



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



Informazioni su questo libro

Si tratta della copia digitale di un libro che per generazioni è stato conservata negli scaffali di una biblioteca prima di essere digitalizzato da Google nell'ambito del progetto volto a rendere disponibili online i libri di tutto il mondo.

Ha sopravvissuto abbastanza per non essere più protetto dai diritti di copyright e diventare di pubblico dominio. Un libro di pubblico dominio è un libro che non è mai stato protetto dal copyright o i cui termini legali di copyright sono scaduti. La classificazione di un libro come di pubblico dominio può variare da paese a paese. I libri di pubblico dominio sono l'anello di congiunzione con il passato, rappresentano un patrimonio storico, culturale e di conoscenza spesso difficile da scoprire.

Commenti, note e altre annotazioni a margine presenti nel volume originale compariranno in questo file, come testimonianza del lungo viaggio percorso dal libro, dall'editore originale alla biblioteca, per giungere fino a te.

Linee guida per l'utilizzo

Google è orgoglioso di essere il partner delle biblioteche per digitalizzare i materiali di pubblico dominio e renderli universalmente disponibili. I libri di pubblico dominio appartengono al pubblico e noi ne siamo solamente i custodi. Tuttavia questo lavoro è oneroso, pertanto, per poter continuare ad offrire questo servizio abbiamo preso alcune iniziative per impedire l'utilizzo illecito da parte di soggetti commerciali, compresa l'imposizione di restrizioni sull'invio di query automatizzate.

Inoltre ti chiediamo di:

- + *Non fare un uso commerciale di questi file* Abbiamo concepito Google Ricerca Libri per l'uso da parte dei singoli utenti privati e ti chiediamo di utilizzare questi file per uso personale e non a fini commerciali.
- + *Non inviare query automatizzate* Non inviare a Google query automatizzate di alcun tipo. Se stai effettuando delle ricerche nel campo della traduzione automatica, del riconoscimento ottico dei caratteri (OCR) o in altri campi dove necessiti di utilizzare grandi quantità di testo, ti invitiamo a contattarci. Incoraggiamo l'uso dei materiali di pubblico dominio per questi scopi e potremmo esserti di aiuto.
- + *Conserva la filigrana* La "filigrana" (watermark) di Google che compare in ciascun file è essenziale per informare gli utenti su questo progetto e aiutarli a trovare materiali aggiuntivi tramite Google Ricerca Libri. Non rimuoverla.
- + *Fanne un uso legale* Indipendentemente dall'utilizzo che ne farai, ricordati che è tua responsabilità accertarti di farne un uso legale. Non dare per scontato che, poiché un libro è di pubblico dominio per gli utenti degli Stati Uniti, sia di pubblico dominio anche per gli utenti di altri paesi. I criteri che stabiliscono se un libro è protetto da copyright variano da Paese a Paese e non possiamo offrire indicazioni se un determinato uso del libro è consentito. Non dare per scontato che poiché un libro compare in Google Ricerca Libri ciò significhi che può essere utilizzato in qualsiasi modo e in qualsiasi Paese del mondo. Le sanzioni per le violazioni del copyright possono essere molto severe.


Informazioni su Google Ricerca Libri

La missione di Google è organizzare le informazioni a livello mondiale e renderle universalmente accessibili e fruibili. Google Ricerca Libri aiuta i lettori a scoprire i libri di tutto il mondo e consente ad autori ed editori di raggiungere un pubblico più ampio. Puoi effettuare una ricerca sul Web nell'intero testo di questo libro da <http://books.google.com>



X.

GG.3.



879.8

R49

1748



OP E R U M^{meo}
BARTHOLOM(ÆI)
R I C C I (I)
LUGIENSIS
TOMUS SECUNDUS,
CONTINENS EPISTOLAS
A D
ATESTIOS PRINCIPES,
AD JO. BAPTISTAM CAMPEGIUM
Balearium Majoris Episcopum,
ET AD FAMILIARES.
*Accedunt Epistola quaedam ineditæ, Argumenta,
Epistolarum, & Rerum Indices.*



PATAVII, Typis Seminarii. MDCCXLVII.
Apud Joannem Manfrè.
Superiorum Permissu, & Privilegio.



10



15000
7-16-27
15096

3

BARTHOLOMÆI RICCHII

A D

HERCULEM ATESTIUM

Ferrariæ Principem

EPISTOLARUM

LIBER PRIMUS.

LUCRETIE, & LEONORÆ

Sororibus Atestiis Principibus

Bartholomæus Riccius S. D.



T si nullus mos est in edendis Epistolis, ut cuiquam separatim volumen integrum inscribi soleat, quippe quæ singulæ singulis, atque adeo multæ multis scribantur; nos tamen hac una Epistola cæteras omnes, quæ in hos duos libros digestæ sunt, vobis, Lucretia, atque Leonora Atestiæ, Regiæque adolescentulæ ea ratione dicavimus, quod vos solæ ex vestra Illustrissima Familia mihi supereratis, quibus nihil adhuc aut Literarum scripsissem, aut Librorum inscripsissem; quando eorum alterum nihil opus fuit; alterum non commode, ut facerem, accidit. Nunc vero ut hæc sese prima occasio obtulit, eam arripui, ut vestrum

A 2

hunc

4
hunc locum in meis scriptis haberetis ; multo
etiam ampliorem , quoties usus ferat , habitu-
ræ. Quare vobis , ut estis , carissimis Sorori-
bus , quod vestris omnibus separatim scripsi ,
id omne inscribere placuit ; ut quod singuli
suum habent , id omne vos duæ simul vestrum
haberetis ; atque hoc modo quasi quintum Fa-
bulæ actum mihi optime clauderetis. Quod non
dubito , cum quod cum vestris , tum nobiscum
etiam ipsis simul una , ut semper & animis ,
& studiis fuistis , hac mea quoque inscriptione
conjunctas esse vos videtis , quin id vobis gra-
tissimum sit futurum. Valete ut facitis , unani-
mes Sorores .





HERCULI ATESTIO

Bartholomæus Riccius S. D.

Instituendi in humanioribus litteris filii Principis, qui ne prima quidem elementa componere norit, ratio facillima arte plenissima, mirumque docendi genus ad aliquod tempus sine libro.

PEtis a me, Hercules Princeps, ut tibi per literas significem, quam ego docendi rationem sequeretur, si mihi Alphonsum Filium tuum in humanioribus studiis instituendum committeres, ut cum instituendi formam perspexeris, qualis futura tota sit institutio mea, facile postea cernas. In quo ego tibi libenter obsequor, cum quoniam rem a me tam facillimam, quam etiam tibi æquissimam petis, tum quia spero, me illam ita tibi esse comprobaturum, ut minime contemnatur. Duo igitur sunt, Princeps, magister, & literæ, quorum utriusque magna ratio in nostris studiis adhibenda est. Nam si forte alterutrius odium puerum ceperit, de ejus studio actum est. In utroque igitur probe cavendo continuo omnem animum, atque diligentiam intenderem; ac quantum ad magistri odium, atque fastidium declinandum, ego læto semper vultu ad puerum accederem, eumque inter docendum pari præstarem ratione, blandum, comem, hilarum in omnibus illi me præberem; nisi res tamen ea incideret, quæ humanitati illi meæ aliquid etiam gravius ascisceret, in qua re tum mihi graviori vultu, verbis etiam cum vultu consentientibus

præsto adessem. Sed in eo totus essem, ut puerum belle inducerem, fallerem, deciperem. Hunc enim fabellis assidue oblectarem honestissimis, ex quibus postea semper aliquid explicarem, quod ad Principis vitæ rationem pertineret. Deinde a te Patre omnibus præmiolis illum facile allicerem, atque in officio continerem, neque etiam ab æmulatione nihil mihi sumerem adjumenti. Alias alia ratione, prout rem ipsam ferre viderem, animum ejus mihi compararem. Certe in verberando aut nullus, aut perparcus essem. Neque enim is Filius est, qui hoc vel a te Parente suo expectet; neque is ego sum, qui vi magis, quam blanditiis literas ingenuos, nedum Filios Regios, doceri existimem; verum flagri loco hac ego arte uter, ut cum puerum meum aut longiori studio, aut animi aberratione aliqua rem aliam agere sentirem, quorum utrumque crebro accidere solet, quoniam vel unus versus puero satietatem affert; vel quavis levissima de re, quæ illi incidat cogitatio, continuo totum eum abalienat, atque a mente aufert, hunc ego tum aut paulisper missum facerem, aut aliquo ridiculo usque eo oblectarem, quoad ejus animum ad pristinum statum reduxissem; tum ego quoque ad rem redirem, brevique partem illam absolverem. Quo uno studio, atque si quo alio est opus, discipulum meum in mei amore prorsus continerem. Quod vero ad hanc eandem ejus benevolentiam in literas conciliandam, & retinendam spectat, mea multiplex esset ratio. Eas enim ego illi continuo omnibus laudibus in Cælum esserem. Reginas esse rerum omnium literas, idque exemplis, atque rationibus, quantum ejus captus esset, comprobarem. Multos præterea commemorarem, qui harum præsidio ad maximas dignitates evecti sunt, idque adderem, has solas illustres viros, atque immortales reddere, & in sempiterna hominum memoria fideliter retinere. Postremo ei demonstrarem, nihil ad Principem tam attinere, tamque illi necesse esse, quam rei literariæ cognitionem. Hujus autem addiscendæ facilitatem, quod omnium mihi maxime causæ meæ conducere videtur, summam illi commonstrarem; quin eas ego illum ita docerem, ut vix sentiret quid ageret. Nam cum res, ut audio, cum eo puero mihi futura esset, qui ne prima quidem elementa componere norit, & ingenii præstan-

stantia longe ætatem superet, ego primum illud tempus, non quemadmodum alii in literarum cognitione, atque conjunctione frustra cum eo contererem, sed huic, in digitis quasi librum, unde prima artis rudimenta, hoc est, quæ ad Nomen, quæque ad Verbum pertinent, facillime ediceret, meo novo describerem instituto; qua una hac mea diligentia hæc quoque sequerentur commoda, ut primum, quod in Principis Filio maxime providendum est, nihil temporaria omitteretur. Nam si mihi expectandum sit, dum literas probe cognoscat, dum eas inter se singulas ad syllabam conjungat, postremo ad vocem formandam componat, annus, atque adeo plus abibit. At omnino hæc etiam addiscenda. Recte quidem; sed lentius id fieri potest; quod etiam leviter interea quotidie attingerem, ac quasi rem aliam agens, id quoque illum docerem. Deinde quod puero hoc modo discenti ludere videretur. Nam si ad librum eum instituerem, ac ei proponerem quæ memoriæ mandanda essent, continuo puer frontem contraheret, stomacharetur, literas odisset, magistrum etiam non amaret; cum ea pleraque ex libro addiceret, si vulgares regulas sequamur, quæ neque quicquam illi usui essent futura, quæque etiam si sciat, malim, ut obliviscatur, quam ut in iis addiscendis opportunissimo tempore abutatur. Hac igitur ratione, inquires, si recte percipio, Filius meus absque libro est docendus. Recte quidem, sed ad aliquod tempus, atque ea, quæ sine libro doceri possint, docendus. Miror novum docendi genus. Nova secum aliquam semper afferunt admirationem, sed cum sunt postea perognita, miram afferunt etiam voluptatem. Sed quid hoc tam mirum, quædam memoriter, hoc est, sine libro doceri Filium tuum? Quasi vero nutrix ipsa dum eum vestit, dum spoliat, *Patris nostri deprecationem*, ac *Virginis salutationem*, cæteraque, quæ Christiani viri scire maxime interest, sine libro, atque ex ore suo non eum doceat, ac quæ is præterea quotidie loquatur, non de omnibus addiscat, nihil ex ullo libro. Sed rediens ad institutum, cum ad orationis rationem ventum esset, primum eum in pura, ac simplici dictione exercerem, ut quo Nomen casu, quo Verbum tempore poni deberet eum docerem, idque satis lente; deinde cum mihi videretur, Terentium, aut aliquid ex Cicerone, quod

cum pueri ingenio conveniret, quasi articulatim exponere inciperem; in quo uno efficiendo, continuo ei quam orationis structuram ante eum docuisssem, eorum exemplo comprobarem. Postea vero pro ejus captu sensim ad dictionis elegantiam, ac copiam venirem, quid simpliciter, quid figurate diceretur, ostenderem. In re vero una, non uno modo dicenda, multum eum versarem. Hoc vero magis præsenti oratione, quam scriptione facerem, nullam certe sumptam partem, quam lectionem isti appellant, omitterem; ex qua non illi decerperem aliquid, aut ad nobiliorem vocis significationem, aut ad locutionis vim elegantiores, idque ut in adversaria sua referret, exemplo monstrarem. Cætera, quæ aut Historiæ essent, aut ad artem pertinerent, commode in locum adducerem; ex his vero ut nobiliora memoriæ mandaret, efficerem. Postremo quicquid ex Latinis ei exposuisssem, id mihi in nostram Linguam ut transferret, probe, ac diligenter curarem. Hoc vero ad Auctorum interpretationem, atque cognitionem; reliquum est, quod ad scribendum pertinet. In hoc ab uno Cicerone, & cæteris paucis bonis nunquam eum abducerem, sed in uno Cicerone in primis occuparem. Id autem cum ejus assidua lectione, tum etiam ad ejus ipsius imitationem creberrima scriptione facile exequeretur. Primum ego ei partem integram Ciceronis a me in nostram Linguam conversam, quam is iterum in Latinam transferret, quotidie proponerem, in quo quasi equus faceret, qui in orbe molam vertit, qui panno ob oculos obvoluto, ac quasi cæcus pedem tamen extra orbem suum non ponit, neque quicquam oberrat. Sic ipse quasi in Ciceronis orbe facti ignarus iter suum continens, quodam modo rectius ingrederetur. Ut vero longius hoc modo processisset, ac jam sine cortice, ut dicitur, natare posset, huic ego tum paulo altiores fundum ostenderem, in quo se liberius exerceret; id autem esset, ut quibusdam Ciceronis Epistolis facilioribus suoapte ingenio responderet, quorum utrumque studium, quam ad Ciceronis dictionem proxime accedendum, vel solum, vel certe plurimum faciat, arbitror neminem non videre. Ut vero in hoc aliquid eum profecisse vidissem, atque jam liberius suo Marte agere posse, huic quatuor verbis argumentum aliquod proponerem, quod mihi in Epistolam explicaret.

ret. Hoc autem in primis ad Ciceronis imitationem ut faceret, probe demonstrarem, de qua re tota mihi opus in manibus est; jamque ad alterum librum perductum, a scribendo familiariter ad amicos tandem ad dicendi genus oratorium illum adducerem, partes quasdam orationis, quidque cuique earum maxime opus esset, continuo illi declararem, pleraque suis locis commodioribus relinquens, ut sensim ad fictas causas eum traducerem. Atque hactenus de dictione. Nec vero pauca de eruditione. In hac etsi in omnibus id mihi servandum esse scirem, id in primis attenderem, ut a personarum ratione ne pilo, quod dicunt, quidem discederem. Honestas, utilitas, ac Principe digna in meo ludo versarentur. Quæ Fabritii, Fabii, Scipiones, Catones, Cæsares; ex Græcis vero Socrates, Epaminondas, Aristides, Themistocles, cæterique optimi cum Principes, tum viri aut prouidenter dixissent, aut fortiter gessissent, præsertim hac, qua tuus est, ætate, omnia illi proponerem ad imitandum, quantoque is in dies intelligentia cresceret, contra ego tanto magis in eum & studio, & diligentia incumberem instituendum. Paucis, Princeps, ut vides, docendi Filii tui rationem meam ab initio tibi perstrinxi, quæ si re ipsa mihi contingeret, ut coram ego eam tibi declarare possem, & magnam meam in docendo diligentiam, & pueri in discendo facilitatem multo planius cernereres. Non enim tibi singulas partes explicavi, ut facerem in re ipsa pertractanda, quæ si tibi probabitur, ea tuo arbitratu in tuo Filio, atque in quibus cæteris tibi magis libebit, fideliter uti poteris. Vale.

Ravennæ VIII. Kal. Maji. MDXXXVIII.

HERCULI ATESTIO

Bartholomæus Riccius S. D.

Se delectum ab Hercule Atestio Ferrariæ Principe ad Alphonsum Filium in humanioribus studiis informandum significat, suumque Ferrariam primo quoque tempore adventum pollicetur.

2. **P**Er tuas literas, quas strenue tabellarius tuus mihi reddidit, cum certior fio, te me delegisse, qui
Al-

Alphonsum Filium tuum in hisce humanioribus studiis instituerem, tum ut primo quoque tempore istuc advolare, valde cupere. Quod de me ipse decrevist, Christus Opt. Max. Filiolo tuo, mihique felix, faustumque esse velit. Quod ad meum istuc adventum attinet, ut a tabellarii tui celerrimo reditu me istuc habeas, curabo diligenter. Vale.

Ravennæ IV. Non. Majas MDXLIX.

HERCULI ATESTIO

Bartholomæus Riccius S. D.

Namine Lugienſis Patriæ ſæ in exigua frugum omnium meſſe Herculi Ateſtio validis, iſdemque elegantibus precibus ſupplicat, ut eam a magna vi frumenti imperata liberet, vel ſaltem levet.

3. **C**Um nulla hoc anno, aut admodum exigua frugum omnium meſſis ſit, ac omnes Civitates quoquo modo id melius poſſint, annonæ ſuæ proſpiciant, mea, Princeps Ampliſſime, hoc eſt, Lugienſis tua, alia ratione nulla ſuæ conſulere poteſt, quam ut provideat, ne quod puſillum ex agro ſuo legit, alio exportetur omnino. Sed quoniam huic magna vis frumenti in tuam, atque in quorundam aliorum cellam imperata eſt, hæc ſe ut ea ſumma leves ſaltem, ſi minus liberaſ, te etiam, atque etiam ſupplicatum accedit. Quin me quoque miſera adivit, fortæſſe rata ex eo loco, cui tu me præeſſe voluiſti, meas preces apud te aliquid omnino valituras, per locum eum obſecrans, ut ſibi apud te adeſſe velim. Patria eſt, Princeps, famæ agitur, res maxime æqua, neque tibi unde partem illam ſuppetas, qui multis locis abundas, pecunia vero nihilominus indigeas, quicquam deeſſe poteſt. Te igitur rogo, oro, atque obſecro, ut quod a me mei petunt, id ego a te unus ex tuis illis poſſim concedere. Si Patria vel ſaluti propriæ anteponenda eſt, recte mihi nunc accidit, ut quod primum a tua Amplitudine contenderim, id Patriæ meæ contenderim, ſed multo rectius, ſi impetro. Nam & meos ipſe Cives in fame juvero, & ipſi ea opinione, quam de nobis habent, animo conceptam, ſe non fruſtra eam concepſſe, magnam

gnam voluptatem percipient, cum hac quoque causa mea tamen nihilo eorum inferior futura sit lætitia. Vale.

HERCULI ATESTIO

Bartholomæus Riccius S. D.

Rationem reddit, cur Familiam Principum Atestiorum ita appellandam censeat, nominaque a cæteris Scriptoribus usurpata Atestinorum, vel Estensium prorsus rejiciat. E-ruditissimam autem Disputationem instituit lectu, & animadversione dignissimam, a multis agitatam (quo vero successu, non ausum dicere) de triplici nominis ratione, nimirum prænominis, nomine, cognomine, sive cognomento, quo Romani a postremis Regibus ad primos Imperatores continuato ordine vocari consueverunt.

4. **Q**Uæris a me, Hercules Princeps, idque jampridem, quidnam id sit, quod ego in Familiæ tuæ nomine cum cæteris Scriptoribus non consentiam; qui, quam alii Atestinam, plerique etiam Estensem inscribunt, solus eam mihi denominem Atestiam? Contra vero isti, a quibus in ea ipsa inscriptione dissentio, quotidie conqueruntur, qui me antiquissimæ inscriptionis correctorem, ac quasi censores novum accusant. Quare ut tibi abunde satisfaciam, & istis respondeam cumulatifime, paulo altius res est repetenda. Scito igitur, Princeps, Romanos a postremis Regibus ad primos Imperatores continuato ordine hac triplici nominis ratione, prænominis, nomine, cognomine, sive tu mavis cognomento dicere, vocari solitos esse; de quibus singulis multa hoc loco nobis perstringenda sunt, quæ & ad rem nostram, & ad alias etiam Familiæ appellationes maxime pertinere arbitramur. Prænomen igitur, id quod vox ipsa facile indicat, nomini præponebatur, ut C. M. T. P. Cn. Sex. cum Julio, Cicerone, Pomponio, Cornelio, Pompejo, Roscio. Pauciora erant omnino prænomena, si ea cum Familiarum numero conferantur. Hæc enim erant, Appius, Aulus, Cajus, Gneus, Decimus, Lucius, Marcus, Publius, Quintus, Servius, Sextus, Spurius, Titus, Tiberius & pauciora quædam alia. Familias autem quis numerabit? Sed nec id tam mirum videri

deri debet, cum hæc omnibus Familiis communia acciderent. Nam, quæ Lucio prænomine uterentur, Familiæ, supra sexaginta numerabantur. Nam qui cum diluculo nascerentur, prænomen Lucium secum ab ortu afferebant. Prænomine vero tantum Romani usi esse videntur. Quare etiam Horatius dicit Sermon. lib. 2. Sat. 5.

*Quinte puta, aut Publi, (gaudent prænomine molles
Auriculæ) tibi me virtus tua fecit amicum.*

Quo in loco jubet Horatius, ut assentator civem Romanum non gentis nomine, sed prænomine appellaret, quasi quo magis delectaretur, contra quam hoc tempore fieri videmus. Malumus enim omnes gentis nomine appellari, ut Gypsius, Cavalcantius, Gyraldius, Manutius, Rufcellius, Areostius, Abiosius, Riccius, quam Lanfrancus, Gregorius, Paulus, Hieronymus, Ludovicus, Augustinus, Camillus. At in cognomine multo illustrior laus sentitur. Quis enim neget in Cn. Pompejo Magno, *Magno* vocem Pompejo magis arrisisse, atque adeo maiorem quasi voluptatis titillationem movisse, quam & Cn. & Pompejum? Ita in Africano, Numidico, Asiatico, & in cæteris ejus generis? Recte quidem, sed omnes non sunt Magni, Africani, Numidici, Asiatici. Quare Horatius magis dixit prænomine, quam cognomine Romanum gaudere; nisi Lucium Calpurnium Bestiam voce Bestia, quam Lucio prænomine, & Calpurnio nomine: item Cajum Fannium Strabonem Strabone voce, quam Caji prænomine, & nomine Fannio: item Cn. Cornelium Asinam, voce Asina magis, quam Cneo & Cornelio gavisum esse dicendum sit. Sed redeo ad prænomen. Hujus autem inscriptio erat aut singulis literis, ut C. L. T. P. aut duabus, ut Cn. aut tribus, ut Sex. Certe hoc nunquam omnibus literis explicatum legitur. Illud vero addo ad Tiberii & Titi differentiam. Titum unica litera scribi solitum sic, T. duabus autem Tiberium sic, Ti. quod imperitos multos induxit in errorem, ut pro Tiberio Claudio, & Tiberio Sempronio corrupte legerent Tito. Hoc præterea tantum simplex nomini suo præponebatur. Quis enim diceret T. P. Cornelium Scipionem? aut P. L. Cornelium Syllam? & reliqua ejus generis? Nam ubi legitur apud Livium C. Publius & C. Appius, in Publico & Appio mendum esse arbitror, ac pro Publico, Publicio vel Publilio, pro Appio, Appustio, vel Ampio for-

fortasse corrigendum esse non negarem. Certe ex Cicerone ad Atticum, ubi legitur C. Appius, alterum prænomen est tollendum. Hoc autem prænominē & pater, & primus filius communiter appellabantur; reliquis autem filiis aliud prænomen præponebatur; ut in tribus Antoniis fratribus factum videmus. Nam M. Antonius, quia natu maximus erat, a patre Marcus est dictus, cæteri, alter Lucius, Cajus alter sunt prænominati. Quod vero Q. Metellus Celer, & Q. Metellus Nepos fratres eodem prænominē sint dicti, non germani fratres fuerunt, sed patruels, quos etiam fratres appellabant. Verum cum adhuc vivente patre ambigi posset, utrum de patre, an de filio in communi appellatione ageretur, eam quasi notam apponebant, ut aut patris, aut filii vocem adderent, ut in M. Tullio patre, & in M. Tullio filio plane factum videtur. Quin etiam si quis ex filio, adhuc avo superstite, natus esset, is eo quoque prænominē inscribatur. Ad eorum item differentiam *nepotis* voce addita, hoc modo; *M. Tullius Cicero nepos*. Jam vero cum virorum tantum prænomen esse videatur, quædam tamen mulieres hac quoque appellatione sunt dignatæ, ut C. Cæcilia, & C. Tarraria, in quo tamen scribendo, ut mulieres a viris distinguerentur, cum prænomen mulierem significabat, C. hoc modo inversum. Q. scribebatur; ita & in cæteris. Sane vero hæc duo Cajus, & Cneus tametsi utrumque per C. primam literam scriberetur, mitius tamen per G. literam pronuntiabatur, hoc modo, Gajus, Gneus. Nam quod quidam rati sint, prænomen etiam a nomine fieri eo tempore, quo nos dicimus hanc appellandorum hominum rationem recte servatam esse, mea quidem falluntur sententia. Ac quod ad Svetonii locum, qui ita in Claudio ait: *Claudius est natus Julio Antonio, & Fabio Coss.* ubi *Julius* est nunc prænomen, alias autem Cæsaris gentis nomen dictum est, jam tum morem hunc nominandorum hominum labi cœpisse. Certe in Sergio, quod modo prænomen, modo etiam nomen legitur, mendum esse affirmare non dubitarem, & tantum esse gentile Sergium dicerem. Erroris autem causa quæ fuerit neque obscura est. Nam cum Servius prænomen scribatur hoc modo tribus tantum literis Ser. errore intermedium additum est g, & ita factum est Serg. Itaque in locum Servii irrepsit hominum incuria Sergius; ut ego ubique

bique Ser. prænomen nusquam Serg. legendum esse existimem. In Decimo vero Bruto cum Decimus ita scribatur Dec. imperiti item in ea voce explicanda Decium fecerunt, quam docti contra Decimum pronuntiant. Qui vero in alienas Familias adoptati essent, etsi pari ratione in prænominis, nominis, & cognominis hæreditatem venisse videbantur, sua tamen interdum etiam retinebant prænomena, nomina, & cognomina, ut in T. Pomponio Attico, qui quamvis ab avunculo Q. Cæcilio adoptatus esset, a Cicerone tamen semel Q. Cæcilius est inscriptus, alias autem semper T. Pomponius Atticus est dictus. In Scipione autem Africano posteriore non ita; qui cum a P. Scipione majoris Africani filio adoptaretur, eodem prænomine, & nomine, & cognomine semper est postea appellatus, quibus is, a quo adoptatus fuerat, P. Cornelius Scipio appellabatur. Ad nostram autem præsentis temporis nominandi rationem, si quid hoc quoque ad rem facit, ego ea prænominis loco ponenda nomina esse dicerem, quæ nostri sua lingua propria appellant nomina, ut Hercules, Ferantus, quæ cum suis Familiis sic se habent, ut C. L. & reliqua prænomena sese cum suis habebant. Atque ita facerem Herculem Atestium, Ferantum Gonzaghium. Atque hoc quidem ad prænomen. Sequitur, ut de nomine videamus. Sed nunc mihi tecum liceat ordinem commutare, atque ad tertiam propositi nostri partem transgredi, ut ultimo in loco postea de nomine commodius agatur, quod tamen antequam aggrediar, locus postulare videtur, ut quædam explicem, quæ ab hoc nostro instituto minime sunt aliena. Nam cum non defuerint, qui Familiæ nomen id esse vellent, quod nos tertio in loco posuimus cognomen, [tamen si nunc id ipsum in secundo peragimus,] isti prius jure optimo consultandi sunt. Id quod planissime effecero, cum Ciceronis & bonorum cæterorum [nam eorum rationibus respondere, atque adeo proferre maxime pudet] certissimis exemplis comprobare. Cicero igitur, cum de Senectute agit, sic ait: *Cato quasi cognomen jam habebat in senectute Sapientis.* Quæro ego de istis, ubi nunc sit cognomen hoc, an in gentis nomine, quod nullum est ascriptum? an in Sapiente? Certe est in posteriore. Itaque cognomen nihil ad Familiam. Item secundo libro de Officiis ait: P.

Craf-

Crassus cum cognomine dives, tum copius. Quæro item, utrum Licinia familia Crasso divitis nomen dederit, an ejus copiaz? certe copiaz. Item libro tertio, atque, inquit, hic T. Manlius is est, qui ad Anienem Galli, quem ab eo provocatus occiderat, torque detracto, cognomen sibi invenit. Cognomen hoc quod fuit? Manlium, an Torquatum? certe Torquatum e torque factum est, non autem Manlium. Ciceronem is sequitur, qui ad Herennium scribit. Ita enim ait. Cognomen, quod pro certo nomine collocamus. Si cognomen pro certe nomine ponitur, certe Cæsarem, Atticum, Scipionem, Ciceronem, pro Julio, Pomponio, Cornelio, Tullio magis poni videmus, quam contra. Hic item, cum agit de prænominatione ait; qui sicuti cognomine quodam extraneo demonstrat id, quod suo appellari non potest; ut si quis de Gracchis loquatur, dicat; ut non Africani nepotes; ubi vides, quia Africani erat dicturus, cognomine dixisse, non autem nomine. His Maro quoque assentitur, cum dicit, nostrumque in nomen iturus; hoc est, in gentem nostram. Est enim cum Anchises Æneæ filio ostendit in Elysiiis campis, qui ex sua Familia illustres essent futuri. Postremo si prænomen inde dictum est, quod nomini antecedit, in M. Tullio Cicerone certe prænomen est M. Sin vero hoc nomen antecedit, Tullius sequitur; ergo Tullius necessario nomen, non autem Cicero, quod postremum est, ut ratione etiam isti de sua sententia ista prorsus deiciantur. Sed jam ridiculos istos missos faciamus, atque cognomen ipsum agamus. Continuo igitur, quoniam cognominandi prope innumerabiles causas veteres habuerunt, ea quoque ratione factum est, ut plura eorum legantur cognomina. Hæc ad sua certa capita ut reducantur, non est, quod expectes. Nam si dicam, aut ab animo, aut a corpore, aut a fortuna ea trahi solere, multo plura tamen relinquentur, quæ sub hæc genera non veniunt, ut Fidenas, Merenda, Lanatus, Augurinus, Priscus, & multa alia, quæ nos in librum unum ad Camillum filium ad ingentem numerum collegimus. Hoc tantum dicam, videri interdum cognomen fieri ex nominibus alienis, ut in L. Porcio Licinio, item in M. Fabio Licinio, in quorum utroque Licinio cognomen est, quod alias nomen est Liciniaz familie, ex qua L. Licinius Crassus, & C. Licinius

nus Stolo. Item apud Asconium. *Q. Pacuvii fratres cognomine Claudii*; ubi *Claudii* cognomen est Pacuviz Familiz, alias Familiz nomen nobilissimæ. Hujus autem natura est, ut nomen sequatur, ut in M. Tullio Cicerone, & C. Julio Cæsare, & eadem ratione in cæteris. In quibusdam tamen usus obtinuisse videtur, ut cognomen etiam nomini præponatur, ut in Paulo Emilio, in Crispo Sallustio, quorum tamen utriusque recta scribendi hæc fuit ratio, L. Æmilius Paulus, C. Sallustius Crispus. Quemadmodum autem prænomen unum multis Familiis æque præponebatur, sic interdum cognomen unum multis gentibus deserviebat, ut Barba-tus, quod tam Quintiz, quam etiam Horatiz cognomen fuit Familiz. Item Capitolinus, quo uno & Quintia, & Tarpeja, & Manlia usa est cognomine. Quin-duos etiam germanos fratres eodem cognomine de altero tantum dicto nominatos esse comperio. Ii sunt M. Tullius Cicero, & Q. Tullius Cicero. Immo vero Cicero & suum, & Q. fratris filium Cicerones appellat. Cum vero uno cognomine plerique contenti essent, non defuere tamen, qui pluribus cognominibus honestari voluerunt; ut M. Æmilius Lepidus Porcina; & P. Cornelius Lentulus Cethegus; & Q. Cæcilius Metellus Celer; & C. Posthumus Ebutius Helia Cornicen. Nam quod isti agnomen vocant, idem esse cum cognomine, Ciceronis testimonio facile comprobatur; qui hoc ipsum modo cognomen, modo cognomentum, nunquam autem agnomen appellat. Utrum autem omnia cognomina æque ad posteros pervenirent, in multis equidem arbitrator factum esse. Nam Marcelli usque ad ultimum Reipublicæ tempus fuerunt. In quibusdam etiam contra factum esse non negarim. Nam etsi in M. Tullio Cicerone tam filio, quam patri datum sit Cicero cognomen, non ita tamen in Africani filio. Non enim hic Africanus est dictus, sed tantum Africani filius. Verum qui in aliam Familiam per adoptionem venissent, si qui adoptassent, nullum cognomen habuissent, suum ipsi retinebant, ut in T. Pomponio Attico, qui a Q. Cæcilio adoptatus Atticus semper cognominatus est, quia Cæcilii nusquam cognomen legitur, hoc modo, *Qu. Cæcilius, Q. F. Pomponius Atticus*. Qui vero non habuissent, adoptatoris occupabant, ut Octavius, qui a Cæsare

fare adoptatus, postea est dictus Cæsar Octavianus. Nusquam enim Octavio-
rum cognomen reperio. Id unum mirum videri potest, quod Florus pro prænomine cognomen dixit, cum ait; *ne cui de Manlia gente Marco cognomen esset*, ubi vides Marco, quod semper prænomen est, pro cognomine a Lucio usurpari. Quam rem tamen eandem Livius magis proprie dixit. Sic enim ait; *quod gentis Manliæ decreto cautum est, ne quis deinde Marcus Manlius vocaretur*. Hactenus de cognomine. Restat, ut de nomine, cujus causa causam hanc suscepimus, pluribus agatur. Hoc autem cum res omnes notentur, de eo nos nunc tantum agimus, quo Familiæ indicantur. Continuo igitur hoc scito, Princeps, nomen, quod vere nomen est apud Latinos, vocem suam in *ius* terminare, ut Sempronius, Fabius, Posthumus, Valerius, Sulpitius, Furius, Porcius, Junius, Cornelius, Pomponius, Manlius; quædam tamen in *ejus* terminantur, ut Pompejus, Coccejus, Vulteius, Lucejus, Annejus, Sejus, Hejus, & reliqua nonnulla; nisi in his quoque *i* vocalem potius, quam consonantem facimus, ut omnia in *ius* terminent. Solum autem nomen primo [ut ita dicam] genitæ sequebantur. Nam ut primogeniti tantum in patris prænominis possessionem veniebant, sic primogenitæ generis nomen jure optimo possidebant. Hinc Pomponia, Clodia, Tullia, Cornelia, Sempronina, Julia de Familiis suis sunt appellatæ; reliquis vero filiabus aliis alia nomina addebantur, ut, tertia, quarta, quinta; ut, Quinta Claudia. Unde quidam putant Quintam prænomen ei fuisse, contra quam vetus consuetudo fert. Scribendi autem nominis ratio ea est, ut omnibus suis literis scribatur, hoc modo; *Tullius, Julius, Cornelius*; quemadmodum & cognomen, contra quam in prænomine fieri paulo ante docebamus; quod nunquam integre perscribitur. Nomen etiam interdum non apponebatur, sed prænomine, & cognomine tantum vir significabatur, ut in P. Sylla, P. Lentulo, L. Catilina, M. Catone, & multis aliis. Qui vero Civitate donabatur, cujus beneficio in Civitatem venisset, ejus nomine etiam donabatur; ut Demetrius Mega Siculus, qui in Civitatem receptus P. Cornelius est dictus. Eodem modo qui in alienas Familias per adoptionem veniebant, eorum etiam a quibus adoptarentur,

nomen ferebant, ut in P. Cornelio Scipione posteriore, & in Julio Cæsare Augusto videtur; quorum alter ex *Æmilia* in Corneliā, alter ex *Octavia* in Juliā adoptatus est Familiā. Hic enim Julius; ille verò Cornelius est semper dictus. Etsi scio, superiorem invidios magis *Octavium*, quam *Julium* appellitasse; cum hi tamen Gentis quoque suæ nomen non prorsus amitterent. Aliud enim ex ea sibi efficiebant in *anus* terminatum, ut in hisce duobus principibus Viris, P. Cornelio Scipione *Æmiliano*, & Julio Cæsare *Octaviano* cernitur; quorum alter ex *Æmilia* *Æmilianum*; alter ex *Octavia* *Octavianum* sibi consecerunt. Servi item libertate donati nomen Heri sui una cum libertate assequebantur; ut T. Ampius Menander, qui libertus fuit T. Ampii Balbi; ita Eutychides, qui T. Servilio servivit, qui manumissus T. Cæcilius Eutychides est dictus. Observo item a nominibus magis Leges denominari, quam a cognomine, ut dicatur Lex Julia, Cornelia, Calphurnia, Portia, & sic in cæteris; non autem Cæsaria, Scipionia, Pisonia, Catonia. Sed redeo ad te tandem, Hercules Princeps, atque ad tuum nomen. Hoc autem isti, sive Estense, sive Atestinum esse velint, ab Ateste oppido utrunque esse non negant. Sed quod ad Estense attinet, jam vox ea pro barbara explosa est. Restat, ut videamus, utrum Atestinum [quod quidem Latinum est] cum Familia tua convenire possit; quod nullis rationibus fieri posse video. Primum enim, quod vox Atestina, quæ pro Gentis tuæ nomine ponitur, Familiarium nominum terminationem in *ium* certissimam non servat. Deinde, quod cum idem Atestinus sit, quod & Patavinus, ne longe a loco discedamus, & Vicentinus, & Tarvisinus, omnia hæc nomina Civem ex aliqua earum Urbe, aut aliquid, quod ad Urbem pertineat, prorsus significant, ut T. Livius Patavinus, ut Historia Patavina, & cætera his similia. Ac ne a simili voce aberremus, fac idem a Præneste Prænestinum; quid id aliud erit, quam aut Civis ex Præneste oppido, aut quod ad Præneste attineat? Si igitur ita est, ut huiusmodi vocum derivatio proprie Patriam significet, aut aliquid ad Patriam pertineñs, nunquam autem Gentem, aut Familiam, qui isti dicent, Atestinum Familiam tuam indicantes? Equidem Latine lingue tam

indem arbitror esse neminem, qui idem & Patrium nomen, & Gentile cuiquam videri posse ineptius contendat. Ut continuo videas, quæ Illustrissimæ Familiæ tuæ ab istis offusæ sint tenebræ; qui clarissimum ejus nomen cum infima etiam plebecula communicare non dubitarint. Nam si Atestinus est ex oppido Ateste, quemadmodum revera est, quid Leonelli tui, Borsii, Hercules, Alphonsi vel a refarcitore Atestino differant, si omnes eodem appellantur nomine? Hercle, Hercules, tam is erit Atestinus ex Ateste oppido, qui naviculariam exercet, quam tu secundus Hercules Ferrariensium Princeps. Franciscus Frater tibi est. Is hoc bello adversus Germanos rebelles sub Cæsare meret. Fac, Princeps, ut sit alter Franciscus ex Ateste oppido, vir non ignobilis, quique sub eodem Cæsare hoc ipso bello mereat; horum uterque res Historiæ dignas fac æque ut gerat; quæro ego, cum Historiæ Scriptor ad Fratrem tuum pervenerit, qui eum ab illo discernet, si uterque iisdem nominibus & Francisco, & Atestino appelletur? Siquidem ea ratione hominibus nomina, ut cæteras res omittam, imponuntur, ut quicque suo certo vocabulo a cæteris dignoscatur. Hic expecto, ut isti mihi dicant qua ratione Scriptor hos discreverit, si æque uterque & Franciscus, & Atestinus nominetur? Ut hac quoque ratione manifeste videas, aut alios in tuam Familiam indigne irrepere, aut te a Familiæ tuæ clarissimo nomine in oppidanorum nomen transire. Atque hoc de viris est. Quali vero non scemellæ quoque nomen hoc pari sequantur ratione. Nam si quæras de quavis ejus oppidi muliercula, quæ etiam & lana, & colo victum quæritet, cujus ea sit, continuo se Atestinam esse respondebit. Et si Anna Filia tua Regia scemina, pari ratione interrogetur, qua ex Gente sit, eodem nomine respondebit; certe neque ex dignitate, neque ex vero id fiet. At isti, inquit, Gentis dignitas nominis communitate non corrumpitur. Neque enim propterea quod Clodii tres sorores turpissime vixerint, quicquam de Appii Cæci dignitate detractum est; ut hoc nihil sit, quod interdum etiam multum esse solet, [neque enim unquam Catilinam Familiæ suæ ornameto, neque contra Lucretiam turpitudini fuisse convincant] quid ad vocis rationem? Num etiam obstinate pergent tenere, idem & Patriæ, & Gentis nomen esse posse?

posse? Num tandem efficere conabuntur, ut Ferrarienses, Pisaurienses, Pisani, Vincentini, Tarvisini, nomina a suis Urbibus facta, suis etiam Civibus communia, sint idem cum earum Familiarum nominibus, quæ inde quodammodo nomen Gentis suæ mutuata esse videantur? Falluntur, si ista sunt sententia; multoque eorum & verior, & sanior est, qui hosce Ferrarios, Pisaurios, Pisanos, Vincentios, Tarvisios suo nomine appellant. Ad quarum Familiarum rationem nos quoque tuam Atestiam fecimus; Atestinam autem istorum, hoc est, alienissimam contempsimus. Esto, isti, inquit; quid vero, siquis in istis tuis Familiis de Gentis suæ nomine appellatus sit? ut Vincentius ex Vincentia, ut etiam ex tua Riccia Riccius? quid tum agendum? num fortasse vox illa erit geminanda? ut una quasi prænomen, altera nomen significet? Respondeo, ad Latinam rationem, quam nos sequimur omnino, id nunquam esse factum. Nemo enim ex Terentiis Terentius, ex Juliis Julius, ex Antoniis Antonius est unquam nominatus. Sed quando nostris mos est, ut multi a Gentis nomine mares, quod apud veteres tantum foeminarum esse dictum est, denominentur, cum eos Latine tractabimus, ea ratione fortasse tractabimus, ut prænomen nobis leniter adaptemus ad nominis differentiam; ut prior Vincentius, atque Riccius, fiant Vincenzus, & Rizzus; atque ita dicamus Vincenzum Vincentium; Rizzum Riccium; quod in multis etiam suapte natura sequetur, ut Delphinus Delphinus, Contarenius Contarenius, Guidotus Guidotius, Manzolus Manzolius, Guarinus Guarinius. Quod si minus Latinum videbitur, habeo etiam qui melius id dicam, si, parenti prænomen addito, ea differentia explicetur, hoc modo, Riccius Nicolai Riccii filius; ita Vincentius Andreæ Vincentii filius; nisi isti hoc quoque loco clament, me ex uno nomine multa efficere nomina; qui si me doceant qua ratione rationem hanc barbaram ad Latinam melius redigere possim, non solum id de illis discam libenter, sed ea ratione plurimum illi etiam debebo. At doctissimi Viri in suis Familiis inscribendis secus ubique & sentiunt, & factitant, ut Alexander ab Alexandro, & tuus Lanfrancus a Gypso. At Alexander ab Alexandro sane doctissimus Scriptor fuerit, certe in Familiæ suæ.

suæ inscriptione prudentior fuisset, si se magis Alexandrium, quam ab Alexandro appellandum esse vidisset. Quod vero ad Lanfrancum attinet, miror, qui in suis scriptis, quæ modo doctissima in vulgum edidit, non isto vestro modo a Gypso, sed meo potius Gypsius legatur. Quid vero Guarini, Trocti, Areosti, Musti, Sacrati, Tassoni, & innumerabiles ubique gentium voces aliæ ad istam rationem tuam minimæ factæ? Non recte Latine factæ, quas si quis restituere studeat, eas Guarinias, Troctias, Areostias, Mustias, Sacratias, Tassonias, item in cæteris aliis faciendum curabit. Ergo Pontanus, Bembus, Sadoletus, Corradus, Barbarus in suis Familiis scribendis barbari? Certe in ea voce non tam Latini fuerunt, quam Sannazarius, Longolius, Navagerius, Danesius, Alcyonius, Ruscellius, Fracastorius, Manutius, Ramnufius, Majoragius, Bocchius, Bonfadius, Nizolius, Perionius, Palearius. Ac ne te diutius teneam, Princeps, atque adeo in tuis una, ut ajunt, plaga rem totam absolvam, paucis audi. Si Hippolytus Frater tuus Cardinalis Atestinus inscribatur, quid hæc inscriptio aliud significabit, quam eum Atestis oppidi primum esse Antistitem, quem Episcopum vocant? sicuti etiam Pisanum Patavinum, & meum Cornelium Tarvisinum designatum dicimus. Certe Frater tuus multorum, eorumque nobilissimorum Sacerdotiorum nominibus appellatur. Est enim Mediolanensis, Lugdunensis, Heduenensis primarius Antistes. Si item Ateste oppidum accedat, quo nomine alio, quam Atestino appellandus sit, ut me isti doceant, exspecto. Atqui Atestinus appellabitur, & recte quidem. Quid vero si quemadmodum sit, Familiae nomen addere velit? qui id efficiet? Num fortasse bis Atestinum ponet? hoc modo; Hippolytus Atestinus, Atestinus Episcopus [non enim hic isti se corrigere possunt, quemadmodum ipsi paulo ante feceramus in voce altera paulum commutanda, aut etiam Patris nomine superaddito; vox enim ea semper erit utrobique Atestina] quid inquam tum efficient? Num ita dicent, Hippolytus Atestinus, Atestinus Episcopus? Huius, dicendi genus maxime ineptum. Sed multa ipsi ad hunc modum faciamus licet. Sit Franciscus ex Familia Pisania Pisanus Episcopus. Sit Camillus ex Vincentia Vincentinus, Cæsar ex Pisauria Pisaur-

rienſis, Antonius ex Tarviſia Tarviſinus, Hieronymus ex Ferraria Ferrarienſis. Si hos ita appellabimus, quemadmodum vos vultis, Franciſcum Piſanum, Piſanum Epiſcopum; Camillum Vincentinum, Vincentinum Epiſcopum; Cæſarem Piſaurienſem, Piſaurienſem Epiſcopum; Antonium Tarviſinum, Tarviſinum Epiſcopum; poſtremo Hieronymum Ferrarienſem, Ferrarienſem Epiſcopum, qui magis non ſolum vocatione nulla proprietate, ſed quodam etiam earum ſubagreſti dicendi genere inſanire poterimus? At, ſi veram Familiarum vocem ſequemur, omnia ſient propria, ac mitiora. Ea autem erit Piſania, Vincentia, Piſauria, Tarviſia, Ferraria, tua vero Ateſtia. Itaque illi ſcribentur rectius, Franciſcus Piſanius, Piſanus Epiſcopus; Camillus Vincentius, Vincentinus; Cæſar Piſaurius, Piſaurienſis; Antonius Tarviſius, Tarviſinus; poſtremo Hieronymus Ferrarius, Ferrarienſis; ita & Hippolytus Ateſtius, Ateſtinus Epiſcopus ſcribetur. Quibus rationibus credo ego, te, Hercules Princeps, jam facile videre, quo Familia tua nomine ſit vere inſcribenda, quæ omnino aliud eſt, quam Civis ex Ateſte oppido, aut quid ad Ateſte oppidum pertinens. Iſtos vero cum barbarorum uſu, tum veterum Scriptorum ignoratione ſe in manifeſtum errorem eſſe delapſos, prorfus ſentire pari arbitror ratione. Qui mecum poſthac rectius facturi ſunt, ſi cum aut de te, aut de tuis Latine & loquantur, & ſcribant, hoc modo magis Familiam tuam Ateſtiam, quam veteri Ateſtinam, aut etiam ſi Diis placet, Eſtenſem appellitent. Vale.

HERCULI ATESTIO

Bartholomæus Riccius S. D.

Postquam de cura ſua in inſtituendo viva voce Filio mentionem fecit, opus de Imitatione a ſe compoſitum Patri, & Filio exhibet, antequam in aliorum manus perveniat.

5. **E**N, Hercules Princeps, hic quoque mei in Alphonſum Filium tuum amoris veſtigia non levi-ter impreſſa. Nam cum ſex hoſce annos ei viva, quod dicunt, voce in noſtris humanioribus ſtudiis nunquam de-

defuisset, hac quoque docendi ratione illi deesse nolui. Utinam, Hercules, tantum tibi a rebus publicis otii daretur, ut nostrum hoc opus de Imitatione posses percurrere, haud id fortasse & tua lectione, & filio tuo munus indignum judicares. Certe mea in eum studia, fidem autem in te inde quoque spero, maxime comprobare. Hoc volumen post carissimum Filium tuum tibi quoque Parenti optimo mittere placuit. Non enim par mihi visum est, cum opus omnino ad te perventurum scirem, id potius, ut a quovis alio, quam a me ipso in manus tuas venire permitterem. Vale.

HERCULI ATESTIO

Bartholomæus Riccius S. D.

Amici Ferrinii mortem Oratione, quæ publice haberi non potuit, persecutus eamdem communibus amicis de scripto recitatam publica descriptione ad eum, & alios mittit, ut amici sui liberos ab omni re imparatissimos singulis commendet.

6. **F**Eci, Hercules Princeps, in Ferrinii tui funere Orationem, quæ quoniam haberi non potuit, a me privatim, ne cum eo tota interiret, multis communibus amicis de scripto recitata est. Qui omnes, quæ in eum summa erat illorum benevolentia, cum me roga-
rent, ut sibi ejus copiam facerem, neque ego quicquam facilius facerem, quam ut in re honestissima amicis obsequerem, nihil autem difficilius, quam cum aliquid describerem, hoc modo, hoc est, publica descriptione, & meum officium erga amicos secutus sum, & me ab describendi molestia prorsus liberavi. Quoniam vero cum ea te præsentem habita esse videtur, tum etiam quoniam is eum locum apud te tenuit, qui haud postremus habebitur, eam tibi in primis legendam misi. Lege igitur, Princeps amplissime, ac Ferrinii tui memoriam, quod tua sponte facis, hac etiam Oratione aliqua ex parte cum illi, tum ejus etiam liberis, quos ab omni re imparatissimos reliquit, præsta. Vale.

HERCULI ATESTIO

Bartholomæus Riccius S. D.

Filiolo infanti unico a se sene in rei perexigua tenuitate providendum ostendit, ac propterea orat, ut possessionem Fisco obstrictam venalem a veteri Domino ad se novum Dominum transferri permittat.

7. **N**On me, Hercules Princeps, ulla senectutis avidior cupiditas, cui ego valde semper sum adversatus, non naturæ meæ minus explebilis ratio, quæ vel multo eo tenuiore, quam quod a te in singulos annos adhibetur, contenta esse posset, non Familiæ magnitudo, non ejus intolerabiles sumptus, quæ mihi perpessilla est, & ad omnem frugalitatem modice temperata, sed unici infantis filioli sollicitudo, atque cura ad hoc, quod facio, impellit, cogit, adigit. Est enim mihi filius, in qua voce quantum insit pietatis, nihil attinet dicere, parenti præsertim optimo, atque filiorum amantissimo. Sed hoc mihi accidit, qui mihi seniori parenti, atque in rei perexigua tenuitate constituto infans est filiolus, cui ad vitæ totius viaticum, siquid interea mihi humanitus accadat, magnopere providendum est. Sed cum hujus duæ sint in primis viæ, una, quæ in rei uberioris copia, altera, quæ in rerum nobiliorum certa cognitione versatur; quanto mihi de nobiliore, multoque certiore per ejus infantiam illi minus consulere licet, tanto ejus ætas, in inferiore majorem ut curam pōnam, postulat. Itaque ea cura dies noctesque me angit, atque sollicitat, studeoque, ut ad boni parentis nomen hoc etiam accedat, ne ipse prorsus inops, atque cum parentis studiis eorum quoque acquirendorum facultas omnis concidisse videatur, ad quæ si unquam perveniat, non magis meo, quam Principi filio tuo, cui eum ab ejus ortu addixi, & honori, & utilitati futurum confido. Sed in tua benignitate positum est, Princeps optime, ut nunc perpessillæ rei patriæ adaugendæ facultatem habeam non mediocrem. Ea autem est ejusmodi. Paulus Antonius Patarejus, Civis meus, possessionem habet in agro Lugienſi ex tertia parte, si veneat, Fisco ob-

stri-

strictam. Is nunc sui commodi causa eam venalem habet; quam venditionem si mihi benignitas tua ex tertia illa Fisci parte leviores efficiat, hoc est, si a vetere Domino ad novum tantum Dominum Fisci rationem transferre permittas, ego cetera cum Patarejo facile transigam. Rem equidem, Princeps, tibi usitatissimam, quamquam tuis saepius concedis, me abs te petere scio, & propterea etiam ad impetrandum facillimam; sed eam scito mihi tamen eo muneris loco futuram, quo solet esse, quam vix uni ex tuis intimis concedere soles. Non Fiscum inquam tollo; non Fisci rationem veterem ullam impedio; sed ut hac mea emptione tantum jaceat, in ceteris autem ejus conditio, quæ nunc est, constanter permaneat, per me liceat, fiatque tantum a Patarejo ad Riccium possessionis transitio, remanente Fisco, ut nunc est, integro, rogo, atque oro. Summa vero, quæ ad Fisci rationem spectat X. HS. plus minus, ad nostram autem rationem CCL. Scutatos aureos conficere potest. Amplitudini tuæ id quidem satis exile, atque paruum; meo fortasse in tuis filiis studio non maximum; certe meæ fidei perexiguum est; qua ego una fretus, si casus ferat, integram possessionem auferre non dubitem. Epistolæ vero locus hic postulare videtur, ut me gratissimum maximeque memorem, si id impetro, tibi recipiam. Quam autem grati animi significationem ut pollicear, non satis video. Nam quod officium meum [quando re parem gratiam neque ipse possum referre, neque tu eam expectas] aut studiosius, aut diligentius tibi promittam, nulla datur faciendi facultas, qui ea semper in utroque diligentia, atque studio versatus sum, quam tui omnes, tuque in primis omnibus laudibus prosequi non dubitasti. Multo vero minus ad fidem quicquam adjungi potest meam, quam ita perpetuo ab usque initio tibi integram servavi, ut eam neque ulla unquam vel tacita cogitatione violarem. Neque est, quod a me expectes, ut tibi promittam me in horum utroque præstando, tamdiu permanfurum, quamdiu in vita mihi manendum sit. Nam etiam si hoc minime impetro, id mihi mea tamen constantia faciendum esse statuo. Sed ea tibi erit, Princeps, a nobis relata amplissima gratia, quæ liberalissimis Principibus, quique se in dando ad veram liberalitatis rationem metiuntur, referri solet, vetus officium tuum recenti officio tuo quo-

quotidie cumulare , atque adaugere benignissime curabis. Eam enim voluptatem , quam in recte officio tuo crebrioribus officiis cumulando capies maximam , pro maxima gratia tibi relata existimare debebis. Vale.

HERCULI ATESTIO

Bartholomæus Riccius S. D.

Orationem , qua agri Ferrariensis fines adversus Bononiensem populum defendit , a se compositam mittit , in qua modeste , si nihil repereris ad causam sublevandam , amoris saltem sui vestigia impressa ipsum visurum significat .

8. **M**Irto ad te, Hercules Princeps, Orationem meam, qua Ferrariensis agri tui fines adversus Bononiensem populum defendo. Utinam illa & ea arte , atque dicendi vi , atque facundia scripta esset , quo animo , atque benevolentia est elucubrata. Profecto jam causa tibi esset adjudicata ; sed , quod potui , libenter præstiti. Neque enim id a me , quod ab optimo Jurisconsulto , multo veno minus quod duo fratres Phyleni Patriæ suæ præstitere , fuit expectandum , qui ne Jus quidem Civile attigi. Factum autem Phylenorum neque Religio Christiana in suis admittit , neque si admittat , ne quid tibi aduler , tam fortis essem , ut paterer , vel omnibus propositis præmiis me vivum defodi. Hoc , quod possum , do perlibenter. Si quid in eo repereris , quo causa tua sublevetur , mihi eum laborem non frustra accidisse lætabor ; sin contra nihil opis ei a nobis accesserit , id quoque non erit ingratum , quod videris hac quoque parte vestigia amoris erga te mei non leviter impressa. Vale.

HERCULI ATESTIO

Bartholomæus Riccius S. D.

Agri parvi donationem sibi factam largiori beneficio pro ejus amplitudine , & sua in eum fide , ubi opportunior , atque expeditior facultas dabitur , auctum iri confidit .

9. **E**X ista tua agri mihi largitione facta , Hercules Princeps , eum solum percipio fructum , quem mi-

mihî animi tui benignitas protulit, quando id beneficii tua sponte a nullo invitatus in me contulisti. Qui autem inde ullo alio commodo utar, nihil est. Nam quæ mea pars ad mille aureos, ut nostri loquuntur, pervenire putabatur, vix ejus dimidium complet, neque eo quoque, qui frui possim, ulla ratio est. Res enim tota inter fratres sex consortes octo millibus denariorum æstimatur. Mihi a te sexta pars venit; continuo vides quid agelli, deinde qui ego illo frui possim. Nam proprius colonus in tam parvo agro haberi non potest. Si vero communi cum illis utar, rei meæ minime conducet. Quin hanc particulam meam illis si vendere cupiam, negant sibi esse, unde pro ea dissolvant. Qui vero ego eorum possessionem integram emam, neque mihi a pecunia ulla est facultas, neque fortasse, etiam si adsit, ipsi eam venditionem faciant; ut ego me tua liberalitate, quod ad animi tui erga me benignissimam rationem maxime obstrictum sentiam, commodo autem ullo minime auctum videam, qui inde fructum nullum sim percepturus. Ad hæc accedit, quod ex patris testamento hæc bona ex fidei commissione, ut dicunt, ab alienari non possunt. Pro quo ego tibi maximas tamen gratias ago, multo etiam majores acturus. Non enim dubito, cum videris quam leviter meis rationibus consulueris, quin largius, tuaque amplitudine, meaue fide dignius, cum opportunior, atque expeditior facultas dabitur, hanc benigne faciendi rationem exerceas. Vale.

HERCULI ATESTIO

Bartholomæus Riccius S. D.

Hortatur, ut perpetuam de rebus ab Atestiis Principibus præclare gestis Historiam conscribi mander, qua ex obscura hominum ignoratione in sempiternum splendorem, quasi in vitam alteram, revocentur. Addit Historiæ laudes, qualisque Historicus esse debeat, ostendit.

10. **C**UM multa, Hercules Princeps, Viris illustribus accidere soleant, quibus ad eam gloriam, quam sibi proposuerant sempiternam, aspirare non possint, nihil eis tamen magis adversum accidere potest, quam nul-

nullum habere, qui quæ ipsi cum prudenter, tum fortiter gesserint, ullis Historiæ mandet monumentis. Adversissimum id quidem Viro forti est, atque Imperatori egregio, cum multa bella confecerit, multas nationes debellarit, fortissimos hostes subegerit, aut in medio virtutis suæ cursu a perpetuo fortunæ vento destitui, aut etiam quasi de ipsius triumphî curru violenter dejecti, aut eo denique actô, pene in calamitosam vitam misere deturbari. Quemadmodum Annibali contigisse memoriæ proditum est, qui ex victore totius Italiæ, ac prope Romæ ipsius in eam calamitatem adductus est, ut victus in Africa non tam Romanos, quam etiam suos turpiter fugere coactus sit. Alexandro vero vere Magno præpropere mors quantum de gloria detraxerit, dici non potest. Eo enim tempore moritur, cum vix virum agere cœperat, cum tantam tamen adhuc Orbis partem devicisset, atque sub felici ditione teneret, quantam postea plures Reges non tenuerunt. Ad Scipionis autem Africanî laudem cumulatissimam id postremo defuit, quod, iniquissimo suorum Civium odio ex ea Urbe, quam solus ex Pœnorum faucibus eripuerat, discedere, atque Linternum in villam suam, ubi reliquum vitæ prorsus inglorius egit, secedere coactus est. Quibus tribus optimis Imperatoribus, ne cæteros, quorum infinitus est numerus, qui talia sunt perpeffi, hoc loco referam, iniquissime accidisse dici potest. Sed longe tamen cum iis etiam iniquius actum esset, si quæ præclara gessere, una cum iis prorsus interiissent, ac nulla omnino eorum extaret memoria. Quid enim, quæso, calamitosius, aut quid magis adversum optimo Principi, strenuoque ac forti Imperatori accidere potest, quam cum hic domi Remp. rectissime administrarit, ille militiæ omnia Imperatoria munera fortissime obiverit, nullum laborem omiserit, omnia pericula confidenter adiverit, eaque prudenter explicuerit, postremo de fortissimis hostibus sæpius triumpharit, si unum id ei desit, quo hæc omnia in perpetua hominum memoria fideliter conserventur? si nullus, inquam, Scriptor ea suo stylo excipiat, atque, qua una ratione comparata sunt, immortalitati commendentur? Quod eo etiam indignius accidere videtur, si eorum ipsorum fortissimorum Virorum culpa contrahatur aliqua. Sunt enim quidam, qui hoc posterioris laudis

dis nihil admodum laborent, nihilque studeant, propterea quod ad mortuos, quæ eos sequuntur, nihil, aut parum omnino pertinere arbitrantur. Quidam tantum præsentī laude contenti, hanc, quæ ex Historia continenter confici solet, a suis posteris magis expectari censent. Nam quod ad eos attinet, qui totum hominem extinguī volunt in morte, tamen si, quantum ad Historiam, multas rationes habere videntur, quibus sententiam suam tueri possint, hoc loco tamen Majorum auctoritas apud me multo pluris est, qui huic uni venturæ gloriæ, quasi alteri vitæ, aut suis ipsis, aut alienis scriptis studuere; ut Cicero etiam [si Diis placet] suis locupletissimis voluminibus, quibus non solum sibi, sed innumerabilibus aliis in perpetuum nomen illustravit, non prorsus acquiescens, aliquando L. Lucejum, ut Historiam suam scribere maturaret, palam ambire non dubitarit. At sit ita; nihil prorsus sentiant mortui ex iis, quæ se mortuos sequuntur, ac una secum omnis eorum gloria extinguatur, num id fortasse parum est, quod dum vivunt, hac etiam altera voluptate, cum se non omnes interituros vident, læti perfruuntur, atque etiam latius nomen gloriæ suæ hac una scriptorum ratione diffundi planissime sentiunt? Ii vero, qui recte factorum suorum præsentī gloriæ acquiescunt, neque quicquam præterea affectant amplius, ac eorum Historiam a posteris suis expectare malunt, multa peccant. Primum, quod immanissimæ impietatis notam subire videntur, qui in quo posteros suos etiam mortui plurimum ad immortalem gloriam suo ipsorum exemplo urgere, quid enim dicam juvare? perpetuo possent, tam impie contemperint, ac unis in se ipsis priusquam nata esset, eorum gloriam extinguī permiserint. Deinde quod summæ imprudentiæ accusari possunt, ut quod omnibus periculis, atque summis difficultatibus adepti sunt, ea brevi sua stultitia prorsus sint perdituri, quando quod a se non obtinent, id ab aliis sperant, atque ab iis interdum, qui quid sit gloria si interrogentur, respondebunt, ne umbram quidem ejus se novisse. In quorum numero Majores tuos, Hercules, fuisse satis mirari non possum, qui cum omnia ubique egregia facinora ediderint domi, & militiæ, rem cum prudenter, tum etiam fortiter gesserint, triumphis denique innumerabilibus Fam-

miliam suam illustrarint, nihil tamen curæ adhibuerint,
 ut hæc ullis doctissimorum Virorum scriptis, ut digna
 erant, maxime illustrarentur. Nulla enim separatim ex-
 tat, quæ de præclaris illorum rebus gestis perpetua le-
 gatur Historia. Cum neque mihi tamen eorum deinceps
 posteris sua aliqua culpa caruisse videantur, qui id ali-
 quando non viderint, atque eos tandem, ut melius fa-
 cere possent, ex perpetua hominum ignoratione in sem-
 piternum Historiæ splendorem, quasi in vitam alteram,
 revocarint. Quod cum ipse quoque videres, æ ad tuam
 gloriam quasi a Diis immortalibus hoc etiam tibi re-
 servatum esse duceres, tantam occasionem subito arri-
 puisti, cum quæ privatis in omnibus Annalibus, ac ex
 universa Historia excipi possent, diligenter, ut collige-
 rentur, ac in suum postea corpus ea omnia optime con-
 stituerentur, proxime iussisti. Ad quam unam tuam magis,
 quam tuorum gloriam, ut te hortor, nihil attine-
 nere arbitror, nisi currenti, ut dicunt, calcar addere
 velim; tamen, ut meam fidem tibi hac quoque in par-
 te non leviter probem, cum tua sententia hæc pauca
 conjungere placuit. Certe, Hercules, omnibus Scripto-
 ribus materiam præbere ad scribendum honestissimam
 maxima est gloria; cum quis scilicet fortiter, iuste,
 splendide, prudenter, moderateque vitæ suæ cursum om-
 nem traducit; sed una ea in primis vera, ac solida
 laus est, quam ex officiis in alios conferendis homines
 sibi comparant. Cum autem tria sint hominum genera,
 de quibus optime mereri possimus, unum eorum, qui
 jam decessere; alterum, qui adhuc nobiscum agunt;
 tertium, qui post nos venturi sunt, equidem existimo,
 trium horum maximum esse officium, quod in mortuos
 confertur. Nam prodesse viventibus, ut omittam quod
 expectari potest, ut aliqua gratia nobis aliquando refe-
 ratur, quod omnem liberalitatem tollit, iis adsumus,
 qui ipsi sibi sæpius adesse possunt. Quod vero ad poste-
 ros attinet, equidem gloriosum est iis viam commonstra-
 re, qua Majorum suorum vestigiis ad veram gloriam
 contendant; sed hi omnino nondum sunt, neque quic-
 quam certo scimus, utrum sint etiam futuri. Majorum
 autem suorum, quique ab hinc infinitos annos decesse-
 re, atque in ignorationis tenebris toti obruti jacuere,
 curam eam gerere, qua inde in lucem eruantur, ac qua-
 si ite-

si iterum in vitam, eamque longe diuturniorem, restituantur, multo gloriosius, multoque splendidius est; quique hoc facit, tanto ille cæteris viris præstat, quo majus est omnino mortuis vitam reddere, quam eis, qui fortasse nulli sunt futuri, certe non perpetuo permanfuri, sua virtute omnia vel ad summam gloriam comparare. Tamen cum ego rectius considero, tu hæc tria uno isto tuo officio optime complexus es. Neque enim cum mortuis tam officiose consulis, non parum etiam vivis, non minimum posteris in eo ipso officio prospicis, qui utrique æque inde ea sumere poterunt, quibus ad summam laudem, atque æternam gloriam inflammentur. Quare, Hercules, etsi hoc antea me facturum esse negaram, te rogo, atque oro, ut quod semel aggressus es, continuo perficias, ac quod Hercules proprium semper fuit nulli deesse, tuis ipse nunc adfis. Effert tandem in hæc Cerberum, hoc est, mortuorum tuorum virtutes sepultas in hominum linguas, atque in memoriam sempiternam erue. Sed in hoc egregie perficiendo illud etiam, atque etiam diligenter videbis, ut hujus scriptio ei viro demandetur, qui id optime facere didicerit. Neque enim ad unam tantum veritatem, [quæ una in primis, ut in tua Historia explicetur, non autem ut ad assentationem legatur, diligenter providebis,] atque etiam rerum ordinem Historiæ lex universa referenda est. Sunt enim complura alia, quæ illi accidunt, haud his faciliora, quæ qui nesciverit, is multum sibi ad eam optimam scribendi rationem deesse sciat, ut statim locorum descriptiones, consiliorum comprobationes, præliorum multiplex certamen, fortuna varia, Urbium oppugnationes, ac quæ in earum miseris fiunt direptionibus; his conciones, atque hortationes accedunt, quæ totæ ab Oratore sunt petendæ, sed ea ratione, ut earum oratio fluens magis trahatur, quam acriter insistat; & cætera ejus generis multa, quæ prudentissimum Scriptorem desiderant. In primis autem permagni interesse scito, quâ dictione ea scripta sit. Sunt enim quidam Scriptores, qui ita barbare, ita insulse, ita inepte illustrium Virorum Historias scribunt, ut legendo vix ad primam paginam ferri possint. Natura enim comparatum est, quod usus, & ars postea comprobavit, ut pro dignitate unumquodque tractetur. Itaque tu, Princeps, Filios tuos, suos Cives tui,

tui, agricolæ item suos pro cuiusque conditione vestitis. Neque enim par esset, si alius vestitu alius abuteretur, quemadmodum neque deceret, si nobilissimus equus magis ephippiis crassiori canabo confectis, quam serico, atque auro etiam contextis indueretur. Quam naturæ decentiam Alexander ubique vere ille Magnus mire intuebatur, ut cum interrogatus esset, quid in capsula, quæ illi ex Darii præda allata esset, & materia, & opere pretiosissima, reponi vellet, continuo Homerum respondit, videlicet rem præclarissimam rei præclarissimæ componens. Quod ipsum decorum tum quoque sequebatur, cum se a nullo alio aut pingi, aut cæleri, quam ab uno Apelle, aut Lysippo, passus est. Vix a tanto Rege discedere potero. Iste, inquam, ipse, cum gloriam suam cum Achillis gloria conferret, id quod sæpius faciebat, unum illi tantum Homerum invidebat, qui de eo tam magnifice, tamque præclare scripsisset. Neque enim quicquam tantus Imperator tam exoptavit, quam eum Scriptorem rerum suarum habere, qui alter esset Homerus, ut cum quidam aliquando ex ejus familiaribus nescio quid magnum ad eum nunciatum accurreret, longe ille prius fertur de eo quæsisse, nunquid Homerum ab Inferis rediisse, afferret? Videbat enim prudentissimus Rex de virtute sua, ac rerum suarum præstantia multum iri detractum, nisi eæ a pari Scriptore posteris memoriæ proderentur, atque a fortissimo Imperatore essent gestæ. A quo tanto decore neque C. Julius Cæsar discessit, qui cum & ipse rerum suarum optimus æstimator esset, eas ipse scribere, quam ab aliis scribendas relinquere, maluit. Cicero vero pater eloquentiæ neque hoc judicio caruit, qui cum ipse quoque res suas præclare gestas, de quibus ipse quoque tamèn passim in suis scriptis egerat, in unum corpus componi vellet, id ab eloquentissimo ejus ætatis Viro, ut etiam paulo supra dicebamus, L. Lucejo per eas literas, quæ adhuc extant, nobilissimas summis precibus oravit. Prudentissimus item Senatus Romanus publico decreto T. Livio Historiam suam scribendam tradidit. Ac, ut propius accedam, atque in nostris conquiescam, Senatus Venetus rerum suarum & decreto, & mercede publica tres Scriptores habuit, Sabellicum, Navagerium, et si hujus scripta desiderantur, Bembum; Neapolitani Reges unum in primis Jo. Pontanum; Mediola-

nenſum Principes Merulam; Paulus III. Pontifex Max. Bernardum Maſſejum, qui Scriptores, [ne omnium nunc populorum, & rerum publicarum Hiſtoricos perſequar] quantum quiſque ſuam Hiſtoriam dicendo illuſtrarit, eorum ſcripta facile declarant; ut non minus diligentia in iis rebus, quas ſtrenue geſſit, deſcribendis debeat Imperator adhibere, quam in iis ipſis agendis ſummæ adhibuerit fortitudinis. Certe, Princeps, quæ per ſe pulchra ſit Virgo, etiam ſi indecoro, atque agreſti veſtitu induatur, pulchra etiam videbitur; verum ſi ad naturalem pulchritudinem & corporis veſtitus ornatioꝝ, & capitis compoſitior ornatus acceſſerit, multo formoſior, multoque ſplendidior extiterit ad conſpiciendum. Neque ejus parens, præſertim cui egregiæ veſtis ſumma copia ſit, recte accuſari non poterit, ſi eam turpiori quaſi involverit veſtitu. Ac quoniam Virginis mentio facta eſt, his proximis diebus Annam filiam tuam formoſiſſimam Virginem cum eſſingi velles, id negotii ei pictori dediſti, quem ſcires illam optime eſſe expreſſurum, quemque etiam aliquid penicillo, atque artificio ſuo ejus pulchritudinem adjuutorum probe noras. Te, te, Princeps, in hoc de Hiſtoria, ſi me audies, imitabere, ac quemadmodum in pulcherrima Filia depingenda optimo pictore es uſus, in tanta item Hiſtoria poſteris tradenda eum Scriptoreſſe adhibebis, qui & ejus præſtantiam ſtilo ſuo peræquet, & ſic illam ea diſtione perſequatur, quæ cum cupide legatur, tum attente, ac ſumma cum voluptate audiatur. Certe ſi tuorum illuſtrium Virorum ab hinc mille amplius annos mortuorum nomen in lucem, ac quaſi in vitam alteram revocare ſtudes, id eis ſpiritus, ac luminis comparare debes, quod non quo incenſum eſſet, eodem extingueretur die. Nam ea ſcripta, quæ hac elegantia carent, vix legi cœpta ſunt, cum deponuntur. At etiam pretioſiſſimæ gemmæ in plumbo interdum illigantur; at ſi in auro illiguntur, magis decere, hocque ad rationem, illud magis monſtro ſimile eſſe, neque ipſe inſiciabere. Tameſi hoc longe aliud eſt de gemma. Nam ea aut in arca concluſa cuſtoditur, aut in digito paucis oſtentatur, aut ut magis illuſtris appareat, ſi minus obſcuræ materie conjuncta ſit; ſcripta autem Hiſtoria quid magis apertum? magiſque omnium oculis obvium? aut ab infanti Scriptore magis abhorret? Quare maxime providere debe-

his, ne illi scilicet eam demandes Scriptori, qui illam omni barbarie, atque infantia coinquinet, atque conspurcet. Nosti, Princeps, atque adeo amas plurimum Alexandrum Manzolium, prudentissimum, neque ab his studiis abhorrentem Virum, ex ea Familia, ex qua tot Principes Sfortij extitere, ortum. Hic cum a quodam propinquo suo, viro quidem bono, sed Scriptore ineptissimo Sfortiorum Historiam vulgo editam comperisset, accurrit ad eam Bibliothecam, ubi venale opus propositum erat, omnes libros emit, quanti sunt judicati, quos, ut primum domum rediit, sua manu combussit. Factum mea quidem, atque adeo omnium sententia splendidissimum. Maluit enim optimus Civis nullam Familiæ suæ memoriam scriptam extare, quam eo modo indigne perpetuo legi. Quare, Princeps, ut cætera in Historiæ tuæ Scriptore comprobabis, hoc ante omnia maxime providebis, ut Latino viro eam committas, quique dicendo eam non minus ornet, quam vere, atque ordine explicet; quando res fordide dictæ cito consenscunt, quæ vero sua dictionis elegantia non carent, perdurant in omnium hominum memoria. Quæ omnia, Princeps, cave tamen in eam partem a me dicta esse suspiceris, ut ego hanc scriptionem hoc modo mihi ambirem; quando meam scribendi rationem cum eorum, qui haud inepte scribunt, conjungere soles. Primum enim is ego non sum, qui mihi id cæteris præstare posse sperem, quod ego in Historiæ tuæ Scriptore cupiebam; deinde, si omnia mihi abunde adsint, & ad eam verissime cum scribendam, tum omni dictionis elegantia ornandam facile suppeditet, ætas mea tamen, quam vides jam ingravescentem, non patitur, ut tantum onus fuscipiam, qui in ipsius initio facile deficere possem. Sed quicquid tecum egi, id omne sedulo, atque ea ratione egi, ut quemadmodum quæ tuorum præclaræ res gestæ sunt, ita præclare etiam scriberentur, æque videres. Vale.

PRIMI LIBRI FINIS.

AD

AD EUMDEM

HERCULEM ATESTIUM,

Ac reliquos Principes Atestios

BARTHOLOMÆI RICCI

EPISTOLARUM

LIBER SECUNDUS.

HERCULI ATESTIO

Bartholomæus Riccius S. D.

Carmen a Francisco Luyfinsio adolescente in Anna Filia Nuptiis compositum exhibet, cujus virtutes & ipse hac Epistola ob oculos ponit.



Um ego Venetiis essem apud meos, atque etiam tuos Cornelios, ac, ut fit cum hospite, de me illi quærerent, quidnam ego Ferraria novi asferrem, atque in primis de Anna Filia tua, cujus nobilissimæ per hocce dies Nuptiæ celebrantur, studiosius videre viderentur, ego illam iis virtutibus ornatam esse dixi, quibus revera est ornatissima, hoc est, quæ summo, atque humanissimo ingenio esset, quæ in literis, quæ in musicis tantum profecerit, quantum in multo grandiore natu viro quovis non facile reperiri posset, quæ denique iis moribus, eaque educatione [ut acus scientiam egregiam, ac totius corporis formam egregiam nunc omit- tam] prædita esset, quibus probatissimæ Principes sunt præditæ, ad quæ omnia, quæ a me pleno etiam ore dicebantur, sensi omnes ea admiratione commotos, ut ei in hisce Nuptiis una voce bene, ac feliciter ominarentur. Aderat Franciscus Luyfinsius adolescens ad carmina scribenda natus, qui nunc alterum & vigesimum attigit annum. Huic ego; mi, inquam, Luyfinsi, vides quan-
C 2
tam

tam Principis meæ virtutes materiam Poetis præbeant ad scribendum. Cur tu, qui in eorum numero locum jam obtines non ultimum, & mox a primo proprioere occupabis, aliquid tuis versibus in hujus Nuptiis non ludis? Arrisit ad meam laudem adolescens, atque una simul modestissime erubuit, ac paulo post inquit; grave est, Ricci, quod a me petis, ut tot virtutes, quæ ab omnibus Scriptoribus vix multis voluminibus complecti possent, ego unus infans paucioribus versibus persequi audeam. Experiar tamen, si quid possim, idque magis ut tibi tester, me nihil habere jam, quod tua causa nolum, quam quod sperem, me tibi in hac mea lusione satisfacere posse. Tum ei gratias egi; ejusque sermonis finis est factus. Postridie ejus diei me convenit, atque Eridanum in manum affert, id enim centum versus est, quibus Padum ipsum Annæ Principis Filia tuæ discessum, quasi Solis, qui alium Orbem suo lumine sit illustraturus, nostrum autem unde discedit, in densissimis tenebris relinquat, flebiliter querentem inducit, cui postremo felicissimas hæc Nuptias exoptat. Eum ad te mitto, non ut hoc meo officio fidem erga tuos meam hinc quoque tibi quicquam magis probare velim, qui jam multos annos habes quam probatissimam, sed ut hæc legens & tuorum laudibus non parum gratuleris, & tecum animo plurimum gaudeas, qui sentias, te tantum Principem in hoc quoque scriptorum genere tantum profecisse, ut non solum ea optime intelligas, sed de iis etiam prudentissime judices. Vale.

HERCULI ATESTIO

Bartholomæus Riccius S. D.

Rogat, ut pecuniam vestigalium a Petro Vandinio debitam duabus, aut tribus pensionibus ad diem constitutum dissolvi permittat, ut redemptores hac benignitate moti ad superiorem locationem etiam ad quid amplius in redimendo addendum excitentur.

2. **P**etrus Vandinius affinis meus est; sed affinitas cum multis communis esse potest, benevolentia vero, qua ego illum prosequor maxima, non potest.
Ejus

Ejus enim antiqua bonitas facit, ut multis etiam propinquis in amore eum præponam. Is ex vectigalibus Bagnacaballensibus particulam quamdam de Gajaniis redemptoribus redemptam habet, ex qua eis ad quadringentos Scutatos, ut nostri dicunt, aureos debet, sed sua bonitate nullo dolo, nullaque fraude debet. Nam cum negotia sua Venetiis procuraret, proneptis suæ viro CC. aureos dat, filio Lugum perferendos, quos ipse postea Gajaniis dissolvat. Ille bonus vir cum ingenti illa pecunia nusquam postea apparuit. Quare Petrus, relictis omnibus, quæ Venetiis curabat, eum quaque quærere instituit, cumque fere universam citeriorem Galliam [est enim ille Mantuanus] obivisset, tandem Brixie illum reperit, qui tabernam vestibus cujusque generis usitatis, quas ex ea pecunia sibi comparat, plenam aperuerat, easque iterum vendebat. Hunc in judicium vocat. Jam annus est, cum res ad Iudices dilationibus, vadimoniis, ac implicationibus judicialibus ducitur. Fratres enim is duos habet in Divi Dominici familiam cooptatos, qui suo illo sacrosancto Sacerdotio, ac Divi Dominici auctoritate in re tam turpi abutentes, Vandinium extorxis ad sanctitatem collis quaque via, quaque ratione oppugnant. Quo item tempore & in publico hospitio, & in patronis, cæterisque, quæ ad litem conficiendam innumerabilia pertinent, ingentem pecuniam consumpsit. Quo uno tanto incommodo affectus, Princeps, supplicat, ut a Gajaniis id pecuniæ nihil exigi velis, a se eam peti, nomenque suum a Gajaniis ad te transferri jubeas. Id quod commodissime facere potes, & aliis, quæ tua summa est benignitas, sæpe alias fecisti. Quam pecuniam ipse postea tibi dissolvat ad eum diem, quem ei commodum dederis aut duabus, aut tribus pensionibus ad dissolvendum. Is enim totam eam pecuniam habet in nominibus, quam per hanc caram annonam Vincen-tius filius exigere nequivit, quam interea commodius exigit, exactam tuis fideliter dinumerabit. Quare te rogo, ut in quo nullum tibi incommodum, Vandinio vero omnis fortunarum suarum incolumitas sit accessura, ei subvenias, publicanosque tuos optimos viros subleves, ut cum novi redemptores intelligant, se in exigendo te tam benigno usuros, ad superiorem locationem etiam quid amplius in redimendo addere non dubitent, atque

ut a presentibus tuis Civibus, ac fociis facis, ita a posteris etiam hoc modo optime ut audias, tuis istis officiis, tua ista summa benignitate efficies. Vale.
III. Non. Maji MDLI.

HERCULI ATESTIO

Bartholomæus Riccius S. D.

Hortatur, ut pacem armis anteferat, & pristinam concordiam, oratione, consilio, & auctoritate sua tumultibus composuit, restituat.

3. **S**I vales, bene est, Tui Filii, & universa Familia bene habet, nisi quod omnes tui uno desiderio jam confecti sumus. Sed cum tamen caussam, quam ob rem abes, consideramus, id nobis molestiam illam magnopere lenit, atque comminuit. Effice vero, Princeps, ut tuo quoque exemplo res urbanas, atque consilium militaribus rebus recte anteferri, atque tuæ prudentiæ inermi omnia arma, quibus jam magna ex parte Italia premi videtur, cessisse planissime constet. Fac, inquam, Princeps, ut illud Ciceronis de te rectius usurpetur, *Cedant arma togæ, concedat laurea linguæ*. Quid enim gloriosius, quam in tanto bello, antequam concurratur, pacem parere, otium constituere, de utraque parte honestissimum triumphum ducere? Hostem enim armis vincere non tam virtutis est, quam Fortunæ; conciliare vero copias jam in acie constitutas, atque ex earum manibus arma sine armis eripere, discordias componere, odia sedare, in pristinam concordiam illas restituere, solum est virtutis, atque prudentiæ; quod qui faciunt, non tam mihi cum hominibus, sed cum Diis immortalibus conferendi esse videntur. Te, Princeps Hercules, Herculem proba; oratione tua, consilio, auctoritate tumultus istos compone, atque extingue. Propositi victor, atque honestissimi voti compos ad tuos redi, infer in Familiam tuam Lauream istam, non ut pugnans hostem fregeris, fugaris, viceris, sed dicendo, consulendoque Italiam in otium suum restitueris. Para omnibus Historiis splendidissimum, ac illustrissimum prudentiæ tuæ factum, quod cum omnes posterī legent, me-

memoriam tuæ gloriæ renovent, teque in Cælum, unde venisti, extollant. Vale.

HERCULI ATESTIO

Bartholomæus Riccius S. D.

Orat, ut decimam partem prædioli empti Fisco debitam sibi dono liberaliter largiatur.

4. **P**roximis hisce diebus præteritis de Antonio Maria Nigrifolio prædiolum emi in agro Quartifano; ejus summa est ad MCCC. plus minus libras ad nostram rationem. Quoniam vero ex omnibus emptionibus decima Fisco venit, meam partem, quæ ad sexaginta quinque est, a te dono peto, atque, si tua benignitas patitur, rogo. Id quidem quam pusillum tibi sit, plane vides; quam vero mihi & commodum, & gratum sit futurum, ipse intelligo. Brevis sum, Princeps, ne, si multis utar in re non admodum magna, benignitatem tuam offendere videar, quæ in alienos etiam sua sponte largissime quotidie conferre non cessat. Hoc tibi tamen affirmo, id mihi valde gratum fore. Vale.

HERCULI ATESTIO

Bartholomæus Riccius S. D.

Petit, ut emptum agellum in fundo Quartifano omni labore publico liberet, atque immunem efficiat.

5. **H**Abeo in fundo Quartifano agellum, partim de Antonio Maria Nigrifolio, partim de Leonora Cichinia emptum. Is totus ad quinque modios pervenire non potest. Hunc mihi, Princeps amplissime, ut omni labore publico liberes, atque immunem efficias, te rogo, atque oro. Scio equidem, quod te rogo, cum singulari mea in te fide, tum tua in omnes tuos summa beneficentia, multo esse inferius; verum id mihi tamen tam gratum futurum polliceor, quanti si agrum ipsum mihi utrumque condonasses. Vale.

HERCULI ATESTIO

Bartholomæus Riccius S. D.

Epitaphium mittit Strotii tumulo inscribendum.

6. **U**tinam Strotium tuum tibi ab Inferis revocare possem, multo id, quam hoc, quod facio, facerem libentius. Sed cum id optari tantum liceat; quod potui pusillum, tibi libenter præstiti, ut ego quoque in ejus funere & doloris erga illum mei, meæque item in te fidei aliquam significationem darem. Habe igitur, Princeps amplissime, quæ in tanti Viri tumulo inscribi possunt, ut brevius potuit, a me conscripta, teque, tua prudentia, atque ea animi altitudine, qua summa es præditus, isto tanto mœrore, si non prorsus liberares, saltem leva, idque in primis tua, tum etiam tuorum causa a tuo tanto incommodo obtine. Id Strotius vult, id ratio postulat, id Deus Opt. Max. jubet, ne in unius hominis interitu omnia tua interiisse videantur. Vale.

HERCULI ATESTIO

Bartholomæus Riccius S. D.

Conatur persuadere, ut Municipale jus Ferrariense in aliquibus corrigat, atque ad æquiorum rationem diligentius instituat.

7. **I**nter ea, Princeps Hercules, quæ quotidie in Municipali jure tuo Ferrariensi corrigis, atque ad æquiorum rationem diligentius instituis, id fortasse non postremum esse videtur, quod qui de jure disceptant, alter ex impendio in lite facto nihil metuat, alter nihil speret. Est enim caput, cum quis in judicium alium vocarit, ac inopiam suam jurarit, si is postea causa cadat, nihil adversario victore quicquam accepti damni sit præstiturus, quod mihi perinique comparatum esse videtur. Hac enim ratione vel levissima de causa cuique impuro homini securius licebit optimum Virum in judicium vocare, atque in eo quamdiu ei libebit, illum

ve-

vexare. Sit, exempli causa, mulier, cum qua caussidicus clam consuescat, atque ejus amore teneatur, quique non solum ei, ut sit, pro ejus consuetudine quicquam perfolvat, verum etiam ex ejus bonis aliquid speret. Hæc vero fraudem aliquam sibi confingat, qua Civem aliquem in jus rapiat, ac de eo per istum certam summam possulet; continuo ut egestatem suam juravit, nihil postea, si causa cadat, pro causæ expensis adversario præstare tenebitur. Qua una spe adversarium suum ita torquebit, ut ad centesimam provocationem eum rapere non cesset; qui contra in jure suo tuendo multum in patronis, multo etiam plus in scripturis, cum in Judicibus etiam non parum pro sportulis, ut dicunt, centies interdum amplius, quam pro quo litigatur, impendet. Hoc Princeps cuiquam probabitur? neque ex institutis iis statim eximetur? parque utrique omnis causa restituetur? At hoc modo egenis, atque peregrinis adimeretur jus suum persequi posse, quorum alter ab egestate, alter quia notum nullum in Urbe haberet, fideiussorem habere non posset, quo nihil immanius, nihilque magis iniquum. At patroni, qui horum causam æquissimam esse maxime perspectum habent, ii pro iis fidem suam obligent, fidei hanc isti iussionem dent, qua ratione quoque fiet, ut hujusmodi causæ, quasi præjudicio facto in judicium veniant, neque quisquam petet, nisi jure æquissimo petat. At non ita causæ explicatæ sunt, ut ab omnibus cerni possint, utrum æquæ, an iniquæ sint. At in veritate nullum dubium; de quo vero ambigitur, id turpe est. Verum ita sit. Cur eas defendunt, si utrum æquæ sint, incertum habent? Probi enim procuratoris est, nisi æque agere, ac quas causas agendas sumat, eas prius optimas comprobare; quod si is non callet, juris peritiores consulat, eumque deligat, qui cum probe rei naturam pernorit, ad eam postea fideliter judicium suum dirigat; non autem eum, qui lucri causa in quanque partem eum implicare contendat. Certe verum uno plus esse non potest. Hoc si a juris peritissimo, ac fidelissimo Viro habebit, tunc ita tuto aget, quasi si causam victam habeat, & qua spe præmii sui eam defendit, ut ex devicta causa id postea sumatur, eandem in fidei iussione retinere poterit. Hoc autem a me, de aliis meliora quæri poterunt, modo hic error aliquo modo corrigatur. At, quid tibi cum jure? Utinam nihil,

aut

aut non huius saltem generis. Me quædam mulier hac iudicii ratione, atque iis tabulis, quæ jam a Prætoris tuo fictæ judicatæ sunt, jam annum integrum ad Iudices vexat, pergitque etiam dum omni sumptu cumulare, a quo illa cum procuratoris, cum quo summa consuetudine conjuncta est, tum etiam a me juratæ inopiæ causa, si causa cadat, libera est, ut si queror, & jure æquissimo, & honestissima de causa id faciam, qui & fictis tabulis opprimar, & cum causam vicerò, ex ejus tamen dispendio, quam quanti causa sit, plus damni sim facturus. Vale, tuisque, ut facis, æquissime consule.

HIPPOLYTO ATESTIO CARDINALI

Bartholomæus Riccius suorum Civium nomine S.D.

Gratulatio Lugiensium nomine de Cardinalatu ipsi concessio, auguriumque de Suprema Dignitate in Familiam Atestianam aliquando feliciter inducenda.

8. **C**Um superioribus diebus rumor de Pontificatu tuo nobis allatus esset, tanta statim cujusque nostrum animi voluptatis quasi titillatione affecti sunt, ut parum abfuerit, quin id, quod nunc facimus, publice tibi gratulatum mitteremus. Nunc vero cum non modo fama, verum etiam literis, ac nuntiis de eo certiores fieremus, longius faciendum non duximus, quin a lectis literis tuis & per literas, & per publicos legatos summo opere tibi gratularemur. Vere igitur, atque ex toto animo tibi etiam, atque etiam gratulamur, quod majoris etiam dignitatis tuæ ratio habita sit, quodque improborum quorundam iniquitatem honesta tua petitio vicerit. Nam etsi multos habes, ad quos ex isto tuo Pontificatu summa lætitia pervenisse debet, unos scito tamen Lugienses tuos tantum abesse, ut eorum ullo in tui tanta lætitia vinci patiantur, ut ne omnium quidem, si una maximè conjuncta sit, lætitiæ concedant, qui a Diis immortalibus ita precibus omnibus contendunt, quando quod ad te attinet, nihil de virtute tua prorsus dubitant, ut Dignitatem istam ita tibi fortunent, atque adaugeant, ut supremam illam aliquando etiam in Familiam tuam feliciter inducas. Vale.

HIP-

HIPPOLYTO ATESTIO CARDINALI

Bartholomæus Riccius S. D.

Orationem in funere Francisci Regis Gallie a se Ferrarie habitam mittit.

9. **C**Um reliqua funeris Francisci Regis pompa, quæ tuo nomine Ferrariæ celebrata est, Orationem quoque nostram habe, quæ de ejus laudibus & scripta, & habita est. In qua scio te multa desideraturum, neque ea minima; sed neque vitam integram, multo vero minus tanti Regis Historiam eram scripturus; quæ tamen commode poteram, atque etiam debebam, scito illa me nulla aut eorum ignoratione, aut mea negligentia præterisse; qua autem ratione evenerit, ut omitterentur, tui ad te scribent. Certe si in quo potui dictionem meam exercere, id tibi gratum fuisse intellexero, omnia me tibi cumulatissime præstitisse arbitror. Vale.

RENATÆ PRINCIPI FERRARIÆ

Bartholomæus Riccius S. D.

Sub ejus nomine Orationem in vulgus exeuntem de laudibus Francisci Regis Gallie Sororis Viri recitatam in iis Inferiis, quas Hippolytus Atestius Cardinalis illi Ferrarie perfolvi jusserat, tamquam consolationem offert.

10. **F**Eci Orationem de laudibus Francisci Regis Gallie, Sororis tuæ Viri, quæ habita est in iis Inferiis, quas Hippolytus Atestius Cardinalis illi Ferrariæ perfolvi jussit. Sed quid ego me illam fecisse dixi? Immo vero, ut veteres rectius loquebantur, eam faciebam. Nam ad illam integram & majori volumine, quam in funere fieri solet, tempore etiam multo longiori peropus erat. Quo impedimento & multæ a me ex ejus laudibus omissæ sunt, & quas attigi, suo ornatu non satis sunt conscriptæ. Hanc tamen, utcumque esset, cum ii, qui Regium funus curarunt, in Galliam Cardinali Hippolyto mittere vellent, atque eò modo mittere, ut suum

suum studium, suamque diligentiam inde quoque illi maxime probarent, rati sunt id eo modo assequi posse, si publica descriptione, quemadmodum vides, eam mitterent descriptam. Quod cum neque ipse illis gravate concederem, continuo illis, ut dicunt, excudendam dedi. Sed cum ego viderem quo ipsa quoque luctu, ac mœrore tantum Regem prosequeris, tamen multo ante cum literis, tum etiam nuntiis tuis de isto ipso tuo squalore in Gallia auditum esse scirem; putavi tamen tibi minime ingratum accidere, si hæc mea Oratio non sine aliqua tui mentione & illuc perferretur, & ubique legeretur. Itaque volui, ut sub tuo nomine in vulgum exiret. Hanc igitur habe, atque cum cæteris, ut Orationem si minus justam, separatim saltem, ut consolationem fortasse, non ingratam lege. Nam in ejus laudibus recensendis illud solatium capies, quod si tibi dolorem istum tuum universum exhaurire non possit, certe id magna ex parte sit tamen levaturum. Vale.

RENATÆ FERRARIÆ PRINCIPI

Bartholomæus Riccius S. D.

Sententiolas quasdam ex probatissimis Auctoribus decerptas ad mores informandos non solum Filiis, sed Filiabus etiam docendis accommodatas ad illam mittit.

11. **C**Um ego scirem natura pueros omnes a schola, hoc est, a discendi studio valde abhorrere; Principum autem, ut qui delitias suas optime cognoscunt, omnium plurimum, omnia in tuis Filiis docendis conquisivi, qui hanc eis disciplinam, si minus odiosam, saltem aliqua ex parte faciliorem efficerem. In primis itaque id unum provideo, ne longum, ac perpetuum eis volumen ullum proponatur ediscendum, ne ejus magnitudine majus quoque in literas eorum odium excitetur; sed quasi more apum, quæ non ex uno roseto, sed ex diversis flosculis materiam illam sibi deligunt, qua postea suas cellas nectare compleant, breves quasdam mihi sententiolas non tam ad omnium mores maxime aptas, quam optime etiam scriptas, ex probatissimis Auctoribus decerpo, quibus illos cum suaviter
la-

laſtem, tum etiam ad longiorem lectionem ſenſum comparẽ. Has tibi nunc mitto, ut idẽ, ſi videbitur, in junioribus Filiabus inſtituendis cures, ut efficiatur. Nam cum mecum ſæpius ageres, ut aliquid eis quoque prodeſſem in noſtris ſtudiis, inde mihi initium ſumere placuit, unde cum Filiis exorſus eram. Quod vero ad dicendi rationem attinet, in eo quoque brevi operam dabimus, ut aliquid ſeparatim habeas. Vale.

ALPHONSO ATESTIO

Bartholomæus Riccius S. D.

Patris exemplo ad Liberalitatem, & Clementiam Filium hortatur, eundemque ad veram gloriam in rebus omnibus gerendis ipſi tamquam ducem proponit.

12. **H**ercules Pater tuus, Alphonſe Princeps, cum videret tibi multa opus eſſe & ad commodiſſime agendum, & ad quam geris dignitatem honeſtiſſime tuendam, quotidie tum ad rem augendam, tum ad nova, ac magnifica ædificia conſtruenda omne ſuum ſtudium conſert. Hinc veſtigialium maximæ acceſſiones, hinc Berriguardi inſtauratio ampliſſima, hinc a fundamentis ipsis in Urbe, quod ad Montem appellant, item in agro *Caput aureum* magnificentiſſime ædes extructæ ſunt. Sed quoniam hæc, quanquam ad Principem maxime ſpectant, ut habeat & unde Principatum ſuum tueatur, & ubi cum numeroſa familia habitet, caduca, atque ingloria ſunt; ne tibi quid a ſe quoque deeſſet, quod ad ſolidam gloriam, atque ad Deos ipſos proxime accedendum pertineret, ille ipſe in Repub. feliciter gerenda quotidie aliquod tibi præclarum exemplum aut Juſtitiz, aut Liberalitatis, aut Clementiz edere non intermittit. Sed cum ea multa, atque egregia ſint omnia, tamen hoc unum, quod hodierno die inuſitata Clementiz exemplum tibi dedit, facile ea omnia ſuperat, cum Paulo Manfronio, quo tam iniquiſſimo, quam etiam ſcleratiſſimo inimico uſus fuerat, multa in ſe ſclera & veneno, & ſica excogitata ſine ullo cruciatu ſua ſponte conſententi, ſua ipſe voluntate, nullorum aut precibus aut gratia ignovit, ac, quam illi jure æquiſſimo adime-

mere poterat, vitam condonavit, quo quidem clementissimo, atque illustrissimo facto quid ille a patre suo expectare mitius, aut tu a tuo splendidius desiderare potuisses? Fortasse ejus pater in pietate severior fuisset, ubi tuus in vindicta sua Clementissimus, in tui autem ad virtutem instituendi ratione prudentissimus extitit. Alter illi dies ex multis, qui in ejus vita illustres extitere, splendidissimus illuxit, cum Princeps creatur, non quod illum ad tantum imperium evexerit, sed quod ille eo die Liberalitatem suam largissime exercuit, cum sua sponte in suos amplissima, in alienos rogatus non mediocria contulit munera, cum ab eo nemo quicquid is petiisset, repulsam ullam tulerit. Verum si ejus lux cum hujus splendore conferatur, ille hybernus, hic æstivus dies videbitur. Sed illum Patris Principis partes peregisse, atque adeo quotidie peragere ad tuam præceptionem multum id quidem est, verum nisi tuas ipse quoque perfeceris, [ignore mihi si paulo liberius partem hanc tecum ago] non solum id tibi ulli gloriæ, sed non parvæ ignominie est futurum, qui cum Parentem habueris ad veram gloriam quasi præeuntem, ab ejus gloriosissima via quicquam deflexeris. Quod tamen tantum abest, ut id sis effecturus, ut sperem, te multo eum, [quod scio cum ejus bona pace dictum fore,] in omni Regia virtute superaturum. Si quis tamen aderit, [quando a virtute ad libidinem magis homines inclinant] qui tibi, quod minime honestum sit, sequendum proponat, eum tu pro ejus consilio tractabis. Interea vero ab eo virtutem discas, ac quæ hujus generis quotidie agit, tu ea in interiori memoria fideliter recondas, cum res feret, postea ad tuam utilitatem, atque ad communem utriusque gloriam deprompturus. Vale.

ALPHONSO ATESTIO

Bartholomæus Riccius S. D.

Madium Philosophum commendat reliquis Academiæ Ferrariensis Philosophis anteferens. Eos cum pisce comparat, qui, ut ex aqua extractus est, continuo interit, neque quidquam valet; hunc vero in rebus fere omnibus versatum quemvis hominem secum asferre, ut ille ait, ostendit, ingeniumque suum, quo velit, feliciter convertere. Addit in quibus rebus Philosophiæ dignitas, & splendor versetur.

13. **E**T si plane scio quanti Pater tuus Madium Philosophum faciat, qui paucos habet, quos æque diligit, magis autem neminem; quoniam tamen alienus est, [utinam enim aut is in tua Civitate natus, aut ejus Patria tuæ ditionis esset,] eique confecto suo tempore liberum, atque integrum est, quoquo velit, commigrare, si me audias, ita cum Patre tuo ages, ut tantum Philosophum a Ferrariensi Academiâ abduci, te vero tanto Viro spoliari non sinat. Cum hoc cæteros Philosophos non confero; sunt enim omnes omni commendatione digni, & Bucchiferrius, vel etiam Buccaurius, Genua, Portius, & si qui sunt alii, qui Philosophiam profiteantur; si quid tamen id eorum scripta, atque ex suggestu publico explicata probe testantur, quique magis, qui minus in abdita Philosophiæ penetralia perveniant, atque rem ipsam acutius perspiciant, atque ornant, facile declarant, hic quidem cum aliis nobilissimis Philosophis in universis scriptis, quæ in omnibus scholis versantur, explicandis, plurimum valet. Verum in eo solus est, qui Aristotelis Poeticam primum ex publico loco, ut cætera facit, feliciter interpretatus est, tum vero in eam ipsam mox locupletissima Commentaria est editurus. Sed redeo ad Philosophos. Hujus quidem generis plerique, ut a suis studiis ad aliarum rerum agenda rationes abducuntur, piscem imitantur, qui, ut ex aqua extractus est, continuo interit, neque quicquam valet; sic isti ubi non agitur de Cœlo, de Anima, de Deo, muti sunt, neque se Philosophos esse rentur, nisi omnem

ANNÆ ATESTIÆ HERCULIS FILIÆ

Bartholomæus Riccius S. D.

Postquam facere in verbo Thesaurus lussit, neque ex eo a se quidquam surreptum, sed quosdam adulterinos numos in eo repertos a se bonos factos significavit, quatuor Virgilii versuum ex Ecloga VI. Melibœus inscripta interpretationem tamquam ineptam rejicit, suamque subjicit.

15. **T**hesaurum tuum tibi remitto, serius fortasse, quam oportuit. Ignosces. In Thesauro versabar. Magis mirum est, quod remissem, ac non interverterim potius. Sed is non ejus est, scis bene quem significo, amplissimus Thesaurus, ex quo ditari possem; magis, mihi crede, omnes cruciatus tulissem, atque ultra omnia aufugissem maria, quam eum unquam remissem. Sed quoniam verborum est Thesaurus, neque ego eorum sum admodum inops, eum tibi remitto, atque integrum remitto itidem, ut accepi. Ac si quis secus suspicetur, ne aliquid ex eo mihi surripuerim, illum adeat, volvar, pervolvat, numeret vel ad literam. Siquid in eo deesse offenderit, is mecum postea recte furti agat, per me licet. Sin quosdam in eo, ut qui ex quaque gente tantam vim pecuniæ sibi confecerit, adulterinos numos a nobis bonos factos esse deprehenderit, ecquid erit præmii? Id scilicet, ut pars altera in pauciores dies nobis accommodetur. Nam hæcenus ad medium tantum viæ perventum est, eam ut absolvamus, in tua positum est manu. Huic igitur nostro ingens illud onus [satis enim est & crure, & pedibus firmus] imponi jubebis, qui ad me vel validissimo equo validior id perferat. Ac id a nobis etiam habeas licebit, quod neque ab isto Thesauro admodum alienum est, & tibi spero fore pergratum. Nam cum schedulam quandam in Codice manu tua, ut arbitror, scripta offenderem, eam avidè legi. In hac quædam erant in Virgilium, credo ex aliquo tuo Magistro tibi explicata. In his id quoque in Melibœo:

Setosæ caput hoc apri tibi, Delia, parvus,

Et ramosa Mycon vivacis cornua cervi,

Si

Si proprium hoc fueris, levi de marmore tota

Purpureo stabis furas evincta cothurno.

In quo quidem loco cum illud, *si proprium hoc fueris*, exponeret, reliquorum sententiam sequebatur, ut Mycon desideraret, se ea carmina facere, qualia Codrum paulo ante facere dicebat, quod minime verum est. Primum enim versuum scribendorum facultas a Diana non est petenda. Quid enim nunc Dianæ cum Musis? Deinde vox illa *proprium* nihil facit ad eam sententiam. Ne igitur te multis teneam. Parvus Mycon setosi caput apri, ac veteris cervi ramosa cornua Delia dono dat, sed ea aliena erant manu victa. Nondum enim Mycon, qui parvus erat, tantum poterat, qui valentissimas bestias superaret. Itaque Deæ promittit, si ipsius beneficio, quæ quidem in sylvis dominetur, tantum munus suum proprium possit donare, hoc est, caput earum ferarum, quas ipse interfecerit, se eam ex lævissimo marmore in morem venatricis cothurno indutam erecturum. Quæ in nostra sententia vides & personæ rationem maxime convenire, ut venatori adsit Delia in feris superandis, & illud *proprium* non solum aptissime ad hunc nostrum sensum quadrare, sed proprium planissime sentis. Vale, atque Academiæ salutem dic.

ANNÆ ATESTIÆ PRINCIPI

Bartholomæus Riccius S. D.

In edenda Epistola ejus Parenti scripta, atque inscripta se ipsi quoque gratum facturum ait, eamque cum Patre habituram, quali descriptione in suis Latinis literis uti debeat.

16. **E**T si, quæ sequitur, Epistola Herculi Parenti tuo Principi optimo scripta, atque inscripta est, eaque satis superque habere poterat, si tanta ejus inscriptione in vulgus ederetur; ego tamen, Princeps amplissima, qui paulo sum ambitiosior, cum mihi nunc hoc facultatis offerretur, ut tibi quoque in hac ejus editione quodam modo gratificarer, eam cupide arripui, non quod me fugeret, quin tuæ amplissimæ virtutes magis dignæ essent, quæ multis, ac magnis voluminibus celebrarentur, quam hoc modo, quasi laudis gurgula asper-

gerentur. Sed ea a locupletissimis Scriptoribus tibi expectare licebit, utinam possem, a me quoque fortasse alias, addere. Id enim eo tibi animo præstarem, quo Fratri tuo Principi olim feci libentissimo. Nunc autem cum Patre tuo satis habebis, si, qua scriptione in tuis Latinis literis uti debeas, a nobis didiceris. Vale.

A LOYSIO ATESTIO

Bartholomæus Riccius S. D.

Libros tres de Imitatione Alphonso Principi primum inscriptos multo correctiores, & emendatiores Aloyso Fratri in secunda editione nuncupat. Consilii sui causam affert, & quibus rationibus ad idem opus cum Fratre communicandum compulsus fuerit, exponit, eumque hortatur, ne sibi desit in ejusdem Operis præceptis recte, ac sedulo servandis.

17. **S**cripsi ego, Aloyfi, tres hosce libros de Imitatione Alphonso Principi Fratri tuo, mihi que in hisce humanioribus studiis, etiam cum tu in cunis esses, alumno, non tam, ut hoc quoque locupletissimo teste meum erga illum amorem maxime testatum ei relinquerem, quam ut hoc etiam docendi modo illi non deessem. Jam hic tertius agitur annus, cum primum opus est editum, nulli alii inscriptum, quam cui erat scriptum. Nunc vero cum hoc ipsum multo correctius, emendatiusque secundo edere statuissem, ac alicui item Principi inscribere pari ratione statuissem, ex iis, qui se mihi offerebant, cui illud hac sua secunda editione quasi dono mitti posset, te mihi nullus opportunior oblatum est. In omnibus enim, ut omnia diligenter providissem, nunquam id mihi satis cavere poteram, ne viderer, quod ajunt, ex una filia duos mihi generos comparare, ac ex eadem fidelia duos parietes dealbare voluisse. Qua suspicione in te uno prorsus liberatus sum. Nam cum frater sit fere alter cum fratre, in hac mea tibi inscriptione de Fratre tuo nihil detraxero, quod tibi cum eo hac fratris ratione non commune sit. Ad hæc accedit, quod pari amore te prosequi videbor, qui pari etiam munere te sim persecutus. Nam si quid aliud ti-

bi separatim scribere voluissē, nihil erat, aut si erat omnino, certe cum hoc de Imitatione non erat comparandum. Præterea vero, qui ego, qui alios imitari docebam, ab imitatione discederem? qui cum vos conjunctissima voluntate, atque mutuo inter vos maxime amari viderem, hoc modo meis scriptis disjungere, atque separare facile videri possem. Ætas item nunc tua est, quæ Fratris erat, cum illi hoc scripti; studia eadem, par etiam intelligendi ratio, quibus rationibus non solum suavis; sed etiam tractus hoc cum Fratre tuo carissimo tibi communicavi. Quam tamen Fraternam communionem si magis libet propriam tuam tibi efficere, id facile a te obtinere poteris. Neque quicquam aut propinquitatis, aut honestatis rationem violabis; si ita in hujus operis præceptis versaberis, itaque hisce unis operam dabis, ut brevi tui studii nihil te poeniteat. Ex quo isto tuo studio ego tibi polliceor non multum abesse, cum hanc non parvam voluptatem capias. Ingenium tibi non deest, commoditas, quantam vis, datur, a me vero magistro tuo, quod ad hanc rem facit, nihil desiderabis, ut tantum tibi providendum sit, ut tute ipse tibi ne defuisse videare. Vale.

ALOYSIO ATESTIO

Bartholomæus Riccius S. D.

Accipitris, atque ejus generis avium cæterarum usum in vendendo a Regibus, Principibus, ac Primariis Civibus adhibitum novum inventum esse scriptorum optimorum testimoniis confirmat. Gregorium Liliū Gyraldum secus sentientem refellit, judiciumque in eo requirens dilemmate rem totam conficit. Martialis Distichum, quo ejus sententia nititur, ab eo male intelligi ostendit, atque adeo Martiali illud non esse adjudicandum probat. In fine Epistola de Gyraldo conqueritur, quod in amore non satis sibi respondere videatur.

18. **C**UM de me olim quæreres, Aloyfi, utrum accipitris, atque ejus generis avium cæterarum usum in vendendo, uti nunc Reges, Principes, ac Primarii Cives habent, Majores nostri exercuissent? respondi; cum ego

hoc quoque de doctissimis Viris quærerem aliquando ; omnes mihi respondisse , novum esse inventum . Quorum sententiam optimorum etiam Scriptorum sententia postea comprobari ubique offendi . Siquidem apud Plinium nullam mentionem factam esse video ; præsertim cum de ejus avis natura abunde agat , ac ejus etiam mirum aucupii genus , atque huic nostro non admodum dissimile recenscat . Blondus vero in sua illustrata Italia affirmat , CC. annorum plus minus ante ætatem suam id aucupii genus esse adinventum . Blondo Polydorus Virgilius accessit , qui & ipse in eo opere , quod *De verum Inventoribus* inscripsit , in iis , quæ a nostris inventa sunt , reponit . Certe quidem , si Maronis temporibus hæc venatio instituta fuisset , is in quarto *Aeneidos* , ubi Regiam venationem describit , ejus aliquam mentionem omnino fecisset . Quibus rationibus ; atque etiam conjecturis constat , accipitres hominis studio edoctos ad alias aves capiendas apud veteres non fuisse . Quod vero nunc Gregorius Lilius Vir doctissimus ; quique ex aliorum voluminibus , quæ fere omnia lectitavit , multa sibi volumina confecit , solus repertus sit ; qui adversus tot illustrium Scriptorum [quid enim dicam meam ?] sententiam tibi scripserit , affirmans ex hoc Disticho , quod in postremis Martialis Distichis legitur ;

*Prædo fuit volucrum , famulus nunc aucupis : idem
Decipit , & captas non sibi mæret aves ;*

Martialis ætate hanc aucupandi rationem fuisse , non possum non admodum mirari . Nam si re vera tantus Vir ita sensit , ejus judicium valde desidero ; sin hoc modo veteres amicos notare voluit , illius in me amorem , ut de Madio nihil dicam , requiro . Siquidem quod ad judicium spectat , plane videre potuit , illud Distichum inter Martialis Disticha , etiam si in eorum numerum conjectum sit , minime esse reponendum , id quod multi , iique doctissimi Viri multis , ac optimis de causis existimant . Nam si Martiali illud recte attribuatur , aut ante Domitianum illud aucupium in usu fuit , aut a Domitiano , sub cujus imperio Martialis floruit , adinventum est . Quod ante usus hic fuerit , nullum est verbum ; quod vero Domitiani inventum non sit , ex Tranquillo conjici potest , qui cum ejus Principis vitam integram perscripserit , nihil quicquam de hac re indicavit . Legas eam totam diligentissime ,

me, relegas etiam diligentius, si ullam hujusce Regiæ voluptatis significationem reperiās, cum Plinio, Blondo, Virgilio, ac cæteris, qui cum eis sentiunt, victus sum. Neque dicendum est, Svetonium, qui omnes ejus Principis, lusus, ludos, voluptates, atque delicias etiam turpes, hanc laudatissimam aut scientem dissimulasse, aut ignarum præterisse. Quin id quoque meæ sententiæ suffragari posse videtur, quod in ipso Disticho verba sunt, quæ magis eam avem significant, quæ utuntur aucupes ad cæteras aves in retia illiciendas, quam iticem appellant, quam aut accipitrem, aut quamvis ejus generis avem aliam. Nam cum dicit *decipit*, id ad accipitris venationem nostram nequaquam referri potest. Nullis enim is agit insidiis, nullis laqueis, nullis retibus, immo vero ille aperte in eas irruit, atque capit. Præterea vero ubi ait: *O captas non sibi moerent aves*. Neque hoc est accipitris, qui prædæ suæ non prorsus est expers, ut ea est, quæ in retia cæteras illicit, ut columbi, ut turtures, & cætera id genus. At prædo mecum facit. At ex hoc ipso, quod Distichum sibi minime constar, illud adulterinum esse magis conjici potest, quod eorum versuum ea ratio sit, quæ singulis duobus versibus sententiam compleat, neque perpetuum quid agat, in quo scribendi genere cuiusvis facile fuit in suo codice aliquid tale addere. Id quod etiam in aliis hujus generis scriptis deprehensum est, ut in Hippocratis Aphorismis, item in Aristotelis Problematibus, in quorum numerum, quia singula singulas sententias habent, nonnulla, quæ a doctissimis medicis neque Hippocratis, neque Aristotelis esse existimantur, passim leguntur. At quis sui studii gloriam alteri adscribat? aut non sibi, quam alteri, sua scripta malit nuncupare? Scilicet, magnum quidem volumen, ingens gloria, duo versus sunt, qui multo facilius soli periissent, quam si eo modo cum quovis aliorum conjungerentur. Quid si ille satis habuit, cum videret suos versus ita a quibusdam probari, ut Martialis esse crederentur? quasi vero longiora etiam scripta non alieno nomine jam multos annos lægantur, neque plane constet opus ad Herennium nunquam a Cicerone scriptum, cui tamen uni adscribitur. Item ad Octavianum [ut nihil dicam de Sallustii Oratione in Ciceronem, atque de ea, quæ illi responder, quas neutrius eorum esse, sunt doctissimi Viri, qui affirmant] Episto-

la illa bene & longa, & docte scripta, quæ Cicero-
nis haudquaquam a doctis Viris agnoscitur. Id quoque
accedit, quod illud Distichum in postremis adscriptum
est. Est enim octavum ab ultimo; neque etiam satis ap-
pto loco; qui erat, si post sagacis canis venationem po-
situm fuisset; ut omnibus conjecturis, atque etiam ra-
tionibus constet, eos versus minime esse Martialis; quo
uno comprobato, hoc aucupii genus apud veteres mini-
me fuisse comprobatum est. Sed hoc quantum ad ejus-
judicium pertinet; nunc autem quamobrem in amicitia
perpetuo mecum non manserit, videamus. Hic per un-
decim annos, quos a me unice observatus est, satis in
amore visus est respondere. Jam vero biennium est, cum
nulla causa, quam asserre possit vel ineptam, non so-
lum non amare, sed etiam me odisse, atque de meo
nomine detrahare cœpit, ut primum in Dialogo de Poe-
tis, & si id quidem paulo tectius, cum me inducit de
amicis ea dixisse, quæ mihi ne in mentem quidem una-
quam venerunt, tamen si possum id illi ignoscere, quan-
do is nulli in eo sermone, ne suis quidem Gyraldiis
fratribus, Pignæque, cui plurimum debebat, ignovit.
In hoc vero, quod in me unum instruxit, sese totum
indicavit. In quo tantum adest, ut me suo loco non
ambitiose laudet, ut sæpius, ut etiam palam mordeat:
*Quid enim, queso, est, nemine impellente, artes ingenuas
studiose [ut ipse ait] capeffere?* Scilicet nesciebat, me ti-
bi in iis studiis operam dare, atque eam operam dare,
quæ ab omnibus probaretur; nisi forte is unus eam non
satis probat; quod si ita est, mehercule, omnem illi
hanc injuriam facile ignosco, qui ita de me sentiat. In
postremo vero Dialogo inquit; *Quamquam & longe plu-
ra, & meliora ex tuis Præceptoribus audire possis.* Audistin
ex tuis Præceptoribus? de me, qui solus sum tibi, atque
unicus Præceptor, dixit de *tuis Præceptoribus*, suam im-
probabilitatem significans. At levia hæc sunt, & puerilia.
Recte quidem. Sed majora, ac graviora non habuit.
Quibus ego nihil respondeo. Ego enim constantiam meam
in eo amando præstare malo, quam ejus in me maledi-
ctis parem gratiam referre. Legentur ejus, scio, in me
scripta aut palam, aut alieno nomine aculeata. Legen-
tur meæ contra ad eum Epistolæ amoris plenæ. Legetur
Dialogus in Ferrinii morte, qui meum hunc in eum a-
mo-

morem probe testabitur. Legitur in meo opere, quod de Imitatione scripsi, non semel ejus honorifica mentio. Sed ne te pluribus, atque etiam odiosis teneam, habes, Aloysi, de accipitris venandi usu Gyraldi sententiam, habes Ricci magistri tui cum ceterorum omnium sententia opinionem; tuum erit, atque adeo Parentis tui judicium, utra magis vobis probetur. Certe ego in ea tibi explicanda officium meum, nullas autem Junii Calendas secutus sum, neque extra rem, sed cum re ipsa conjunctus, in officio meo permansi. Vale.

II. ANALYSIS AND RESULTS

... **FIN. IN S.** ...

1. The first of these is the fact that the
 2. of the United States, and the fact that
 3. of the United States, and the fact that
 4. of the United States, and the fact that
 5. of the United States, and the fact that
 6. of the United States, and the fact that
 7. of the United States, and the fact that
 8. of the United States, and the fact that
 9. of the United States, and the fact that
 10. of the United States, and the fact that

BAR-

BARTHOLOMÆI RICCI

EPISTOLARUM

FAMILIARIUM LIBRI IV.

A D

JO. BAPTISTAM CAMPEGIUM

Balearium majoris Episcopum.



Rave est, Campegi, cum quis alteri debet, quo debitum solvat, is parem non habet facultatem; multo vero etiam gravius, cum nullo prorsus modo est persolvendo. Siquidem reddere beneficium multo magis tenemur, quam dare. Des enim, nec ne, in tua situm est voluntate; qui vero acceperit, nisi ejus probe memor sit, indignus est, (ut omittam, quod multis etiam pejus obesse non possit,) in quem iterum conferatur. Qua debitione, atque remunerandi ratione ego tibi jampridem valde obstrictus sum. Audio enim de multis, iisque doctissimis Viris, in primis autem de Robertello Viro in optimis studiis omnium judicio præstantissimo, te mea scripta & cum summa animi delectatione legere, & minime jejune, ac frigide commendare: separatim autem, præter

rer universam scribendi facilitatem, id illis tri-
 buere, ut quæ ætatis nostræ sunt Latine di-
 cenda, quæ prope innumerabilia sunt, hæc a
 me ita ad veterum rationem dicer, ut parum
 ab ipsis Latinis distare videantur. Quod quo-
 niam ab eo Viro, quem optima cum rerum
 cognitione, tum etiam summo iudicio prædi-
 rum esse, neque id, nisi ex animi integritate
 dicere, scirem, in me proficisceretur, admo-
 dum, ut vere fatear, lætabar. Rebar enim
 fortasse id ita esse, atque quod a me non fa-
 ciebam, aliquid esse me, ut tuo prudentissi-
 mo, atque fidelissimo iudicio crederem, fac-
 le adducebar. Pro qua mea summa cum volu-
 ptate, tum etiam minime vulgari laude, tan-
 tum tibi debeo, ut, cum multa etiam retu-
 lero, semper tamen multo plura, quæ referre
 debeam, relinquatur. Neque enim cum idem
 de tua ingenua educatione, de tuis optimis stu-
 diis, de tua in omnes homines humanitate,
 de tua in egenos, quod tuæ proprium est per-
 sonæ, charitate, atque de cæteris tuis egre-
 giis virtutibus ea dixero, atque prædicaro, quæ
 omnibus constant, atque pleno ore commen-
 dantur, fortasse aliis minime ingratus videri
 potero, qui in laudando mutuo tecum faciam,
 mihi certe non satisfacero. Quare ut ad hæc
 de meo quoque, siquid possem, adderem, hanc
 pusillam, quam tibi referrem gratiam, quan-
 do

do, quod maxime cupiebam, majorem, atque tuo merito dignam nequivi, ex meis studiis decerpſi: id autem est, ut quos quatuor mearum Epistolarum libros superioribus octo addere, atque edere statui, eos tibi gratissimo animo inscriberem, atque dicarem. Nisi tamen in hac quoque parva referenda gratia magis novum munus a te accipere, quam veteri gratiam referre, videri possim. Quando ista tui nominis inscriptione multo plus dignitatis meis scriptis, quam tibi ex eorum dedicatione relatae gratiae evenire possit; spero tamen, cum quae tua summa bonitas est, tum etiam bonorum virorum judicium, fore, ut magis quod animo hoc fiat, quam quanti res sit, spectes. Cetera quidem, quae in re versantur, aut materia, aut artificium, haud illa quidem contemnenda, atque in parvo pretio sunt habenda, sed ea tamen ut externa ponderantur. Animus vero is est, quo totius muneris nobilitas illustratur. Sed utcunque sit, aut accepti beneficii gratia, aut ejus ipsius gratiae multiplicata ratio, in eam ego partem accipio, quae quid in optimam acciperem. Neque enim cui plurimum debeam, multo etiam magis debere me, unquam pigebit. Habe igitur, Praesul amplissime, quatuor mearum Epistolarum libros, hoc est, eorum scriptorum, quibus te maxime delectari dicis, sub tuo nomine editos, si

non

non relatæ tui veteris officii , saltem acceptæ
novæ gratiæ loco , meque , de quo antea tua
sponte tam honorifice loquebaris , nunc tui ob
singulares tuas virtutes studiosissimum , in tuo-
rum numero aliquo habe. Vale.

XV. Kal. Januar. MDLXII.



BARTHOLOMÆI RICCHII

EPISTOLARUM

ALTERIUS VOLUMINIS


LIBER PRIMUS.

CAROLO AUSTRIO PHILIPPI FILIO

Hispaniæ Principi

Bartholomæus Riccius S. P. D.

Orationem de Caroli Caesaris Aui factis illustribus in ejus funere habitam ei dicat, eundem hac etiam Epistola summis laudibus extollens. Ut autem ea in plurium manus perveniat, Orationi non parum ponderis, atque ornamenti accessurum addit, si ipsam cum sui simulibus Principibus Princeps communicarit.

1.  Uo sunt, Carole Princeps Amplissime, quibus homo erga hominem maxime afficitur, tacita naturæ vis alterum, virtutis nobilitas alterum. Multi enim sunt, qui naturali quadam propensione primo aspectu ad alii bene cupiendum facile adducuntur; contra vero non pauciores, qui, ut quosdam semel viderint, eos libenti animo videre non possint. Virtutis vero quanta vis sit ad eos, in quibus est, amandos, qui non norit, indignus est, qui ab ullo ametur. Horum ego utroque ita in Carolum Cæsarem Avum tuum viventem afficiebar, ut paucis concederem, qui id ardentius facerent. Quare etiam, quoties iis sermonibus, qui de ejus egregiis factis inter homines, ut sit, haberentur, aut casu interessent, aut etiam dedita opera eos instituissem, hujus partes semper enixe tutabar, in quo conflictu, ut ille suos, ego meos adversarios semper frangebam. Nunc vero cum is feliciter decessisset, meum esse duxi, ut in mea erga tantum Imperatorem sententia

tia permanens, quem vivum tantum amassem, ejus quoque mortui memoriam pie colerem; hoc est, si in ejus funere res ab eo præclare gestas commemorarem, quando laudarem dicere hominis esset insolentissimi. Itaque feci. Sed quid ego me fecisse dico? qui pro earum multitudine vix millesimam partem attigisse videor? Quis enim tantus stilus? quod tantum eloquentiæ flumen? quæ tanta Orationis ubertas, atque dicendi copia est, quæ Caroli Cæsaris facta illustria vel longis voluminibus enarrare posset? Sed quicquid id fuit, quod ego attigi, cum id in hominum manus exire cuperem, atque eorum in primis, qui eadem animi affectione in illum & fuissent vivum, & essent etiam mortuum; tu mihi unus omnium visus es, Carole Princeps, cui non solum hanc meam laudationem legendam mitterem, sed eam etiam hoc suo in vulgum publico exitu reverenter dicarem. Nemo enim, uno Philippo Patre tuo semper excepto, qui, quam ipse facis, illi propius accedat. Neque est, qui laudes alicujus libentius audiat, quam quicum earum maxima pars, ut hujus tecum sit, communicetur, præsertim ista ætate, quæ omnibus optimis opinionibus imbuenda est. Et si me non præterit, quantæ tuæ quoque sponte ad omnem summæ gloriæ amplitudinem erectus sis; cum tamen in Majorum tuorum gloriam aut legendo, aut audiendo intueberis, non dubito, quin multo ardentius ad eam consequendam inciteris. At, Ricci, [quispiam hic] tu quidem in Cæsare Carolo excolendo valde commendandus es. Qui enim Solem lucere negant, ejus lumen qui videant prorsus indigni sunt. Neque fortasse improbandus, si cum multis aliis tuum istum in eum animum hoc quoque modo palam testari voluisti, in eo vero, quod cum Illustrissimo Principe homuncius, atque senio confectus, neque illi quicquam ante vel de nomine cognitus tam familiariter agas, vide ne parum considerati sis viri. At ego, cum ejus Regiis virtutibus, tum etiam illa natura, quam omni humanitate, comitate, facilitate conditam esse audio, fretus, tantum abest, ut in hac mea animi erga illum ingenua significatione quicquam honestæ accusationis pertimescam, ut etiam sperem, huic meæ Orationi non parum ponderis, atque ornamenti accessurum, cum ille illam cum sui similibus Principibus Princeps communicarit.

Hoc

Hoc illi. Nunc ad te redeo. Si quid est omnino, Carole, quod mihi in hac re dolendum sit, illud quidem est, quod Orationis granditate, ut par fuit, Cæsaris Caroli Avi tui rerum gestarum magnitudinem æquare non potuerim. Equidem omne studium, atque omnem operam adhibui, quantaque in me fuit, si modo ulla est, dicendi facultate, atque virtute contendere, ut id assequer. Sed quis tantum ejus tubæ sonitum? quis armorum terrorem? quis militarium tormentorum tonitrua? quis præliorum honorificos concursus? quis fluctuum ingentes fragores? quis bellorum ipsorum fulmina? quis reliquorum factorum summam ejus animi altitudinem dicendo æquaret? Immo vero quis tantus Orator reperiri posset, cujus oratio vel ad horum quodvis non languesceret, non concideret, non deficeret? quique cum omnia omni Orationis ornatu collaudasset, frigide tamen, jejune, atque languide non laudasset? Ergo ego in hoc quoque parum consulte feci, qui id ausus sum, quod assequi minime quirem. Sane quidem; sed quid facerem? Meo illi desiderio vim facere non potui. Vicit me animi mei in illum naturalis affectio, ut quicquid possem, quando quod vellem, non liceret, non omitterem. Quamquam in eo socios habere præstantissimos Viros; qui hoc quoque ausi sunt complures, multo levius erratum meum facere potest. Neque postremo cuiquam vetitum est, quia Solem interius intueri non possit, ne ejus quoque lumen longe lateque fufum intueatur; ut ego, qui Orationis meæ aciem ad ejus virtutis splendorem præstam esse sentirem; hæc tamen, quæ tibi de illo mitto, ex ejus aliquo Numine meo stilo persequi non diffiderem. Habe, igitur, Princeps Amplissime, quæ de Caroli Cæsaris Avi tui eximia laude strictim a nobis percurfa sunt, cætera a cæteris, si tamen hoc ipsi quoque assequi poterunt, & majori dicendi copia pertractata, & omnibus Oratoriis luminibus ornata, atque distincta interea expectans. Vale.

BARTHOLOMÆUS RICCIUS

Herculi Campegio S. D.

Epistolarum suarum, quæ sub prælo sunt, impressori se mandasse significat, ut ei copiam faciat, volumen integrum, cum opus absolutum erit, se missurum pollicitus. Modeste tributam suis scriptis a Robertello laudem elevat.

2. **U**tinam ita esset, quemadmodum Robertellus tuus de nostris scriptis tibi retulit. Omnes enim, qui hodie scribendo nomen aliquod sibi confecerunt, facile superassem; sed id eum cum amicitiae nostræ, tum optimæ naturæ suæ magis, quam quod ea ejus generis sint, quæ a tanto Viro tantopere laudentur, dedisse excuso. Is enim a me tuo nomine mearum Epistolarum, quæ istic sub prælo sunt ad octavum librum, volumen petiit, idque te valde cupere significans; cui ego statim rescripti, atque una simul meo impressori scripsi, ut earum eam copiam, quam velles, tibi faceret. Equidem, ut opus absolutum esset, expectabam; postea, si in primis, quibus illud misissem, non esses, certe in postremis non fuisses. Tametsi ego mea scripta magis a mediocriter instructis, quam a tui similibus elegantissimis Viris legi malim. Novi enim tuum judicium vel ab eo tempore, quo te Bonamicus noster domi tuæ cum fratre tuo majore natu in hisce nostris studiis institueret, cum vero postea Venetiis multo magis. Patavii vero ubi cum ætate, tum etiam optimis studiis auctior factus es, quid omnibus Bonamicus de tuo ingenio referret, optime recordor. Sed tua tamen humanitate fretus id libenter feci, qui de nullo, nisi modeste loqueris, & si quid in eorum scriptis desideras, id tibi soli desideras. Habe igitur a tuo Riccio volumen, quod petis, integrum, cum opus absolutum erit, expectaturus. Vale.

BARTHOLOMÆUS RICCIUS

Thomæ Cuspip. XL. Viro S. D.

Fuschinium amicum suum commendat, ut inter præstantissimos Juris consultos delectus causis publicis dijudicandis præficiatur, ejus integritatem, & scientiam in multis muneribus publicis ab eo exercitis perspectam proponens. Rogat, ut animum suum virtute ipsa in Fuschinium satis instructum sua quoque causa etiam incitatus urgeat, ut omnino in iis decernatur, nullamque se in hac commendatione excusationem accepturum denuntiat.

3. **Q**Uam ego in amicis meis commendandis sim diligens, quaque id meliore de nota facere soleam, plane scis. In hoc uno tamen Fuschinio tibi commendando cum omnia fecero, quibus tibi commendatissimus sit, eum vulgariter commendasse videbor. Tot enim; ac tantæ necessitudinis causæ inter nos intercedunt, ut, nisi, quod petimus, nobis obtinebis, minime mihi sim satisfactorius. Meus primum Civis est, hoc est, cujus gloria mecum quoque cum cæteris Civibus communicatur. Civitatis vero conjunctionem vicinia, atque eadem Sacra conjunctionem efficit. Huc accedit, quod ego non solum ejus suavissima consuetudine, sed in Jure etiam optimo jam multos annos usus sum consilio. Verum singularis ejus integritas, quæ multis, ac magnis in rebus sæpius perspecta est, cur ego hunc tanti faciam, maxima est causa. Hic ab amicis suis, se eorum opera in iis præstantissimis Juris consultis, qui vobis multi propositi sunt, ex quibus postea deligatis, quos causis publicis dijudicandis præficiatis, esse adnumeratum, atque in eorum albo descriptum, sit certior, quorum cum amicissimi erga se animi operam, tum vestram etiam tantam dignitatem omnium sibi gratissimam accidisse, ut demonstraret, omnibus eorum, atque cæterorum amicorum commendationibus in eam incumbit, meque per unum in primis, quem apud te, atque aliquid etiam tuos Collegas plurimum valere jam pridem novit. Hunc igitur tibi nunc, paulo post cum aliis hanc eandem illi operam daturus, non quantum ejus virtus

po-

postulat; quæ omnibus per se commendatissima esse debet sed quantum mutua, atque summa inter nos benevolentia me facere cogit, commendo. Habebis Virum in causis dijudicandis exercitatissimum, qui primum, idque admodum adolescens, Ferrariæ quæstionum, postea Regii Lepidi provocationum Iudex fuit; quibus absolutis sub Strotio Gubernatore totum illud tempus iudicavit. Ferrariam rediens provocationi iterum præficitur, Carpensensem postea, deinde Regiensensem Præturam gessit, nunc vero totius Ferrariensis Ditionis cæterorum Iudicum, quem Sindicatum dicunt, animadversionem cum publica Feudi interpretatione feliciter pergit exercere. Sed, quod familiam ducit, æquissimum Iudicem, quemque nullis reus aut precibus, aut præmiis a recto iudicio sit, vel quantum pilus est, deducturus. Quibus bonis etsi scio jam tibi, ut tui simillimum, hunc jam valde commendatum esse, tamen, ut aliquid ipse quoque addam de meo, præter hoc de eo verissimum testimonium, te rogo, ut animum tuum, quem video virtute ipsa in hunc satis incitatum, mea quoque causa etiam incitatus urgeas, atque ita cum Paleotio, atque Bolognetio agas, ut noster omnino in iis decernatur. Nullam enim in hac commendatione excusationem accipio. Pro quo tuo isto summo beneficio promitto tibi, Cives tuos nunquam satis dignas gratias tibi acturos, atque etiam habituros; me vero, si quid tibi amplius debere possum, id aut hac una ratione, aut nulla alia debiturum. Vale.

BARTHOLOMÆUS RICCIUS

Herculi Malvetio XL. Viro S. D.

In commendando Fuschinio se suffragatores optimos habere, gratiosos Viros, ejus Collegas ostendit; sed rogat, ut se quasi institutæ petitioni duces, atque gubernatorem adhibeat, cujus auctoritate futurum sperat, ut Fuschinius Vir summa integritate, atque in iudicando usu, ac scientia præditus inter primos renuntiatur.

4 **M** Agis tua singulari humanitate, quam nostra ultra veteri consuetudine, qui vix semel, atque
 E 2 ite-

iterum ad Bevilacqua tuos collocuti sumus , hoc , quod facio , adducor , ut faciam . Satis enim mihi arbitror futurum , si , quod a te contendam , honestum , atque pro honesto Viro me petere , tibi comprobaro . Ego , Malveti , valde laboro , ut Fuschinius Vir optimis moribus præditus , neque inter Juris consultos postremus , unus ex iis , quibus vos , ut dicitis , Rotam conficitis , decernatur . Scio complures vobis optimos Viros , Juris autem consultos peritissimos esse propositos ; sed noster quoque cum iis facile numerari potest . Quare ego hunc tibi , multisque aliis , ut suos alii aliis , commendo : in qua nostra petitione optimos suffragatores habemus , gratiosos Viros , Collegas tuos . Verum si tu te quasi institutæ petitioni ducem , atque gubernatorem adhibebis , non dubito , quin primi renuntiemur . Scio quantum in isto XL. Virum Collegio valeas , ac quanta auctoritate in universa sis Civitate . Unum mihi tanta in hac commendatione mea deesse videtur , ut antiquior , atque frequentior usus inter nos intercedat . Verum cum illum cum universa mea Ricciorum familia , quæ tota tibi addicta est , habeas , mecum quoque ut habeas , oportet . Tametsi non hoc tantum nostra , aut cujusquam gratia peto , quam Fuschinii ipsius summa integritate , atque in judicando veteri usu , ac scientia fretus postulo . Quod si , ut spero , impetro , promitto tibi , fidemque meam obstringo , te nulli unquam meliori , atque prudentiori Viro , atque etiam magis grato operam , ac studium tuum præstitisse , brevi esse cogniturum ; me vero tibi ita obstricturum , ut qui tibi omnibus officiis obligati sint , nihil iis maximæ debitionis sim concessurus . Vale ,

BARTHOLOMÆUS RICCIUS

Camillo Paleotio XL. Viro S.D.

Dolet, sibi nihil recte ex omnibus prooessisse, quæ domi constituerat, se Bononia facturum; ex iis autem, quod in Urbe illum non offenderit, ut cum eo ageret de duobus Poematis Heroico versu scriptis a Camillo Paleotio ejus Gentili, hortaturque, ut ea publici juris faciat, neque diutius in hominum ignoratione cum universæ Paleotia Gentis ingenti gloria jacere patiatur.

5. **C**Um ego Bononiam multis de causis proxime venissem, nihil eorum, quæ domi constitueram istic agenda, recte mihi processit. Omnia enim aut adversâ accidere, aut saltem, ut volebam, non facile evenere; ut etiam in levioribus negotiis fortuna hominem ludibrio habere non negligat. In iis autem id quoque mihi adversum accidit, quod te in Urbe non offendi, neque illos etiam quinquaginta dies, quibus ego istic mansi, tu unquam interea peregre domum redisti. Tecum enim mirum in modum esse cupiebam. Nam cum abhinc quadraginta annos plus minus Camilli Paleotii Gentilis tui præstantissimi Viri, cujus nomen tu fortasse refers, duo præclara Poemata, utraque Heroico versu scripta legissem, alterum, quod ipse in Virgiliana ut dicunt, prælectione, alterum Ovidiana ex publico loco recitasset, ita ea mihi tum argumento, tum scriptionis dignitate probata sunt, ut avidè postea semper expectarim, ut hæc aliquando tandem alicunde in vulgus exirent. Cujus mei desiderii tamen nunquam compos sum factus. Quin etiam interdum subveritus sum, ne aut aliquo malo fato perierint, aut, quod ab improbis fieri solet, aliquis sibi ea interverterit; de quibus, quid factum esset, de te facile scire posse sperabam. Quod meum desiderium Marco quoque Tullio Beato optimo Civi tuo exposui. Quin etiam Virgilianæ argumentum illi totum explicavi. Hoc autem ejus erat incipitium:

*Ivorat Imperio magni genitoris opacam
Umbrarum in sedem, & late squalentia regna
Interpres Divum.*

Hæc pauca mihi tantum hæſere. Quæ carminæ, atque etiam reliqua, (non enim arbitror, tantum Virum hæc ſola ſcripſiſſe,) ſi apud te ſunt, miror, quod non videas, quam diu in hominum ignoratione jaceant, tam diu cum illis: & ejus, & tuam, & univerſæ Paleotiæ gentis ingentem gloriam jacere. Si vero penes quempiam tuorum conduntur, tua eadem cura eſſe debuit, ut inde quoque in vulgus eruerentur. Quod meum deſiderium, vel etiam, ſi mavis, conſilium, ſi tibi nimis familiare videbitur, tuam humanitatem, quam ab omnibus prædicari audiebam, quaque ego fretus ita tecum egi, excuſabis; aut ſi quicquam omnino in me accuſare voles, etiam ſummam erga ejus Viri vel manes ipſos benevolentiam accuſabis, qui hac mea cupiditate nihil aliud, quam ejus gloriam; quid enim memoriam dicam? ex Inferis in hanc lucem eruendam eſſe cupio. Vale, ac Cuſpio collegæ tuo meo nomine plurimam ſalutem dicito. Ferrariæ XVI. Cal. Decemb. MDLVII.

BARTHOLOMÆUS RICCIUS

Camillo Paleotio S. D.

Amici laudes tamquam a laudatiſſimo Viro profeſſas ſibi gratiſſimas accidiſſe proſitetur, ſequæ in poſterum ejus hoſpitio peramicæ oblato uſurum promittit. De Camilli ejus Patruſ verſibus Heroicis cum Epigrammatibus ad ſe miſiſſis gratias agit, judiciumque ſuum de iis exponit, eorum inventionem, inventorum aptam diſpoſitionem, & elocutionem miris laudibus extollens, & Poeticæ artis ornamenta omnia, ac virtutes in iis ineſſe declarans. Pro verſibus autem ſuum de Imitatione ad eum opus miſſit, illos ſibi ſoli miſſos, iſtud vero jampridem cum cæteris omnibus communicatum ſignificans.

6. **C**onſtitueram, quod nunc per literas tecum ago, brevi me coram eſſe facturum, ſed cum meum iſtuc adventum aliud ex alio incommodum diſferre pergeret, ne diu tacendo meam gratiſſimam naturam offenderem, tuam autem ſummam humanitatem contemnere viderer; malui hoc modo neutri deeſſe, quam diu-

diutius expectare, dum facultas daretur, ut coram utriusque satisfacerem; quæ tamen si detur, non eam non avidè arripiam, ut hoc meum officium multo etiam pluribus præsens renovem. Ego te, Paleoti, jam in eo amicorum numero, qui mecum omnibus necessitudinis, causis conjuncti sunt, facile numerare possum, quando meis veteribus amicis novus amicus neque benevolentia, neque officii quicquam concedis. Dii boni, quid amicus, aut magis benevole a quoquam eorum, qui mihi in intimis sunt, quam quod tu proxime facis, rescribi posset? Nam, ut omittam, quod nullum mei laudandi finem facis, quæ laus, quoniam a laudatissimo Viro proficitur, mihi ut gratissima accadat, necesse est; atque unum illud tantum recenseam, quod me tam familiariter accusas, qui vel te absente, quibus multis diebus Bononiæ fui, tuorum hospitio non sum peramice, usus, quam tuam liberalissimam accusationem, etsi mihi iniquam, qui te ac tuos tantum propter singulares virtutes vestras amarim, præterea vero nihil neque usus, neque verborum inter nos intercessisset, quoniam tamen summi amoris, atque humanitatis erga me tuæ, et plena, non possum non valde probare, atque vehementer amare. Quem meum errorem, (ita enim meam modestiam tua liberalitate appellas) ut dedita opera corrigam, non solum mones, sed etiam rogas. Quod ego me facturum tibi recipio, cum ut ad animi conjunctionem hospitii quoque necessitudo accedat, tum etiam, ne ingratus videar, si tuam tantam liberalitatem totò non accipiam animo. Non enim illum minus grate facere arbitror, qui accepti beneficii nullam gratiam referat, quam qui benigne oblatam non accipit. Quid vero, quod in Camilli Patruuli tui versibus tuo quoque officio meam expectationem superasti? Nam cum ego illos tibi ad Gentis tuæ gloriam edendos tantum hortarer, tum mihi eos describendos curasti, ut, quoad eorum exemplum cum cæteris publice communicaretur, hoc ego me interea privato perfruerer. Neque totum solum, de quibus ego tecum agebam, exemplum mihi misisti, sed ad majorem tuæ erga me benevolentia significationem, Epigrammata iis quoque addidisti. Quod vero me rogas, ut quid ego de omnibus sentiam, id ad te liberè pertribam, atque etiam, ubi videbitur, epinendam, et a

que corrigam , respondeo , hoc quoque magis tuam singularem humanitatem præferre , quam ad meam ejus rei scientiam pertinere. Equidem , Paleoti , tantum in eo scriptorum genere profeci , quantum qui ea cæteris explicant , non autem quantum , qui natura ad illud exercendum & nati , & facti sunt , quos nihil latere potest , in quo aut quid vitii , aut virtutis insit. Si quid ego tamen in docendo ex ejus , ut sit , artificio , atque virtute detexi , id , ut in isto tuo desiderio depromam , omnem operam dabo ; sed non eo , ut in illis quicquam corrigam , verum ut tuæ honestissimæ petitioni obsequi voluisse videri possim. Primum igitur in eo genere versuum , quæ Epigrammata appellantur , quibus cum de amoribus suis , tum etiam amicorum varie ludit , pictorem rudem imitari videtur , qui hominis formam , quam aut ex aliquo optimo signo , aut mente sua etiam meliori sibi conceperit , primis suis penicillis in suis tabulis effingere conatur , quod quidem suis optime diductis lineis facile facere poterit , sed suis certis coloribus ad vivum eam nondum exprimere didicerit ; ita iste tuus in primis suis carminibus faciendis ludere videtur , qui nondum polite , atque suis luminibus carmen suum illustrabat. Ut vero multas tabellas experiendo confecit , ac naturæ longum usum adjunxit , optimus omnium rerum imitator est factus , ut in Heroico , in quo omnes colores , omnem artem , omnem dignitatem , omnes splendores consumit. Tria sunt in quibus omnis Scriptor vertatur ; inventio , inventorum apta dispositio ; elocutio. Hæc omnia in illo splendide florent. Mirus enim , si quis alius , est in inveniendis ; in dispositione cave , quicquam eo compositius videas , aut in quo planius perpetuum filum servetur. In ejus vero dictione omnia veterum lumina eluceant , omnes virtutes extant. Grandiorem Poeticam orationem efficit epithetum aut proprium , aut aliunde quasi mutuo sumptum. Translatio , imago , comparatio in magnis Poetæ ornamentis ponuntur. Brevitas , cum res postulat , auditorem recreat , cum etiam suo loco copia spatietur , ejus animum mirum in modum oblectat. Rem ita enarrare , ut ante oculos geri videatur , summa Scriptoris laus est. In decoro vero servando , hoc etiam a natura ausum discere ; videre quid deceat , quid non ,

non, idque optime præstare, non solum in præstantioribus scriptis, sed etiam in scena maximam laudem tulit. Unus postremo proprius est Poetæ numerus, quo uno cum auditoris aures maxime permulcentur, tum se Poetæ laus concinnissime extollit. Quæ omnia ita noster [quid enim semper tuus dicam?] sua certa possidet, ut ex eorum virtute perfectam sibi compositionem conficiat. Recordor, me jam abhinc multos annos Andream Navagerio homini doctissimo, sed in primis summo iudicio, hujus Heroicum Virgilianum legisse. Is adolescentem istum admirabatur, mireque commendabat. Sed illum terris Dii invidere, itaque nobis illum nimis cito sibi eripere. Nam si huic in tot bonis unus vitæ cursus longior, qui multis bestiis in hominum forma datur, concessus fuisset, veteres Virgilios ætati nostræ repræsentare potuisset. Sed ita est; mortem optimum quemque celerius rapere, ignaviores contemnere, atque, ut in sua ignorantia longissime dormiant, sinere. Sed ut ad me tandem redeam, ego, mi Paleoti, pro isto tuo, quo me patrio prosequeris amore, summa te observantia colam, in qua, ut te cum cæteris tui similibus superem, omnia conaturum polliceor. Pro tuis autem verbis opus meum tibi de Imitatione mitto, in eo quidem inferior, quod tui versus mihi soli sunt missi, meum autem opus tibi cum cæteris omnibus jampridem communicatum habes. Vale.

BARTHOLOMEUS RICCIUS

Camillo Paleotio XL. Viro S. D.

Fuscinium antiquæ fidei, & bonitatis Virum in iudicando exercitatissimum enixe ei commendat, ut suffragatione sua cum cæteris XL. Viris Collegis Rota, quod dicunt, Iudicum numero adjungendum curet. Commendationis æquæ ratio mira sane est, ac singularis.

7. **Q**uoniam virtus ipsa, in quibus perspecta sit, eos sua sponte valde commendatos efficit, neque iis præterea quicquam alienum opus est ad omnia impetranda, ut qui omnibus per se dignissimi sint; ego ut amici mei in omnibus rebus integritatem, in iudicando
vero

verò summam scientiam cum summa æquitate conjunctam ostendero, satis huic meæ commendationi fecero. Joannes Baptista Fuschinus Vir summa integritate præditus, atque in utroque Jure optime institutus est, quique domi, forisque multos Magistratus integerrime gessit, in quibus Carpendis, atque Regiensis Præturæ æquissime sunt absolutæ; nunc vero Ferrariæ non solum de cæteris Judiciis, [quem Syndicatum dicunt] æque judicare, ac Feudum publice interpretari pergit; sed cum, quæ multa huic quotidie privata compromissa, tum etiam quæ a Principe ipso minime vulgares causæ deferuntur, pari æquitate componit, atque iudicat; in una vero vera Religione, quod maxime ad rem facit, colenda Vir est probatissimus. Sed ne te pluribus teneam, ac rem uno verbo tibi absolvam, antiquæ Vir est & fidei, & bonitatis. Hæc sunt, quæ ego tibi de Fuschinii virtute cum polliceor, tum etiam fideliter sum præstiturus. Hic in eorum præstantissimorum Virorum numero conscriptus est, ex quo ipse cum cæteris XLII Viris Collegis tuis Rotæ, quod dicunt, Judicum numerum estis postea confecturi. Ego, Paleoti, si mea causa a te peterem, ut in hac petitione illi adesses, continuo per Camilli patrui tui clarissimi Viri, cujus tu es nomen, & prudentiam refers, sanctissimos cineres te obtestarer; deinde per nostram, quam scis paulo antè incaptam esse, amicitiam omnibus precibus orarem, ut eam hoc uno officio, quasi optimo fundamento, communires, atque fulcires. Adderem singularem humanitatem tuam, qua me domi tuæ accepisti, ac prope hospitii religionem interponerem. Postremo, quæ in me non levia officia contulisti, ut ea in Fuschinii petitione cumulares, te etiam atque etiam rogarẽm. Sed quoniam una virtus agitur, eaque per se satis commendata est, his præsertim, qui ea quoque maxime sint præditi; unum ego tantum agam; ut, si quid in ista tua suffragatione aut animo tuo, aut Fuschinii virtuti, diligentioris studii, aut ardentioris curæ adjungi potest, id mea summa in te observantia, tuæque erga me singulari benivolentia adjungatur. Quod, etsi id totum cum ejus integritati, tum tuæ virtuti dabis, polliceor tamen, me isto tuo officio ita tibi in perpetuum esse debiturum, ac si id mihi soli dedisses; neque alia causa, quam mea

solius, id mihi concessisses. De Fuschinio vero nihil amplius dicam, quam, quod ante dixi, eum Virum esse, qui vivendi rationes omnes intra rationis gyrum facile contineat, quique iis in primis, quos de se optime meritos esse sciat, optime gratus esse didicerit. Vale.

BARTHOLOMÆUS RICCIUS

Camillo Paleotio S. D.

Vasre admodum admonet de commendatione ipsi facta, de qua solus ex multis nihil rescripserat, aitque, sibi persuasum esse, eum secum familiarius agere, ut petitioni suae magis officio, quam literis respondeat.

8. **T**U solus, Paleoti, ex multis tuis Collegis, quibus eadem de re scripsi, reliquus es, qui mihi nihil rescripisti. Credo, te mecum familiarius agere, ut petitioni meae magis officio tuo, quam tuis literis respondeas. Nolle tamen, ut fieri solet, eas literas Tabellarii, quae maxima est, negligentia periisse. Quare magis hac ratione has brevissimas ad te exaravi, quam ut te ad illas rescribendum provocarem. Satis mihi est scire, te illas accepisse. Nam si secus accidisset, aut eadem tibi remittendas curarem, aut alius eandem commendationem renovarem. Vale.

BARTHOLOMÆUS RICCIUS

Francisco Bolognetio XL Viro S. D.

Pro veteri more, quo receptum est, ut etiam summi Viri Magistratus quodammodo ambiant, ait, se ad eum scribere, & commendare Fuschinium prestantissimum Virum, ne ei quid deesse cum amicis videatur, oratque, ut cum Cuspicio, & Paleotio ita petitionem suscipiat, ut eam absolutam tradat.

9. **E**tsi facile sciebam unis meis literis ad Cuspium nostrum tibi, & Paleotio satisfieri posse, qui ita inter vos & animo, & sententia convenitis, ut nihil sit, quod alius velit, alius non probet; neque vos ita

am-

ambitiosos esse, ut nisi vobis quoque scripisssem, petitioni meæ aliquo modo nocuisssem; malui tamen utrique separatim suam quoque Epistolam exarare, idque magis, quia scirem, vos mea scripta libenter legere, quam quod ego vel omnibus precibus a vobis contenderim, ut mihi, quam Cusprii vel unico verbo, facilius daretis. Tecum igitur nunc, Bologneti, paullo post cum Paleotio agam. Audio non multum abesse, cum novi Judices, quibus publicas causas judicandas committitis, vobis deligendi sunt, multosque, eosque præstantissimos Viros hanc judicationem esse competituros, in quibus etiam meus Fuschinus adnumeratur. Hic, ne te frustra multis morer, qui reliqua a Cusprio habebis, is Vir est, quem si ipsi pernovissetis, absentem, atque cætera omnia agentem omnibus sententiis decerneretis. Tamen quia vetus est mos, ut etiam summi Viri Magistratus quodammodo ambiant, ejus amicis, in quibus ego haud postremus sum, videndum est, ne quid ei desimus. Quare ego te etiam, atque etiam rogo, ut una cum Cusprio, atque Paleotio ita petitionem nostram suscipias, ut eam nobis, ut volumus, absolutam tradas. Id, quod facillimum spero futurum. Quis enim tribus honestissimis Viris, ut de reliquis tribus Malvetio, Gislerio, atque Elifantutio nihil dicam, in honestissima petitione suum suffragium non dabit? Pro quo isto tuo summo officio Fuschinum ipsum tibi in perpetuum obligaveris; me vero, quem jampridem obligatissimum habes, etiam strictius devinxeris. Vale.

BARTHOLOMÆUS RICCIUS

Francisco Bolognetio XL. Viro S. D.

Postquam de Corradii Bononiensis Academia splendidissimi luminis obitu conquestus est, ejusque præclaras virtutes recensuit, Anonium Palearium Mediolanensibus eandem publicam docendi operam dantem nominat, eumque cum soluta, tum etiam adstrictiori oratione cum paucis pereleganter, atque lumine & scribere, & canere ita omnibus constare ait, ut hæc Epistola magis currenti sit calcar, quam amici commendatio. Postulat autem, ut legendam nonnullis ex XL. Viris mittat, eosque nomine suo roget, ut Corradio Palearium sufficiendum decernant.

10. **U**T mihi de Corradii nostri obitu nuntiatum est, multis, iisque honestissimis de causis graviter, molesteque tuli. Primum, quod quasi alterum filium, qui me parentem pie appellabat, amisi; deinde, quod in eo magnam iacturam res literaria fecisse videtur, qui & in eleganter scribendo, & superiore de loco erudite docendo, eam quotidie novis scriptis, atque præceptis cumulationem reddebat; postremo, quod vestra Bononiensis Academia tanto Viro orbata sit, cui ut parem reperiatur, fortasse non facile fiet. Nam ad eas literas, quas profitebatur, ejus generis mores accedebant, qui in paucioribus probantur. Equidem modestiorem, humaniorem, sanctiorem Virum non cognovi, qui nihilo magis movebatur adversis, quam etiam lætis, ac secundis rebus faceret, in quibus ne vultum quidem mutabat; ejus autem sermo, congressus, hospitium fuere, quæ ejus generis moribus optime responderent. Sed quid ego ejus virtutes tibi commemoro, qui eum optime noras, & amaras plurimum? Quin quod restat, magis curandum est. Ego, Bologneti, certo scio, istum XL. Virum Ordinem alium Corradio brevi substituturum. Quoniam vero mihi in tanto amico adempto providere non possum, neque ab eo quicquam nostris studiis amplius sperandum est, ac tantum, quod vobis damnum ex ejus obitu accidit, id optime præstari potest, si alium in ejus locum delegeritis; in quo ejus desiderio mederi possem, par esse du-

duxi, si mihi non deessem. Equidem non dubito, quin multi, iique doctissimi Viri Senatui vestro propositi sint, ex quibus is decernatur, qui Corradio sufficiatur; verum si inter eos unus Aonius Palearius, qui Mediolanensibus hanc eandem publicam docendi operam dat, nominetur, ego fidem meam tibi do, fore, ut quicquid de eo decreveritis, modo quod cum vestra, atque ejus dignitate fiat, id eum esse optime comprobaturum. Commendarem ego tibi amicum meum quam diligentissime, rogaremq̃ue, quantum in te esset, efficeres, ut in demortui amici loco vetus amicus meus decerneretur, probaremq̃ue isto loco, si quisquam alius, dignissimum esse; nisi scirem, te quoque eum valde amare; omnibus vero ex doctissimis atque elegantissimis ejus scriptis constaret, unum Aonium esse, qui cum soluta, tum etiam adstrictiori oratione, quod paucis ad hanc ætatem datum est, æque pereleganter, atque lumine & scribat, & canat; tamen si quid amoris erga illum tuo adjungi potest, id ut mea causa adjungatur, te etiam, atque etiam rogo; ut quasi hæc mea Epistola magis currenti sit calcar, quam amici commendatio. Malvetio, Ghislerio, Cuspio, Fantutio XL. Viris hanc meam Epistolam legendam mittes, atque eos postea meo nomine rogabis, ut in hac causa mihi tecum adsint, ac qua ratione tecum ago, eadem me secum egisse existiment. Quod si a vobis impetro, etiam si omnem gratiam vobis referam, semper tamen apud me ea erit integra. Vale. Ferrariæ Non. Septemb. MDLVI.

BARTHOLOMÆUS RICCIUS

Joanni Antonio Locatellio S. D.

Rationem reddit, cur Sylvium Antonianum adolescentem non solum ceteris in amore præferre debeat, sed eum, quantum se ipsum, amare cogatur. Ex hoc autem vehementi Epistolæ initio Antonianii multiplex commendatio apud Locatellium oritur, quem enixe orat, ut ad constitutam bonam domi suæ in Philosophiæ præceptis eum instituat, quemadmodum & publice, & privatim paterne faciebat Mædus, qui propter armorum tumultus cum ceteris Academiæ Ferrariensis Doctoribus dimissus est.

11. **C**UM Sylvius Antonianus in humanioribus studiis cum eruditione, tum etiam iudicio sit adolescens, qui in iis æquales paucos pares, in illo vero neminem habeat superiorem, si illum non plurimum diligam, literis injuriam facere videar. Verum si horum nihil unquam attigisset, neque literam novisset, quoniam tamen iis moribus, atque ea vitæ integritate, quæ ab improbis etiam hominibus suapte virtute laudatur, præditus est, facere non possem, quin eum carissimum haberem, atque ejus causâ omnia vellem. Nunc vero cum hæc omnia simul una in eo excellant, atque ita, ut utrumque ars, unde studia, & literæ emanarunt, an recte agendi a natura instituta ratio antecellat, satis constitui non possit, quando æque utrumque in eo ad suam summam pervenit, ut quem studia prudentissimum reddant, vitæ vero sanctior ratio in probatissimis Viris collocet, impius sim, si huic primas, & secundas, & tertias in amore non deferam. Sed his etiam accedit, quod propter communia studia, atque summam meam erga illum benevolentiam, in amore mecum mutuum facit. Propter autem ætatem me eundem, ut grandiores natu, summo etiam honore prosequitur. Quæ ejus in me ingenua reverentia non jam illum ceteris in amore præferre debeo; sed eum, quantum me ipsum, amare cogor. Video te expectare, quorsum tam vehemens Epistolæ initium, atque multiplex amici commendatio spectet. Scito igitur, novo isto bello exorto, docendi publi-

blicam disciplinam apud nos totam sublatam esse. Malo enim hoc fato non solum arma nobis in manus sumpta sunt, sed libri etiam ex manibus exciderunt. Quo uno publico incommodo multis magnum detrimentum, Sylvio vero maxima calamitas iniecta est, cui Madius Philosophus, a quo paterne in Philosophiæ præceptis instituebatur, ereptus est, qui cum cæteris, qui in nostro Gymnasio publice docebant, dimissus est. Sed aliorum melior conditio, qui ad alienos Doctores aut Patavium, aut Bononiam, aut quovis alio se conferre potuere. Huic uni omnes hæ viæ præclusæ fuere, neque hoc ex ulla rei tenuitate, quem amici nunquam deseruissent, sed ne ab Hercule Principe suo vel tantum pedem discederet: Sed Deus Optimus Maximus, qui suis optime confusit, te quasi dedita opera per hoc tempus nobiscum esse voluit, a quo id si non publici, saltem privati muneris habere posset. Audio enim, te tua sponte illi obtulisse quicquid, quod multum est, in te ejus facultatis inest, id omne cum illo ad constitutam horam domi tuæ fideliter esse communicaturum. Quod ut ego intellexi, manus in Cælum sustuli; Deo gratias egi, qui suos prorsus non desereret; tibi vero, quem jam multo ante a meo Brachio magis amare non poteram, plurimum debere cœpi. Verum si ad tuum istum animum mea commendatione quicquam amplius accesserit, quod erit, si non solum susceptam partem fideliter illi explicueris, sed quam viam in iis studiis cum minus ancipitem, tum etiam breviorē insistere debeat, eam illi familiariter commonstrabis. Multi enim, ut magnos in suis studiis progressus fecerint, interdum se postea tamen in illis magis errasse, quam didicisse animadvertunt, atque in caput iterum redire, aliamque de integro viam inire coguntur. Hoc, inquam, si ante amplius habebimus, me nihil, quod tua causa posthac nolim, polliceor habiturum: quin molestum erit, non eam mihi remunerandi facultatem dari, quam ego cuperem, & ipse mereris. Si quid tamen mea, ne quid dicam de ejus, scripta unquam valuerint, non minima ex parte ea tibi polliceor valitura. Vale.

BARTHOLOMÆUS RICCIUS

Joanni Antonio Locatellio S. D.

Facete taciturnum ejus discessum Bononia sugillans oras, ut impressorum ignaviam urgeat, ut tandem suum opus absolvans post septimum mensem, quod altero mense debebant.

12. **Q**uarto Idus Septembris ad tuum cubiculum, ut te viderem, veni: pulto: nulli intus: foris mihi puer respondet, neminem adesse; te Bononiam nudius quartus tuos visum profectum esse. Dolui tantum via frustra suscepisse me; sed acerbius tuli, quod sine me, ut milles constitueramus, discessisses. Scilicet comitem infacetum, quique sua taciturnitate comitatu magnam molestiam attulisset, sprevisi. At ego tibi pro isto tuo officio tantumdem reponam. Nam, te infcio, Venetias solvam, neque ego tibi magis fidem meam in eo itinere præstabo, quam tu mihi tuam in Bononiensi præstiteris. Sed de jocis hætenus. Si me amas, ad impressores istos ibis, atque eorum ignaviam, quantum potes, urgebis, quando ignorantiam corrigere non potes, ut tandem post septimum mensem, quod altero debebant, opus nostrum nobis absolvant; hocque etiam cum Zoppio nostro ages diligentissime, non quod is in eo corrigendo quicquam claudicet, sed ut tecum istis Vulcanis, vel fustibus ulmeis grandiore gradum efficiatis. Vale, ac fratri tuo salutem meo nomine dixeris. Ego vero vino illi tuo divino, quando perpetuitatem non possum, saltem, ut bene ætatem ferat, opto. Vale.

BARTHOLOMÆUS RICCIUS

Antonio Locatellio S. D.

Ipsi, & Campegio gratias agit, quod Dialogum suum de Judicio cupide legerint, & laudarent.

13. **M**ihi scribis, Campegium doctissimum atque optimum Virum Dialogum meum de Judicio & cupide legisse, & laudasse etiam minime jejune; quod

Tom. II.

F

eo

eo spectare videtur, ut illi admodum placuerit. Cujus laudi tuam ipse quoque laudem addis, me scilicet in Latina dictione non postremam laudem esse consecutum; quorum utriusque iudicium ut probem, cum vestra integritas, atque rerum omnium cognitio, tum etiam meæ laudis non parva mea cupiditas efficit. Sed cum ad meum postea redeo, facile ego contra sentio. Nam ut ingenue de me fatear, non mihi plane satisfacio; Dique faciant, ut mea illa sit nimis exquisita diligentia, vosque rectius, quam ego, de me sentiat. Sed hactenus de Dialogo. Campegio, quod de me tam egregie sentiat, & tam honorifice loquatur, meo nomine ingentes gratias ages, cui ego ut aliquando aliquam referam, omnem operam dabo. Vale.

BARTHOLOMÆUS RICCIUS

Antonio Locatellio S. P. D.

Petit, ut certiore faciat, utrum verum sit, quod circumfertur, Bononienses in Robertelli locum cæcum ab ejus ortu ad publicam operam præstandam delegisse, quod sibi simile veri non videtur; quod si ipse confirmet, se Bononiam statim advolaturum pollicetur, ut illum audiat, amicumque amanter complectatur. Obiter nobilitatem ingenii hominis ob oculos ponit.

14. **A**udio, Cives tuos cæcum quendam ab ejus ortu in Robertelli locum delegisse, quæ res mihi maximam admirationem attulit. Ut enim ille in nostris studiis tantum audiendo proficere potuerit, ut cæteris modo publicam operam suam feliciter præstaret, vix mihi veri sit simile. At in quo, Dii boni! loco? In Bononiæ celeberrima Academia. Hoc reliquum erat ad summam ætatis nostræ præstantiam, ut cæci etiam plus, quam oculati viderent, ut undique quanta hominis ingenii sit nobilitas, quotidie Deus ipse declaret. Quid enim recenscam, quæ ab hoc apud superiores ætates inventa, atque in hominum usum sunt prodita? Artes scilicet ipsæ, atque artium omnium instrumenta. In primis autem literarum formulæ, quibus paucioribus signis omnia nostra sensa vel longissime gentium exprime-

re

re possumus. Nunc quod prope monstri simile est, homo reperitur, qui uno auditu tantum in optimis studiis profecerit, quantum multi & auditu, & lectione, & inscriptione vix assequi possunt, ut etiam videre expectem, qui mutus scribat, atque nutui calamum etiam addat. Id si ita est, pergratum mihi feceris, si me certiores feceris. Nam cæteris in re tam difficili non satis fidem habeo; tibi vel etiam majora facile possum credere, quo mihi a te confirmato, istuc advolo, ut cum illum audiam, tum te etiam amanter complectar. Vale.

BARTHOLOMÆUS RICCIUS

Sylvio Bertolaio S. D.

Gratias agit, quod gratulatur, a Principe possessionem optimi agri sibi donatam fuisse. Largiendi rationem, & possessionis commoda, atque amœnitatem extollit, ad quam eum invitat.

15. **D**E tua ista gratulatione valde te amo, atque eo magis, quod omnes meos Cives superasti, quorum adhuc nullus isto modo mihi gratulatus est. Ita est, ut dicis, Sylvi, me a meo Principe valde amari, atque in primis haberi. Tanta enim munera non omnibus elargiuntur. Possessionem nostri quam optimi agri, quamque oppido commodam; ut quod ille de suo rure faciebat, ego de meo commode usurpari possim. Ex meo scilicet propinquo rure hoc capio commodi; neque agri, neque Urbis odium me unquam percipit. Ubi satias cœpit fieri, commuto locum. [Eunuch. Act. 5. sc. 6.] Quid vero de aquila dicam, quæ sub villam fluit? Sed possessionis commodis, atque amœnitati accedit largiendi ratio. Nam cum hanc ipsam multi peterent, iis omnibus præteritis, eam sua sponte mihi condonavit, atque eo modo, quo de nostro Mucino intelliges. Sed cum mihi gratularis, tum etiam est, quod ipse tibi gaudeas. Sæpius enim me istic habebis, quamdiu Lugientem Prætorem ages, mecumque feriatus assidue rusticaberis. Interea cura, ut valeas, meque, ut facis, ama. Vale.

BARTHOLOMÆUS RICCIUS

M. Tullio Beroio S. D.

Ejus versus ad se missos numeroſe , concinne , ſplendide ſcriptos laudat , agitque gratias , quod de ſe honorifice ſenſerit .

16. **T**ui verſus , M. Tulli , mihi gratiſſimi fuere . Qui enim aliter eſſe poterant , cum tam numeroſe , tam concinne , tam ſplendide ſcripti eſſent ? In eo vero , quod ad meas laudes attinet , ſi cum cæteris ambitioſe agam , majori voluptate affici non potui ; ſi vero tecum ingenue loquar , te in iis multo malui , quam fuiſti , modeſtiorẽ . Sed hoc te amoris erga me tui nimis ardore ductum feciſſe , certo ſcio , idque , quam ego tuum agnoſco , tam etiam tibi facile ignoſco . Expecto mittas , qui tibi tuum Siccinium deſcribat . Nihil enim eſt , quod ego faciam difficilius , quam cum deſcribo . Vale .

BARTHOLOMÆUS RICCIUS

M. Tullio Beroio S. D.

Virgilii locum a Servio male explanatum ipſe interpretatur , ſuamque de eo explicationem , & ſententiam Salluſtii ſimonio , & Aldini Codicis lectione confirmat . In fine Epistolæ Camillum filium ſuum ei commendat .

17. **C**um Bononiæ ſuperioribus diebus eſſem , teque fere quotidie domum ex febricula languefcentem amice viſerem , ac noſtri ſermones plerunque eſſent de noſtris communibus ſtudiis , ſcio te recordari a Topiano noſtro hos duos Virgilii verſus Æneidos lib. 4.

Extremam hanc oro veniam , miſerere ſororis ,

Quam mihi cum dederis , cumulatam morte relinquam . aliquando adductos fuiſſe , in quibus ingenue adoleſcens fatebatur , ſe quid Maro in *cumulatam* voce ſibi vellet , prorſus ignorare , præſertim cum Servius quoque in eo loco neſcio quid involvat . Tum ego meam a te ſententiam rogatus reſpondi , ſi recte recorder . Servius , dum
lo-

locum corrigere studet, magis corrumpere videtur. Qui cum tuo iussu allatus esset, ita compertum est: qui cumulatam gratiam ad Annam referri vult: dicens: *quod beneficium cum mihi cumulatam dederis*, & quæ sequuntur. Non enim ita est; sed ad Didonem magis refertur; ut si diceret: tantum soror apud me tuum beneficium erit, ut semper cumulatam remansurum sit, etiam si omnia tibi pro eo in tota vita reddidissem. Auget, inquam, Dido sororis gratiam, dicens: ego non solum eam in tota vita omnibus meis officiis non aequabo, sed ne ejus partem quidem, quo minus ea in me integra sit, efficiam. Cujus meæ sententiæ, ut Ferrariam redii, cum in mentem veniret, locum adii in meo Codice, ubi in hanc sententiam Sallustii locum notatum offendi, quo Virgilii sententia planius explicari non posset. Eum tibi scribere placuit. Is ita inquit. *Id adeo experiri licet, arma, viros, pecuniam, postremo quicquid animo libet, sume, utere, & quoad vires, nunquam tibi redditam gratiam putaveris: semper apud me integra erit.* Vides, ut eadem sit Bocchi Regis, [is enim eo in loco hoc modo Sylæ se debere fatetur] atque Didonis erga sororem suam debitio; quam uterque usque eo adauget, ut se negent omnibus officiis ulli ejus parti esse satisfacturos. Quod Dido per *cumulatam*, Bocchus vero per *integram* vocem dixit. Sed redeo ad Didonem, ac planius, si possum, locum explicabo. Hæc igitur inquit: si tu soror hanc mihi gratiam feceris; ut ego omnia postea tibi retulerim, nihil omiserim in pari gratia referenda, nihil tamen de ea diminuerō: quin cumulatam, ut semper fuit, etiam moriens relinquam. Atque in hanc sententiam Aldinus Codex legitur:

Quam mihi cum dederis, cumulatam morte relinquam;
non autem ut Servius legit:

Quam mihi cum dederis cumulatam, morte relinquam.
ut sit interpunctio post *cumulatam*. Sed de loco satis. Camillum filium istic habes. Si eum tuis consiliis [est enim admodum adolescens] si ei, quoties tibi videbitur, non deeris, me a te plurimi fieri judicabo. Pro quo etiam tanto tuo officio cum tibi omnem gratiam retulero, multo tamen major semper apud me erit referenda. Vale.

BARTHOLOMÆUS RICCIUS

M. Tullio Beroio S. D.

Ejus Commentarium in Didonem non sine lachrymis a se lectum significat, Æneamque impium appellans Didonem tamquam nimis mollem redarguit, quod sibi pro ingratiſſimo prædone mortem conſciverit. Ubi iterum Commentarium reſuſcitavit, ſe ad eum miſſurum admonet, ut ſtatim edendum curet.

18. **D**idonem abſolvi, neque ſine lachrymis. Res enim ea commiſeratione eſt digna, qua vel Æneas, invitis etiam fatiſ, commoveri debebat. Sed nimis ille impius fuit. Jaſtet ſe modo pium eſſe, qui humeris parentem ætate conſectum ex medio Patrio incendio extulerit, qui ſacra, qui Deos penates ſecum vehat, cum Didonem ſui amantiſſimam, atque a qua non ſolum portu, ac Regio hoſpitiſ, ſed lecto etiam conjugali acceptus fuerat, in rogum extulerit. Genus hominum, qui pro maximis officiis crudele mortis genus vel ſummæ loco gratiæ referunt. At fata. Quid fata? quaſi nos noſtra non ſimus ſæpius fata. Non enim poſſum putare, fata iſta tam nefariam mortem Didoni intuliſſe. Dii enim non impii ſunt, neque ex bonis operibus homines excruciant. Sed ipſa nimis mollis fuit, quæ pro ingratiſſimo prædone ſibi mortem conſcivit. Id quod fortaiſſe non omnes ſceminæ feciſſent, ſed potius illum gladium in eum, quam in ſe, convertiſſent. Sed iſtos omitamus; illam ſumma in arce comburi, illum ventis adverſis per mare pererrare. Ut iterum Commentarium reſuſcitaro, illum tibi commendo, tamenſi ſcio, te illum æque; atque fratrem alterum amare. Matri vero tuæ, ſpectatiſſimæ ſceminæ plurimam, ac longiſſimam ſalutem meo nomine dixeris. De Paleotio tua cura erit, ut ſciam, quid meæ litteræ profecerint. Vale.

BARTHOLOMÆUS RICCIUS

M. Tullio Beroio S. D.

Duas ejus Orationes summa cum voluptate a se perfectas significat; eam autem, qua se furti reum defendit, cum magna etiam utilitate: Scriptores tum Latinos, tum Græcos omnes ad unum fures appellandos, si, quod commune omnium sit, dictione sua suum proprium facere non liceat; seque malle cum Terentii patronis errare, quam cum ejusdem criminatoribus sapere; stulte vero, & pueriliter sentire, qui Virgilio Baptistam quemdam Carmelitam præferant, eumque magis, quam Maronem, imitandum tuantur.

19. **D**uas tuas Orationes mea summa cum voluptate perlegi; sed in ea, qua te furti reum defendis, cum voluptate magnam etiam utilitatem percepi, Dii boni! quid in ea, quod ad causam tuam faceret, non vidisti? Ut vero cum ex Latinis, tum etiam ex Græcis, si scriptio tua furtum judicaretur, omnes eorum Scriptores fures tecum omnino fuisse, optime convicisti? quod tantum abest, ut dicatur, ut qui aliter scribant, vix probentur. Nam si nihil dicitur, quod non sit vel sapius ante dictum, quid tam iniquum, tam impium, tamque omni criminatione dignum, quod commune omnium sit, si quis sua dictione suum proprium efficere conetur? Terentium tuis locupletissimis testibus addas licet, qui furti reus factus, Lælii, atque Scipionis testimonio magis probari non potuit; quorum optimorum Virorum sententiam, quam invidorum malevolentiam magis faciendam, semper ego duxi. Clament isti quantum velint, furem e scena explodendum esse. Quandoquidem illo tales patroni steterint, tandiu ego cum illis magis errare, quam cum istis sapere, facile patiar. Sed redeo ad te. Credo, cum tui accusatores tuam istam defensionem viderint, istos accusationis, an magis calumniæ suæ? valde poenitere. Ita enim cum iis agis, ut magis eos rerum omnium imperitos damnes, quam ut, te prudenter fecisse, probes. Quod vero ad alteram attingit, ego istos quoque audire expecto, qui Virgilio

Baptistam quendam Carmelitam præferant, eumque magis, quam Maronem, esse imitandum sua stultitia tueantur. Sed utrum isti, quod sentiunt, prædicent, non graviter accusandi, an, quod tam pueriliter sentiant, magis contemnendi? Sed hoc pacto quid prudens a stulto differat, facile cernitur. Hæc in mea Ricciola in Quartisano, cum tuæ mihi Ferraria literæ sunt allatæ, quibus me cuiusdam sponsonis appellaturum graviter minitaris. Ego, Tulli, ut ad Urbem venero, nusquam tibi deero. Quid vero si eas exequias expectemus, quas ego istic tecum spectem? & eos versus tum tibi dictem, tu vero tibi fidelissimus sis descriptor? sed ut lubet. Nihil est, quod meæ fidei diffidas. Probe enim eam tibi sum præstiturus. De Frizolio vero bellus homo es, qui de me Evangelia quæras. Equidem illi gratulor. Sed mihi, qui ejus suavissima consuetudine cariturus sum, non minus doleo. Zoppio salutem. Camillum vero filium, nisi frustra est, tibi etiam atque etiam valde commendando. Vale ex Quartisano Cal. Maji MDLIX.

BARTHOLOMÆUS RICCIUS

Sebastiano Regulo S. D.

Oblatam amicitiam se & amico accipere, & arte complecti proficetur, quam officiis omnibus se effecturum promittit, ut, si non superet, saltem æquet. Orat, ut videat, si quæ literarum forma satis idonea apud impressores reperiantur, qua ad sua scripta edenda uti possit.

20. **T**Uas literas accepi, mihi quidem, ut par fuit, gratissimas, in quibus me novo, atque eo maximo amico auctum esse intelligo; neque tantum humanam conditionem mihi in eripiendis veteribus amicis adversari, quantum etiam mea studia novos ereptis probe substituere, video. Scribis enim pro altero Sebastiano mihi proxime erepto, te alterum Sebastianum mihi esse relictum, atque ut in ejus locum te accipere velim, peringenue me invitas. In quo tuo officio tu quidem, Regule, tuorum studiorum dignum facis, qui eum ames, quem in aliquo tuorum similium numero fortasse nlla non ignoras, neque ego meorum indignum faciam, qui

quæ te doctissimum Virum & amice accipio, & arctè complector. Equidem antè audieram ingenuitatem tuam ab omnibus commendari, nunc vero a te ipso eandem video re ipsa comprobari; quam ego contra si omnium officiorum integritate mea non superabo, certe, ut eam me æquasse videas, facile efficiam. Ac continuo, ut id tibi præstem, [quando tanta esse videtur, amico occasionem dare ad optime de se promerendum, quam etiam si ipse de eo haud pessime promereatur] te rogo, ut videas, si quæ istic apud istos impressores literarum forma satis idonea tibi videatur, præsertim ejus generis, quæ manum imitatur; sin, quæque alia sit, atque ejus postea exemplum paucioribus verbis descriptum mihi mittas, quo mihi quoque comprobato, continuo istuc me conferam, atque de meorum scriptorum editione cum iis constituam; ut videas, te non solum a me libentissime in amicitiam acceptum esse, sed continuo eam me non parvo officio confirmatam esse voluisse, teque hoc modo probe invitasse, ut si quid tibi a nobis opus accidat, id a me tam libere, quam a te hoc nunc me facere videas, petere non dubites. Vale.

BARTHOLOMÆUS RICCIUS

Sebastiano Regulo S. D.

Ejus literas cum impressoris literarum exemplo se accepisse significas, illas quidem amoris plenas, impressoris autem, quæ non plane comprobantur. Itaque rogat, ut, si quid forte melius extiterit, certiore faciat.

21. **T**uas literas cum impressoris literarum exemplo accepi; tuas more suo amoris plenas; impressoris, quæ non plane comprobantur. Nimis enim tritæ, atque veteres sunt, quæque opus meum ferre non possent. Si quid forte melius extiterit, tua cura erit, ut sciam. Neque quæras, cur istic potius, quam Venetiis hanc operam quæram, ne mihi dolorem augeas. Ego vero, quos nollem, si causam scribam, gravius offendam. Nam si mutuo in amore ii, qui maxime debebant, mihi respondissent, de hac editione jampridem nihil laboraremus. Sed quando in amicitia nostra concili-

lianda, ut prior fuisti, in petendo autem ab amico eundem locum habere non potes, saltem, te magis in secundo, quam in nullo, ut videam, efficies. Ac si quid tibi a nobis opus esse videris, id ne fideliter petere dubites, te etiam atque etiam rogo. Vale.

BARTHOLOMÆUS RICCIUS

Sebastiano Regulo S. D.

Magistro Manterchio sibi commendato locum non esse respondet propter temporum difficultatem, bellicque calamitatem, quorum causa plerique magistros, quos habent, missos faciunt. Admonet tamen, si quid interim apparuerit, se ei promississe, nusquam suam operam illi defuturam.

22. **E**T amice, &, ut ego cupiebam, fecisti, qui me, ut te antea rogaram, in petendo imitaris. A Manterchio tuas literas, quibus eum mihi commendas, accepi. Ego, Regule, si omnes Cives nostri magistrum suis filiis quærerent, solus vel triduo omnibus, ne quid ejusmodi egerent, qui providerem, abunde haberem. Vix enim alius a me discessit, cum alius adest. Quin etiam sæpe alius alium ad me opprimit. Verum cum nemo nunc non solum non quærat, sed quos plerique habent, [vides enim in quam temporum difficultatem inciderimus, quodque bellum nos urgeat] missos faciant, quid ego tibi recipere, aut qua spe illum accipere possim, non habeo; cui tamen promisi, idque præstabo, si quid interim appareret, meam operam nusquam illi esse defuturam. Tu vero meum Cuspium meo plurimum nomine salvere jubebis, apud quem si istis Saturnalibus sim, nihil vobis mirum videri debet. Utrique interim Camillum filium commendo. Vale.

BARTHOLOMÆUS RICCIUS

Sebastiano Regulo S. D.

Academiarum fructum, & utilitatem exponit. Earum tria genera constituit, unum publicum, alterum privatum, tertium, cum utrinque res disputatur. De singulis nonnulla subjicit: ubi exercentur: qua ratione: quantam nobilitatem, & præstantiam præ se ferant, quantamque utilitatem afferant. Fusius autem de privatae Academiæ forma, & imagine disserit, commemoratque Viros præstantissimos, qui in hoc genere Academiæ Florentiæ sub Cosmo, Petro, ac Laurentio Medicis floruerunt.

23. **C**Um proxime Bononiæ essem, quo toto tempore quotidie una vel multam horam partim domi, partim foris deambulando essemus, ac de multis rebus, in primis autem de communibus studiis colloqueremur, scis de me, quid mihi de vestris istis doctissimorum Virorum conventibus, quos vos Academias appellatis, videretur, quæsiuisse; meque ad id, quod de illis sentirem, tibi explicandum, tempus postulasse. Nunc igitur, ut ei parti satisfaciam, tibi respondeo; quædam in ejus generis Academiis esse, quæ mihi valde probentur, nonnulla etiam, quæ non satis placere possint. Nam, quod una tam amice conveniatis, ut de vobis dicam, atque in nobilissimis sermonibus illam diei horam transigatis, cur non summa laude digni videri debetis? Id enim vere est societatem colere humanam; ut qui, post mutuam benevolentiam, in communem usum quæ privato quisque studio sibi compararit, benigne conferat, atque alii aliis, omnes omnibus consilio profint. Quo fit, ut quisque vestrum semper domum aut meliori sententia, aut in sua confirmatio redeat omnino. Huc accedit, quod novæ, atque nobiles amicitiz suscipiuntur, veteres vero consuetudine stabilius confirmantur. A bonis deinde omnibus inde quoque optime auditis, qui vestro isto otio, non, ut ii faciunt, qui ex multis sunt, abutimini; sed in iis studiis, quæ hominem expoliunt, atque Virum reddunt elegantiorē; illud egregie infumitis. Deinde ex vestris scriptis maxi-

mam

nam utilitatem percipitis. Quisque enim ita frequentior, atque magis assiduus in iis sit exercendis, quam si liber erret, atque suo arbitratu agat, non fieret. Postremo in eorum correctione dici non posset, qui, ac quantus fructus sequatur. Nam cui Epigramma censendum sit, is omnes ejus partes prius, ut teneat, oportet; postea vero quibus illud careat, planius ostendat. Id, quod in cæteris quoque censendis scriptis faciendum est, qui fructus omnium est uberrimus. Hæc sunt in primis, quibus cum summa utilitate non parvam laudem ex istis conventibus vobis comparatis. Sed contra illa mihi istis tot, ac tantis bonis non leviter adversari videntur, quod qui nobilissimorum Scriptorum loca abstrusa, minimeque omnibus nota, atque obvia summo studio, ac sua industria sibiprehenderit, si quoquo modo de iis agendum accideret, ea dedita opera præterierit, ac tantum omnibus trita, atque perspicua protulerit, ineptus, atque imperitus habeatur, qui in re vestro tanto confesso indignissima operam suam occupatam habuerit. Sin contra ea benignius in medium protulerit, atque cum cæteris communicabit, is suorum studiorum fructus, ac gloriam in magnum periculum adduxerit: ne scilicet, dissoluta Academia, atque adeo stante illa, eorum quisquam pro suis aliis postea divulget; atque ita is suo studio, atque labore aliis laudem, & gloriam compararit. Ex quo, præterquam quod maxime injurium est, interdum illa odia excitantur, quæ nulla postea sanctior amicitia conciliare posset; ut ex optimo officio eum fructum feras, quem vix ferres ex injuria graviter illata. In his præterea Censores creantur, quorum judicio aliorum scripta censeantur. In quo idem inimicitarum periculum versatur. Natura enim comparatum est, ut quisque, quicquid agat, laudari maxime cupiat. Si vero contra illud damnari sentiat, nihil ægrius patiatur, nihil iniquius perferat. Quare etiam contra suam sententiam præfracte tuebitur, neque vinci poterit: in qua contentione sæpius ad jurgia, atque criminationes, ab his autem ad manus etiam venit, quorum nihil turpius, atque a nostris studiis magis alienum dici potest. Si vero error, atque mendum tale sit, ut nulla ratione defendi possit, tum ille iracundius etiam in se ipsum, quod id non viderit, exardescet. Non enim, mihi crede, tam utile est

errare.

erranti mendum corrigi, quam odiosum se errasse, monstrari. Mallet ille quidem perpetuo in eo errore versari, quam cum tanta ignominia doceri. Quod si sæpius accidat, id quod necesse est, ut accidat, pudore pulsus, aut perpetuo postea tacebit, aut etiam a collegio sese abduxerit. At huic malo prudenter cautum est. Lege enim prohibetur, ne quis adversus Censorem causam dicat, sed æquo animo ejus judicium perferat. At primum inique latum esse videtur, quod sua quisque scripta defendere non possit. Qui enim scitur, an is recte scripserit, Censor autem interdum imperite judicavit? Certe enim rei auctor, quique sciat mox eam doctissimorum Virorum judicium subituram, mature, atque haud inconsulte scribet, atque interius in illam, quam alienus Censor, penetrabit. Deinde, ut lex etiam jure defensionem omnem accusato eripiat, id ei numquam auferet, ut non graviter ferat, atque etiam illi, a quo se damnari putet, gravius irascatur. Verum æqua lex omnibus est perscripta. Is quoque postea cum alios censebit, hoc ejus beneficio in eos utetur. Audio. Ergo tacito odio laborabunt, qui apparent benevolentiam profitentur. At alii de se viderint; inter nos ita ingenue jam triennium agitur, ut horum nihil sit auditum. Id si ita est, vobiscum feliciter agitur, ac permirum videtur, inter multos eandem sententiam congruere, quæ vix in paucis congruit. Hæc vero sunt, quæ de ejus generis Academia dici posse videntur, quæ tamen, ut omnes Academici a nobis ita amice dicta accipiant, volumus, ut facerent, si ab eorum amicissimo dicta essent. Neque vos cum aliud Academiae genus mihi quodammodo magis probari dixero, ideo fecisse, ut hoc vestrum, atque ejus simile ex istis honestissimis conventibus excludam, aut ex hujus laude aliarum sequatur vituperatio. Tria enim Academicarum genera mihi constituo; unum publicum, privatum alterum; tertium, cum utrinque res disputatur. In Publico unus tantum docet, cæteri discunt. Hoc item duplex est. Majus, ut ita nunc distinguam, & minus. Majus, ut Bononiæ, Patavii, Pisis, Ticini, Ferrariæ in Italia; in Gallia Lutetiæ Parisiorum; in Germania Augustæ, Lovaniæ, atque in cæteris similibus locis perpetuo fieri constat. Ex quibus florentissimis Academiis quotidie, tanquam ex tor equis Trojanis, præstantissimi extant Viri, qui postea quasi ex frequentissimis

simis Seminariis aut ad Civitates regendas, ac populis jus dicendum, aut ad hominum morbos depellendos, atque ad pristinam eis valetudinem restituendam, deliguntur, atque in omnes Orbis partes, tanquam in vacuum agrum disseminantur; quo genere Academiæ nihil nobilius, nihil præstantius, nihil utilius in terris habetur. Minus autem genus est, quod in minoribus Urbibus, atque in Oppidis exercetur, quod perinde se habet ad illud majus, atque familia optime instituta ad Remp. sancte administratam. Ut enim familiæ parvæ sunt Reipub. formæ atque imagines, unde etiam ii postea Viri deliguntur, qui ad Remp. gubernandam accedunt; ita Oppidanæ Scholæ adolescentes erudiunt ad majora illa postea studia capeffenda. Alterum genus erat, quod privatum faciebamus. Hoc autem inter domesticos parietes, & certis quibusdam, quibus tantum ingredi licet, nulli præterea alii, constitutum est. Hoc quoque bifariam dividitur: alterum, ut vestrum, de quo satis supra a nobis disputatum esse arbitror: alterum, cum pauciores conveniunt, sed alio instituto, atque vos facitis, se in eo exercent. Id autem tale est, ut ego hanc Academiam tibi constituam. Sex viri, satis enim hi nunc mihi sunt, alias alii plures, ut faciant, licebit. Horum vero quisque suum certum habeat officium: puta alius, qui in Poetis: alius, qui in Oratore: tertius in Historia: quartus in linguæ splendore, atque dignitate: quintus in agricultura: sextus in moralibus disciplinis optime versatus sit. Horum quisque tertio quoque die paratus veniat, atque quicquid habuerit in sua facultate indagatum, id in medium afferat. Ut si Poeta [Poetam enim nunc illum appello, qui in Poetis versabitur] sibi sumperit aut quartum Æneidos, aut Horatii Poeticam, aut quid tale explicandum, paucis, ut per semihoram de superiore loco, quicquid in præsentī parte dignum vobis, dignum Poetis habebit, cæteris Academicis explicabit. Ita Orator in quaque Oratione malit; ita Historicus; ita reliqui deinceps omnes omnibus, quod sibi domi excogitarint, ut melius facere poterunt, fideliter impertient. Ex quo genere studii quantus fructus percipiat, atque utilitas emanet, nihil est opus dicere. Quis enim continuo non videt, una opera quinque facultatum quenque eorum partem suam domum referre?

at-

atque eodem tempore præstantissimis disciplinis optimam operam dare, cum tamen nisi in una sua sexta quisque laboret, faciatque quasi qui pecuniam in fœnus locet, qui per centum quingenties fœnus recipiat. Quæ ratio si post mensem conficiatur, magnam summam conficiet. Neque tam ferax pratum est ullum, quod tantum fœnum, quantum hoc studium fœnoris ferre possit. Neque timendum erit, ne ingratos suorum studiorum participes faciat, cum statim pro uno quinque recipiat. Quod genus Academiæ Stephanus Saulius Vir in hisce nostris studiis elegantissimus in amœnissima villa sua in agro Genuensi cum Marco Antonio Flaminio, cum Julio Camillo, ac Sebastiano Delio aliquot menses exercuit, atque exercere perrexisset, si per Flaminii invaletudinem ei licuisset. Tertium genus eorum est, qui de re propo-
sita argute disputant, atque etiam in contrariam partem; quod quidem plurimum valet ad ingenii aciem acuen-
dam, atque postea cum opus est, etiam ex tempore in omnibus rebus apparatus respondendum. Hoc genus Philosophi proprium sibi vendicant, a quibus etiam solis argumentandi rationem, & viam petendam esse volunt. In quo genere Academiæ Florentiæ sub Cosmo, Petro, ac Laurentio Medicis Ficini, Cavalcanti, Argiropoli, Bencii, Pici, Politiani, Marulli, Landinii, Marsupini, Ricasoli, alique florere. Hæc sunt, Regule, quæ de istis studiis, quas Academias dicitis, ego per istos ardentissimos Solis ardores in meo Quartisano colligebam, quæ tibi postea scriberem. Cui meæ sententiæ non dubito, si is sis, qui esse debes, quin tua quoque facile accedat sententia; An secus senseris; expecto quibus id sentias rationibus, ut mihi perscribas. Vale. Meis Fantoniis fratribus, ac Robertello salutem. Ex meo Quartisano XI. Cal. Augusti.

BARTHOLOMÆI RICCI

LUGIENSIS


EPISTOLARUM

LIBER SECUNDUS.

BARTHOLOMÆUS RICCIUS

Laurentio Gambaro S. D.

Amicum jocosè hortantem, ut cum eo, & aliis amicis ad Indos transvehatur, facete etiam ipse excipit, seque jam septuagenarium ad tam longam navigationem ineptum profectus, satis sibi futurum inquiens, si in suam Quartisanum, vel Bononiam, vel Pistorium cum amicis se conferat, vel ad ignem hyemis tempore cum Columbo, & ceteris ejus navigationis Scriptoribus totum illud iter legendo sibi conficiat. Re ipsa, non rationibus, atque argumentis jam declaratum esse ostendit, nugas esse, & Pictorum fabulas, Orbem terrarum totum non esse habitabilem. Nautarum manera singula diligenter describit, seque ad ea obeunda minime aptum fatetur. Itaque magis amice secum eum acturum ait, si a suis studiis non abduxerit, sed potius multiplicem eam navigationem sibi describendam attribuerit.

- i.  En quoque, Gambare, tuis Heroibus admiscēs? atque cum iis usque ad infimos Indos transvehis? Utinam ego mihi melius augurer. Perinde enim esse videtur, atque si dicerēs, jam eo pervenisti, Ricci, unde ulterius progredi non potes; id quod ex LXX. annis meis facile conjici potest; neque tibi ab Inferis ullus, quam summi Judicii, alius datur reditus. Non enim tantum viæ tam natu grandem virum ingredi, par esse videtur, ut iterum ex longissima illa navigatione ad nos Superos rediturum me sperem. Quare mihi satis esse

esse poterit, si quod reliquum est vitæ, in meum Quartisanum meo ciso per ætatem cum meo Antoniano vehar; vel si quid paulo etiam longius, Bononiam ad meos Cusprios, Beroios, cæterosque amicos; aut etiam Venetias ad meos Cornelios; inde Patavium ad meum Abiosium: per hyemem autem, cum non solum maria, verum etiam terrestria itinera tum frigoris, tum ventorum vi clausa sunt, ad ignem cum Columbo, ac cæteris, qui navigationem illam scripserunt, totum illud iter legendo mihi conficiam. Sed quid ego sum hominis, qui superiore anno etiam bello bonus sum habitus, cum tot fortissimis viris navem vel ultra Indos, si detur alius locus, conscendere verear? unde mihi tot gemmas, tantam auri vim, tot pretiosas res sim domum revectorus? Huc accedit, quod magnam voluptatem capiam, cum alium Orbem, alias gentes, atque harum alios mores, cultus, quæ ad humanam vitam agendam maxime pertinent, videro. Sed heus tu, quam torridam, quamque glaciale plagam inter nos, & illos veteres esse rati sunt, ut eas prætervehemur? Ne timeas, Ricci. Nulla ea est, nugæ sunt, atque Poetarum fabulæ. Totum est habitabile. Veteres enim [quod cum eorum bona gratia dictum volo] in eo imprudenter allucinati sunt. Quid ego ex te audio? Num tuus quoque Maro cum cæteris illius artis prudentissimis Viris in suis quinque plagis elapsus est? Re ipsa, non rationibus, atque argumentis ita esse jam pridem declaratum est. Doleo; tantos Viros in hoc tam manifesto errore versatos. Sed quoniam non arbitror te vectorem ullum officio vacuum tollere, quæro ego de te cui operi meam operam usui esse posse reris? Nam si me aut impellendo remo, aut velis sive tollendis, sive deducendis destinasti, aliarum virium id, quam septuagenarii viri, totum est onus. Si ut per funes volitem; ego vix humi repo; ne dum-fatis obesus funambulus fiam. Si clavo gubernatorem constituisti, magnum periculum est, ne vel prima nocte alterum Palinurum Oceano compararis. Non puto te ad sentinam exhauriendam politissimum hominem additurum; multo vero minus, qui cæteris imperem, qui ejus artis sim imperitissimus, quique ventorum nullam scientiam teneam, neque umquam alias mare intravi. Si vero malueris, ut is sim, qui aut per foros

curfitem, aut qui remiges impellam, aut qui signum iisdem quando remis incumbant, aut quando eos sustineant, aut inhibeant, falleris; cum horum nullus mihi usus, nulla sit scientia. Neque me in summo malo, quasi in specula, collocabis, qui ne vitreis quidem oculis certius quicquam cernam. At quædam sunt tamen, quibus ego aliquam operam dem, ut pede faciendo, in anchoris evellendis, & funibus in spiras colligendis, & in cæteris ejus generis. Verum si tu magis amice mecum agas, me a meis studiis non abduxeris, ac multiplicem eam navigationem mihi describendam attribueris; in quo officio fortasse ego tibi satisfaciam. Ut continuo unde a Gadibus solvemus quantum viæ in singulos dies, ac quæque, quo vento, conficietur, quæ pericula prudenter devitabimus, quas tempestates virtute superabimus, ad quæ loca post longissimam navigationem appulerimus, qui eorum habitatores, qui mores, qui Deorum cultus, qui vestitus, quæ leges, instituta, rerum copia, cæteraque, quæ notatu digna videbuntur, describendo. Hoc modo utrique optime consulueris. Neque enim ipse inanem hominem tolles, neque ego non ad nihil bonus videbor, neque hac ratione quicquam habeo, quamobrem nobilissimam istam navigationem non exoptem, qua non Colchos, non Thulem vehar, sed totum Orbem terrarum circumvehar. Tuis igitur me, quod tua sponte antea fecisti, permittentem, atque etiam rogantem, adscribas, licet; cui ego ad diem dictum præsto ad portum adero, atque cum reliquo nobilissimo comitatu feliciter navem conscendam. Vale. Ferrariæ.

BARTHOLOMÆUS RICCIUS

Camillo Filio S. D.

Hortatur filium, ut cum matre in villulam Riccianam se conferat, ejus Cælum ad concoquendum factum extollens, admonensque, ut secum Aliotium adducat.

2. **M**atrem tuam, si per Annæ valetudinem ei licebit, expecto. Tuum esse videtur, ut eam non sinas solam venire. Fuschinus equum, quando cisium didisti, tibi accommodabit. Vises post alterum annum tuam
vil-

villulam. Perficorum adhuc reliquum est non parum, uva optima, Cælum autem illud, quod scis ad concoquendum factum, ut vel ad alteram diei horam esuriendum sit. Si tuum Aliotium tecum adduceres, nihil amplius desideraretur. Curabis, ut hæ literæ recta Bononiam perferantur. Vale ex nostro Ricciano.

BARTHOLOMÆUS RICCIUS

Camillo Filio S. D.

Pro pecunia argentea peregrino signo excusa, publicoque edicto vetita, tantundem auri signati remittit. De sua penula situ, sordibus, pice, atque plicis male obsita sibi relata, novaque ipsi propter hyemem conficienda admonet.

3. **T**uas literas cum pecunia argentea peregrino signo excusa, quam istic publico edicto, ut scribis, impendi vetant, ut quam ipsi suam interim maximam signant, commodius dispendant, a nostro Viscovino accepi, pro qua tantundem auri signati, quando argenti non eadem, quæ auri, ratio habetur, ut hac ratione major ejus vis a peregrinis cogatur, atque cum eo argentum suum commutent, tibi remitto. Cum his etiam penula mea mihi relata est, situ, sordibus, atque, ut in navi fit, tota pice, atque plicis male obsita. Qui retulit, quod ipse coram nunquam dixi, refert, si tuam & ipse per imbrem, atque hyberna tempora habeas, tibi quam commodissimum futurum. Continuo eam tibi conficiendam curo, atque cum his literis per publicum Tabellarium tibi mitto. Vale.

BARTHOLOMÆUS RICCIUS

Camillo Filio S. D.

Tabellariis male precatur, qui neque literas, neque penulam, neque pecuniam in decimum diem reddiderant, cum pro iis ferendis etiam amplius, quam satis est, in literis foris inscripserit, ut ea citius & perferrentur, & redderentur.

4. **D** li omnia mala dent istis publicis Tabellariis. Hic ego literas cum pecunia, atque penula do, atque pro iis ferendis etiam amplius, quam satis est, in literis foris inscribo, ut ex citius & perferantur, & reddantur, & tamen in decimum diem non redduntur. Quare istorum Magistros ad Angeli hospitium ipse adibis, atque de illis hæc omnia quæres. Cave quicquam periisse putes. Quicquid damni in iis fecisti, id est, quod eorum usu decem hosce dies caruisti. Sed in pecunia gravius, qui interea contubernalibus tuis gravis fuisti, qui eorum convivium tuum victum sustinuisti: sed omnium rerum est vicissitudo. Alias ipse hoc ipsum illis præstabis. Vale.

BARTHOLOMÆUS RICCIUS

Camillo Filio S. D.

De navigatione sua Ferraria Venetias strenua, ac felici corriorem facit. Admonet, febriculam ex illa navigatione a se contractam, seque coactum ob pedum frigus ad quartum diem in lecto decumbere, nunc tamen valide valere: Cornelios moleste tulisse, quod eum, ac matrem secum non duxerit: matri omnia a se empta usque ad aëcus, seque quamprimum ad eos advolaturum.

5. **Q**ua hora a te Ferraria discessi, eadem, hoc est duo de vigesima, altero die Venetias appuli, ut videas quam strenue, ac feliciter navigarim: tamen ex mea illa navigatione nonnihil febriculæ contraxi. Nam cum nusquam remum continerem, ac totam illam noctem in navi, in tabulis cubarem, tanto pedum frigore sum affe-

affectus, ut duobus sequentibus diebus stomachus ita concrasset, ut quicquid cibi caperem, nihil omnino ex eo concoquerem. Quod cum video, ab eo me abstineo, atque inedia curari cœpi. Tertia vero nocte sua sponte venter in illud profluvium mihi persolvitur, quo eum Fabius noster interdum suis pharmacis exonerare solitus est, in aquilam totum se diffluit: quæ me res cum paulo languidiorem reliquisset, mane medicum accersiri jubeo. Præsto adest Abiolus meus, qui me non sine febris offendit, hortaturque, ut bono sim animo, ex illo frigore hæc omnia contracta esse affirmans, meque eadem, ut illi, diætæ uti iussit; atque ita quarto die ex lecto surgo, atque valide valeo. Hoc quantum ad me. Nunc venio ad nostros Cornelios, qui quam moleste tulerint, quod te, ac matrem tuam mecum non duxerim, dici non posset. Causam afferro honestissimam. Non est accepta. Ut Dii saluum illum esse velint, quando mea integritate perdant dicere non possum, qui nos hac integra voluptate frui prohibuit. Matri omnia emi usque ad acus. Tibi vero cras totum dabo, cui cum satisfecero, nihil mihi reliquum erit, quin ad vos duas animas meas advolem. Vale interea, & matrem meo nomine deosculabere. Venetiis.

BARTHOLOMÆUS RICCIUS

Camillo Filio S. D.

Brevis hæc Epistola multa complectitur: messim ad aream convectam esse: culpa eorum, qui equas ad trituram locant, eam longius produci: ob hanc rem se diutius ruri detineri: a suis studiis non esse propterea se prorsus vacuum; nonnulla perlegisse, alia correxisse, Epistolas ad amicos scripsisse. Præterea ipsi mandat, ut nonnulla faciat, & quid ipse cum matre agat, rescribat.

6. **M**ESSIS ad aream convecta est; ut primo quoque tempore tritura fiat, probe curatur. Sed qui equas ad illud opus locant, eam longius producere videntur; ut qui altiores frumenti cumulos, ac pleniore areas sequantur. Quæ res nos diutius ruri continebit: ubi tamen nostris studiis non prorsus vacui sumus. Tres

enim primos nostros de Gloria libros perlegi. Quædam etiam diligentius correxi. Scripsi ad Cantellium, ad Nobilium, ad Antonianum haud fortasse rusticas Epistolas. Huc accedit ea Oratiuncula, quam tibi mitto. Contra vero quid tu in tuis agas, scire cupio. Cum Sarachio si eris, ac rem illam numariam curabis, ne scilicet ille abeat, antequam ad numum dissolvat, rem tuam curabis. Aurifici pauciores illas literas, quæ ad nostri imaginunculam adscribendæ sunt, quamprimum dato. Floram matrem tuam meo nomine plurimum salvere iubebis. Vale. Ex nostro Quartisano Non. Julii MDLVII.

BARTHOLOMÆUS RICCIUS

Camillo Filio S. D.

Epistola lectu utilissima, atque adeo necessaria iis, qui alio studiorum causa profisciscuntur. Patris monita ad filium Bononie commorantem: studiorum diligentem rationem habendam esse; morum, totiusque vite cursum optime instituendum. Suggest itaque locum, ubi habitet; unde pecuniam habeat; quem sibi Doctorem proponat; amicos, quibus familiarius utatur, quaque ratione cum iis se gerat. Omnibus temere fidem non esse adhibendam admonet; noctis tenebras vitandas, & pericula, quæ tunc temporis casu circumvolitant; contentiones in Magistratibus creandis exoriri solitas fugiendas, quodque primo loco ponendum est, Deum Unum, & Trinum toto animo colendum.

7. **H**odie, Camille fili, duo de viginti annos natus es. Tantum enim dierum est, ex quo die tu in has auras editus es. Quod tempus domi tuæ cum parentibus tuis in optimis studiis, atque ingenua, ac liberali educatione traduxisti. Primos quidem annos, ex quo fari cœpisti, cum Aloysio Atestio in primis literarum rudimentis percurristi; reliquos quatuor in Jure Civili perficendo publice posuisti; nunc vero, cum domesticus tuorum studiorum cursus istius importuni belli interruptu interromperetur, atque eorum absolutio, quam domi speraras, apud alios tibi comparanda esset, Bononiam concessisti, ubi cum me, quasi adolescentiæ tuæ rectorem habere non posses, mihi visum est, saltem hi-

sce

ſec præceptis tibi abſenti non deſſe ; quibus , ſi parueris , parentis quidem præſentia carebis , ejus quidem conſilio minime . Duo igitur ſunt , Camille fili , quæ tibi in hoc tuo ſtatu maxime attendenda ſunt : alterum ſtudioꝝ tuozum , quozum cauſa iſtuc veniſti , diligens ratio : alterum moꝝum , & totius vitæ , quæ non minus in homine , quam rerum egregiarum ſcientia , elucet , optima inſtitutio . Quod ad ſtudioꝝ rationem attinet , eam iis operam dabis , cujus omnibus brevi non parvum fructum extitiſſe comprobes ; quibus ut libere , atque nullo impedimento vacare poſſis , omnia tibi a nobis apud quempiam eozum hominum , qui in ſingulos meſes certa mercede conſtituta tui ſimiles alunt , habebis comparata , ne , ſi ad menſtruum cubiculum agas , omnia [ne quid agam de quotidiana ejus commutatione] quæ ad victum faciunt , a te ipſo ſint cum tuo magno incommodo providenda ; neque quæ ad ea tibi opus eſſet pecunia , tibi Ferraria quotidie ſit expetenda , atque etiam expectanda . Quod vero ad Doctozes tuos attinet , continuo videbis , quos tibi proponas ad audiendum , in qua una conſultatione ſi Cephalius noſter a Bononiienſibus , ut factum iri videtur , decernatur , nullus labor tibi accidet . Scio enim , te hunc multis de cauſis cæteris omnibus eſſe antepoſiturum . Si vero nullus acceſſerit Cephalius , tum tu , quem cum nomine , tum etiam re cæteris præſtare cognoſceſ , eum tibi deliges ad audiendum . Hoc autem , quod ad tua ſtudia . Reliquum eſt , quod ad vitæ inſtitutionem attinere dicebam . In primis igitur quicum agas , quoque familiaris utaris , prudenter videbis . Nam cum duo ſint hominum genera , alterum optimis moribus præditum , quodque cum virtute agit ; alterum , quod ab his contra abhorret ; ab hoc ut caveas , alteri ut adhæreas , te paterne moneo . Sed quoniam difficile eſt in primo congreſſu hominum naturam deprehendere , ut quæ in intimis animi latebris deliteſcit , præſertim in tanta nobilium adoleſcentum multitudine , continuo non ita te totum in ullius familiaritatem conjeceris , ut , cum jam experiendo malam deprehenderis , ab ea non facile poſtea diſcedere , teque recipere poſſis . Cum iis vero , quibuſcumque verſaberis , ita te geres , ut nulli te inſolenter præſeras , omnes tibi anteponas ; quo uno officio omnium omnem

be-

benevolentiam facile tibi conciliabis. Cave enim putes quicquam tam amari, atque commendari, quam humanitatem, atque facilitatem; quemadmodum contra, nihil plus homines odisse posse, quam ipsam insolentiam, atque superbiam. In iis vero obsequendis eam rationem adhibebis, ut ne, quod dicitur, præter aras, ne quid cuiusquam alius injuria facias. Potius enim ab ea cum tuo aliquo incommodo ut abstineas, quam cum aliorum damno ut facias, tibi præcipio. Nam in tuo damno; ut ego id ignovero, nemo alius a te quid tale reposit, in injuria autem, quam alii intuleris, conscientiz stimulis semper sollicitaberis. Illud in primis tibi persuadere debebis, non omnibus temere fidem esse adhibendam; multo vero multis pollicitationibus minus. Imponunt enim nunc magis homines, quam mutuum reddant: in quo sæpius dedecus, quam damnum gravius hominum animos offendit, quorum utroque postea facile ad arma venit: atque ita, quos amicos nobis officio comparasse putamus, infensissimos inimicos experimur. Quoniam vero noctis tenebræ homines domum colligere videntur aut ad quietem capiendam, aut ad domesticas actiones agendas, ipse temporis rationi obsequens in tectum tuum te sub primum lumen recipies ad tuos Juris consultos optime versandos; foris autem eos per tenebras versari fines, quibus lux odiosa est, quique inde victum per furtum, interdum etiam funera sibi comparant. Tu vero in tuo cubiculo cum tuis libris colloquere, atque inde amice, quæ in tuam utilitatem conferas, furabere. Nam ut etiam nulli injuriam foris per illud tempus facias, quare etiam neque eam a quoquam ipse quoque pertimescere debeas, multæ tamen causæ sunt, quamobrem etiam infontes injuria afficiuntur: ut si pro alio accipiaris, aut alieno vulnere pereas, aut etiam insciens alii impedimento sis, & multa ejus generis similia, quæ casu circumvolitant. Quoniam vero in vestris Magistratibus creandis contentiones inter vos maximæ exoriri solent; tu eas aliis relinquens in id unum incumbes, ut te cito ad publicos Magistratus accipiendos expedias, qui si ulli erunt a Principe tuo, tibi non deerunt, neque ab Aloysio ejus fratre tibi quid tale desiderabitur. Postremo autem, quod primo in loco tamen positum esse volo, ut toto animo Deum

Deum Unum, & Trinum colas, videbis; neque quicquam sive tecum, sive cum alio agas, quod non ab hoc initium capiat, atque in eo perfiniat, Christiane providebis. Quod si præstiteris, nullæ insidiæ, nulla fraus, nulli doli tibi intendi poterunt. Is te testum ab omni adversa fortuna perpetuo continebit, neque non tua studia secreto plurimum adjuvabit. Quod ut facias, non solum tibi paterne præcipio, sed te etiam, atque etiam Christiane rogo. Vale.

BARTHOLOMÆUS RICCIUS

Camillo Filio S. D.

Mandat, ut rem librariam curet, & impressores urgeat, quorum munera diligenter describit.

8. **T**Uas literas exspecto omnibus de iis rebus, quas tibi discedens mandavi, in primis autem, quo loco res libraria sit, aveo scire: an impressores in officio perstent: an cum meo discessu aliquid ipsi quoque ab eo discefferint, ac remissius agere cœperint, quod tamen ferri potest, modo recte cætera. Nam quanto rem longius produxerint, tanto majori cum eorum detrimento fiet. Videbis, ut ignis sit in furnulo ad locum calefaciendum. Multum enim interest ad literas ex suis signis exprimendas, an is frigeat, an calefiat; deinde ne atramento nimis exiliter parcant. Nam quæ folia mecum attuli, ut ea melius cerno, albescere videntur. Qui vero in prælo comprimendo operam dat, eum commonefeceris, ut diligentius curet, ne, quæ interspatia sunt, cum literis ipsis emergant, notasque ad aspiciendum turpissimas efficiant: id quod in meis in multis locis apparet. Hactenus de impressoribus. De cubiculi commutatione, ut tibi videbitur. Nicolai conditio mihi perplacebat, cui meo nomine salutem dixeris. Vale. Ferrariæ V. Calen. Decemb. MDLVII.

BARTHOLOMÆUS RICCIUS

Camillo Filio S. D.

Rogat, ut libri folia jam impressa ad se mittat, curetque, ne in ea quidquam negligentia irrepat: literas sibi quotidie minus placere, parumque expressas videri significat.

9. **T**uas literas eo die, ut conjicio ex earum die, quo tu meas, accepi; sed permiror, cur folia omnia, quæ post meum discessum impressa sunt, mihi non miseris, præsertim cum hoc in primis a me in mandatis haberes, ut statim viderem, quam recte res procederet, an me absente quicquam negligentia in eam irrepsisset; quemadmodum de foliorum numero scribis, qui alieno loco per ejus, qui in plumbo ad prælum describit, summam imprudentiam positi sunt. Quod erratum non manu, ut tu reris, sed totius folii renovatione tantum corrigi potest, idque ejus ipsius sumptu, cujus erratum est. Sed cura te rogo, ut primo quoque tempore ea folia ad me mittas. Vereor enim, ne quid in iis gravius offensum sit. Certe literæ quotidie minus placent, parumque expressæ videntur. Mater tua te salutat. Vale. Ferrariæ XV. Cal. Janu. MDLVIII.

BARTHOLOMÆUS RICCIUS

Petro Mercantio S. D.

Orat, ut se certiore faciat, cur filius reditum domum differat, cum per literas uterque recepisset, postridie, quo ipse Bononiam pervenisset, illum inde aut equo, aut cisto in Patriam advolaturum.

10. **E**Go, Mercanti, putabam, & ut tu mihi coram, & Camillus per literas receperatis, postridie, quo tu Bononiam pervenisses, illum inde aut equo, aut cisto ad nos advolaturum; quod tantum abest, ut id mihi præstiterit, ut ne literam quidem ad me postea miserit. Id si eo fortasse fecit, quia quotidie discessurus esset, possum illi ignoscere; si vero quis novus casus

eum

eum nobis intercept , valde doleo. Tu tamen , si me amas , cura , ut si non ante , saltem cum Frizolio nostro veniat. Quod si se facturum neget , pari ratione , quamobrem id neget , me certiore facies. Vale.

BARTHOLOMÆUS RICCIUS

Jacobo Invitio S. D.

De fide Mazolanii nihil dubitandum scribit , quem & Virum probum , & antiquæ bonitatis hominem , & in re familiari satis commodum , & multæ auctoritatis apud Cives suos esse demonstrat.

11. **S** Cripſi ad Mazolanium. Is mihi reſcribit , fidemque ſuam obteſtatur , tantum abeſſe , ut quicquam adverſus tuam dignitatem egerit , ut etiam , cum a quibuſdam tuis Civibus rogaretur , ut locum iſtum peteret , nihil eos audierit , teque illis , tuumque in eorum filios ſtudio plurimum commendarit. Id quod ego tibi affirmare non dubito. Novi enim eum probum Virum , atque antiquæ bonitatis hominem ; qui præterea cum in re familiari ſatis commode agit , tum etiam apud Cives ſuos non in poſtremo loco habetur , qui otii publici cauſſa XC. Vir ab iis factus eſt. Vale.

BARTHOLOMÆUS RICCIUS

Seraphino Jacobejo S. D.

A Trigeſtinis eum iterum Prætozem non ſine aliqua Patriæ gloria ad jus dicendum delectum eſſe gratulatur , ejuſque integritatem in judicando commendat.

12. **G** Ratulor tibi , qui iterum Prætor a Trigeſtinis delectus ſis ; doleo , quod interea tua conſuetudine ſum cariturus. Sed tuæ cum utilitati , tum etiam dignitati omnis mea voluptas , quam ex ea capiebam , merito eſt poſtponenda ; cui id quoque accedit , quod non ſine aliqua Patriæ gloria bis in eam Præturam decretus es. Nam etſi tua propria laus eſt , ea tamen cum tuis quoque Civibus communicatur , qui eum Civem ha-

habeant, qui ab externis longe etiam gentium ad ius sibi dicendum iterum decernatur. Utinam, Seraphine, quod amice, ac vere dictum sit, ea integritate, qua tu in iudicando uteris, Iudices uterentur; multo cum litigatoribus æquius ageretur. Non enim aut temporis dilationibus Iudicia perirent, aut in iis homines cum re ætatem iniquissime confumerent. Sed hic me comprimam, ne quos nolim, offendere videar. Vale, atque, ista altera Prætura feliciter absoluta, ut ad nos te incolumem referas, cura.

BARTHOLOMÆUS RICCIUS

Fabricio Refecio S. D.

De Horatii fratris, quem unice diligebat, obitu dolet, eumque consolatur, prudentia, aut patientia præripiendum esse ostendens, quod temporis longinquitas sit allatura. Fratrem non esse amissum, sed, unde prius descenderat, in Cælum remigrasse; quo ejus sanctissimi mores, atque totius vitæ integritas illum reposcebant, animo, & cogitatione reputandum; aliaque subicit, quæ miram plane, atque singularem consolandi rationem efficiunt.

13. **T**ristior nuntius mihi nullus afferri potuit, quam cum de Horatii fratris tui obitu mihi nuntiatum est. Ita enim eo affectus sum, ut quovis alio gravius affici non possem. Amavi equidem illum, Fabrici, ut plane scis, cum propter Urbanum parentem vestrum, meum optimum magistrum, tum vero propter ejus humanissimos mores, atque singulares animi virtutes plurimum. Cui meo tanto desiderio tua quoque non levior causa accedit, quem scio cum eo prope simul una interiisse. Quid enim dicam omnem vitæ tuæ voluptatem amisisse? quem primum, non ut fratrem, sed ut filium, institueras: deinde etiam virum factum, atque eorum studiorum, quæ vere Virum probant, Bononiam secutus es: atque ejus suasu in eam curam venisti, ut a tua libere vivendi ratione discedens uxorem duceres, hoc est, ut in Christianam quidem illam, sed gravem tamen, tui præsertim similibus, venires servitutem; ut a te, qui primus eras ex quinque fratribus, jam

cæteris mortuis , quod a se habere nequibat , familiæ vestræ semen in liberis propagaret. Paruisti. Cum eo fraternaliter vivebas , uterque , ut melius ab illis curis fieri poterat , in vestra studia incumbentes ; cum ecce tibi ex transverso , quæ suo semper magis , quam nostro tempore venit , mors vestræ conjunctioni invidit ; quam ut inique dirimeret , eum tibi eripuit ; te solum reliquit , cuius dolor meo quoque dolori accedit. Videor enim te videre noctu , dieque in omni sermone , in omnibus tuis scriptis , heu frater , heu frater , ubi nunc es ? ubi fratrem tuum deferis ? qui , ut te multo ante in hanc lucem venerat , ita & ex ea prius exire debebat , atque etiam multo acerbiora querentem. Sed id mihi durius accidit , quod in tuo tanto luctu nullam tibi consolationem asserere possum , qua vel dolorem istum tuum levare , si minus sanare possem. Gravissimam enim plagam accepisti. Recens vulnus est. Medicus autem is adhibetur , cui prope pari , quam tibi fratri , consolatione esset opus , qui naturæ clementia in alienorum malis valde commovetur , in amicorum vero calamitatibus prorsus occumbit. Sed quid tandem agemus , Fabrici ? Tu fratrem optimum , ego amicum carissimum amisimus : soli destituti sumus. Num id perpetuo lugebimus ? Certe si lugendo aut dolorem levare , aut eum nobis restituere possemus , omnes lacrimis habundantæ dandæ , atque etiam alienæ summo pretio essent emendæ ; sed quoniam neque sciendo quicquam horum proficimus , ad nos redeundum est , atque in rationis gyrum nostræ voluntas revocanda , quæ est , ut quod semel ortum sit , id quoque ut aut ocius , aut ferius moriatur , neque causas ullas querere , quamobrem nobis dolorem , quem mitigare debemus , augeamus. Amisimus parentes , fratres alios , amicos ; molestissimum : quod tamen nostræ prudentia ipsi nequivimus , temporis longinquitas tantum illum dolorem non solum sedavit , sed etiam prorsus abstulit. Id igitur , quod antea non factum est , in præsentī luctu arripimus , atque pro lucro habeamus , si quod tempus ipsum est allaturum , ipsi nostra aut prudentia , aut patientia præripiemus. Redi igitur , Fabrici , ad tua studia , ac quod cum fratre amisisti , amisum ne recordare. Illud quidem in animo tibi inhæreat , fratrem non esse amisum ; sed unde prius descendit , in Cælum remigrasse , quo

quo ejus sanctissimi mores , atque totius vitæ integritas illum reposcebant ; familiamque , ut facis , quæ reliqua tua cura est , in iis bonis , quæ vos vestris honestissimis studiis comparastis , gubernâ , Deoque ipsi , qui te illi incolumem reliquit , gratias agas immortales. Vale.

BARTHOLOMÆUS RICCIUS

Benedicto Manzolio S. D.

Jocatur , jejunii die se male ab hospitibus acceptum esse , patriumque morem , capiendique bis quotidie cibi institutum nunquam derelicturum profitetur. Amicum autem jejunium in foro Clodia ad vespem fere ambulantiem false , & facete deridet.

14. **P** Erbelli mehercle homines estis , atque elegantissimi hospites , quique lautissime , atque opipare amicum accipitis. Ita ne cum eo hospite fuit agendum , quem probe sciretis & suo cibo quotidie bis uti integro , neque in eo capiendo quicquam horæ suo stomacho , ne illi stomachum moveret , defraudare ? Valet , boni mei hospites , in omnes istos jejunii dies. Ego , qui & mei stomachi caliditate , & multo etiam magis longiori hœra optime concoxeram , atque ad mensam famem usque ad assum vitulinum attuleram , uno ficu , nucibus avelanis duabus , tribus minutis pyris , totidem prunis , fœniculo etiam loricato in jentaculis appositis eam explebo ? Non placet mos iste prandendi , qui istis angustis terminis circumscribitur. Malo ego humilium hominum in jejuniis morem , qui sua hora laute prandent , vespere postea , si libuerit , quid levius gustant , ut magis dormitum , quam laboratum , vel etiam deambulatum jejunus discedam. Sed mihi semel imposuistis. Si post hæc in talem me diem habebitis , vobis permitto , ut me impransum , atque etiam incoenatum dimittatis. Illuserit Græcus homo , ut lubet , Italorum morem , qui bis in die ad honestam saturitatem comederent. Ego hoc patrio more , atque capiendi cibi instituto meam vitam ad septuagesimum quartum annum , ut omnes vident , feliciter produxi. Ab hoc nunquam abducar , sperans eam ad centesimum producturum. Sed nunc mihi illud de

de Clodiæ horologio in mentem redit. Nam cum Alphonsum Ferrariæ Principem Venetias, cum is eam Rempublicam superioribus mensibus videret, cum cæteris Nobilissimis Viris comitaremur, noster ordo Clodiam præmissus est, illic eum postea expectaturus. Postridie ejus diei, quo Clodiam appuleramus, longam horam, ut otiosi hospites faciunt, Urbem obeundo, Tempia visitando, Forum illud longissimum sæpius conficiendo famem, ne dum prandium, nobis comparaveramus maximam. Cum tamen comites forum arare pergerent, tum ego jam pridem languido stomacho ecquando nos prandium recipimus? Tum unus eorum, qui semel in tribus diebus vel pullum hirundineum in cibum sumit, nimis cito est, inquit. Nondum enim ad Horologium Clodiæ decimasexta hora significata est. Tum ego haud leviter commotus: ergo ego famem meam ad Clodiæ horologium sustinebo? non meo stomacho, ut postulat, obtemperabo? Non faciam. Ut quisque velit, vel ad Divi Marci suam sustineat. Ego eo, atque ita me domum converti. Cæteri consequuntur, uno illo excepto, qui hesternam hirundinem nondum concoxerat, quique adhuc in foro cum sua illa cruditate laxissime ambulat. Sed heri apud vos nusquam mihi persagium datum est. Nam ad publicum hospitium qui melius ruri? Ad Coquium ne iverim & recens congressus, & vestri ratio valde prohibuit. Sed o te prudentissimum Cananium, qui tibi ab ista inedia optime cavisti, cum Ferrariæ ad tuos remanisti, ubi parum, multum, ut libuit, in visum sumpisti. Ego solus pœnas dedi, qui idem efficere poteram, si id animadvertens, in meo mansissem Quartisano. Sed satis de jocus. Serius, quod restat. Illud nostrum meo nomine rogabis, ut mihi, quod sæpius ante, postremo etiam heri, in illa nostra, quam vidisti millies repetita ambulatione promisit, semel tandem aliquando præstet, atque ita, ut neque ego illi amplius negotium facebam, neque ille mihi semper deuisse videatur. Vale, atque Coquo suavissimo Viro salutem plurimam. Ex meo Quartisano.

BARTHOLOMÆUS RICCIUS

Benedicto Manzolio S. D.

De vappa mensæ appposito jocatur, alteriusque amici nobilissimis vinis cellam referam omnibus patefactam laudas. De Cardinalis morbo se contionem fieri postulas, cui, quod vivit, atque ita jocatur, totum se acceptum referre profuerit.

15. **T**uas rusticas literas legi. De cæteris coram: de tuo autem illo vappa permixta mihi risum excitasti. Audieram alias de aliis; sed minorum hominum hoc esse putabam, neque sua debilitate tot graduum scalas ascendere, suoque haud bello sapore superbis, atque nobiliorum mensis excludi prorsus rebar. Sed nunc in tali casu ad illum amicum est confugiendum, cujus cella nisi Tuscanis, Græcis, Turbians, cæterisque ejus generis nobilissimis vinis referatur, quem videor videre illo suo lætissimo vultu & totam cellam patefacere, & convivas multo etiam mensa accipere latiori, quam tamen nunc arbitror ex Cardinalis morbo gravissimum vortum occupasse, cui salutem sempiternam vide, meo nomine omittas dicere. Non enim illi ex ejus Tusco puncto brevior debet; cui quod nunc vivo, atque ita tecum jocos, totum acceptum refero. Ego interea vindemiam absolvam Quartisanam, non autem Mutinensem, sed eam tamen, qua familiam alam; postea ad vos dulcissimos sodales accurram. Quantum Cardinalis febris se remisit, quod multum expecto, si ad me scripseris, gratissimum mihi feceris; multo etiam gratius, si eam totam in malam crucem abiisse significabis. Vale. Ex meo Quartifano III. Non. Septem. MDLXI.

BARTHOLOMÆUS RICCIUS

Benedicto Manzolio S. D.

Ejus rusticatum per biduum cum amicis facete laudat, de quo a Cuspio se omnia cognovisse, & non sine dolore eodem caruisse, significat. Cum rus redierit, se probe hanc injuriam ulturum, denuntiat.

16. **T**Otos istos Baurienses dies tibi facile concedo ; quos autem in Aristotelis Problematis discutiendis posuisti, etiam valde gratulor. Illud vero biduum, quod cum Hercule Contrario nostro apud Coquium egisti, non satis possum invidere. Omitto enim, quod delicatissimam atque opiparam mensam habueris, mantiliis puris, non autem pampinorum foliis stratam, non illud insulsum vinum, varium, horridum, nulloque Pado mitigandum, sed sua sponte & gustu, & odore, & colore suavissimum: non hæc, inquam, recensco, quibus vel centum jejunii damna facta refarciri poterant, suavissimis illis sermonibus, quos de rebus jucundissimis habuistis, non possum sine dolore caruisse. Ego tertio die, ut a te discessi, ad Urbem redii, equas interea ad triturationem expectans. Postridie autem ecce tibi Coquius mihi sit obviam. Continuo, mutua dicta salute, de suo rusticatu illum percontor; ut valeas? ut crebro una sitis? Recte, inquit, omnia. Biduo meus hospes factus est, quo Hercules Contrarius mecum mansit, suum comitatum prorsus deferens. Pupugit me, ingermui. Sine me? Sed cum rus rediero, hanc injuriam probe ulciscar. Interea vale.

BARTHOLOMÆUS RICCIUS

Benedicto Manzolio S. D.

Agit de Librorum, atque Epistolarum forma apud veteres, ac qua earum ipsarum Epistolarum cum intus, tum etiam in tergo fuerit inscriptio. Epistola sane lectu, & cognitu dignissima.

17. **C**Um nudius tertius ad Aloysium Atestium Cardinalem nostrum satis multis disputatum esset, qua

scilicet forma libri apud veteres fuissent, quaque eorum literarum complicarentur, ac quæ earum ipsarum literarum cum intus, tum etiam in tergo fuisset inscriptio; scis me in paulo longius tempus meam de ea re consultationem distulisse. Ut igitur eo die domum redii, libros, unde id eruere possem, versari cœpi, in qua mea indagatione partim argumentis, atque rationibus, partim auctoritate, atque testimonio in eam sententiam, ut, quod ad libri formam attinet, eam veterum fuisse, quæ nostra quoque est, existimarem. Continuo enim mihi ex simili succurrit codex accepti atque expensi, qui negotiatorum liber erat. Hic igitur codex plurimarum erat, ut ex ejus usu conjici potest, cartharum simul una conjunctarum. Hujus autem ratio talis erat, ut in primi folii secunda pagina, quod expensum esset, unde expensi nomen factum, scriberetur; in prima vero sequentis folii, quod contra reciperetur, quod Latini dicebant, acceptum referre, reponi solebat. Quam scribendi rationem vulgo nostri ratiocinatores, qui veterum more negotia sua scripturæ mandant, appellant *il dar, e l' avere*. Qua ratione ad codicis nostri rationem quoque codex compactus fuisse planius probari non posset. Cum codicibus Sybillini libri consentire videntur, qui cum in rebus dubiis consulerentur, ut forte aperiebantur, eo in loco, ut ferunt, præsto consilium offerebant. Quod si ita est, magis omnino ii libri conglutinati, quam conglobati fuisse videri possunt. His codicillis quoque accedunt, qui ex ligneis tabellis gypso superlitis sunt, quæ quidem simul una ex inferiori parte, ut chartæ in nostris fiunt libris, æque erant conglutinatæ; ut Cardinalis nostri tabulæ, quibus certa navigatio distinguitur, mirifice & factæ, & optime conglutinatæ sunt; quorum codicillorum forma ad librorum nostrorum formam propius accedere non posset. In quam meam sententiam id quoque conjici potest, quod nulla veteris codicis formæ sit a Scriptoribus mentio. Nam si ab hac nostra alia, atque diversa fuisset, omnino aliqua, ut de cæteris rebus, extaret memoria. Sed rem ipsam non jam rationibus, atque conjecturis, sed veterum etiam testimonio magis comprobemus. Cicero igitur ad Atticum in hanc meam sententiam inquit: *Offendes designationem Tiranionis mirificam, meorum librorum bibliothecam, quorum reliquia multo meliores sunt, quam putavam: etiam*

velim mihi mittas de tuis librariolis duos aliquos, quibus Tiranio utatur glutinatoribus. Ubi vides libtarios glutinatores nihil aliud esse, nisi qui membranas inter se conjungunt: puta quos nos vulgo *ligatores* appellamus. Siquidem glutinare est rem rei adungere; unde etiam gluten, quo quid cum aliquo conjungitur. Ciceroni vero locupletissimo testi Catullus quoque, qui ejusdem ætatis fuit, testis non pessimus accedit; qui rem hanc multo planius in Suffenum [*Carmine 22.*] expressit. Hic enim malum istum Poetam irridens, quod nimis delicate versus infusos, atque ineptos Regiis chartis scriberet, atque elegantius conglutina-ret, prope nostram hanc formam describit. Ejus autem verba hæc sunt.

Idemque longe plurimos facit versus.

Puto esse ego illi millia aut decem, aut plura

Perscripta, nec sic, ut fit, in palimpsesto

Relata; chartæ Regiæ, novi libri,

Novi umbilici, lora rubra, membrana

Directa plumbo, & pumice omnia equata.

Quibus verbis nostri libri forma, ut nunc est, planius describi non posset; ut etiam umbilico, atque loris eam ornet, atque lævissimo expoliat pumice. Non negarim tamen superioribus, iisque rudioribus ætatibus, ut quæ in papyro, quæ in foliis, quæ in cortice scribebant, vix tantum alteram paginam implentes, magis scriptorum involucrum esse comprobatum, in qua forma etiam adhuc apud nos multæ veterum tabulæ leguntur. In primis autem Bononiæ in Divi Dominici Sacratio Vetus, ut dicunt, Testamentum in corio Hebraice ab Esdra, ut fertur, scriptum reverenter visitur. Hactenus quod ad libri formam. Jam habe, quæ literarum fuerit forma, quæ tamen magis conjici, quam re vera explicari potest. Hæ igitur quoque magis complicari, quam involvi solere videntur; ut Cicero ad Atticum ubi ait: *cum complicarem hanc Epistolam, noctu Abundus ad me venit. Item: cum hanc Epistolam complicarem, Tabellarii a vobis venerant*; ut omnino aliud esse videatur complicare, aliud conglutinare; ut hoc ad libros, illud ad literas aptius accommodetur; ut etiam magis explicare de literis, evolvere autem de libris, sive longioribus, atque perpetuis voluminibus usurpetur. Ut item Cicero testatur ad Atticum: *evolvi*, inquit, *volumen suarum literarum*.

rum, id est, ut ego existimo, multas, non autem u-
nias tuas literas evolvi. Neque huic meæ sententiæ illud
obstiterit, quod fascem, & fasciculum literarum, &
conijcere literas in fascem, atque in fasciculum Latini
dicant, quando fascis earum rerum, quæ oblongæ, non
autem quadræ sunt, magis quidam esse velint. Quis e-
nim neget, recte Latine etiam dici & paleæ, & her-
bæ, & florum fascem, atque fasciculum? ad quarum re-
rum formam & librorum etiam, & literarum fascem re-
cte usurpari posse, nunquam negarem; ut literæ, quem-
admodum libri, magis in plicis, quam in spiras com-
plicari videantur. Pauca hæc de literarum forma. De ea-
rum vero utraque inscriptione multo plura consequun-
tur. Ac statim de ea, quæ in tergo fit, de qua nullum
quidem verbum, quod ego viderim, legitur, quo as-
firmari possit, quæ ejus ratio fuerit. Tantum enim ad eam
deprehendendam conjecturis ducimur, ut aut nulla, aut
eadem cum interiori fuisse dicatur. Quod nulla, id cer-
te Tabellarii probare possunt. Principes enim Cives, ut
nihil dicam de Regibus, multos proprios servos, qui
Tabellarii munere fungerentur, habebant, ut in quam-
que partem eodem etiam tempore literas commode mit-
terent. Quod quidem fieri solet, cum de re gravissima
agitur; ut ille ad Catilinam. *Qui sum, ex eo scio, qui
tibi has literas reddidit.* Nam sine nomine eæ scriptæ e-
rant literæ. Id quod etiam multifariam faciebant. Aut
enim literarum loco signa ponebant, aut si literis ipsis
id faciebant, aut alienis utebantur, ut Græcis; si vero
suis, loco b. c. ita loco c. d. atque ita deinceps usurpa-
bant; ut C. Jul. Cæsar fecitavit. Augustus vero tertiam
loco veræ collocabat. Quæ non veræ scribendi ratio hac
nostra tempestate apud Principes nostros summo in usu
versatur. Quod autem objici potest, si Tabellarius in
manus inimicorum incidisset, ex literarum inscriptione
facilius eas aperiri postea potuisse, cum scirent & a quo,
& cui scriberentur, ut eorum consilia deprehenderent,
respondeo, multo avidius id facturos in iis literis, qui-
bus nullum inscriptionis in tergo verbum legeretur, quia
eo modo majorem magnæ alicujus rei suspicionem inji-
cere viderentur; ut omnino ego sentiam, eas sua nulla
inscriptione caruisse. Quare si id, quod veri est similis,
ut omnino inscriptionis nota apponeretur; quaeritur pos-
tea,

stea, quænam ea fuerit? Nam si quæ intus quoque legitur, duplex erratum accusant: alterum in repetitione, quando alterum supervacaneum est: alterum, quod in periculum literas adducit, ne, ut dicebam, cum a quo, atque cui mittantur, ex inscriptione cognosceretur, ut interceptæ erunt, continuo aperiantur, atque perlegantur. Cui rationi quoniam paulo supra satisfactum est, nunc alteri, idque quam paucissimis, satisfaciam. Nullum, inquam, in ea repetitione errorem esse, quando nihil in ea supervacare videatur. Nam quod foris est, multis id de causis recte apponitur. In primis autem si Tabellario in via excidissent, ut qui eas reperisset, cui redderet, inscriptione ipsa admoneretur. Præterea vero si plures essent, cui quæque veniret, statim ex inscriptione cognosceretur. Quare ego putarem vel simplici inscriptione hoc modo: P. Lentulo: C. Cæsari: M. T. Ciceroni: vel etiam præposito, qui scribit, ut M. T. Cicero P. Lentulo S. D. & Cn. Pompejus C. Cæsari S. D. fuisse majorum literas foris inscriptas. Nam si ita sit, ut aut sublata, aut apposita inscriptione, literæ in periculum adducantur, ne deprehensæ aperiantur, atque perlegantur, usus scribendarum Epistolarum prorsus tolleretur, fietque potius per nuntium hæc significatio; quod tamen tantum abest, ut fiat, ut perpetuo is magis apud omnes omnium gentium homines fervetur, ut neque nostri quicquam vel in publicum fasciculum, sive Romam, sive in Galliam, sive in Hispaniam, in Germaniam, ac quovis alio gentium suas cum sua extrinseca inscriptione conjicere vereantur. Sed jam de ea, quæ interius sit, est, quod etiam aliquid attingam. Hanc ego conjicio initium Epistolæ apud veteres fuisse, etsi nostri illam prorsus scriptione ab ea separarint. Quod autem ita existimem facit Cicero ad L. Valerium, quæ primi familiarium ultima libri est Epistola, cujus initium tale est. *M. T. C. S. D. L. Valerio Jurisconsulto. Cur enim in hoc tibi non gratificer?* ubi constat, verbum *gratificer* referri ad *Jurisconsulto*, quo sublato, nihil ager, frustra que positum erit. Ut item ad Tironem, cum ait; *Tullius Tironi S. D. Quid igitur, non sic oportet? equidem censeo sic.* Addendum etiam *suo*. Nam cum Cicero hoc modo nimis familiariter, ac quasi vir Consularis nimis demissa cum liberto agere accusaretur, qui sine prænomine at-

que cognomine, hoc est, sine dignitate ad eum scriberet, illi accusationi hoc Epistolæ initio ita occurrit. *Tullius Tironi S. D. Quid igitur? non sic oportet? ubi vides totam orationem a superiori Tullio pendere; quam vocem si tollas, quod sequitur etiam sustuleris. Sentiant alii, quid velint, hoc in loco mea hæc sententia. Sed neque huic nostræ sententiæ id quoque non consentit, quod est in tertio libro ad Atticum, ubi ait. Cic. salut. Q. Cæcilio Q. F. Pomponio Attico. Quod quidem ita esse, & avunculum tuum functum esse officio vehementissime probabo. Ubi vides totum hoc membrum ad illud Q. Cæcilio, Q. F. Pomponio referri. Probat enim Cicero Q. Cæcili Attici avunculi adoptionem, qua Pomponium Atticum sibi adoptarat, ut hinc quoque satis constare videatur salutem dictam, quod nostri prorsus ab Epistola sejunxere, omnino apud veteres cum ea conjunctam fuisse. Hæc habui, Manzoli doctissime, quæ de librorum, atque literarum forma, earumque utraque inscriptione ad veterum rationem ad te scriberem: quæ si tibi probabuntur, tum me recte sensisse judicabo; sin secus, mihi gratissimum feceris, si quæ tua sententia erit, mihi perscripseris. Vale.*

PETRO BENENTENDIO, BERNARDO
BERGONTIO, PAULO LEONIO JUDICIBUS

Bartholomæus Riccius S. D.

*De procuratoris insolentia, & calliditate apud Judices con-
queritur, eosque orat, ne se ab eo contempti, ac de-
spicatiui haberi patiantur, & hinc quoque causæ suæ præ-
judicium facere incipiant, ejusque honestatem in ferenda
sententia adjuvent.*

18. **M.** Crispinius Lucretiæ Galliniæ nomine apud
Collegium vestrum HS. X. plus minus, ad
nostram autem rationem M. libras a me dotis nomine
petit, a quo cum ego de more, ut mandatum, cujus
virtute id a me petit, proferat, atque utrum earum
tabulas, quas protulit, veras, ac ratas probet; neu-
trum cogi potest, ut faciat, idque quamobrem non fa-
ciat, bellissima hac fallaciola defendit. Aut enim, iste

inquit, causam vincam: si tum postea mandatum non ostendam, frustra vicero: si ab ea cadam, vos vicistis. Vastrum dilemma, Judices, callidum inventum. Ego vero huic meum hoc verius oppono. Aut enim hic prorsus insanit, aut vos palam irridet. Insanire autem eum, qui ingentes clientum greges in causis suis quotidie tueatur, quis umquam dixerit? Sequitur ergo, ut vos, vestramque auctoritatem derisui habeat; quod quo animo ferre debeatis, vestrum est iudicium. Audistis autem umquam causam venustiore afferi? Vidistis umquam procuratorem meliori fide causam suam defendere? O acutum, atque argutum defensorem, qui quod de more omnium gentium sit, tam insolenter se facturum neget? Quid putatis istum facere, Judices, in iis rebus, quæ aliquam veri similitudinem habere videntur, cum in hac, quæ manibus tenetur, tam insolenter se tueri conetur? Quis enim nescit, si hic istas suas tabulas de more non probet, aut agendi mandatum non proferat, cum causa ceciderit, qua se omnino casurum videt, tum mulierem, ut negarit, huic se quicquam tale mandasse. novum iudicium mihi esse comparaturam? Immo vero eo hoc omne spectat, quoniam nullam istæ spem in causa habet, ut me non solum in hoc iudicio, sed in quibus etiam aliis possit, & omni sumptu, & molestiis omnibus oneret, atque excruciet. Quare vos rogo, Judices, non ut istum hæc præstare cogatis; quod scio vos vestro jure facturos; neque ut dignitatis vestræ rationem habeatis, quam vobis scio esse charissimam; sed ut hinc quoque jam causæ meæ præjudicium facere incipiat, ut cum eo ventum erit, ut de ea sententiam feratis, hoc quoque causæ meæ honestatem adjuvet, pro qua ego quoque satis justam orationem habiturus sum, in qua spero vobis ita hoc genus hominum exprimere, ut ne umbra quidem sua sit ulla cariturum. Interea valete, atque, quod facitis, vestris æquissimis sententiis æquum, rectumque tueamini.

BARTHOLOMÆUS RICCIUS

Lucio Paganutio S. D.

Amicorum supplicationes Pigna traditas commendat, oratque, ut omnem operam cum amico det, ut in prima subscriptione absolvantur.

19. **P**igna nostro duas, quas supplicationes dicunt, nudius tertius dedi, atque de meliore nota commendavi: idem coram tecum facere non potui: hoc nunc, ut vides, per schedulam facio; quæ tamen, quæ tua summa est humanitas, quin vim maximæ commendationis habeat, nihil diffido. Eas igitur tibi etiam atque etiam commendo. Hæ eorum amicorum sunt, pro quibus mihi magis, quam si meæ essent, elaborandum est. Nam si res protrahatur, quando de impetratione nihil dubitant, magis me negligentiz accusabunt, quam, vos mihi parum amice studuisse, judicabunt. Quare in vestra manu positum est, ut proberis, me meis, vosque mihi nihil defuisse, quorum utrum magis nolim, non facile dixerim. Certe utroque opus est. Quare etiam utrumque vos rogo, atque oro, hoc est, ut omnem operam detis, ut in prima subscriptione absolvamur; pro quo vestro isto gratissimo officio mecum illos vobis in perpetuum obstrinxeritis. Vale.

BARTHOLOMÆUS RICCIUS

Sperono Speronio S. D.

Nicolaus mortis reum sibi commendatum Principis clementia absolutum iri se confidere, suppliciiq; loco longiorem carceris durationem futuram, respondet. Culpam nimis recentem non ferre, ut cum Principe hac de re statim agat; se tamen probe curaturum, ut, cum prima occasio se obtulerit, ejus causam apud eundem adjuvet.

20. **V**ideo quam prudenter, atque adeo pudenter Nicoleti tui causam mihi commendas, qui id potius miseri ejus parentis commiseratione motus facis, quam

quam quod illum ipse quoque non facile condemnes, qui tantum facinus in tantum Principem admittere sit ausus, cum puerum, quasi obſidis loco datum, mercede pacta ei ſuſſurari ſtuderit. At Patriæ reſtitutio, quæ illi propoſita erat, quæ omnium rerum cuique cariffima eſt, id eum videre non ſivit. At, ut id omittam, quod fruſtra ea promiſſa eſt, vetus ſcelus, quo Patria deſideratur, hoc recens multo majus efficit, quo is ſe facile probat, in turpiter agendo non ſemel eſſe verſatum. Sed ejus tamen fortuna eum ſalvum etiam vult. Nam ſi in quemvis alium Principem id amiſiſſet, prius de ejus ſuſpendio, quam de carcere, audiviſſes. Sed noſter ea clementia eſt, ut ſua cauſa neminem capite puniri jubeat. Quare de ejus ſalute non videor dubitare. Longior carceris diuturnitas ſupplicii loco eum torquebit. Sane Prætor aſſirmat, ſe, qui de illo poenas ullas ſumat, nullo jure cogi. Quod vero nunc Principem eo nomine adeam, temporis ratio ferre non videtur. Nimis enim culpa illa eſt recens. Magis placet, ut temporis longinquitas, quæ omnes animi perturbationes mitigare, ac ſedare ſolet, hanc quoque cauſam adjuvet. Cum ſe prima occaſio obtulerit, ne nos auſugiat, probe curabitur, teque poſtea de tota re certiorum faciam. Interea expecto de Frigimelio. Pigna Alphonſi Principis mei a ſecretis factus eſt. Is nunc cum eo Mutinam proficiens, ſuo nomine ut te ſalvere juberem, juſſit. Vale.

BARTHOLOMÆUS RICCIUS

Jacobo Ruſinio S. D.

Tum Orationes ſuas, tum ejus verſus aliis legendos traditos ex eo probari inferit, quod, licet repetiti, nunquam tamen remiſſi fuerint. Ejus nomen Ruſinium ad veterum rationem, non Ruſinum ſcribendum admonet, Flaminiique Hendecasyllabum paulo ante mortem ab eo compoſitum mittit.

21. **I** Dem meis Orationibus, quas tibi miſi, ut ſcribis, quod tuis, quos mihi miſiſti, verſibus evenit, accidiſſe video. Nam ut tu eas Rhamnuſio filio legendas tradidiſti, neque poſtea unquam tibi ſunt redditæ; ita nos

BARTHOLOMÆUS RICCIUS

Bartholomæo Bertonio S. D.

Postquam reditum suum domum satis commodum narravit, ejusque Civium humanitatem commendavit; quæ in via sibi acciderint, singula commemorat; Corneliorum in Paradiso liberalitatem laudat, Capelli in Gallera villam splendida edificatam humanissimi villici facilitate maxime ornari prædicat; amicis suo nomine salutem dicere jubet, ejusque adventum cum Rufino se expectare significat.

23. **T**ertio die, quo a te discessi, domum perveni, via facilissima, Cælo ad Solis ardorem subnubilo, mula vero, quam scis, gradaria, quæque lenissimo graditur succussu. Cætera omnia lata, latissimi serpentes de te, ac cæteris sodalibus fuerunt; nisi quod meus comes gutturis angustia sublaborabat, qua re impediatur ad mutuo respondendum. Sed ejus aures mihi satis erant ad ea audienda, quæ de tua, atque tuorum Civium humanitate, quo me scilicet hospitio accepissetis, atque certatim laudavissetis, in toto itinere prædicabam. Nobilissima præmia, cœnas dubias, ambulationem secundum aquulam, villarum amoenissimam obitorem ad Trivillas, ubi optimus adolescens nos tam rustice accepit, ut ne videri quidem voluerit; etiam is recte quidem, quando ipsi villam, non autem eum, visuri accesseramus. In Paradiso a meis Corneliiis certe liberalius cum a patre, tum etiam a nobilissimis filiis sumus accepti. De illo meo veteri hospite nihil dico. Galleram postremo ad Capellum tuum venimus, ubi perquam familiariter a quatuor illis Gigantibus accipimur: credo, si scalas ascendere, atque cubiculorum ostiis capi potuissent, nos per omnes villæ angulos dixissent. Et mehercule villa est bellissima, atque splendide ædificata, quæque cum amplissimis Urbium ædibus facile contendat, atque si paulo latiora habeat cubicula, eas etiam superet. Sed humanissimi ejus villici facilitas illam maxime ornat, cui meo nomine salutem post gratiarum actionem Latine etiam repetitam dixeris. Si vobis de Tiena morem gerere potuissem, omnia se-

feliciter absolvissimus. Sed nimis longe aberat, via faxosa; ego vero de superiore satis eram lassus. Sed cum ad lacum Benacum proficisceremur, eo declinabimus. Avetarium meo nomine plurimum salvere jubebis. Rossio vero sororis tuæ viro dixeris, me suas literas Ferrariam contulisse, quas ille Urbis Patavii janitori reddendas tradiderat. Quid facias? satis habeat, quod calcaria reddidi. Gratias nullas ago de ejus ad tantam viam comitatu. Id enim cum ipse a me discedet, sum pari comitatu redditurus. Quare ad dictum tempus te cum illo, atque Rufinio nostro expecto. Vale. Ferraris.

BARTHOLOMEUS RICCIUS

Joanni Rondinellio S. D.

Mittens quæ in Vallæ defensionem adversus Alciatum nuper ediderat, ad edendam patris ipsius ejusdem Viri defensionem invitat.

24. **M**itto tibi, quæ in Vallæ defensionem adversus Alciatum nuper edidi. Neque id ea ratione mitto, ut, a me Vallam defensum esse, intelligas; sed ut hoc te modo patris tui ad ejusdem Viri defensionem edendam invitem. Hanc igitur meam invitationem accipe, atque optimi Viri parentis tui suo lumine nomen illustra, atque ex densissimis tenebris in hanc lucem revoca. Hoc ei nihil splendidius, tibi vero, ac posteris tuis dignius facere potes. Vale.

BARTHOLOMEUS RICCIUS

Francisco Cornelio Marci Antonii Filiolo S. D.

Ejus in studiis progressum laudat, hortaturque, ut eandem viam cum Jacobo patrueli Georgii filio ardentius insistat, optimeque provideat, ne alter alteram in istâ vincat, coneturque omnibus viribus Majores uterque suas si non superare, saltem exæquare.

25. **M**Arcus Cornelius propinquus tuus mihi refert, te istius ætatis in litterarum studiis jam eos
pro-

progressus fecisse, quorum neque grandiore natu pœniteret. Quare valde tibi gratulor, mihique gaudeo, quod meis fidelissimis monitis obtemperaris, qui quoties istic apud patrem tuum, meum multorum annorum discipulum, essem, te hortari non desisterem, ut in hîce nostris studiis, ut faciebas, pergeres ardentius insistere, quæ studia etsi suapte natura, atque summa delectatione, quæ ex iis percipitur, quemque ad se consequenda facile trahunt, tibi tamen separatim patris tui patruelis filius accedit. Habes enim Jacobum Georgii Filium, qui ad istam summam virtutis gloriam tecum æque contendit; in qua contentione tibi videndum est, ne te antecedit. Audio enim eum quoque huc omnes nexos, atque omne suum studium contendere, ut uter utri præstet, utrique elaborandum sit. Sed ut ætate, amore, atque Familiæ dignitate pares estis, ita ne in studiis alter alterum superet, optime providebitis, ut ille in Rep. Romana, ipse vero in tua Veneta excellatis, atque in utraque si Majores vestros non superetis, saltem uterque exæquetis. Parenti tuo, atque Ariadnæ Aviæ tuæ meo, atque uxoris meæ nomine salutem plurimam dixeris. Vale,

BARTHOLOMÆUS RICCIUS

Jacobo Cornelii Georgii Filio S. D.

Hortatur, monetque, ne a recto instituto studiorum cursu quoquam deflectat, in memoriam revocans, ex qua nobilissima Familia natus sit, quæ multos Cardinales, Venetos Principes, & Cyprias Reginas protulit, quorum stimulo ad veram gloriam ardentius incitetur. Eloquentiam cum rerum cognitione conjungendam esse subjicit, quæ in Concionibus, ad Judicium, in Senatu dominatur, & cum amicis magnam dignitatem habet. Oratiunculam mittit, ut apud eum amoris sui testimonium existat.

26. **A**UDIO de Marco Cornelio Spalatrensi primario Antistite, idque mea cum summa voluptate audio, te in nostris studiis mirum in modum profecisse. Refert enim cum in Latinis, tum etiam in Græcis literis jam eam scientiam te puerum habere, quæ in viro natu grandiore satis esse posset. Id quod ego primum ita tibi gratu-

tulor, atque filio facerem meo. Nam Georgium patrem tuum Virum optimum, cum istorum esset annorum, ego vero Aloysium Cardinalem, ac Marcum Antonium ejus fratrem, patris tui æqualem decem annos eadem in domo docerem, eodem amore pro ejus bonitate, quo meos discipulos facerem, semper sum prosecutus. Quare ejus etiam filiis non possum non omnia optare, quæ illos ad summam gloriam brevi sint elatura. Te igitur hortor, moneoque, ne ab instituto cursu quoquam deflectas, neque de tuis optimis studiis, quam quantum satis sit, ad æquam animi relaxationem quicquam amplius remittas. In memoriam tibi revocarem, ex qua nobilissima Familia natus esses, quæ non solum multos Cardinales, sed Venetos Principes, atque Cyprias Reginas protulit, quorum stimulo ad veram gloriam ardentius incitareris, sed esset, quod dicunt, currenti calcar. Hoc unum non omitam, ut te etiam, atque etiam adhorter, ut ad rerum cognitionem eloquentiæ quoque splendorem adjungas. Rerum quidem omnium scientia in omnibus studiis facile præcellit, sed eam suo stylo ornatè, splendide, copiose, ac unumquodque pro sua natura explicare, in maxima laude positum est. Hæc una dicendi virtus est, quæ in Concionibus, ad Judices, in Senatu dominatur; cum neque etiam in familiariter cum amicis agendo non suam magnam habeat dignitatem. Scribunt quidem omnes, sed pauci, mihi crede, ut decet, scribunt, in quorum numero ne sis, omni studio, atque omni styli exercitatione contendes. Id quod etiam a doctissimo magistro tuo, qui nihilo minus in hac dicendi ratione, quam etiam in rerum cognitione valet, facile assequeris. Mitto tibi Oratiunculam meam, non ut ex ejus lectione quicquam doctior, aut elegantior fias, sed ut hoc quoque amoris erga te mei testimonium habeas. Si eam tibi gratam fuisse sensero, quotidie aliquid ejus generis a nobis expectare licebit. Parenti tuo, atque Mariæ Avæ tuæ primariæ sceminæ meo, atque Floræ uxoris meæ nomine salutem plurimam dixeris. Vale. Ferrariæ X. Cal. Mart. MDLX.

BARTHOLOMÆUS RICCIUS

Pompilio Amasejo S. D.

Amorem suum erga patrem mutuum semper fuisse ostendit, operamque suam, & judicium in deligendis ex multis ejus Epistolis eas, quæ divulgantur, pollicetur. Petit, ut lectioni diem suum constituat, seque, quod recipit, fideliter præstiturum proficitur.

27. **R**omulum patrem tuum, cum viveret, amavi quam qui plurimum, mortuo vero illi amori parem etiam memoriam præstiti, quorum utrumque cum officiis, tum etiam scriptis meis non semel testatus sum. Id quod jure optimo fecisse me fateor, qui contra ab eo non vulgariter amatus sim, neque quod aut ad meam dignitatem, aut aliquam utilitatem pertineret, quicquam unquam desiderarim: quem mei erga illum animi tenerem sum, quamdiu vivam, retenturus. Quare quod superioribus diebus a me petiisti, ut in ejus Epistolis, quas sane multas esse dixisti, perlegendis tecum esse vellem, atque una posthac, quæ utrique magis hominum lectione dignæ viderentur, eas ad divulgandum deligeremus; ego, Pompili, nunc tibi filio, quod parenti tuo optimo mortuo debeo, omne meum studium, atque omnem operam, quando id jam polliceri non possum, libentissimo animo recipio. Utinam vero meum judicium tale esset, quo præstantissimi Oratoris patris tui scripta recte censerentur. Multo enim cum meis studiis rectius ageretur. Quoniam tamen ita tibi visum est, me quoque adducit, ut aliquid de me, quam a me facio, amplius existimem. Equidem in ea lectione cum summa voluptate, tum etiam pari afficiar utilitate, qui interea suavissimum patrem tuum, amicissimum meum, loquentem audire videor, atque ex ejus oratione, ut olim ejus auditor faciebam, summum fructum auferam. Quare tuum erit isti lectioni diem suum constituere, meum autem, quod tibi recepi, si minus prudenter, certe, quod faciam, fideliter præstare. Vale.

BAR-

BARTHOLOMÆUS RICCIUS

Joanni Cepalio S. D.

Libros suos mittit , ut sub novum Auditorum conventum venales exponantur , quantique vendendi sint , arbitrio , atque judicio librarii relinquit , cui ipse vendendos tradiderit .

28. CUM Patavii essem , meum Cardinalem Atestium sequens , quo tempore ipse Ticinum reverfus es , in causa fuit , quo minus tibi , ut constitueram , meos libros , quos tecum perferres , darem. Nunc vero , ut domum redii , nihil antiquius habui , quam ut eos tibi mitterem , ut sub novum istum Auditorum conventum venales exponerentur. Decem sunt fasciculi , suo singuli certo numero signati. Quanti autem unumquodque volumen judicandum , atque etiam vendendum sit , ejus librarii , cui ipse vendendos dederis , arbitrio , atque judicio relinquimus. Quos vero Aonio Mediolanum inscriptos vides , eos illi cum his literis recte perferendos curabis. Ne bonitatem tuam , atque amicitiam nostram offendam , tibi eorum reliquam curam nihil commendo. Si tamen de more omnium faciendum est , hos , ut meos fructus , tibi etiam atque etiam commendo , eamque a te diligentiam expecto , quam ipse ab aliis expectares , & ego tibi omnium optime præstarem. Vale.

BARTHOLOMÆUS RICCIUS

Herculi Ateftio Taffoniano Nicolai Filio S. D.

Gratias agit, quod ipse a Patre suo obtinueris, ut non parvæ pecuniæ summa facile exigi possit. Ejus progressum in literarum studiis commendat, hortaturque, ut iis acriter insistas, per quæ in primis ad immortalitatem via comparatur. Rogat, ut parenti nomine suo cum gratiis ingentibus salutem plurimam dicat, cujus beneficio tanto commodo se auctum proficetur, ut ejus memoriam nulla umquam oblivio sit deletura.

29. **T**uas literas accepi, quæ mihi sua elegantia jucundissimæ fuerunt; sed eo etiam multo jucundiores accidere, quod ex eis intellexi, me a te non leviter diligi, qui mihi prope non parvæ summam pecuniæ exegisse videris, quando id a patre obtinuisti, quo uno impetrato, nihil præterea ad ejus exactiorem opus erit. Id, quod etiam in futurum mihi liberaliter polliceris, quod ego libenter accipio, atque nunc pro utroque tibi immortalæ gratias ago, aliquam etiam, cum usus venerit, relaturus. Nam quod nomen tuum meis literis cum cæteris claris Viris illustrari speras, minime falleris, si modo ea sint mea scripta, quæ ad tantum tuum splendorem, quem ista adolescentior ætas præferret, aliquid luminis addere possint. Certe in tua ista benigne faciendi ratione prædicanda, atque celebranda nusquam deerunt. Sed redeo ad earum elegantiam. Equidem, Taffoniane, te in nostris studiis aliquid profecisse, ut qui a doctissimo, atque politissimo nostro Sebastiano Briccio magistro tuo institutus sis, facile existimabam, sed numquam tantum omnino subvereri cogebar: idque ex ea rerum omnium, quibus abundas copia, in quibus rari admodum reperiuntur, qui tantum proficere soleant. Quare tibi gratulor, quod ista quoque studiorum nostrorum dignitate non parum sis auctus, teque hortor, ut in iis, ut cœpisti, acriter insistas, in quibus mihi crede tantam voluptatem es capturus, ut hunc laborem natu grandior nusquam alibi posuisse maluisses. Illud addas, quod in tua ista summa rerum copia tuæ locupletissimæ fortunæ
per

per se quidem splendidæ sunt, si ad virtutem infumantur, sed fluxæ tamen, atque caducæ; si vero istorum studiorum nobilitas accedat, illæ quasi adamas in auro illigatæ videbuntur; præter quam quod istis ipsis in primis ad immortalitatem via comparatur. Perge igitur, ut cœpisti, ut, cum rerum copia multis prodesse possis, ne tibi his optimis studiis ad istam immortalitatem defuisse videaris. Parenti tuo meo nomine post salutem plurimam etiam gratias ages ingentes, cujus beneficio, quanto ego commodo auctus sum, ne expecta dum dicam: id tantum dicam, ejus memoriam mihi nullam unquam oblivionem esse deleturam. Vale.



BARTHOLOMÆI RICCI

LUGIENSIS


EPISTOLARUM

LIBER TERTIUS.

BARTHOLOMÆUS RICCIUS

Bartholomæo Cavalcantio S. D.

Ad edendam Rhetoricam suam, Italico sermone scriptam, avide ab omnibus expectatam hortatur, antequam omnes ejus amici decedant, quorum plurimos jam decessisse significat. Diluit, quæ in contrarium asserere poterat, additque, munus tanto acceptius futurum, quanto pluribus illud ipse communicaverit.

- I.  Ethoricam tuam, Italico sermone scriptam, ego avide expecto; & ut audio, hanc ipsam jam pridem omnes mecum valde desiderant. Quid autem ejus editionem moretur, aut quo minus doctissimis Viris, tuique studiosissimis in ea gratum facias, non possum suspicari. Sane opus jam multos annos absolutum habes; nisi si ad limam semper aliquid desideratur; præsertim ad illius tui rationem, cui nihil ad unguem probatur, cujus superbissimo judicio si stare volueris, nos isto inani desiderio commorituros, Oratorem vero, quem in ea optime informas, numquam ex capulis tuis in forum, atque in publicum proditurum esse video. Aude, Cavalcanti, tandem vivis gratiam hanc facere, atque hanc libro tuam gloriam compara, antequam omnes amici tui decedant. Decessit paulo ante Bembus, post eum Romulus, tertius accessit Bonamicus, quartus Sadoletus, postremus Flaminius; ut quosdam alios omitam, non tanti nominis illos quidem, sed qui tamen hunc & cum illis libenter legere, & commendare potuiss-

tuisſent. At motus iſti cum Gallici , tum Italici , meæ vero a Pontifice modo ad Regem , modo ad alios legationes , familiaresque curæ minime leves magno , ne id efficerem , hætenus mihi fuere impedimento . Utinam vero nunc eſſet melius . Sed poſteriorum ea cura erit . Scilicet , ut in quo negligens ipſe fueris , tui ſe poſtea diligentiores præbeant . Quid ſi illi ab hiſce ſtudiis abhorreant ? Quid ſi aliquo modo [quod omen Dii avertant] liber pereat ? At nihil horum ſit . Edatur , legatur , laudetur . Tu certe tum nihil ejus gloriæ ſenties , ad quam unam omnes homines inflammari ſolent , neque quicquam aliud ſpectant , quam ut audiant de ſe cum ſumma laude prædicari ; cujus gloriæ ſi minus cupidum te eſſe reſpondebis , certe non negabis , quam utilitatem in eo cæteris comparavi , eam quanto pluribus communicabis , tanto munus tuum acceptius futurum . Præſentibus igitur in eo fac , ut proſis , ne te merito accuſare poſſint , qui in tui quaſi proprio conceptu maximam jaſturam feciſſe videantur . Vale .

BARTHOLOMÆUS RICCIUS

Sylvio Antoniano S. D.

Sylvium Poetam , & Oratorem laudat , aitque , eum adoleſcentem id eſſe jam aſſecutum , quod vix pauci ſenes adepti ſunt , & in utroque dicendi genere æque plurimum valere . Ejus Orationi de ſcientiarum laudibus habitæ pro rei magnitudine recte perorata ſe interfuiſſe ſignificat , excitatque ad utrumque ſtilum exercendum , brevi futurum pollicitus , ut homines incertum habeant , in utro plus laudis ei attribuant .

2. **S** Atis tibi , Sylvi , ſuperque eſſe potuit , quod ſumus Poeta natus eſſes , qui cum Heroum res præclare geſtas eo verſu caneres , [nequid nunc dicam de iis , quos Italica lingua de quaque re , quæ tibi propoſita ſit , ex tempore vel optimos facis] , ut eas ipſas , ut gererentur , ante oculos proponere videaris ; tum etiam cujuſque generis amores varie deplores , neque in ſacris Deorum pari cum dignitate non ludas ; niſi alteram etiam laudem , qua ex Oratorio dicendi genere com-

paratur, tibi tam feliciter vindicares. Tuæ Orationi, quam de scientiarum laudibus ad maiorem Urbis Ædem habuisti, interfui, quam pro rei magnitudine ita perorasti, ut paucis omnia non solum percurrisse, sed etiam ample pertractasse mihi sis visus: idque eo, quo alia aliam pars aptissime sequeretur, ordine, & filo. Dictione item, quæ veterum tuorum, actione vero, quæ etiam recentiorum esse agnoscitur, etiam maxime laudatur; ut mea sententia id jam sis adeptus adolescens, quod vix pauci senes sunt assecuti; ut in utroque dicendi genere æque plurimum valeas. Perge modo, ut facis, in utroque stilum tuum exercere, & mihi crede brevi fore, ut in utro plus laudis homines tibi attribuant, incertum habeant, atque in te finem querendi faciant, qui ex veteribus optime simul caneret, ac splendide, atque copiose diceret, nullum æque umquam fuisse. Vale.

BARTHOLOMÆUS RICCIUS

Sylvio Antoniano S. D.

De annua pensione a Principe ei constituta, & de extraordinaria publice interpretandi provincia commissa gratulatur. Admonet, ut Auctoris sensum brevi explicet, ne in vitiosam loquendi rationem incidat, cum nondum propter ætatem optimum dicendi genus, & usum optime calleat.

3. **Q**uando eodem die te Princeps noster duplici munere affecit, ego quoque nunc tibi dupliciter gratulabor, atque utro magis, haud scio, an ex sexaginta illa annua pensione tibi constituta, an ex ea publice interpretandi extraordinaria provincia. Nam, quod ad pensionem; illa quidem ad commodum tuum maxime confert; sed in iis bonis tamen adnumeratur, quæ fortunæ attribuuntur; interpretandi vero munus multo quidem est nobilius, sed vereor, ne tuis interioribus studiis incommode acciderit. Illud enim tempus, quod huic parti dabis ad tuis Auditoribus, quicquid id sit, explicandum, id totum de tuis optimis studiis detraxeris. Huc accedit, quod dictionis elegantiae, qua una maxime delectaris, quamque nihil omittis, ut af-

fe-

sequaris, ea loquendi ratio plurimum est obfutura. Nam cum Latine, ut fit, in explicandi cursu fereris, multa sæpe tibi deficient, plura etiam non statim, nec suo tempore succurrent propria verba; tum ne hæere videaris, non solum impropria, aut minus culta, sed interdum etiam barbara, ac quicquid in buccam venerit, arripies. Qua una re nihil est, quod eloquentiæ perniciosius accidere, nihil quod magis eam contaminare possit. Nam cum id sæpius feceris, quod sæpissime est faciendum, non solum id, ut vitium vitare studebis, sed in cæterorum morem lapsus, satis tibi esse præstitum excusabis, si ab Auditoribus tuis intelligaris, atque ita, dum cæterorum commodo studebis, in tuis pessime delinques. At qua in re? Quæ in sermone, quæ in scriptis, quæ domi, quæ foris, quæ nunc, quæ multos etiam in annos gloriæ tuæ sit egregie obfutura. Quare meum consilium est, si omnino docendum est, ne multis id facias; sed ut brevi Auctoris sensum explices. In multis enim, ut in vitiosam istam loquendi rationem incidas, necesse est; quando nondum id eo modo facere potes, quo iis facere licet, qui jampridem in optimo dicendi genere constituti sunt, atque dicendi usum optime callent; qui cum etiam subito ad dicendum veniunt, nescio quid ex eo, quod cogitate egregie faciunt, afferre videntur: ac quasi navis illa faciunt, quæ plenis velis feratur, quibus etiam deductis, non nihil tamen prioris incitationis ad aliquantum spatium retinere videtur. Sed hoc mihi eo minus molestum est, quo id tibi est rarius faciendum. Nam si quotidie in eo dicendi genere tuo stilo abutereris, prorsus actum esset de tuo illo politiori scribendi modo; nunc vero non vereor, quin multorum dierum cogitata scriptio perpaucorum dierum interpretationem sit valde superatura. Vale.

BARTHOLOMÆUS RICCIUS

Sylvio Antoniano S. D.

Cum doctissimo Madio , ac Fuschinio ad villam suam in Quartisano invitat , petitque , ut rescribat , quam libenter hanc suam invitationem accipiat .

4. **S**I tibi libebit , aut etiam commodum erit , cupio , ut cum urbanissimo , ne dicam nunc cum doctissimo Madio nostro , ac Fuschinio optimo Viro , mecum ad meam villulam in Quartisano VII. Id. Jun. fitis , quem diem lætitia magis , quam vino pleni , risu , ac jocis traducemus ; cui diei , si vobis per vestras urbanas actiones licebit , eum etiam , qui sequitur dies , adjungemus . Distat locus ab urbe sex millia passuum , una hora matutina , plus minus , iter illud commodissime cisis conficiemus . In reditu vero in Beriguardum loci Regii visendi causa facilis erit declinatio . Nolo id ante ; ne ex amplissimo loco cum in humilem diversorium postea venissetis , vobis , quasi a splendidissimo Sole in parvum candelæ lumen oculos coniecisse videremini . Expecto , ut rescribas , quam libenter hanc nostram invitationem accipias . Nam de cæteris non dubito , quin mihi gratiam hanc læto , atque alacri animo facile sint facturi . Vale .

BARTHOLOMÆUS RICCIUS

Sylvio Antoniano S. D.

De Cæli inclementia queritur , hortaturque , ut lyram sumat , Apollinemque exoret , ut sudum reducat , subjicitque , id eum non negaturum , modo se ad preces accingat .

5. **V**Ides , Sylvi , quæ Cæli in nos inclementia exorta sit . Nobis nubes undique Cælum obnubunt ; creberrimus imber toto effluit Cælo ; ut mox lutulentissima futura sit via , nisi tu lyram sumas , atque Apollinem tuum exores , ut sudum saltem reducat . Nostri risus , nostri joci villici vel omnibus urbanis suavio-

viores nobis sunt erepti, atque prope ex ore ipso evulsi. Si vero id non impetras, nihil est, cur barbiton in parietem non illidas, atque etiam fias ad Bacchum transfuga; aut illi miniteris, cum precibus non obtineas, te postea omnia ejus scelera palam in urbibus, in publicis locis ad ejus lyram esse divulgaturum. Sed non negabit, modo te ad preces accingas. Vale.

BARTHOLOMÆUS RICCIUS

Sylvio Antoniano S. D.

Cæli improbitati succenses, quæ iter amicis ad villulam suam in Quartisano impedierat. Eamdem ad unguem mirifice describit, queriturque, nullam, si non sui, saltem Madii optimi Philosophi, Sylvii adolescentis Apollinis filii, Fuscini omniæ integerrimæ rationem habere voluisse. Fortunam sibi adversari subjicit, non tamen suadere, ut eam propterea ulciscatur, sed orare potius, ut versibus suis leniat, ne posthac, cum iterum hoc ipsum constituerint, tam adversa sit, illudque iter facile concedat.

6. **D**ii isti malæ tempestatum omnia mala dent; quando ipsa me pejus afficere non potuit. Non poterat in tertium, vel saltem in posterum diem hæc Cæli improbitas differri? Ruisset postea Cælum ipsum; nihil fecissem. Sed, quæ mea bona fortuna est, credo quicquid imbris Aquarius per totam æstatem terris demittere, quicquid ventorum Æolus effundere debuit, id totum in unam superiorem noctem, atque continenter in hunc diem coegisse, atque effudisse. Dii boni, quid hoc fuit iniquitatis? aut quid ego tam impie adversus vos egi, quem tanta injuria afficeretis? At pessimus omnium hominum in cæteris rebus fuerim, nefarie omnia egerim, omnium scelerum fuerim affinis: certe hac una re nulla sanctior, nulla castior, nulla integrior agi potuit. Optimum Philosophum, sanctissimum Poetam, æquissimum Juris consultum ad meam villulam in Quartisano VII. Id. Jun. animi gratia invitaram: præveram pridie ejus diei vespere, omnibus tamen prius in Urbe, quæ ad iter illud eis accedebant, constitutis; ut ibi quoque haud imparatus illos postridie

die mane acciperem. Hactenus læta omnia : cum ecce tibi tota nocte illa , quæ constitutum diem præcedebat , totum Cælum densissimis nubibus subito corripitur , ac ventis primum , deinde imbris ita conturbatur , ut corruere videretur. Quod ut sensi [sensi enim statim] nihilo minus , quam Cælum , ipse omnino commotus sum. Ad unum quoque novum venti flatum graviter angebar : totus etiam imber in me , vel in lecto cubantem irruere videbatur. Me tamen , ut melius poteram , sustinebam , sperans ad nascentem Solem utrumque cessaturum. Surgo e lecto sub ipsum diem , quando sub Solem dicere non possum : circumspicio : nusquam spes fore melius ostentatur : nusquam Auroræ albor , nulla sydera , nox omnia densissima , creberrimus imber. Neque tamen etiam dum despero : media æstas , meaque integritas consolatur , ut partim ventus , partim Sol nubes illas discutiat , cesset imber , serenum inducatur. Sed frustra omnia : pergit , ut cœperat inclementius imber ; venti vis in sextam diei horam acrius ingruit. Tum tota spe excidi , totoque animo concidi. Quicquid enim reliqui mansit , totum fuit desperatio , atque in Cæli inclementiam illam verba aspera. Quod si integritatis meæ nullam [de more suo] rationem habere noluit , saltem Madii optimi Philosophi , hoc est , Viri sanctissimi , Sylvii adolescentis Apollinis filii , Fuschinii omnium integerrimi aliquam habere potuit. Sed nunc plane perspicio , quantum mihi fortuna adversetur , ut apud eam plus mei solius odium , quam eorum omnium bonitas valuerit. Utinam , Sylvi , mihi tuus ille divinus spiritus vel unum tantum diem concederetur ; efficerem probe , ut hoc haud inultum abstulisse minime lætaretur. Quod ego eo securius facerem , quo jam ab ea nihil gravius accipere , neque novum ei injuriæ locum dare possem. Neque tibi tamen suadeo , ut meam istam vicem doleas , atque gratissimus hoc officium mihi præstes. Nolle enim mea causa illam in te acerbius insurgere. Valde enim est mala bestia , quæ cornu , quæ dente , quæ pedibus ferit. Quin si me audias , eam tuis verbis nobis lenire studebis , atque omnibus precibus rogabis , ne posthac , cum iterum hoc ipsum constituerimus , tam adversa , atque ingrata sit , tibi que soli unum illud iter feliciter concedat. Vale.

BAR-

BARTHOLOMÆUS RICCIUS

Sylvio Antoniano S. D.

Se pœne in lecto valentem, dormientemque pomi lignei casu, unde lecti tentorium pendebat, oppressum fuisse significat, eumque ad suam villam in Quartifano invitat. Nihil in posterum metuendum a malis ligneis addit, quæ in ferreos uncas in terebræ morem ab altero capite præacutos commutarit.

7. **J** Am mihi nullum locum posthac periculo vacuum video, quando in lecto valens, dormiens, pœne oppressus sum. Nosti pomum, quod dicunt, ligneum, unde lecti tentorium pendet. Illud veteri funiculo, quo, ut usus ferebat, aut tollebatur, aut demittebatur, diffracto, mihi in alterum armum [in latus enim dormiebam] graviter decedit, ut videas hominum conditionem; sed bono tamen fato factum est, ne mihi in caput decideret. Totum enim illud mihi, quod ejus pondus erat, contrivisset; cum ita latus offendisset, ut, etiam post vigesimum diem inter eundum non nihil sentiam. Quod vero ipse non solum prorsus quartana careas, sed omnem etiam gravedinem a te removeris, valde gratulor. Quare etiam commodè poteris animi causa huc ad me te conferre, ubi lætius, quantum tibi videbitur, commoraberis. Neque est, quod quicquam a ligneis malis metuas. Magis rosea, quæ hic sunt hoc anno pulcherrima, nostris manibus colligemus. Ferreis enim uncis ab altero capite in terebræ morem præacutis, in trabe immixtis, annulo item ferreo, nullo funiculo, ut tentoria appenderentur, curavi. Vale. Ex meo Quartifano.

BARTHOLOMÆUS RICCIUS

Sylvio Antoniano S. D.

Causam affert, cur eum ægotantem visere non potueris. Addit, se cupere, ut Bononiensi Bolognetio mirifico adolescenti hospiti suo, qui miro desiderio tenetur eum ad lyram canentem audiendi, eam gratiam faciat, ut, cum eum reuideris, rem eleganter in sermonem inducat, sumptaque lyra, aliquid vel etiam de ejus laudibus ad eam agat.

8. **P**Edes sum; Camillus ægotat; Cælum æstu ardet; via longa est; rei familiaris cura me sibi totum postulat; his multis ac maximis impedimentis te his diebus ægotantem non visi. Nunc te hoc, quo commodius possum, modo viso, atque rogo, non ut mihi ignoscas, qui nihil admisi, neque ut valetudinem tuam cures, qui tua sponte id facis; sed, ut convalueris, per istos æstus, ut parumper tua studia, illa, inquam, severiora studia, non hæc humaniora, seponas, genioque, atque lyrae tuæ tantum indulgeas. Hospes hic est Bononiensis Bolognetius, mirificus adolescens, qui te ad lyram canentem audiendi miro desiderio tenetur. Hanc si illi gratiam facere posses, & te, & optimo adolescentem, qui haud scio, an huc ea tantum causa accesserit, dignissimum faceres. Poetæ, ac XL. Viri filius est, neque etiam ipse cum infans, tum etiam a tuis Musis alienus. Si te reuideris; reuideret omnino; ac febris, ut audio, prorsus abierit, rem eleganter, ut facere soles, in sermonem induces, atque ita belle lyram posces, atque aliquid vel etiam de ejus laudibus ad eam ages. Interim vale.

BARTHOLOMÆUS RICCIUS

Sylvio Antoniano S. D.

Ejus ingenium ad omnia nobiliora studia facillime percipienda & factum, & natum laudat, nihilque se dubitare ait, cum par ætas, & studium accesserit, quin Virgilio, & Maroni proxime accedat. Docet, quæ ratione in Cicerone versari debeat, quamque ex eo sibi bene dicendi suppellectilem comparare possit.

9. **L** Egi tuas literas, sed quid ego dico legisse me? cæterorum enim leguntur, tuis vero ita afficior, ut nihil suavius sentiam. His vero omni voluptate suffusus sum: neque id injuria. Nam qua ego dicendi elegantia maxime delector, ejus eæ totæ refertæ erant; ut, cum eas legerem, me non legere, sed omni voluptate frui viderer. O te undique felicem, Sylvi, qui tecum ab ortu tantum ingenium extulisti, atque ad omnia nobiliora studia facillime percipienda & factus, & natus es. Tu in versibus pangendis, sive id subito, de quaque materia, quæ tibi proposita sit ad dicendum, omnes, qui te audiunt, summa afficis admiratione; si ve eos meditare scribis, summo eosdem stupore complēs. In solutiore præterea Oratione quis te facilior? quis compositior? quis comptior, atque elegantior legitur? vereor, ne me, quæ tua est ingenuitas, hoc auribus tuis dare putes, atque hæc magis, quia in te esse cuperem, quam quod ita sint, hæc ad te scribere. Te equidem tantum amo, Sylvi, idque tuis virtutibus, quantum quisquam alius, aut etiam quemquam alium. Sed ea tamen benevolentia nihil impeditur, quo minus, si quid secus in te sit, videre possim, aut adducor, ut ei, quam par est, atque etiam facere debeam, quicquam amplius in te laudando obsequar. Quid autem ad ætatem? numquid hoc quoque falsò tibi dare videbor? Certe cum duo de viginti annos attigeris, summum ætatis tuæ attigeris, quo brevissimo spatio alii fari incipiunt, tu vero & splendide loqui, & numerosè canere didicisti; ut vere ego illud de te quod de Virgilio adolescente dictum circumfertur, usu
pare.

pare possum : *Salve* scilicet , *Sylvi* , *magnæ spes altera Romæ*. Tametsi illud alterum in te mihi duplex verius efficere possum , qui in Poetica facultate jam Maroni adulescenti propius accedere , in dicendo vero Ciceroni etiam grandiuſculo optime respondere videaris ; ut nihil dubitem , cum par ætas , ac studium acceſſerit , quin utrique proxime accedas . In quo vero de me quæris , ut te doceam , qua ratione in poſteriori verſeris , ac quam ex eo tibi ad propositam bene dicendi rationem ſupelleſtilem comparare poſſis ; equidem , *Sylvi* , cum hæc duo tibi præcepero , ut in Cicerone lectionem tuam contineas , atque in eo dieque , noctuque verſeris ; lectioni vero ſcriptionem aſſiduam ut adjungas , omnia , quæ ad hanc poſtulationem pertinent , tibi præcepero . Si quidem ex lectione verborum delectum , cui primas in eloquentia tribuunt ; locutionem deinde , videlicet , ut quæque ac quoquo modo ſplendide , copioſe , humiliter , graviter , atque cum dignitate dicantur , inde quoque aſſequere . Cum vero non poſtrema laus ſit in Oratione numeroſe dicere , idque aurium iudicio maxime comprobetur ; ſi eas in unius Ciceronis lectione attriveris , qui fieri poterit , ut in tua ſcriptione illas poſtea non ſequaris , atque ad earum quaſi harmoniam non concinne ſcribas ? Nam ſi tibi quoties numerum ſervare voles , ad pedum rationem recurrendum ſit , atque cur magis brevi , quam longa ſyllaba utaris , ex arte ipſa erit quærendum , nimis , niſi infinitum , longum laborem tibi conſtitueris , perindeque facies , atque ille , qui formæ literarum ignarus , ſcribat , cui ad earum ſingularium formam effingendam , ſemper ad eam reperiendam erit recurrendum . Quod is non faciet , qui eas frequentiffimo uſu , mente , atque animo comprehenderit . Si quid tamen ex tua lectione in tuum codicem ad præſentioſiorem memoriam tranſcribere voles , ut qui ex pretioſiſſimis gemmis quaſdam præſtantiores deligas , quas poſtea , cum uſus poſcet , in Orationem tuam illiges , quarum micantibus radiis ea illuſtrior , ac ſplendidior fiat , id in primis cum in verborum , tum in ſententiarum figuris ſervari poterit . Pari item ratione , ſi in translatis feceris , haud ab re feceris . In una vero locutionis ratione ſemper attentior eris , ut ſi novum apparatus inde tibi conſtituas , non admodum improbem . At uno tuo ,

tuo, ne mihi frustra summm laborem sumam, facile possum acquiescere. At mihi crede, multo magis unum tuum, quam centum alienos, apparatus tibi esse profuturum. Quidam item sunt dicendi modi, qui per se nituntur, quique eodem modo semper proferuntur, ut *solvendo non esse; dedita opera, sive de industria; quo jure, quaque injuria; tertio quoque verbo; quaque versus; aliud alias; mutatis equis ad celeritatem; ad verbum; de improvviso; ut nunc est; quantum in me est; tantum abesse, ut;* & alii innumerabiles, qui si in unum locum conferantur, ac postea legendo vel percurrantur, istud tuum studium non nihil ornabunt. Sed hæc, & reliqua ejus generis minuta sunt, quæque vel nullo negotio adinveniri possunt. In scriptione vero, quæ in distributione nostra pars erat altera, hoc studii ponendum erit, ut assidue scribas, rescribas, deleas, quæ scripseris, meliora reponas, in eandem sententiam non eodem modo stilum tuum exerceas; quando Cicero affirmat, stilum esse optimum dicendi magistrum, atque effectorem. Sed quemadmodum ex uno Cicerone omnem verborum deletum, cæteraque, quæ Orationem tuam illustrabunt, ita ab eodem scribendi exemplum tibi sumendum erit; ut hunc tibi tantum proponas, cujus non solum lingua loqui, sed ad ejus etiam imitationem tua sensa exponere videaris. Hæc pauca, ut vides, quæ tamen multa sunt, cum tuæ optimæ naturæ adjunxeris, nihil diffido, quin brevi sentias, te, quicquid vis, in dicendo consequi posse. Tametsi in eo jam tam longos progressus fecisti, ut parum viæ ad eum finem tibi relinquatur, quam ego tibi, ut tuo isti desiderio magis satisfacerem, quam quod quicquam meis præceptis ipse indigeres, hoc modo perbenigne demonstravi. Cætera, si quæ sunt alia ad illud iter conficiendum, ea ipse per te facile animadvertes, atque deprehendes. Vale.

BARTHOLOMÆUS RICCIUS

Sylvio Antoniano S. D.

Se plane hospitem Bononiæ esse significat, cum nullum ex amicis suis ibidem offenderit; hospitium malum se invenisse; impressores alios a literis, alios ab operis imparatos esse. Epistolam claudit pistoris insolentiam, & incommodam hospitalitatem facete admodum, & jocosè describens, eumque Bononiam invitans.

10. **A**ltera, & vigesima, ut nostri dicunt, ejus diei, quo Ferraria disceſeram, hora Bononiam perveni, ea cissi commoditate, quæ esse potest in publico; viæ autem facilitate, quæ ex superioribus imbribus orbitis ad rotarum asses effossis, atque etiam lamis veteribus plena esset, quæque postea glebis vento, & Sole obduruisset. Sed id multo gravius, quod meorum quadraginta Virum nullum in Urbe offendi. Cuspius Romæ legatus adhuc tenebatur; Gislerius, Bolognetius, Elefantutius ruri cum familiis per hæc temperatissima Autumni tempora sese oblectabant; Paleotius Carasæ Cardinali Venetias occurrerat, ut plane hospes esse videar. De cubiculo, præter hospitem, non autem hospitati, satis bonum virum, nihil ad meam ad Gandulfium descriptionem; quin ejus fenestræ ita se in Cælum tollunt, ut scalis ad eas aperiendas mihi opus sit. Rides? Peream male, nisi ita est. Sed non apud hunc sum diutius commoraturus. De impressoribus, ut dicunt, qui a literis optime parati sunt, ii ab operis pejus imparati esse non possent; qui vero contra ab his optime, ab illis pessime sunt comparati, ut quid acturus sim, non satis constituam. Si possem hinc hoc, illud autem ab illo, quod opus esset, mutuari, sperarem aliquid confici posse. Dabo tamen omnem operam, ne huc frustra venisse videar. Sed iterum rideas licet. Dum hæc scribo ante lucem ad lumen, ecce tibi pistor, qui nostri vici panes coquit, ostium more suo pultat: non sentitur: iterum gravius repultat: frustra: tertio, ac sæpius iratus vehementiores, atque crebriores ictus ingeminat: omnes mortui sunt. Tum ego, scriptione missa, ad ostium
acce-

accedo. Quis, inquam, tam insolenter fores has infringit? Pistor, ille inquit, qui jubeo istas mulieres panes conficere. Tum isti ostium aperio, ut is suo cum illis perfungatur officio. Ingreditur: vocat: clamat: vociferat: sepultæ sunt mulieres. Tandem ex inferiori ædium parte, credo ex cella vinaria, vox emittitur absurdissima; se facturas; ut videas, cui mihi in hac mea hospitalitate deserviendum sit. In vicinia autem est muliercula mente capta, altera Gabriella nostra, quæ noctu, quæ interdiu, insanis clamoribus totam complet viciniam. Sed quid? expecton te? an non? si me amas, si res tua, si Principis benignitas fert, te octo saltem dies Ferrariensibus subtrahas, atque ad nos Bononiam, pusillas Venetias, advola. Crede mihi, Urbem hanc unam omnium esse commodissimam, Civium vero animos omnium hominum humanissimos, atque in hospitibus accipiendis benignissimos. Vale. Bononiæ Id. Oct. MDLVII.

BARTHOLOMÆUS RICCIUS

Sylvio Antoniano S. D.

Adolescentioribus ejus literis respondens jocatur, eique adolescentulo a Musis virginibus vitium oblatum ait, partumque elegantem ex eo congressu natum, videlicet optimos, versus. Addit, nos Deum precibus frustra sollicitate, ut ea nobis concedat, quæ in nostra manu sunt posita, Principumque animos emolliendos esse, ut pacem faciant, pristinamque quietem, & tranquillitatem Italia restituant:

II. **M**onstrum horrendum, ingens. Ain tu Musas virgines tibi adolescentulo vitium obtulisse, atque ex eo congressu Heroum filium natum? Multiplex medius fidius portentum, mulieres castissimas cum viro coivisse, atque eum concepisse, ac peperisse. Id mihi illi Catonis simile est visum, cum nescio quis prodigium esse diceret, quod mures per noctem mane discessuro soleas corrossissent, neque propterea illi tuto esse discedendum: *minime*, inquit ille: *id quidem prodigium fuisset, si soleæ mures corrossissent.* O elegantissimas Musas, quæ cum tam eleganti adolescentulo coivistis, atque ex eo talem partum suscepistis! Ignosco vobis vestram libidi-

bidinem , imo vero vos rogo , ut eam sæpius repetatis , atque Jovis patris vestri cum Alcumena concubitus imitemini . Concludite diem inter duas noctes , ac vestros Hercules vos quoque progignite ; quando vobis nullus ulter est gerendus , neque ad vestros partus ulla vocanda est Lucina . Sed ad partum tuum redeo . Diis gratias ago , qui , ne abortum faceres , providerunt , aut , ne , ut montes , inurem pareres , effecere : tamen hoc Principum est , non autem tenuiorum virorum . Sed quid , si ipse Musas compressisses ? credo , singulæ singulos Apollines peperissent . Sed hætenus de joci ; fortasse etiam plus satis , qui , ut tibi ad tuas adolescentiores responderem , homo septuagenarius quasi ineptire videri potuerim . Tuum igitur partum , hoc est , tuos optimos versus legi , relegi , atque etiam , ut eorum ratio postulabat , heroice concinnui . Tu quidem , Sylvi , pie , atque ad misericordiam universæ Italiæ causam agis , atque apud eum Judicem , qui pœnitenti ignoscit , atque omnia scelera veniam petenti usque eo condonat , atque remittit , ut se suamque vitam pro hominum sceleribus atrocissimæ , atque turpissimæ morti offerre non dubitaverit . Sed frustra preces fundis ; inanem operam sumis . Non quin is eas libenter audiat , sed quia ejus ope nihil opus est ad id , quod rogas . In Principum nostrorum concordia ea sita est potestas , atque auctoritas . Ii odia deponant , arma abjiciant ; animos inter se concilient , in pristinam concordiam redeant , pacem faciant ; otium constitutum est , quies Italiæ parta est , omnia tuta , atque in tranquillo sunt posita ; ut aliunde quæramus , quod in nobis habemus ; quod qui faciunt , indigni sunt , ut audiantur . Ut illum rusticum imitari videamur , qui cum cæstro in pede [ut in fabulis est] sauciaretur , manibus in Cælum sublati , Jovem rogabat , ut is illud inde ejiceret , quasi ipse iisdem hoc ipsum efficere non posset . Ita nos facimus , qui eum precibus sollicitamus , ut ea nobis concedat , quæ in nostra manu posita sunt . Istos igitur , quorum odiis omnia everuntur , jus sublatum est , vis , & scelus dominatur , cantu , si potes , flecte , eorum animos emollias , atque ita pacem , atque , quod quæris , Italiæ otium constitueris . Hoc vero , quod ad versus tuos . Ego hic aliquot dies esse cogito , cum ut mihi ad impressorem adsum ,

tua

tum ne Camillo filio desim, quem perinde, atque si domi essemus, in vivendi usitata consuetudine contineam, atque ita in aliena Urbe, quasi in sua, esse videatur. Vale.

BARTHOLOMÆUS RICCIUS

Sylvio Antoniano S. D.

Orationem ab ipso de laudibus eloquentie habitam auditoribus placuisse significat. Horratur, ut viam, quam in studiis cepit, ne pergat, & summe de ejus ingenio omnium expectationi respondeat.

12. **H**odie, Sylvi, mihi tecum id prope accidit, quod Cicero cum suo Dolabella sibi accidisse dicebat. Hic enim ad ipsum Dolabellam scribens, sibi ex ejus egregiis rebus, quas in Consulatu gesserat, multas, ac maximas a præstantissimis Viris gratulationes factas esse, quasi cujus consilio eas Dolabella gessisset, quodammodo gloriabatur. Nam cum ipse splendidissimam illam Orationem de laudibus eloquentiæ habuisses, continuo Amanius cum Bendidio ad me accedens, tibi gratulor, inquit, Ricci, quod tam cito tantum alumnus, tibi confeceris. Cui ego: nihil est, quod hac causa mihi gratuleris. Illum magis adolescentem admirari omnes debemus, qui in hoc dicendi genere tantos, tamque brevi tempore progressus fecerit. Equidem, quod ad hanc Orationem attinet, ne verbum quidem ejus aut legi, aut audiui antea. Recte ille quidem: sed ex tuis præceptis, atque institutis eo jam pervenit adolescens, ut etiam sine cortice, ut dicunt, longum natare possit. Tum ego: non negarim equidem me illum ut filium amare, neque quicquam habere etiam in hac dicendi ratione, si modo quicquam habeo quod cum eo non libenter communicarem. Sed mihi crede, tale ejus ingenium est, ut parum adjumenti extrinsecus illi ad quidvis faciendum opus sit. Ego quoque illum ad versus tantum, quos mirifice facit, natum esse credebam, sed, ut ipse quotidie magis comprobatur, nihilominus ad hoc solum dicendi genus, quam ad illud numeris paulo astrius, apposite factum esse video; ut, si vita superfit,

neque ex instituto cursu aut casus aliquis, quod noſim, aut etiam aliorum ſtudioꝝ ratio, quæ jam parata eſſe videtur, retraxerit, utrum præſtantiꝝ Orator, an magis egregius Poeta iudicetur, in dubio ſit omnibus relictuꝝ. Quam meam ſententiam omnes, qui aderant, Locatellii, Pignæ, Friſolii, Bendidii, Lolii, una voce & amanter, & conſtanter confirmarunt. Hæc autem tum de te. Nunc vero ego hæc tecum. Magnam tibi, Sylvi, adverſariam conſtitutam eſſe vides, ſummam omnium tui ingenii expectationem, quam niſi vir præſtiſſeris, non ſolum tuorum, atque adeo tuis commodis imprudenter conſulueris, ſed dignitati etiam non leviter obſueris, quorum utrumque quanto in pretio apud omnes ſit, neminem fugit. Quare ipſe interea pro virili contendes, atque eniteris, ut in neutro tibi deſis. Id autem aſſequeris, ſi ita, quam cœpiſti, viam ire perrexeris, ut quotidie aliquid amplius profeciſſe te ſentias, neque quicquam remum intermiſeris, ne ceſſando retro relabaris, atque ita fiat, ut nunquam ulterius, quo ſemel perveniſti, excedas. Quibus meis fideliffimis conſiliis ſi parueris, tum mihi quoque ex ampliſſima illa tua gloria, ut aliquid decerpam, tibi minime moleſtum eſſe debet. Quid enim ex Oceano guttulam haurire? Non quin hoc quoque tua ſponte ſis optime facturus, ſed quoniam mea paternæ cohortatione, ſi non aliquid doctrinæ, certe acutioris ſtimuli non parum ſit acceſſurum. Vale.

BARTHOLOMÆUS RICCIUS

Sylvio Antoniano S. D.

Se magis frui ejuſdem ſigno in vaporarii cornice collocato, quam præſentia, oſtendit, magnoque deſiderio teneri Romanæ Urbis videndæ, ſed alterum ſupra ſeptuageſimum annum, quem homini fatalem notant, rei huic impedi-mento eſſe, proptereaꝝ properare, ut ſua ſcripta edat. Totum ingreſſum Principis ſue Medicinæ in Urbem ſe ad eum perſcripturum promittit.

13. **Q**uoties in cubiculum ingredior, quo mihi in Bibliothecam iter eſt, toties tui memoria mihi renovatur. Id autem ex tuo ſigno, quod in va-

po-

porarii cornice , ut dicunt , collocatum est . Id quod quam crebro fiat , dici non potest , ut prope te nunc absente magis fruar , quam cum præsens adesses , non faciebam . Sed illud mutum , mortuum , umbra : vivus longissime abest , ut inde præter tui recordationem nihil habeam amplius . Tantundem te a meo plumbeo habere , audio respondere . Acquiesco : te amo ; a te amor : illud ex oculis , hoc ex animo . Sed moleste fero , te a me in amore vinci ; malletem equidem superari . Jam alter mensis adest , cum a nobis discessisti , neque tamen adhuc quicquam de tuo adventu . At novus eram in Urbe : domus , quæque ad victum pertinent , cæteraque mihi erant paranda . Recte quidem . Ignosco . Quid vero si ego tuas literas mea præsentia , non autem meis literis antevertam ? Nihil enim mihi optatius , quam ut ego Romam , tu me Romæ , aliquando videam . Certe , Sylvi , nihil propius est , quam ut cum meo Principe istuc veniam . Jam nimis ingravescis : non ego . Sed ardens desiderium tantæ Urbis videndi , tot , ac tantos amicos visendi me vel quinti lustris virum reddere potest . Nostri præterea , quam ego ætatem meam oprime , atque athleticè feram . Unum impedimento , si istos audiamus , esse potest , alter supra septuagesimum annus , quem homini fatalem notant , atque in quo plures decedunt , observatum esse dicunt ; quæ suspicio mihi quoque injecta est . Quare etiam propero , quantum possum , ut mea scripta edam , De Judicio Florentiam misi , ut opus publice describatur . Familiares Epistolæ adhuc sub prælo sunt . Cum hæc scribebam , XIII. Cal. Mart. intercalares in Padanam insulam , ubi superiori nocte Princeps nostra Medicia accepta fuerat , ut eam inde in Urbem solemniter pompa ducerent , omnes conveniebant . Ego Julio , illi Monoclo LIII. annos in carcere custodito , comes sum datus . Dum equus adducitur , hæc tecum . Sed servus pulsat . Equum adesse ferunt , consensum eo . Totum ingressum postea ad te perscribam : nunc vale . XIII. Cal. Mart.

BARTHOLOMÆUS RICCIUS

Sylvio Antoniano S. D.

Colloquium cum Robertellio Bononiæ habitum describit. Antonianii ingenium laudas ad canendum ex tempore de re qualibet proposita expeditissimum, hortaturque, ut rerum omnium cognitionem assequi conetur, seque brevi domum rediturum significat.

14. **F**RANCISCUS Robertellius tandem Bononiam venit expectatissimus. Hunc ego cum viserem, ita me amanter complexus est, ut germanum fratrem amantius complecti nequivisset. Continuo enim inquit: ecce meum Riccium, quem Ferrariæ videre non potui; nunc Bononiæ in meo complexu teneo. Tum ego: doleo, mi Robertelli, te Ferrariæ domi meæ ita hospitem accipere non potuisse, ut tu me nunc Bononiæ advenam accipis: atque ita assedimus. Incipit ille. Primum Herculi Principi nostro gratias immortales agit, qui se humanissime accepisset, atque cum omni rerum suarum vetigali condonatione ad iter suum res suas continuo expediti iussisset: deinde in tuas laudes ingressus, earum nullum finem fecit. Commemorat enim, ut ad se ad suum hospitem humanissime visum accessisti, ac post amicissimos complexus, qui toti sermones fuissent, quemadmodum cum Pigna de Poetæ fine disputarit, cum diceret se Horatii sententiam cum cæteris facile tueri; Pignam vero contra duos fines nulli facultati dari acutissime disputasse, atque in una tantum voluptate eum finem versari defendisse: ut nisi ego hic, ea causa essem, qua plane scis, meum ab Urbe nostra discessum hunc peius odisse non possem. Sed neque, quæ sequuntur, me levius affecerunt, cum narrat, te lyram postea sumpsisse, atque ad eam Cæsaris Heroicum, deinde alterum, quo postremo Italiæ calamitatem deploras, cecinisse. Quibus absolutis, atque ita, ut fit, brevioribus sermonibus interjectis, te de eo quæsisvisse, ut tibi proponeret, de quo ex tempore Hetrusco carmine caneres. Tum se, ut literas laudares, proposuisse. Video te primum, ut de illo cane fertur, qui in vilem feram

ram objectam nihil commotus est, ad nimis vulgare argumentum, ac de quo alias centies egisses, quasi stetit; deinde tamen, ut ei satisfaceres, quasi in tranquillissimo Oceano navigares, vela solvisse. In qua una tanta rei pertractatione te omnia & prudenter vidisse, & suo unumquodque loco apte, atque concinne distribuisse; ea vero dictione atque actione, quæ tua Romana est, mire persecutum esse, asseverabat. Quo perfecto, te item novum argumentum quæsisse, dicit. Credo ego, te a tanto Viro in re aliqua nobilissima, ut majus periculum de tuo ingenio faceret, cupivisse; id quod ipse, suam humanitatem sequens, atque istis tractati fortasse non satis fidens, haud imprudenter omisit. Quare alterum tibi proponit superiori non minus tritum, videlicet, ut eorum statum, qui Principibus serviunt, quos Aulicos vocant, laudares; cui respondisti, te sæpe alias contra cecinisse, nunc tamen in ejus gratiam hoc quoque libenter esse facturum; in quo item te ipsum longe superasse, summa cum omnium admiratione testabatur. Quibus omnibus uti ego tua causa interea afficerer, ne expecta, dum dicam, cum te scias, ut filium alterum, a me amari. Sed hæc, mi Sylvi, pœne etiam dixi fili, in adolescente, atque ista, qua tu es ætate, vere commendantur, atque etiam admirationem faciunt; in paulo vero adultiori non ita; in senectute vero nullam prorsus dignitatem habent. Quare non tam præsentem gloriam admiraberis, quam futuram ex cæteris tuis præclaris studiis omni labore contendes, ut assequaris. Illa, illa, Sylvi, solida, ac vera laus est, quæ ex omnium rerum cognitione nascitur. Tu igitur, ut facis, perge illi omnem operam dare; neque si tibi unum Madium præstantissimum illum quidem Philosophum belli hæc importuna rabies ademit, non tamen nunc cum Belgeriniis, tum etiam Locatelliis tibi deerunt. Neque ego despero, cum bellum hoc, jam prope affectum, totum sepultum erit, quin in sequentem annum Madium nostrum sis habiturus. Tu vero interea in tuis istis initiis ita versaberis, ut ad illa postea divina studia quasi factus, non tantum eruditus venias. Hactenus de te. Nunc ad me redeo. Brevi tecum esse cogito. Domo enim diutius abesse non possum; ac nisi me magis hic Camillus filius, quam Epistolarum mearum editio detine-

neret, me domi Robertellius, non autem Bononiæ offendifset. Vale. Bononiæ VI. Idus Novemb. MDLVII.

BARTHOLOMÆUS RICCIUS

Sylvio Antoniano S. D.

Ejus carmina ita omnibus probari scribit, ut sibi singuli ea descripserint. Ad eum M. Tullii versus mittit, quem addit & nomine, & re M. Tullium Ciceronem imitari, & Virgilii vestigia pone sequi ex ejusdem scriptis facile ipsi judicaturum. De suo reditu nihil habere, quod scribat, navem tamen se conscensurum, antequam majus frigus Cælum occupet, & aquæ ad navigandam gelu obdurescant.

15. **T**ua carmina ita hic omnibus probantur, ut qui ea legere, quorum magnus numerus fuit, sibi omnes descripserint. Nunc in manu M. Tullii sunt. Quid, inquires, M. Tullii? Erravi: volui dicere Virgilii. Sed neque erravi. Nam is quidem est M. Tullius nomine, re vero haud impolite utrumque refert; qui & eleganter scribit, & numeroſe etiam, & concinne canit, ut ex ejus versibus, quos tibi mitto, ipse facile judicabis, qui ex tuis te tanti facit, ut nullum æque, neque quicquam tam libenter, quam de tuis laudibus audiat. Puta tu, ut conveniamus, atque ego illi meis de te prædicationibus satisficiam. Hic te ex meis verbis, atque adeo ex tuis literis cum multis aliis avide expectabat; etsi jampridem de adventu tuo desperatum est: quamquam ego nihil umquam de eo melius, quam nunc facio, speravi. De meo vero reditu, aut in quem me diem expectes, ego nihil etiam dum habeo, quod ad te scribam. Sane hæc peregrinatio, quam vellem, jam mihi longior esse videtur; sed me confortor, cum hic frustra non sum; tamen antequam majus frigus Cælum occupet, atque aquæ ad navigandum gelu obdurescant, navem conscendam, atque ad vos remis, velisque advolabo. Vale. Bononiæ.

BARTHOLOMÆUS RICCIUS

Sylvio Antoniano S. D.

M. Tullii Beroji ad eum carmina mittit, quibus recentem Italiae calamitatem deplorat, quam eodem versuum genere idem Antonianus persecutus fuerat. Editionem suam nondum ad dimidium venisse admonet, secumque se propediem, quidquid descriptum fuerit, ad eos allaturum.

16. **M.** Tullius Berojus hæc mihi, quæ tibi carmina nostro, et si mihi soli tota est inscripta, communis est. Tamen is in illis tuas magis, quam meas laudes persequitur, idque mea cum summa voluptate, qui eo modo dupliciter laudari videor: semel ab eo; iterum a tua virtute, cum cujus laudibus mea laus conjungitur. Altera tota tua est: nisi quod ipse quoque hanc ipsam cum eo communem habes, ut qui rem eandem, atque eodem versuum genere persecutus sit. Hic enim, ut tuos versus vidit, continuo: vide quæso, mi Ricci, ut in hanc sententiam ego quoque luserim; versusque suos mihi tuorum quam simillimos legit. Tum ego: Beroj, hoc quidem nihil admodum mirum videri potest. Res enim omnibus pernota est, atque in qua sive Poeta, sive Orator stilum suum exercere posset. Quis enim recentem Italiae calamitatem deplorare, atque etiam eo modo, quo uterque vestrum facit, facile non possit? Ita est, inquit: tamen mihi pergratum feceris, si ut ego a te ejus versus legi, eam operam dabis, ut a te eodem ipse quoque meos habeat. Id quod ei libenter me facturum recepi: idque nunc facio. De editione autem mea, ea nondum ad dimidium venit: veniam ego tamen ad vos propediem, mecumque quicquid descriptum erit, afferam. Vale interea. Idem ut Locatellius noster faciat, meis verbis jubebis. Bononiæ.

BARTHOLOMÆUS RICCIUS

Laurentio Frizolio S. D.

Respondet, studium Latine scribendi eleganter, atque polite probatissimorum Scriptorum assidua lectione, & ad eorum imitationem frequenti perscriptione adjuvari. Itaque ab uno Cicerone numquam discedendum, & in illo uno die, noctuque inherendum docet; numquamque futurum, ut ex illius solius lectione ulla ipsi satietas creetur; stilum frequenter exercendum, & multa volumina conscribenda, ut rationis scribendi, quam querit, particeps fiat. Vices has servandas, ut a lectione ad scriptionem, a scriptione ad lectionem se conferat, neque unquam una simul utramque deponat.

17. **Q**Uæris a me, Frizoli, ut quid eleganter, atque polite Latine scribendi studium adjuvet, idque strictim, atque paucis ad te perscribam. Utrumque magnum, ac perdifficile. Alterum enim ut rarum, sic etiam laboriosum ad præcipiendum: alterum, quod amplum, copiosumque sit, ut in pauca conferatur, rei magnitudo non patitur. Conabor tamen, ut isti tuo tanto, tamque honesto desiderio potius morem geram, quam ut tantæ rei magnitudini me satisfacere posse sperem. Duo sunt mea quidem sententia, in quibus hæc universa facultas versatur; alterum probatissimorum Scriptorum assidua lectio, alterum ad eorum imitationem frequens præscriptio. Nam cum verborum delectu, & eorundem collocatione hæc elegantia maxime constet, hoc aut ab una lectione, aut a re nulla alia commodè peti posse videtur. Quare, si me audias, ab uno Cicerone, qui pro cæteris omnibus mihi instar est, numquam discedes; immo vero in hoc uno die, noctuque inhærebis; quem ut deposueris, eundem ipsum iterum sumes, atque, ut ab isto ipso discesseris, ad istum ipsum iterum redibis. Neque est quod timeas, ut fieri solet, ut ex huius solius lectione ulla tibi satietas creetur, nisi omnem delectationem fastidio sis habiturus. Variis enim hic rebus, iisque Viro dignissimis, quasi prætium diversis, ac nobilissimis floribus ornatum, quam est

est refertissimus. Ex hujus frequenti lectione, atque assidua versandi ratione verborum delectum, tum eorum ipsorum concinnam collocationem, quæ duo, quam quæris, elegantiam maxime conficiunt, facile consequeris, perindeque in hoc facies, atque externus adolescens, qui in Italiam ad ejus linguam perdiscendam commigrarit, qui in media Hetruria sedes suas collocarit, neque inde postea pedem ullum prius extulerit, quam ad eorum modum voces omnes proferat, atque loquatur; quod facile ex quotidiana loquendi consuetudine assequetur; quique postea, si aut scribat, aut loquatur, in media Hetruria natus esse videatur. Ita tu, si in uno Cicerone in Latinis habitabis, dicendo efficies. Ad ejus enim modum splendide, atque venuste & loqueris, & scribes. At hoc quantum ad lectionem. Jam vero quod ad scriptionem. Huic Cicero primas in exercendo tribuebat, cum diceret, stilum scribendi optimum esse magistrum. Et re vera si quis tantum in lectione eorum, quos volumus, commoretur, neque quicquam calamum exerceat suum, fortasse, ut de aliorum scriptis recte iudicet, assequetur; ut vero ipse polite scribat, numquam. Accedat oportet frequens stilus, ac volumina multa conscribat, qui aliquid in hoc studio se proficere posse speret. Nam quemadmodum ille, qui omnem artis alicujus rationem, ac scientiam perceperit, nisi eam postea exercuerit, nisi assidue pertractarit, nihil in ea, quod laude dignum sit, effecerit: ita Scriptor ille, qui veræ scriptionis præcepta omnia pernoverit, ac etiam, ut nos volumus, in optimis noctes, atque dies sese continuerit, nisi stili frequens usus accesserit, hujus scribendi rationis, de qua nos intelligimus, numquam, vide quid dicam, particeps fiet. Quare, ut tu in Ciceronis lectione satis aures tuas pertriveris, tum calamum fumere poteris, atque quotidie aliquid tibi effinxeris, quod scribendo exprimas. Scribas, rescribas, deleas hoc, aliud supponas, nova semper argumenta tibi suppeditent, quæ tu oratione convestias. Vices has serva, ut a lectione ad scriptionem, item a scriptione ad lectionem te conferas, neque umquam una simul utramque deposueris: verum, quod otii lectioni concesseris, id scriptioni tribuas. Item contra. Consolare amicos in rebus adversis; in lætis eisdem gratulare; hos aliis commenda: nunc
hac,

hac, alias alia de re, ut ea sese obrulerit, agas. Si vero Ciceronis Epistolas, quæ tibi magis videbuntur, sumpseris, atque eis quasi tibi missis rescripseris, mihi crede id in tuam istam dicendi rationem plurimum collaturum, brevique fore, ut te istius tui studii minime pœniteat. Hæc duo nunc; quotidie, si quid aliud opus erit, de eo coram inter nos colloqui poterimus. Vale.

BARTHOLOMÆUS RICCIUS

Laurentio Frizolio S. D.

Gratulatur de nobilissima ipsius conditione Bononiensi; se amorem suum erga ipsum re ipsa, non pollicitationibus semper comprobasse; ad id vero faciendum ejus singulari bonitate, probatissimis moribus, & singulari eruditione se fuisse compulsam. Majorem fortunam Romæ eum brevi expectare, qua ut prudenter utatur, ejus sapientiæ futurum.

18. **D**Uabus tuis literis eadem de re, sed non eodem tempore conscriptis, unis his respondebo. Gratulator tibi statum istum tuum, tuamque istam nobilissimam conditionem. Quod vero mihi gratias agere non cessas, ac totum istud boni mihi acceptum refers, tu quidem amice, atque ingenue; sed tamen, quod minime opus erat, facis. Equidem, Frizoli, a quo die te prius cognovi, in dies magis amare perrexi, idque ob tuos optimos mores, tuasque singulares virtutes feci. Quare etiam tibi, ubi meam operam opus esse vidi, nusquam defui, unumque illud semper studui, ut amorem erga te meum re ipsa, non autem pollicitationibus comprobarem. Ferrariæ apud nostros Trotios te collocaui; illi tam te nunc quoque absentem cupiunt, quam præsentem amabant. Bononiæ nunc multo nobilius agis. Hoc quoque mei officii nihil est expers, qui te apud omnes istius Urbis doctissimos Viros non mediocri commendatione sum prosecutus. Sed, mihi crede, nihil tibi adulator, nisi tui probatissimi mores, nisi tua singularis bonitas, nisi studia minime vulgaria id a me libentissime impetrassent, verbum de te nullum umquam fecissem; ut quas gratias mihi hæc de causa agis
fin-

singulares, eas tuis moribus, tuæque bonitati, atque singulari eruditioni magis agere debeas. Sed adhuc es in initio. Hoc tibi feliciter audeo ominari. Major fortuna Romæ te brevi expectat. Hæc illic te totum complectetur; qua postea, ut prudenter utaris, tuæ erit sapientiæ. Redeo ad me. Orationem de V. Caroli Cæsaris laudibus confeci: eam tamen non sum tam cito editurus. Sylvius te tantum amat, quantum quemquam alium; non enim possum dicere, quantum quisquam alius, ne mihi illum parem faciam. Te resalutat. Idem facit Madius, idem Pigna. Vale.

BARTHOLOMÆUS RICCIUS

Laurentio Frizolio S. D.

Antonianii ingenium laudat, & a se gratias immortales Deo agendas esse significat, quod feliciter viderit duos fratres suos discipulos, alterum ad Ferrariæ Principatum evectum, alterum Cardinalem factum. De suo cum Cardinale Romam adventu nihil adhuc satis habere constitutum; se jam ad septuagesimum primum ætatis annum pervenisse; non satis ex recenti triplici gravi morbo confirmatum esse; familiam sibi grandem esse, Camillumque filium a tali cura abhorrevit. Deo itaque relinquendum, ut faciat, quod saluti, atque commodis suis expedit.

19. **B**inas tuas literas in lecto tertiana laborans accepi, quarum alteris mihi significas, Antonianum nostrum pro Petri Æde ad Summum Pontificem, atque Cardinalium Collegium primo jejuniorum die de more Orationem habuisse, eamque cum dictionis splendore, tum etiam actionis dignitate mire ab omnibus commendatam, quod quidem mihi magis gratum, quam novum accidit. Novi ego jam a puero adolescentis ingenium, neque id destitit omnibus prædicare, atque etiam in quo potui, aut meis literis ad amicos commendare, aut etiam monitis illum adjuvare, quicquam omisi. Sed fosculi sunt hi, ut dicunt, mox, cum adoleverit, maturiores fructus eum edere senties, modo nobis illum Dii incolumen servent. Ad alteras venio, quibus

bus mihi de Aloysii Atestii mei discipuli Cardinalatu perarifice, ac benevole gratularis. Est ita, Frizoli, ut dicis, cur Deo Optimo Maximo gratias agam immortales, cujus voluntate duos fratres meos discipulos, alterum ad Ferrariæ Principatum pervenisse, alterum Cardinalem factum, feliciter viderim; id quod ego pie, ac Christiane quotidie facio. De meo vero istuc cum Cardinale adventu, adhuc non satis habeo constitutum. Hodie, qui est Id. Martii, LXX. & alterum annum ago. Decem hisce mensibus proxime elapsis ter graviter ægrotavi, neque nunc satis confirmatus sum. Familiam habeo, quod familiam ducit. Nosti uxorem scemellam, neptes ex fratribus grandiusculas. At Camillus filius eam reget, & prudenter gubernabit. Nosti quam sui juris sit, quamtumque ab omni tali cura abhorreat. Equidem, ut Cardinali nusquam desim, omnia facere possum; ut nobiscum etiam sim, nihil libentius facerem, cum me quoque Romam videndi maximum jam pridem teneat desiderium. Hæc adventus mei adhuc informata ratio est. Deus reliquum, quod saluti, atque commodis meis expedierit, ut qui solus id novit, ita etiam effecerit. Vale, ac Sylvio nostro salutem. Ferrariæ. Id. Martii MDLXI.

BARTHOLOMÆUS RICCIUS

Francisco Tonanio S. D.

Ob diligentiam in curando Sylvio prope paternam se multum ei debere fatetur, rogatque, ut videat, ne per difficilem hyemem quotidie ab Urbis capite ad alterum caput Doctores suos audiendi gratia itando in periculum ejus vita adducatur; ne de media nocte ex lecto ad libros exsurgat, cum mollis, ac delicatus adolescens sit, & frigido ad concoquendum stomacho. Admonet, moderata durare, quæ vero modum excedunt, cito interire.

20. **E** Go te, Francisce, ob tuos istos optimos mores valde amo; ob singularem autem ac prope paternam diligentiam, quam in Sylvio nostro curando adhibes, quem numquam a tuo latere vel unum pedem discedere finis, multum etiam tibi debeo. In quo tuo
sum-

summo erga illum studio etsi nihil est, quod ipse non videas, quodque desiderandum omittas, ego tamen, qui post te illum omnium maxime diligo, ut mihi satisficiam, te etiam atque etiam rogo, ut videas, ne per hanc difficilem hyemem, cum ab Urbis capite ad alterum caput quotidie illi cum ad Belgerinium, tum ad Locatellium ejus Doctores itandum sit, aliquid gravioris morbi contrahat, quo postea non solum tantus studiorum cursus interpelletur, verum etiam ejus vita in periculum adducatur. Sane vel paucorum dierum studiorum jactura magna est, eaque fugienda, sed vitæ nulla major, quæ cum nobis semel adempta est, nunquam postea recipitur. Quin domi etiam id quoque providendum erit, ne scilicet de media nocte ex lecto ad libros per hæc ingentia frigora exsurgat. Mollis enim est adolescens, ac delicatus, quique frigido ad coquendum utatur stomacho: hunc parva vis frigoris facile exsugget. Moderata, mihi crede, sunt, quæ durant, quæ vero modum excedunt, cito intereunt. Ille senectutem effoctam a dissoluta juventute reddi præcipit: ego vero ab immoderatis laboribus eam, antequam veniat, interfici, possum ex ejus ipsius sententia affirmare, cum ait, qui diu senex esse cupiat, eum mature senem esse faciendum. In quem meum metum id quoque me inducit, quod hujus generis ingenia, quæ præcocia appellant, brevi ad maturitatem suam pervenire solent. Idque male natura comparatum esse videtur, quod ubi simul una sunt bona plurima, certant, eumque, in quo sunt, interimunt; a quibus omnibus nobis & valde metuendum, & diligenter cavendum est. Vale.

BARTHOLOMÆUS RICCIUS

Laurentio Ochio S. D.

Franciscæ propinquæ suæ causam commendans postulat; ut æquum judicium de ea ferat, seque jus suum, non alterius injuriam sequi, profutur.

21. **E**tsi Franciscæ propinquæ meæ causam sæpius coram tibi commendavi, nunc tamen, quando
 Tom. II. L judi-

judicium instat, illa, eandem commendationem ut tibi per literas renovem, a me valde contendit. Narrat enim omnium rerum, quæ sub divisionem veniunt, æstimationem factam esse, idque tantum restare, ut ad æquissimam portionem dividatur. Ea autem esse videtur, si cuique cujusque rei pars dimidia tribuatur; non autem alteri tota domus, alteri fundus; ne illi, ubi habitet, foris conducendum, huic vero pro agro in tegulis ferendum sit. Hoc, si æquum sit, quod æquissimum esse videtur, ut decernas, te etiam atque etiam rogo; sin contra, nihil laboro. Jus enim meum, non alterius injuriam sequor. Vale.

BARTHOLOMÆUS RICCIUS

Aonio Paleario S. D.

Facete de fide sibi data non præstata conqueritur, frustra que se ab onere voluminum suorum exemisse, quæ a Cephalio Juris Civilis Papia Interprete accipiet librario danda, ut vendat. Cum autem secum tres dies esse noluerit, se ad eum brevi venturum, gravissimumque hospitem ad longissimum tempus cum eo commoraturum significat.

22. **I** Tane fidem datam præstas? itane tuum Pignam, atque Lollium, ne quid de me dicam, revisis? O amicum elegantem, qui tres suos veteres amicos tam optatus decipit, fallit! Expecto navicularii præproperam festinationem, diem studiorum instare, viam longam, tempora pertimescenda, & cætera id genus. Scilicet omnia ficta, atque inania. Me miserum, qui verebar, ne in Hetruria ægrotares, quotidie, vel etiam in singulos dies, tuum istum diem expectans: quando ecce Lollius mihi significat, te Mediolani esse, atque ad te eo scripsisse, quo nuntio gravius offendi non potui. Sed si ea tamen ratione nos devitasti, atque fugisti, ne te meis voluminibus onerarem, haud recte vidisse te, nunc vides. Ea enim tibi a Cephalio, qui Papia Jus Civile interpretatur, mitto. Tu vero istic, ut coram constituimus, tuo librario ea vendenda dabis: pretium autem is faciet pro voluminis ratione. Interea vale, & quoniam cum esse tres dies noluisti, me brevi expecta
ad

ad longissimum tempus tecum commoraturum, gravissimum scilicet hospitem, quique tuorum scriptorum omnium omnes capsulas tibi compilet, atque exhauriat. Rides? videbis, si vivimus. Vale.

BARTHOLOMÆUS RICCIUS

Dario Bocarinio S. D.

Pro accepto beneficio in se sponte collato gratias ingentes agit, rogatque, ut quidquid a se referetur, id eo loci habeat, quo gratissimi, atque sui studiosissimi haberet.

23. **D**Ari, quantum tibi debeam, ipse optime scio; quantum autem ego de me optime meritis gratus esse soleam, ipse cum cæteris, cum usus veniat, faciam, ut intelligas. Etsi tuo tanto in me officio omnem meam referendæ gratiæ rationem facile superasti, qui tua sponte id in me contulisti, quod nullis meis precibus vix sperassem a quoquam alio impetrare. Res enim major esse non poterat, mihiq; perquam necessaria; ut etiam si in ipsa tibi referenda gratia par sim, ex eo tamen sim futurus inferior, quod fecero benignissime laceffit, semperque magis referre, quam inire gratiam videbor. Te tamen rogo, ut quicquid a me tibi referetur, id eo loci ut habeas, quo gratissimi, atque tui studiosissimi haberes amici. Vale.

BARTHOLOMÆUS RICCIUS

Basilio Milanio S. D.

Gratias agit, quod de se honorificentissime locutus fuerit, & sua scripta laudibus omnibus extulerit. Se in posterum curaturum, ut mutuo amore ei respondeat, & si possit, ejus benevolentiam superet. Opus de Imitatione, & cetera scripta, quæ se optare significaverat, mittit.

24. **C**Amillus filius mihi scribit, quæ multa secum de me honorificentissime locutus es, cum & mea scripta omnibus laudibus efferres, & propterea te me, quam quemquam alium, nihilo minus, ut tuo

verbo utar, observare; quæ mihi eo jucundiora accidere, quo etiam minus expectabantur. Qui enim ego ab eo homine, quem neque de facie noscerem, tanti me umquam fieri existimassem? Neque etiam in meis scriptis tantam vim inesse, quæ tantum amorem mihi conciliaret, in mentem umquam venisse potuisset. Sed cum hæc mihi gratissima fuere, tum etiam nonnihil ex eo quoque molesta accidere, quod mutuo tibi in amore tantum tempus non responderim, præsertim cum meus mos sit, magis in eo amicos superare, quam etiam æquare. Quare mihi posthac videndum erit, ut in te amando id studii, atque benevolentiae ponam, ut in quo imprudens defecerim, sciens id longe superem; id, quod re ipsa comprobare incipiam. A Camillo enim cum his literis cum meum opus de Imitatione, tum etiam cætera scripta, quæ te optare significasti, habebis. Vale, meque, ut tua sponte facere cœpisti, nunc etiam meo rogatu ama, qui tibi sum in eo officio optime respondurus. Ferrariæ.

BARTHOLOMÆUS RICCIUS

Lollio S. D.

De Bentivolii gravissimo morbo certiores facit, monetque, ut, si vivum eum visere velit, cisum conscendat, & in Urbem advolet. De humana conditione dolet, miseriæque omnes vera vitæ cogitatione fortiter ferendas subjicit.

25. **B**entivoli noster, nisi animam ageret, gravius ægrotare non posset. Assidua enim, idque multorum dierum febris conflatur, postremo cum pulsus intermissione, quod medici in ægrotis lethale signum esse dicunt, ut si eum vivum visere velis, cisum conscendas licet, atque in Urbem advoles. Ut videas quam humanæ conditioni fidendum sit, quem optime valentem paulo ante reliqueras, nunc quasi ad ejus elationem inviteris. Certe quavis sagitta [quid enim flumine dicam?] hic omnia magis fluxa sunt. Pueritiam continuo senectus consequitur, vitæ mors adhæret, ut nihil homo sit, nisi postquam mortuus est. Id enim qui tollunt, hominem omnibus belluis infeliciorum faciunt. E-

jus

jus igitur veræ vitæ spe hic istas misérias consolemur ;
nosque ad istum discessum in Christo comparemus. Vale.

BARTHOLOMÆUS RICCIUS

Lollio S. D.

Bentivolium melius habere significat , ac propterea eum reditum suum ad Urbem differre posse. Respondet de sorbis sibi commendatis , additque , Horatio ejus filio in ludo minime fidendum , cum in tribus lustris se admodum fefellerit.

26. **B**entivolius noster , ut hoc pro illo , melius habere cœpit , jamque spes est eum posse vivere , ut hac ratione reditum tuum ad Urbem tui nobilissimi Musei studio commode differre possis. De sorbis locutus sum cum meo villico. Is apud vicinum nostrum , qui plantariis cujusque generis optimam operam dat , rectos , ac procera altitudine , caudicis etiam apta crassitudine notasse se dicit. Illum continuo remitto , ut eas tibi emat : item redit : refert , pridie eum eas alii vendidisse , [puta , ut commotus sim] reliquos esse parvulos ad hominis altitudinem. Sed non puto , te Museum nobilissimum pumilionibus sorbulis ornare velle ; nisi mavis , ut apud te concrecant , ac quasi suam adolescentiam faciant. Uxori tuæ salutem ; quam meis etiam verbis admonebis , ne Horatio in ludo quicquam fidat , quando in tribus lustris nos tam vafre fefellerit. Vale.

BARTHOLOMÆUS RICCIUS

Lazaro Sabellio S. D.

De acceptis literis certiorē facit , rogatque , ut Hippolytum Orimum adeat , rem magni ponderis ei commendet , oratque , ut eam urgeat , & , quo loco sit , ad se perscribat.

27. **C**um essem in via ad Venerum Legatum , ad quem me quotidie ventitare plane scis , tuæ mihi literæ sunt redditæ. Has ita , ut sit , in via legere

cœpi. Cum vero ad ejus ædium vestibulum perveni, non fti quam inæqualiter stratum fit, lectioni etiam dum intentus, ita pedem offendi, ut parum absterit, quin præceps corruerem. Ex mihi tamen nihilo minus gratæ fuisse. Nihil enim casus ille mihi quicquam de illarum suavitæ, qua plenissimæ erant, detraxit. Gratulor tibi te saluum, atque incolumen domum rediisse. Ecquid aliud? multa; sed quæ non temere sunt literis committenda. Parmam ad Hippolytum Orium jam multis ante diebus scripti de re non levissima. Nunc istuc cum suo Principe esse audio. Si me amas, te rogo, ut illum ad eas, eique illas literas ita commendes, ut facis, cum quid amice, ac valide commendas. Res enim, de qua agitur, magni ponderis est, mihiq;e, quam si mea esset, nihilo minus cara. Ut illam urgeat, ipsum urgebis, ac quo loco res sit, ut ad me perscribat, rogabis, meque illi valde commendabis. Vale.

BARTHOLOMÆUS RICCIUS

Francisco Robertellio S. P. D.

Frizolium amicum suum ei commendat, additque, eum incredibili desiderio ardere audiendi ipsum interpretantem Pindarum, ut, si quid ex ejus virtute ad illud scribendi genus adjungere possit, id ab illo uno adjungat.

28. **E**N tibi, Robertelli, Frizolium meum, immo vero tuum, quem mihi nova ista tua conditione eripuisti, immo vero utriusque. Nam quod ad ejus erga me benevolentiam nihil mihi, etiamsi ad Indos naviget, detrahi potest: tibi quidem, quod mihi detrahitur, accedit ejus suavissima atque amabilissima consuetudo. Sed quando hoc cum ex honestissima conditione, tum ex te ipso, a quo magnum lumen in suis studiis consequi sperat, magnam illi utilitatem allaturum video, illi magis gratulor, quam mihi, qui eo cariturus sum, doleo. Commendarem hunc tibi quantum cum ejus optima studia, tum etiam maxima, quæ inter nos vetus intercedit amicitia, postularet, ut eum non in recipientium, sed in vetustissimorum amicorum numero haberet, atque huic, quæ tuis intimis amicis præstas, omnia

omnia amice præstares ; sed quando ejus studia , atque optima natura id abs te , quamvis durissimus sis in amicis obsequendis , qui summa etiam in alienos humanitate es præditus , facile obtinebunt , hac commendatione superfedendum esse duxi. Hoc tantum addam , hunc incredibili ardere desiderio te Pindarum interpretantem audire , ut si quid ex ejus virtute ad illud scribendi genus , ad quod & natus , & factus est , adjungere possit , id a te uno adjungat . Si id assequatur , Deus est : si minus id tibi per tua publica studia licebit , saltem quoties licebit , aut in sermonibus , aut etiam cum a publicis studiis vacabis , nonnihil hoc ejus tantum desiderium levare non gravaberis . Quod ut facias , quod negaram facere me , te vehementer etiam , atque etiam rogo , atque ita omnia ejus commoda commendo , ut si inea commendarem propria neque meliori de nota , neque majori studio , neque ponderosioribus literis tibi commendarem , pro quo me tibi omnia polliceor debiturum . Vale .

BARTHOLOMÆUS RICCIUS

Vincentio Cartario S. D.

Gratulatur cum omnibus amicis , eum esse in maxima gratia apud Cardinalem Hippolytum Atestium , Deumque orat , ut illius fortunam in hunc cursum directam in eo perpetuo servet , ejusque res in dies magis secundet .

29. **H**Uc omnium literis , atque nuntiis affertur , te in ea apud Cardinalem tuum Hippolytum Atestium , qua quis alius maxima , esse gratia . Quod quoniam neque a tua virtute , neque ab ejus judicio , qui magnus est hominum æstimator , discrepat , eo omnes , quod etiam mirum in modum cupimus , ita esse sine ullo dubio ut credamus , facile inducimur . Quare tui omnes Rondanelii , Madii , Gualenghii , Martelii tibi valde gratulantur ; ego vero in primis , atque adeo ante hos omnes . Nam isti veteri necessitudine , atque tuis erga illos minime vulgaribus officiis id facere tenentur . Equidem pro iis paucis annis , quibus amamur inter nos , ita ista tua fortuna amice affectus sum , ut non concedam , quemquam , quam ego fecerim , inde majorem voluptatem

tem percepisse. Sed vide, ut nos homunculi sumus, hoc est, rerum omnium ignari, quod nos aliquando gravius dolere nequivimus, eo nunc lætius exultare non possumus. Deos omnes, qui fortunam tuam in hunc cursum direxere, ut eam in eo perpetuo servant, atque ut res tuas in dies magis secudent, rogo, atque oro. Vale.

BARTHOLOMÆUS RICCIUS

Sulpitio Tombesio S. D.

Gratias agit pro condimento ad manus commolliendas, atque delicatius conservandas misso, ejusque virtutem, atque præstantiam laudibus extollit.

30. **J** Ocabar equidem, Sulpiti, cum tecum de tuis Regiis condimentis ad manus commolliendas, atque delicatius conservandas, nudius tertius agebam. Quid enim feni cum illis ad suas, quas sæpius nudas habuerit, atque in opere, non illo quidem rustico, sed familiari versatas continuerit? quo si non sint callis obductæ, saltem aliquam duritiam, certe jam creberrimas rugas contraxerint? Sed id tamen placuit experiri: vixque [mirum] semel eo manus mihi unxi, atque leviter livi, cum ejus virtutem, atque præstantiam sensi. Continuo enim vel olorina pluma, atque infima auricula molliores, atque teneriores sunt factæ. Cutis vero ita se tetendit, atque dilatavit, ut codicilli non tam expoliti, atque explanati sint. Cui tuæ summæ virtuti summus, ac mirificus odor accedit, ut sive tactu, sive ad olfaciendum jam Regias manus habere videar. Utinam vero, quod cuti extrinsecus junioris aspectus tuum istud attulit medicamentum, interius etiam ad sanguinem ejus virtus penetraret, huncque in venis renovaret. Sed alia ratio est eorum, quæ simulari, atque fingi possunt; alia eorum, quæ nullam simulationem accipiunt. Cani quidem tingi, rugæ in fronte ad aliquod tempus probe dissolvi possunt; natura tamen interius nullo artificio reprimi potest, quin secreto suum cursum conficere pergat, ac quanto longius procedit, tanto magis de nostris viribus nobis detrahat, atque diminuat. Sed ad rem redeo. Ego pro tuo isto elegantissimo munere mirificas tibi gratias ago, atque si quid unquam

quam amplius valeam, ejus quoque optime recordaturus. Vale.

BARTHOLOMÆUS RICCIUS

Octobono S. D.

De honestissima conditione gratulatur, hortaturque ad optimos Scriptores Auditoribus suis interpretandos, ipsosque ad eorum imitationem excitandos, a quorum uno plus utilitatis, atque gloriæ comparari potest, quam ab Apulejis, Philelphis, Mancinelliis, & reliquis ejus ordinis.

31. **F** Ranchinus Lenzolius me tuo nomine salvere iussit, quod cum per se mihi jucundum fuit, tum etiam multo jucundius accidit, quod is mihi eam salutem ita amanter, atque peramice dixit, ut me suo illo suavissimo sermone totum sibi devinxerit; præsertim cum tui se omnium studiosissimum esse demonstrarit. Gratulor tibi honestissimam conditionem, meliorem etiam propediem expectans. Tu vero interea, ut facis, in ista politiora studia incumbas, neque ab optimis Scriptoribus, hoc est, a Cicerone, Cæsare, Terentio, Virgilio, Horatio, & si qui sunt ejus generis alii, tuis Auditoribus interpretandis quicquam discedas. In primis autem ab eorum imitatione eos ne verbum quidem abduces. Versentur alii per nos quidem licet, in Apulejis, Philelphis, Mancinelliis, & reliquis ejus ordinis Scriptoribus; nos in paucis iis omne nostrum studium, atque adeo in uno quovis horum occupemus, a quo plus utilitatis, atque gloriæ, quam a cæteris omnibus sumus comparaturi. Vale.

BARTHOLOMÆI RICCI

LUGIENSIS


EPISTOLARUM

LIBER QUARTUS.

ANDRÆ CORNELIO CARDINALI

Bartholomæus Riccius S. D.

Significat, se non verbis, sed ex intimo animo gratulari de Cardinalatu ipsi delato, & enixe Deum orare, ut illum sic fortunet, ut eum ad reliquum, qui unus superest Dignitatis amplissimus, cumulum feliciter provehat.

- x.  Utabam equidem, ut etiam Palestinio nostro dixeram, me, ut te Cardinalem factum esse audissem, novo, atque inusitato gratulandi genere tecum usurum. Id enim & singularis amor erga me tuus, & mea in te perpetua observantia, ac fides integerrima jure æquissimo postulabat. Sed cum id nunc præstare conarer, aliter mihi, atque ante putaram, evenire sensi. Tanta enim ista summa Dignitatis tuæ accessione sum lætitia affectus [probe enim nosti, quam ego meos moliter amem] ut non solum nullum præclarum gratulandi genus potuerim aliunde eruere, sed illud etiam, quod maxime vulgare est, mihi prorsus exciderit. Quare id, quod res est, tecum cogita, me, quod verbis non queo, tuam istam amplissimam Dignitatem tibi ex intimo animo, atque vere gratulari, neque ea vel tuorum quemquam, quam ego faciam, magis lætari. Hoc vero, quod possum, non omitam, ut Deum Opt. Max. rogem, atque omnibus precibus orem, ut istum tuum Cardinalatum sic tibi fortunet, ut is ad reliquum, qui unus superest Dignitatis amplissimus, cumulum te feliciter provehat. Vale.

BAR-

BARTHOLOMÆUS RICCIUS

Georgio Cornelio S. D.

Ejus fratrem Andream Cardinalem factum , tantamque Dignitatem in nobilissima Familia retentam , ac quasi hereditariam relictam , gratulatur .

2. **N**E puta , Georgi , quod cum Andrea Cardinale fratre tuo facere nequiverim , me tecum id facere posse ; hoc est , ut tibi ejus amplissima Dignitate mirifice gratuler . Omnem enim digniorem gratulandi rationem ea lætitia , quam ex ejus Cardinalatu percepi , valde superat . Quare tibi satis erit , si tecum usitato , ac vulgari gratulandi genere utar . Tibi igitur , atque etiam Marinæ matri tuæ præstantissimæ fœminæ valde gratulor ; quod ipse ab altero patruo in fratre carissimo ; illa vero in filio , in cujus amore omnes matres superavit , tantam eam Dignitatem retentam , ac quasi hæreditariam relictam videatis . Quam vestram summam voluptatem Deos omnes non solum , ut diuturnam vobis conservent , sed etiam cum multis aliis suo cumulo ut augeant , rogo , atque oro . Vale .

BARTHOLOMÆUS RICCIUS

Philippo Cardinali Gislerio XL. Viro S. D.

Rogat , ut cum amicis honestissimæ petitioni suæ non desit , contendatque , ut Fuschinius inter primos renuntietur , cujus virtutem , Juris prudentiam , integritatem , ac probitatem extollit .

3. **S**I mihi per Camilli filii invaletudinem licuisset , id coram fecissem , quod nunc per literas facere cogor . Quantum ego Fuschinium Virum cum maxima in Jure Civili scientia , tum summa totius vitæ integritate , meum præterea Civem , & veterem amicum diligam , hoc , quod tecum , atque cum aliquot tuis Collegis ejus causa facio , omnibus indicio esse potest . Hic in eorum albo scriptus est , ex quibus vos vestros quinque Judices
[quam

[quam Rotam dicitis] de more postea decernitis. Multos quidem competitores habemus gravissimos, ac prudentissimos Viros, tamen si tu cum cæteris nostris amicis XL. Viris huic honestissimæ petitioni nostræ non defueris, non dubito, quin inter primos renuntiemur. Certe si virtute, atque Juris prudentia, non autem ambitione certemus, jam facti sumus. Cave enim putes prudentiorem, aut magis probatum Virum, [quod cum cæterorum probatissimorum Virorum bona gratia dictum volo] in istum Judicum ordinem decernere possis. Verum si omnino ambiendum sit, qui mos ab usque Majoribus nostris servari pergit, suffragatores habemus optimos Viros, atque gratiosos homines Collegas tuos non pauciores, quibus ut te addas, te etiam atque etiam valde rogo, qui postea petitionem nostram vestra omnium gratia ita foveatis, atque ornetis, ut nullam repulsam feramus. Quod si, ut spero, mihi concesseris, ego tibi polliceor, te nullam umquam tuam suffragationem honestius posuisse, neque tuis Civibus gratiorem operam dedisse, neque quemquam umquam tuis omnibus officiis tibi, quam hoc me, atque Fuschinium gratissimum Virum sis facturus, obstrinxisse. Vale.

BARTHOLOMÆUS RICCIUS

Lanfranco Gypsi S. D.

Gratulatur de Gyraldio a secretis Principis facto, & Cavalcantio inter familiares ejusdem adscripto, atque, incertum esse, utrum eis magis gratulari debeat, qui tanta dignitate a tanto Principe cohonestati sint, an Principi ipsi, qui præstantissimorum Virorum virtute, & prudentia auctus sit.

4. **E** Go, Gypsi, duos amicos, & Gyraldium & Cavalcantium hodie summa cum gratulatione complexus sum, quod ille a Principe nostro in eum numerum delectus sit Virorum, quos habet a secretis perpauco; hic vero inter eos familiares, quos carissimos habet, adscriptus sit. Tamen si haud satis scio, utrum eis magis gratulari debeam, qui tanta dignitate a tanto Principe cohonestati sint, an Principi ipsi, qui præstantissi-

tissimorum Virorum virtute, & prudentia sic auctus sit, ut prope magis in quovis alio Viro augeri non posset. Sed non est hic locus, ut pluribus verbis eorum commendationem persequar, tibi præsertim, qui utrumque optime nosti. Hoc vero, quod magis ad rem pertinet, non omittam. Id autem est, ut tua tandem opera fiat, ut contra isti mihi quoque ex eo, quod ipse ex ejusdem Principis verbis mihi jam sæpius es pollicitus, gratulari possint. Quo uno isto tuo officio & eis dederis, in quo mihi grati esse possint, & me a Camillo filiolo omni sollicitudine liberabis. Vale.

BARTHOLOMÆUS RICCIUS

Marco Antonio Cornelio S. D.

Certiores facit, se Venetias cum filio, & matre brevi venturum, oratque, ut Patavium ad suos ædium custodes scribat, ut eos hospitio accipiant.

5. **C**Amillus filius miro desiderio videndi Venetias tenetur; Flora mater vos visendi multo majori æstuat; ego vero, ni quotidie de vobis aut loquar, aut cogitem, moriar. Quare cum illi a me contendere non cessent, ut se hujus tam honesti voti compotes faciam, ego vero nihil eis libentius concedam, ut qui in eorum desiderio mihi magis obsequar, constitui in hunc proximum Christi ascensum cum eis vobiscum esse. Sed quoniam puer etiam in Pado commovetur, mater autem nihil magis horrescit, quam mare; ciso iter hoc facere decrevimus. Patavium igitur ad tuos ædium custodes, qui nos hospitio accipiant, scribas te rogo. Si vero meo aliquo bono fato illic te offenderem, nihil mihi optatius, nihil opportunius accidere posset. Id enim amplius una & essemus, & longioribus sermonibus frueremur. Dies autem adventus nostri tertio die ante diem Festum est constitutus, ut postridie commodissime tecum Venetis cenemus. Ariadnæ matri carissimæ, ac Cæcilie uxori alteri animæ tuæ nostro omnium nomine plurimam salutem dices. Vale.

BAR-

BARTHOLOMÆUS RICCIUS

Honorio Stellæ S. D.

Ejus progressus honorificos in scribendo laudat. Admonet, eam exercendi rationem, qua in sua Oratione usus est, ad dicendi copiam plurimum valere, ad imitationem non ita; veram autem imitandi rationem aut ex simili, aut ex contrario sumendam esse. Tres suas Orationes mittit, & quidquid in se est aut ingenii, aut gratiæ, ei exhibet, ut fideliter utatur.

6. **V** Incentius Madius tuam epistolam una cum ea Oratione, quam tu paraphrasim in eam, quam Cicero pro M. Marcello egit, inscribis, mihi legendam misit, quarum utramque non solum libenter legi, sed etiam valde sum admiratus. Nam qui istorum annorum adolescens, ac pœne puer tam prudenter, tam compose, tamque eleganter scribat, magis summa admiratione suspiciendus est, quam ut ejus scripta libenti animo fiat perlegenda. Equidem, Stella, complures vidi, qui in hoc scribendi genere multo, quam tu es, diutius versati sunt, atque etiam [quod cum eorum tamen bona gratia dictum volo] de principibus loquor, qui non ita tamen, ut tu facis, scribunt; ut miraculum sit, quod in scribendo tam paucis annis, tam parva scribendi exercitatione, tantos, tamque honorificos progressus feceris. Te equidem hortarer, ut in hanc dicendi facultatem ardentius incumberes, sed id perinde esset, atque si quis eum equum impelleret, qui jam ad metam pervenisset. Quoniam tamen me tuæ istius egregiæ scriptionis quasi auctorem appellas, idque ex nostris libris de Imitatione, quos in manibus assidue te habere scribis; visus sum recte facturus, si hoc quoque modo, in quo opus esse viderem, tibi non deessem. Scito igitur, eam exercendi rationem, qua tu in tua Oratione usus es, ad dicendi copiam certe plurimum valere, ad imitandum non ita. Non enim aliis verbis, atque etiam alio ordine, quod alius dixerit prius, persequi, etiam si quid cominutes, atque etiam addas de tuo, veræ imitationis esse videtur. Siquidem vera imitandi ratio

tio aut ex simili, ut nos præcipimus in secundo libro de Imitatione, aut ex contrario sumitur. Quare si me audis, aliud posthac argumentum tuum capies ad scribendum, quod cum aliquo Ciceronis argumento aliquam similitudinem habeat; ut si tu cuipiam summa aliqua ejus secunda fortuna gratuleris, ita exordiaris, ut Cicerone pro M. Marcello in agendis Cæsari gratias facit, postea in ejus virtutis egregias laudes digrediaris, atque etiam Orationem tuam abunde locupletes; postremo ad rem rediens, eam feliciter absolvas. Aut etiam si magis placet, ut ipsi fecimus in Archiam Poetam, aliquid ex eodem tibi libenter proponas, contra quod dictionem tuam exerceas, ut in Ligarium, aut in Cælium, aut, ut nobis in animo fuit, dissuasionem Legis Maniliæ, in qua ut ille Cn. Pompejum, tu contra L. Lucullum summis laudibus exornes. In qua dicendi ratione si stilum tuum occupabis, mihi crede; brevi fore, ut ejus studii te minime poeniteat. Quod meum consilium, ut pluribus tibi nunc probem, nihil opus est, cum id in libris de Imitatione plane omnibus comprobarem. Inde cætera tibi sumere poteris, si minus hisce paucis acquiesces. Mitto tibi tres Orationes meas, nuper editas; in iis, quam dicebam; in Archiam, ut videas, qua ratione tu quoque, si quid tale aggressus fueris, pertractes; tibi que persuadeas velim, me tua ista virtute, ne quid de moribus, atque totius vitæ tuæ sanctissimis institutis agam, habere nihil, quod tua causa libentissime nolim; ut si quid in me est aut ingenii, aut gratiæ, quo aut tibi, aut cuiquam tuorum usus aliquando accadat, eo tam fideliter utaris velim, quam si ipse a patre tuo, aut Camillus meus a me ipso uteretur. Vale.

BARTHOLOMÆUS RICCIUS

Joanni Baptistæ Rhamnufio S. D.

Rogat, ut primo quoque tempore impetret a X. Viris Venetæ Reipublicæ, ut sibi liceat Epistolas suas edere, & si quid cum Navagerio etiam agendum restat, per Paulum filium hoc quoque agi, & transigi diligenter curet.

7. **P**roxime cum Venetiis essem, cum Bernardo Navagerio Senatore optimo, ac gratissimo Viro de Epi-

Epistolarum mearum editione diligenter egi. Is mihi humanissime, quantum ad se attineret, eam libenter permittere respondit, sed hanc tamen eandem permissionem a Pontificis Legato impetrari oportere, is quoque affirmavit. Id quod a Manutio nostro continuo nobis optime curatum est. Audio postea permissu X. quoque Virum opus esse. Id si ita est, cuius opera ego apud tantos Viros & fidelius, & facilius uterer, quam tua, si omnium optio mihi daretur, non haberem, qui eorum sis tot annos a secretis, ego vero te totidem unice observem. Quare te rogo, ut eis fidem tuam, idque tum ex Manutio, tum etiam ex filii tui lectione obstringas, nihil in iis Epistolis offendi, quod earum editionem nobis vetare, aut etiam quicquam retardare possit. Præterea vero, si quid cum Navagerio etiam agendum restat, videlicet, ut permissus ejus scripto extet, te etiam, atque etiam rogo, ut per Paulum filium hoc quoque & agi, & transigi diligenter cures. Quæ omnia ut a te, quæ tua summa est humanitas, facile impetrem, nihil dubito; ut vero ea primo quoque tempore impetrem, te valde rogo. Vale.

BARTHOLOMÆUS RICCIUS

Paulo Rhamnufio S. D.

Ostendis, nullam causam esse, cur de parentis optimi, & integerrimi Viri morte doleat, qui totam vitam cum in privatis amicorum, tum in publicis Reipublicæ officiis peregit; suamque operam, ubi opus fuerit, ei pollicetur.

3. **M** Allem te perpetuo, quo cæperas, silentio mecum uti, quam eam causam habere, quamobrem tandem ad meas multorum mensium literas responderes. Equius enim tuam istam diuturnam taciturnitatem ferre poteram, quam parentis tui amicissimi mei mortem non feram; de qua ita tamen ad me ipse scribis, ut non solum a me nullam consolationem indigeas, sed mihi eam non levem asferre videaris. Quibus rationibus, quas cum prudentissimas, tum etiam Christianas adducis, quando ipse filius acquiescis, qui ego amicus non acquiescam? Ille quidem satis matura ætate [quan-

[quando omnino decedendum est] decessit. At qui Vir? qui totam illam vitam cum in privatis amicorum, tum in publicis istius magnificentissimæ Reip. officiis integerrime peregit. Unde etiam cum eo nunc quoque optime agi pro certo tenendum est, cui pro tot benefactis par a Deo in ejus Regno gratia referatur. Equidem unum illud mea causa doleo, quod quamdiu quatuor annis me præcedebat, tot ego semper mihi, quasi jure meo posse vivere, promittebam, ac quanto me diutius vivendo antecessisset, ego quoque in ejus vitæ cursu meam vitam producere videbar. Nunc vero, cum ad ejus annorum numerum pervenero, ad meum pervenisse suspicari potero. Si quid tamen est [quod facere negaram], quod cæterorum cum parentis, tum etiam tuorum amicorum officiis a me accedere possit, id ego tibi ita sedulo polliceor, ut cætera vere, atque sincere cum amicis facere soleo, quæ tantum abest, ut benevole præstem, ut, quæ ipse videam mea sponte in eos conferre, non omittam. Vale.

BARTHOLOMÆUS RICCIUS

Joanni. Martino Peregrinio S. D.

Propter ejus literas maximam esse voluptatem suam significat, maximumque suum desiderium eum videndi, & cum eo colloquendi. Admonet de morte, & scriptis suorum amicorum, & nonnulla innuit, quæ secum secreto egerant.

9. **Q**UANTAM mihi voluptatem tuæ attulerint literæ, ne expecta, dum dicam. Præ gaudio ad nomen tuum lacrymæ mihi exciderunt. De te enim cum tot annos nihil neque a te, neque a quoquam alio audissem, vereri interdum cogebar, ne in istis tuis Asianis scripturis decessisses; ut vero te incolumem esse, idque a te ipso cognovi, Dii boni, quo non sum gaudio affectus? O mi suavissime Peregrini, o mi vetus, ac fidelissime sodalis, ut te absens absentem libenter amplector! Sed cur, ut hoc multo arctius præsens præsentem facerem, mihi facultatem non dedisti? cur ipse tuas literas non attulisti? cur ex isto tuo Municipio tuæ scripturæ vel in biduum, quod scio a Prætore tuo im-

pétrasses, non te surripuisti? atque ad nos tui cupidissimos advolasti? Nolo, ne verbo quidem, tantam meam lætitiā conturbare, sed te possem accusare, parum amice fecisse, qui non prius ad me, quam isthuc, accesseris. Scio enim te brevi, idque etiam cumulatius præstaturum. Te igitur expecto, ut veterem omnem omnium rerum ac consiliorum nostrorum memoriā repetamus, usque ad Trojani excidii causam, ex quo incendio ipse quasi alter Æneas non a matre Venere, sed a fidelissimo amico ereptus fuisti. Qui vero risus in tectis illis Nasonianis? Sed reliqua in adventum tuum reservo. Hoc tantum; ex omni illo nostro amicorum numero me, & Augustinum Abiosium, qui nunc Patavinus, ut dicunt, Collateralis est, his etiam auris perfrui. Rotengus, Cochius decessere. Rigonius nostri, quid egerit. Julius in Galliam eo tempore, quo tu in Asiam, profectus est. Multa scripsit, atque edidit cum summa sua gloria. Arbitror, cupio quidem certe, eum adhuc vivere. O notem illam Nestorianam, cum nobis a lictoribus. Sed te expecto, ut secreto omnia agere, atque suavissimum risum alter alteri commovere possimus. Vale.

BARTHOLOMÆUS RICCIUS

Angelo Angelinio S. D.

Sibi nihil deberi propter officium ipsi præstitum profectetur, atque adeo ne gratias quidem, cum, quidquid ejus causæ profuit, sua sponte profuerit. Addit, sibi gratissimum futurum, si ita se gesserit in Bentivolio instituendo, ut ejus parentes ex isto officio ei gratias agant.

10. **C**Aussa nulla erat, quamobrem mihi ulla gratias ageres, nedum ullam te referre non posse, per literas quereris. Parum enim id, quod tibi præstiti, atque adeo minimum, fuit officii. At maximum fuerit. Quoniam tamen id ex meo animo, nullius autem precibus in te profectum est, a nullo item ullam relatam gratiam, aut etiam gratiarum actionem expectare debebat. Quicquid causæ tuæ profui, mea sponte profui; si qua in meo officio ulli debitio est, ea mea est; mihi ipsi deo. Verum id mihi gratissimum erit, si ita te in Benti-

volio nostro instituendo gesseris, ut ejus parentes ex isto tuo officio mihi gratias agant: id quod cum tua, tum etiam mea causa ut diligentius facias, te etiam, atque etiam rogo. Vale.

BARTHOLOMÆUS RICCIUS

Duobus Philippis Braschio, & Savorellio S. D.

Ambos valere cupit, & ad suum suburbanum invitat, ut ibi late, quamdiu libuerit, in Socraticis sermonibus agant.

11. **T**antum ego vos amo, Philippi, quantum vos inter vos diligitis, nisi etiam magis. Nam quæ vos causa in amore mutuo facere cogit, simplex est, utriusque scilicet integritas, quæ utrumque tam arte inter vos conjungit, hæc eadem mihi duplex fit, quando ubi vos tantum alterum, ego duos unice diligo. Quare primum vos valere cupio, separatim autem Savorellium, ut cui hoc magis opus sit, quique non satis firma utitur valetudine; deinde cras ambos in meum suburbanum expecto. Vos domo ciso Durellius tollet. Hora vos commodius mecum sistet, ubi late, quamdiu vobis libebit, in Socraticis sermonibus agemus. Ubi vero loci satietas vos ceperit, continuo in Urbem revertemini. Ad primam diei horam, ut is cum ciso vobis adsit, mandavi. Volo enim, ut Cælo matutino iter hoc conficiatis, ne quid ardentioris Cæli sentiat. Valete.

BARTHOLOMÆUS RICCIUS

Philippo Braschio S. D.

Suum eum videndi desiderium significat, hortaturque, ut Concionibus suis concordiam inter iratos animos conciliet, doceatque factionum principes, ne eorum voces audiant, quorum inopiæ, & improbitatis maxime interest, Civitates inter se diffidere.

12. **O**Mnes Quadragessimæ vulgo longæ & sunt, & dicuntur, hanc vero tui desiderium mihi o-

animum longissimam facit. Nondum enim ad ejus medium ventum est, & annus mihi videtur, cum te careo. Quanto vero ea tibi longior videri debet, cui quotidie semel, interdum etiam bis ad summum sudorem concionandum est? Etsi tuus iste sudor in eo magis gravis tibi accidit, si te frustra laborare, neque verbi tui semen radicem, quam quod in saxo jacitur, altius agere vides. Contende tamen, quantum in te est, ut inter istos iratos animos concordiam concilies, ut Civilia ista odia deponant, ut injuriam obliviscantur, eaque omnia uni omnes Deo condonent, qui illis multo plura, & majora remunerabitur, atque etiam quotidie gratis, atque ingratis elargitur. Quid enim indignius dici potest, quam quod Municipiolum istud ita inter se dissentiat, ut ex duabus portis suam quæque factio possideat? altera minime tuto uti audeat? Doce principes factionum, ne eorum voces audiant, quorum inopiar, & improbitatis maxime interest, Civitates inter se dissidere, quorumque passioni nihil magis adversatur, quam otium publicum, quam pax, & Civium concordia. Quos, si isti me audiant, si non ex Oppido, saltem domo sua ejicient, atque a sua consuetudine alienabunt, ut cum in pristinam, hoc est, Christianam concordiam redierint, nullis istorum falsis delationibus, nullo ab hostium novo metu injecto, quo minus in ea perpetuo incorrupte permaneant, impediuntur. Quod si tu Dei Optimi Maximi auxilio efficies, cum omne tui desiderium mihi levabis, tum etiam me summa lætitia afficies, cum vicinos meos Bagnacaballenses audiam resipuisse, atque ad rectum vivendi institutum vere rediisse. Quos Lugienfes postea Cives mei optime imitabuntur, quibus ego non magis omnia bona, quam mihi, quam Camillo filio cupio. Si Savorellio quid interea scripseris, meo nomine illi salutem adscripseris, cui quid aliud opportunius optem, neque ego habeo, neque ille desiderat. Vale.

BARTHOLOMÆUS RICCIUS

Philippo Braschio S. D.

De ejus provinciæ in alterum biennium prorogatione certior rem facit ; admonet , Venetam pestilentiam quotidie ardentius ingravescere ; constituto itineri suo Lugum in dies singulos novi aliquid objici ; Mantuæ tantam vim calamitatis Cælo demissam , ut etiam omnes adium regulas perfrerit .

13. **M**Adius noster , ut totum nomen suum a Quæstore exegit , VIII. Id. Junii Brixiam in quatuor mensium vacationem discessit , postea ad suum diem rediturus . Is pridie quam discederet , cum provinciæ suæ in alterum biennium prorogationem vidisset , tuam quoque vidisse mihi narravit , idque , ut ad te scriberem , mandavit , ut jam nihil de ea timeas , cum privatæ publicæ etiam fidem perscriptam intercedere scias . Ego magis Venetam pestilentiam metuo , quæ quotidie in-gravescit ardentius , atque eo jam pervenit , ut mercaturæ , ludorum conventus privati , publici , sacrorum etiam ceremoniæ , atque instituta , ut fertur , intercepta sint . Rumor præterea erat , isque ex quorundam literis , quasi in coloniam ex Urbe , in littora ad duas maritimas turres , quibus Urbis portus efficitur , magnam hominum cujusque generis multitudinem exivisse ; nobiliores in suas villas emigrasse , alium alio , complures Patavium se contulisse , eamque Urbem , ut ab ejus morbi contagione incolumem servant , in primis omnem operam dare . Qui morbus si se in reliquam Italiam effundat , atque , quod Deus prohibeat , latius emanet , non solum Gymnasia , sed Civitates pæne sublatae esse videntur , neque id tantum in præsentem annum timendum est . Merces enim , quibus plena est Urbs , quæque in universam Italiam effundit , ita infectæ sunt , ut magnum periculum sit , ne etiam ad multos annos hanc item calamitatem quoquo invehant , statim commoveant , atque excitent . Sed de his Deus viderit . Nos interea nobis non deerimus . Si quid contra ferat fors , æquo animo , idque in Christo ut feramus , probe curabimus .

Certe in magno periculo sumus, qui proximum vicinum tanta peste labrantem habemus, atque eo magis, quod non ea cura a nobis adhibetur, qua opus esset, ne in nostros fines ea labes irrepere posset. De constituto nostro isthuc itinere, in dies singulos novi aliquid obicitur, quo ab eo me retraham; quin etiam si in via sim, ut me domum referam, cogere possit. Si tamen per temporum rationem nobis licebit, neque curationi nostræ rei Flaminiz, neque tibi deerimus. Certe si Lugum proficiscar, non omitam, quin ad te quoque Faventiam accurram. Vale. Dum hæc scribebam, renuntiatur, Mantuæ tantam vim calamitatis Cælo demissam, ut etiam tegulas ædium omnes perfregerit, idque tantum, quantum est Urbis circuitus; in agro parum admodum damni factum esse. Iterum vale.

BARTHOLOMÆUS RICCIUS

Nicolao Zanellio S. D.

Rogat, ut auctoritate sua Aliotium adjuvet in Locatellii sobrini sui pace concilianda, neque sinat, eum ad se redire, nisi pace & confecta, & omnibus æquissimis cautionibus probe confecta.

14. **S**ervator Aliotius meus vetus est familiaris. Hic isthuc Locatellii sobrini sui pacis conciliandæ causa accessit. Quæ res etsi nullam difficultatem habet, si tua tamen auctoritas acceperit, teque quasi secundum pacificatorem adhibebis, multo cum facilius, tum etiam firmiori fide constituetur. Equidem nihil dubito, quin, quæ tua summa est bonitas, in tali negotio vel tua sponte omnia, quæ ad pacem hanc conficiendam pertinent, sis ei præstiturus. Si quid tamen isti tuo optimo animo addi potest, ut mea causa id addas, te etiam, atque etiam rogo, neque sinas, Aliotium ad nos redire, nisi pace & confecta, & omnibus æquissimis cautionibus probe confecta. Id mihi erit quam gratissimum; Aliotium vero Virum gratissimum tibi in perpetuum obstrinxeris. Vale.

BAR-

BARTHOLOMÆUS RICCIUS

Nicolao Zanellio S. D.

Gratias agit , quod non solum Aliotium in pace conficiendæ adjuveris , sed præterea multa illi extra pacificationem & pollicitus sit , & præstiterit , multo majorem gratiam , cum casus sulerit , ei propterea se relaturum significans .

15. **C**Um tibi Aliotium commendabam , videbam te illi omnia , quæ ad pacis conditionem facerent , idque cum tua animi integritate , tum etiam amicitia nostræ causâ esse præstiturum . Nunc vero Aliotius multa mihi refert , quæ illi extra pacificationem istam & pollicitus es , & fecisti , quibus ille multo magis se tibi obstrictum esse , quam ista pacis confessione , qua in perpetuum tibi debebit , ingenue fatetur . Ego vero nunc quia ita mos est , tibi ingentes gratias ago ; cum vero casus ferat , etiam multo majorem relaturus . Vale .

BARTHOLOMÆUS RICCIUS

Francisco Racchio S. D.

Joannis Baptiste Minadoji mores , virtutes , studia , animi probitatem , integritatem , scientiam ob oculos ponit , rogatque , ut omni studio , cura , diligentia , gratia contendat , atque labores , ut in Civitatis medicum prorsus decernatur .

16. **T**Ot ac tantæ necessitudinis causæ mihi cum Joanne Baptista Minadojo prudentissimo , ac fidelissimo medico intercedunt , ut nihil habeam , quod ejus causâ non libenter velim . Ejus enim uxor illum mihi arcta affinitate conjungit ; merita in me , & officia cum multa , tum etiam maxima me illi obligatum , obstrictumque tenent ; mores autem , virtutes , studia , ac Viri bonitas multo his omnibus me illi conjunctiorem , atque obstrictiorem efficiunt . Quibus rebus , ut quod res est , plane fatear , ego soleo , si quid odorem , quod aut ad ejus dignitatem , aut utilitatem aliquam pertineat ,

neat, mea sponte in illum conferre. Is a me nunc ultro etiam, atque etiam magnopere contendit, sit meis isthic amicis, tibi vero separatim, novo quodam commendationis genere causam suam primo quoque tempore commendem: quod quoniam ego nullum habeo, quod depromam, ac de officio meo multum ille petendo detraxerit, cui ego a me omnia præstare soleam, tuum erit curare diligenter, ut & ille recte de meo ingenio sperarit, & ego meum dolorem aliquo modo levem, qui non, quemadmodum soleo, mea sponte, & voluntate, sed coactus hoc illi officium præstem. Id autem effeceris, si per te unum, quod a multis petimus, impetrabimus. Is, Racchi, maxime cupit in Camilli Civis tui locum deligi, qui cum Nicolao Mutinensi isti Civitati medendo præsto adfit; qui valetudinem suis consiliis vobis universis perpetuam servet, aliquo autem vitio etiam affectam suis pharmacis recuperet; id quod optime facere dicit, quemadmodum ego in uxore mea Lugi planissime sum expertus. Diligens est, assiduus, si quis alius, medicus, nec qui a veterum, eorumque optimorum medicorum instituto quicquam recedat. Accedit ad hæc, quod ea Vir est integritate, atque animi probitate, qua qui optima. Neque homo infacetus, atque inurbanus, quod etiam ægrotos aliquid delectare potest. Scio, Racchi, hoc, quod abs te peto, Civium tuorum suffragiis esse decernendum, quorum voluntates difficile est peroscere; tamen si te non solum gratiosum Civem, sed Virum etiam optimum suffragatorem habebimus, nihil dubitamus, quin facile decernamur. Quare, mi Racchi, non a te jam peto, ut mea causa petitionem hanc suscipias, tuearis, ornes, atque omni studio, cura, diligentia, gratia contendas, atque labores, ut decernamur, sed ut prorsus decernamur, peto, atque postulo. Multa equidem beneficia abs te accepi, multa etiam atque maxima expecto; verum in hoc uno omnia mihi cumulatissime te esse præstiturum, tibi etiam, atque etiam persuadeas, velim. Præterea, si quid hoc ad rem attinet, medicum honestissimum gratissimumque hominem tibi in perpetuum devinxeris. Vale.

BARTHOLOMÆUS RICCIUS

Joanni Antonio Rondinellio S. D.

Rogat, ut, si fieri possit, sine iudicio res componatur de fructibus cuiusdam Beneficii, colloquaturque cum Balthassare amico suo, eumque doceat, quid jus, quid honestum, quid propinquitas hoc in negotio postulet.

17. **C**hinanus Blondius antiquæ probitatis Sacerdos superioribus diebus decessit. Hujus, quod Beneficium dicunt, quod ejus majores sibi, ac suis proprium instituire, Joannis Pauli Blondii Chinani patrue-
lis filio venit. Nulla controversia est, quin præsentis quoque anni ejus fructus veniant; Balthassar tamen Blondius ejus familiæ cum senior, tum etiam locupletior, eos fructus apud se habet, negatque ex testatoris Chinani sententia cuiquam, nisi ejus matri in victum se esse redditurum: Joannes Paulus Vir probatissimus atque etiam in summa egestate constitutus humanissime cum Balthassare per propinquos, affines, amicos agit, si sine iudicio res componi possit. Quare me rogat, ut ita tecum agam, ut soleo facere, cum quid ago diligentissime, ut causam hanc suscipias; cum Balthassare, apud quem te plurimum valere scit, colloquaris, eumque doceas, quid jus, quid honestum, quid propinquitas postulet; ne cum ab alienis optime audiat, a suis male audire studeat; ac quod jure coactus postea sit ei redditurus, nunc volens, ac benevole reddat. Is has literas tibi reddet, ac causæ suæ æquitatem pluribus exponet. Mihi pergratum feceris, si mea quoque causa aliquid ei honestati addidisse te demonstrabis; quod ut facias, te etiam atque etiam rogo. Vale.

BARTHOLOMÆUS RICCIUS

Joanni Hieronymo Ravanio S. D.

Orat , ut Philippum Savorellium Concionatorem ab Abbate Lauredanio delectum ad Evangelii cibum ovibus Municipii sui publice suppeterendum , non satis firma utentem valetudine , adjuvet , neque ferat , si quid gravius Quadragesime tempore illi acciderit , ægotantem , ac languentem suggestum ascendere . Præterea hortatur , ut quotidie illum publice audiat , & privatim cum eo colloquatur , polliceaturque , eum semper in Fide firmiorem domum rediturum .

18. **E**Go Philippum Savorellium Concionatorem Franciscanum ut alterum filium amo. Est enim ætate adolescens , sed prudentia & integritate , atque horum studiorum cognitione vel natu maximus. Hunc Abbas tuus Lauredanius hoc anno delegit , qui tuis Municipibus suis ovibus Evangelii cibum publice suppeteret. Quoniam vero non satis firma utitur valetudine , summusque labor est quotidie eo modo ad populum dicere , si quid illi interea gravius acciderit , quo minus laborem ferre possit , te rogo , ut cum ei in cæteris rebus nusquam defueris , in primis hac una ei prospicias , ne feras ægotantem , ac languentem suggestum ascendere. Novi equidem hominem ; ut officio satisfaciat , invaletudinis suæ nullam rationem habebit. Quare periculum erit , ne dum lucem æternam cæteris aperit , hæc illi humana occludatur. Quod vero ad te attinet , si is , quod cupio , æque valebit , cave diem ullum intermitas , quin eum publice audias , atque etiam privatim , cum tibi per clientes tuos licebit , ad eum adeas , atque cum eo colloquare. Semper enim in Fide firmior domum redibis. Duas leges habemus , alteram Civilem ; hac tu clientibus tuis præsto aderis ; alteram Dei Opt. Maximi ; in hac ille tibi nusquam deerit. Vale.

BARTHOLOMÆUS RICCIUS

Joanni Hieronymo Ravanio S. D.

Gaudium suum significat de Concionatore a se superiori anno commendato, quem omnium sententia etiam hoc anno postulatum audit, iterumque Christiane etiam atque etiam commendat.

19. **G** Audeo iudicium meum mediusfidius cum vestro omnium, atque Præsidis vestri optimi Viri Lauredanii convenire, qui quem superiori anno Christianum Concionatorem habuistis, quem ego tibi commendavi, hoc quoque anno omnium sententia depoposceritis. In quem cum isto vestra sponte sitis omnes affecti animo, nihil est, quod commendationem meam tibi renovem; tantum te hortabor, ut eum assidue audias. Tanta enim segetis nostræ luxuria est, ut nisi usque illam sarculo excindamus, continuo agrum totum occupet, bonamque frugem opprimat. Quare publici isti quasi Christi vinitores quaque versus mittuntur, qui quo tempore reliquæ vineæ putantur, Christi quoque vineas amputent; tamen si quisque suæ putator esse debet, neque unquam falculam deponere. Sed, quod negaram, me facturum, eum tibi Christiane etiam, atque etiam commendo. Vale.

BARTHOLOMÆUS RICCIUS

Jacobio Sorbio S. D.

Philippum Braschium Concionatorem ipsi notum se non commendare, sed sperare, eum in suis intimis semper eundem habiturum, atque ceteris, si quid ei opus sit, probe commendaturum, significat.

20. **H** Ac, quæ adventat, Quadragesima Philippum Braschium ex Divi Francisci familia Concionatorem Christianum habebis, Virum eum quidem, qui quæ tibi, atque tuis Municipibus ex suggestu præcipiet, suo etiam exemplo sit comprobaturus. Sed si hoc nimis videtur, sane Virum integerrimum, & in ejus facultatis

tis scientia eruditissimum habebitis. Quare te hortor, ut primum nullum diem intermittas, quin eum publicè audias, deinde etiam quoties tibi otium erit, privatim ad eum ipsum adeas. Numquam enim domum, mihi crede, inanis redibis; semper aliquid, si minus novi, certe magis confirmati auferes. Hunc tibi non commendo. Nam cum eum noveris, spero, te eum in tuis intimis perpetuo habiturum, atque cæteris, si quid opus ei sit, probe commendaturum. Vale.

BARTHOLOMÆUS RICCIUS

Joanni Baptistæ Zavarisio S. D.

Rogat, ut per eum liceat adolescenti perfamiliari suo rei militaris minime ignaro more militum arma sua secum ferre. Si quid autem ei opus sit in negotiis honestissimis, quæ illic habet, postulat, ut adjuvet.

21. **Q**ui tibi has literas reddidit, meus perfamiliaris est adolescens, & bonis moribus, & rei militaris minime ignarus. Isthic negotia habet honestissima, in quibus quicquid a tuo officio illi opus erit, ut ei præstes, te etiam atque etiam rogo, in primis autem, ut, quo brevi tempore isthic aget, more militum secum arma sua ei ferre liceat, quorum utrumque si a te impetro, erit mihi valde gratum. Vale.

BARTHOLOMÆUS RICCIUS

Antonio Ferrario S. D.

Certiores facit, se suspicari, nondum ei fuisse redditam Epistolam, quam ad Herculem Atestium Principem de ejus Familiæ nomine scripserat, mittitque Orationem, qua Abravanellium Judæum accusatum de structis Principi suo insidiis apud eundem defendit, atque absolvit.

22. **T**E equidem, Ferrari, ex tuis studiis mea sponte antea semper dilexi, sed cum junior Rachiis proxime ad me esset, ea ipsa studia ita mihi probavit, tuum vero erga me animum sic testatus est, ut
te

te valde amare cœperim. Nunc vero, ut literas tuas amantissime ad me scriptas perlegi; ea erga te amoris accessio facta est, ut tuorum in te amando nemini concedam. Certe cum te audirem libenter vetera scripta mea legere, ut haberes etiam ex eis, quæ quotidie ederentur, mihi curandum esse duxi. Itaque tibi eam Epistolam misi, quam ad Herculem Atestium Principem meum de ejus Familiæ nomine scripsi, ubi de Prænomine, Nominē, Cognomine multa fortasse minime inepte disputantur. Sed puto nondum eam tibi redditam fuisse. Nihil enim de ea scribis; quod meum deinceps institutum integre servabo. Nunc autem habe Orationem, qua Ab-ravanellium Judæum capitis reum apud Principem meum, atque adeo cui insidias struxisse accusabatur, defendi, atque absolvi. Vale. Fabio nostro, Abiofio, Camillo, Racchiis utrifque salutem meo nomine impertiare.

BARTHOLOMÆUS RICCIUS

Joanni Baptistæ Bovio S. D.

Ejus causam se Principi commendasse significat, consiliumque dat, ut aliquas literas Roma curet, ac præcipue purpureo atramento conscriptas, maximum apud eundem pondus habituras, causamque brevi explicaturas.

23. **C**Ausam tuam, ut coram tibi receperam, Sarchio diligenter commendavi. Is mihi retulit, se cum Principe de ea accurate egisse, sed eum, cum multis aliis gravioribus de rebus fessus esset audiendo, causam tuam cum multis aliis in aliud tempus rejecisse. Continuo vero Mutinensis profectio secuta est, ut, antequam ad nos redeat, de ea nihil constitui possit. Omnium quidem Principum literæ apud Principem meum magnum pondus habent; verum, si me audies, Roma aliquas curabis, ut habeas, quæque purpureo atramento sint conscriptæ. Multo quidem illæ erunt ponderosiores, quæque causam tuam tibi brevi explicabunt. Quod a me speres, parum id quidem est nimis. Certe quantum quantum id erit, eam operam dabo, ne quid ejus a me desiderasse videaris. Vale.

BAR-

BARTHOLOMÆUS RICCIUS

Bartholomæo Salio S. D.

Epitaphia sibi commendata mittens significat, ea esse huiusmodi, ut, si alacritas, ac voluntas spectetur, qua a se facta sunt, omnem omnium elegantiam, atque argutiam facile superare possint.

24. **E** Quidem, Sali, non ut optimo equiti tuo satisfacerem, qui vitæ suæ elegantia, ac Musei dignitati paria omnia cupit, sed ne tibi, cujus causa omnia volo, in re tam facili minime obtemperarem, in ejus sententiam hæc, quæ vides, Epitaphia conscripsi. Si ea omnino parum arguta sunt, ac multo minus facilis habent, quam ille in suis literis cupere videtur, quique in te sal est, id meo subagresti ingenio atque illepidæ orationi attribuas licebit. Verum si quæ animi alacritate, atque summa voluntate facta sunt, quicquam spectes, omnem omnium elegantiam, atque argutiam facile superare possunt. Vale.

BARTHOLOMÆUS RICCIUS

Octavio Abiofio S. D.

Ad scribendum invitat, ut stilum sermone Latino exerceat, hortaturque, ut quidquid in buccam venerit, scribat, modo id faciat suis delectis, propriis, atque usitatis verbis, polliceturque, eum hac ratione multum profecturum. Ejus judicium de suis libris de Imitatione requirit, quidque ex eorum lectione didicerit, postulat. Excitat, ut cæteris fratribus viam, quam insistant, aut etiam cum eo ineant, commonescet, rogatque, ut potius maturis patrum amicum præceptis, quam suæ præcipitis adolescentiæ impulsibus obtemperet.

25. **P** Romiseram tibi, cum apud patrem tuum proxime essem, ut domum rediissem, te quoties ad me scriberes, numquam muto scripturum, meque meo ita stilo tuum stilum non parum esse adiuturum. Vide
nunc

nunc ut non solum id tibi præstem, sed etiam primum locum ad scribendum occupem, etsi nihil aliud habeam, quod tibi scribam, nisi ut te magis ad scribendum invitem. Nam cum te sciam parum in hoc scriptiois genere versatum, atque in opera, quam parenti das in scribendo Italico sermone, occupatum, veritus sum, ut mihi fidem præstares. Quare hoc modo quasi provocatus diu tacere non poteris. Scribas omnino, aut si quid habes politiori scriptioe dignum, aut etiam quidquid in buccam, modo suis delectis, propriis, atque usitatis id facias verbis. Neque te a scribendo deterreat, si, quæ orationis lumina in elegantioribus Scriptoribus cognoscis, ea in tua scriptioe minime agnoscas. Aliud enim est aliorum scripta cognoscere, aliud eorum modo scribere. Neque dubita, quin, si non brevi, saltem non multo post annos, si stilum exerceas, qui optimus est scribendi magister, multum sis profecturus. Res omnes parvis initiis oriuntur, studio tamen ad suam perfectionem crescunt. Patrem habes, qui te multa, quæ ad hanc scribendi rationem pertinent, docere potest. Sed mihi crede, nisi volumina scripseris, nisi libros confeceris, nisi assidue eris in scribendo, atque calamus contriveris, tu quidem de aliorum virtute recte judicabis, certe nunquam polite, atque eleganter scribes. Expecto scire quid tibi visum sit de nostris libris de Imitatione, ac quid ex eorum lectione auctior, atque certior factus sis ad scribendum. Haftenus de studiis. De tua vero in tantum parentem tuum summa observantia non dubito, quin meam expectationem, atque adeo promissionem tuam sis superaturus; sed currenti tamen, ut ajunt, calcar. Mi Octavi, natu major es ex quinque fratribus, hoc est, qui cæteris quasi viam, quam insistant, aut etiam tecum ineant, commonstres. Si in rectam illos induxeris, iis simul una tecum optime consulueris, sin secus tuo exemplo in pejorem ingrediantur, tuo errore eorum errorem multo effeceris leviolem, quos continuo majorem fratrem secutos excusabimus. Non possum literis omnia, quæ coram facerem, atque adeo paulo ante feci, percurrere. In mentem tibi ea revoca, quæ postremo tecum habui, atque quasi ad eorum regulam omnes tuas actiones gubernas. Quod si effeceris, nihil dubito, quin vir factus mihi omnes gratias quotidie agas, qui tibi, quæ

quæ ad omnem cum utilitatem, tum etiam dignitatem tuam pertinent, paterne demonstravi. Noli tibi deesse, cui neque etiam paterni amici usquam desunt, atque maturis eorum præceptis, quam tuæ præcipitis adolescentiæ impulsibus magis obtempera. Vale. Ferrariæ. Non. Octob. MDLXII.

BARTHOLOMÆUS RICCIUS

Sebastiano Briccio S. D.

Ejus prudentiam laudat, rogatque, ut Tassoniano adolescenti, & patri salutem suo nomine dicat.

26. **Q**uanto magis prudentiam tuam confidero, tanto eam maiorem esse video. Ego putabam, mihi satis esse, si ad Tassonianum filium scriberem, sed ipse rectius vidisti, ut is eo postea modo apud parentem ageret, quo optime fecit. Sed quoniam summæ tuæ prudentiæ parem nostri amorem significas, ut de illa tibi valde gratulor, ita in eo respondeo, ut ei facerem, a quo me valde observari scirem, ac si umquam idoneus mihi locus detur, ut hoc cum cæteris intelligas, sum optime præstiturus. De reliquo autem negotio nihil dico, ne cum prudentiam tuam, tum etiam amorem erga me tuum graviter offendam. Vale, ac Tassoniano adolescenti, quin etiam parenti salutem plurimam meo nomine dixeris.

BARTHOLOMÆUS RICCIUS

Sebastiano Briccio S. D.

Ejus modestiam commendat, epistolamque ad se missam & argumentum minime vulgari, & inepto, & ea dictione Latina, quæ in paucis reperitur, conscriptam extollit, magnumque ejus progressum in studiis propter ingenii excellentiam futurum pollicetur.

27. **E**t si modestia tua mihi multo ante in omnibus tuis actionibus valde perspecta erat, nunc tamen multo notior est facta, cum neque quod amici de tua

tua animi integritate prædicent, æquo animo feras, æquod ad me attinet, qui, quia eam aliquando vix attigi, tam ingenue conquestus es, nihil aliud dicam, quam quod qua me epistola subaccusas, eam melius causam meam tueri nequivisse. Hæc enim meam tui commendationem non solum comprobat, sed etiam augeat. Nam, quod ad studia, atque ad scribendi genus elegantius, quod tu fortasse non eo contentus, ullum in te esse negasti, id secus esse tua illa epistola probe testatur, quæ & argumento minime vulgari, atque inepto, & Latina dictione illa, quæ hodie in paucis reperitur, conscripta est. Utinam tibi per tot tuas familiares curas, quæ te a matre vidua, sed multo magis a tribus sororibus jam natu grandioribus, a tuis optimis auferunt studiis, in ea studiosius incumbere liceret. Verum si umquam id otii dabitur, ac te ad scribendum conferas, mihi crede, te non frustra eam operam esse positurum. Sed non pergam ulterius de tuo ingenio amice agere, ne in te vere laudando animi tui ingenuam naturam magis commoveam, quam ut quicquam gratum faciam. Vale.

BARTHOLOMÆUS RICCIUS

Sebastiano Briccio S. D.

Ludit in nomine Briccio, & Riccio, nihilque minus cuiquam videri debere ait, si se invicem ament, cum primum eos Gentis nomen prope conjungat, deinde communia studia, & multorum annorum arctior consuetudo conjunctos teneat, atque adeo pergat arctius retinere. Gratulatur, quod alteram sororem desponderit, Deumque orat, ut tertiæ Nuptiis eum totum liberet.

28. **V**ide, Bricci, quam prope idem sumus, quamque parum inter nos differamus. Nam si tui nominis primam literam demas, meum integrum remanebit. Quid enim Briccius erit aliud, si B tollas, quam Riccius? ut nihil admodum mirum cuiquam videri debeat, si nos inter nos tantum amemus, quos primum Gentis nomen prope conjunxit, deinde communia studia, atque tot annorum arctior consuetudo conjunctos

Tom. II.

N

te-

tenuit, atque adeo pergit arctius retinere. Si igitur hac quoque ratione, quoties res ferat, nomen tuum a me commendare senseris, nihil tibi molestiæ afferre debet. Gratulor tibi, quod alteram sororem despondisti. Ita Dii faciant, ut in tertiâ Nuptiis te totum brevi liberatum videam. Tassonianum tuum mihi salvere jubebis, meoque nomine hortaberis, ut parenti hanc gratiam faciat, ex qua tamen is majorem cum utilitatem, tum etiam dignitatem est consecuturus, ut in sua studia ardentius incumbat. Vale.

BARTHOLOMÆUS RICCIUS

Crispo Ferrario Prætori S. D.

Alphonsum Ferrium de cade olim Argentæ facta accusatum innocentiam suam ex vinculis apud eum defendentem commendat, rogatque, ut ejus causam mature cognoscat, atque ex ejus æquitate illum postea domum remittat.

29. **A**lphonsum Ferrius meus vetus amicus, Mucini vero utriusque nostri propinquus, atque affinis est. Hic Argentæ olim cædem secisse accusatus, temporum iniquitatem magis vitans, quam se fontem subacufans, sua sponte Patria excessit. Nunc innocentiam suam ex vinculis apud te defendit, in qua tuenda multos, eosque optimos Viros testes habet, qui suo sanctissimo testimonio illum liberant. In primis autem duos ejus, qui cæsus est, fratres, qui jurejurando Alphonsum hac omni fraternæ cædis suspitione prorsus absolvunt, qui cum hic hac solum de causâ ad publicum hospitium per hanc annonæ caritatem detineantur, ille vero in carcere multis incommodis afficiatur, neque post multos dies verbum ullum etiam dum de se factum sit, omnibus precibus a me contendit, ut causam suam ad omnem ejus absolutionem tibi quam diligentissime commendem. Te igitur rogo, non ut illum absolvas, quod ipsum jure ipso te facturum certo scio, sed ut ejus causam mature cognoscas, atque ex ejus æquitate illum postea domum remittas. Id quod si per me, ut sperat, neque ego, quæ tua summa est in me benignitas, diffido, impetrabit, scito, Alphonsum in perpetuum tibi esse debitum.

biturum; me vero istud officium tuum omnibus aliis tuis officiis ante esse positurum. Vale.

BARTHOLOMÆUS RICCIUS

Paulo Manutio S. D.

Epistolarum suarum editionem commendat, ostenditque, singulos homines maximo desiderio teneri nominis sui apud posteros propagandi. Rationem addit, cur potius ejus, quam aliorum, praelis eas edi cupiat, rogatque, ut sumptui in editione non parcat, eamque quamprimum expediendam curet, ut, si earum lectione ipse diutius frui nequeat, sciat saltem, si forte decesserit, aliquam sui partem, quæ secum decedat, in ea remansuram.

30. **S**cripsi ad Corradium, ut de Epistolis meis edendis tecum ageret, causamque, quamobrem id eum rogassem, etiam adscripsi. Nunc idem tecum ago. Quam ego, Manuti, a te, quæ ab amico expectari debent, omnia expectare possim, tu mihi testis es quam locupletissimus, qui quanti ego te semper fecerim, re ipsa non semel expertus es. Quod cum ita sit, spero, te quoque in amore mutuo mecum facturum, in eo præsertim, in quo meæ vitæ ratio non agitur parva. Vides, mi Manuti, me jampridem in senium delapsus. Neque te fugit, quantum quisque hanc vitæ diuturnitatem appetat. Id enim natura omnibus insitum est, ut nemo emori velit. Quod quoniam natura quoque vitari non potest, quando quod semel natum sit, ut tandem intereat, necesse est; eo fit, ut quisque saltem quo possit studio, etiam sibi mortuo nomen aliquod comparet. Egregio enim ille penicillo, malleo ille doctissimo, belli gloria ille, ille in pace conservanda, scriptor vero suis scriptis non solum suam sibi, sed aliis etiam prorogat vitam, quemadmodum ego nunc meam ex meis mihi proferre studeo. Nihil enim dubito, quin horum publica lectione in doctissimorum Virorum memoria mei aliqua memoria diutius conservetur. Quare nunc duodecim Epistolarum mearum libros ad amicos conscriptarum edere statui. Hi vero, ut ex tuis prælis exirent, multis de causis mirum in modum cupio. Primum, ut elegantioribus

bique exagitet; hoc item in loco perargute irridet. *Non enim solum*, inquit, *emes agros, sed etiam coacervabis*, hoc est, cumulos agrorum extrues, quasi saxa, atque lapides si sint. Aut quia supra ad sexagesimumtertium folium dixit, *coacervatam pecuniam Decemviralem*. Item ad octuagesimum folium: *ante pecunie coguntur, atque coacervantur, quam gleba una ematur*; ut hoc in loco dixerit, *coacervari agros*, quasi qui ex coacervata pecunia emerentur; ut non tantum pecunia hujus lege, sed etiam agri coacervari viderentur: quæ per risum, atque jocum in Rullum dicta videntur. Placuit hæc, non fortasse aliena, epistolæ nostræ addere; quæ si tibi probabuntur, aliquid erunt; si minus, nihil moleste accidet, si tecum, atque adeo cum cæteris doctissimis Viris me quoque Proteus iste suo risu fefellerit. Sed pœne præterieram de Bibliotheca illa nobilissima, cui præfectum esse te significas. Istam quoque tibi valde gratulor. Video enim eam tuis studiis librorum copiam factam esse, quæ non ita cum omnibus communicatur: unde multa tibi ad tua studia commodissime depromas, licebit. Ego cogito totum Aprilem Venetiis apud Marcum Cornelium Spalatrensem Archiepiscopum designatum agere, cui post parentes, ac fratrem tuum meo nomine salutem plurimam dixeris. Vale.

BARTHOLOMÆUS RICCIUS

Joanni Vitrianio S. D.

Certiore facit de re communi Aloysio Cardinali a se commendata; queritur, quod ad se nondum scripserit, ut promiserat; rogatque, ut librorum suorum curam gerat.

33. **C**Um Aloysio Cardinale de communi re hodie sum locutus. Is eo, quo solet, lætissimo vultu mihi respondit, nusquam nobis esse defuturum. Sed mihi placebat, ut proxime constituimus, ut, nisi re prorsus explorata, atque etiam cum Germanis illis probe confecta, ullum cum illo verbum faceret. In hanc igitur curam totus incumbes, ut primo quoque tempore utrumque absolvas. Sed miror, qui discedens ad me sub tuum adventum scribere promiseras, etiam dum nihil miseris,
ut

ut nescio quid suspicari cogar de eo, quod tecum locutus sum, præsertim cum de summi illius Viri nomine me certiore facere deberes. De meis libris cura, si me amas, ut aliquo modo conficiatur, si non tanti, ut mandavi, at quanti queas. Vale.

BARTHOLOMÆUS RICCIUS

Hectori Mirolio S. D.

Gratulatur de nobilissima conditione Bartholomæi fratris apud Alphonsum Principem, eumque eo munere dignissimum ostendit, significatque, id temporis se non habere eum Virum, qui in humanioribus studiis principis Cloti filios instituat.

34 **G**ratulor tibi, Bartholomæum fratrem tuum apud Alphonsum Principem nostrum eum locum tenere, quo nemo majorem, neque digniorem tenet. Sed eo quoque multo magis gratulor, quod is nobilissimum gradum cum Juris Civilis cognitione, tum etiam regendorum populorum summa obtinet prudentia. Nosti, cum hic aderas, ut Prætor ab omnibus bonis optime audiret, utque in causis dijudicandis integre, atque incorrupte sese gesserit. Cave nunc in totius ditionis administratione, quando huic omnes cum Urbanæ, tum etiam Provinciales causæ deferuntur, quidquam a veteri illo suo instituto discedat. Hactenus de fratris tui auctoritate, atque integritate. Nunc ad te redeo, atque ad eum Virum, quem a me, cum optimis literis, tum etiam melioribus moribus requiris, qui amici tui principis Civis filios in hisce humanioribus studiis instituat. Hos equidem [ut tecum ingenue agam] multos reperi, sed omnes omni locupletissimæ conditioni sua studia facile anteponunt, hoc est, qui aut Bononiæ, aut Patavii, aut Ferrariæ, ubi agunt, aliquid in iis vel laboriose, quam alibi sine iis otiosissime agere malunt. Si quid aliud est, quod mea opera tibi usui veniat, si me certiore feceris, dabo operam, ne id frustra fecisse videaris. Vale. Ferrariæ X. Calen. Octob. MDLXII.

BARTHOLOMÆUS RICCIUS

Sylvio Portio S. D.

Ejus totius vitæ rationem exponit, consiliumque laudat agendi in otio apud Cives suos quicquid reliquæ vitæ supersit. Hortatur, ut se pacificatorem præbeat in Civium discordiis componendis, seque non solum corporum, sed etiam animorum optimum medicum probet. Quod si nihil audierint, tum demum solus in suis studiis conquiescat, animumque suum ad veram Christi Philosophiam dirigat.

35. **J**ulius Gajanius mihi refert, te in Patriam rediisse, se, atque domi, quicquid reliquæ vitæ supersit, quod longum sit opto, id apud Cives tuos in otio acturum. Cætera, Sylvi, ante actæ vitæ tuæ omnia prudenter vidisti. Nam cum te Venetias admodum adolescens, inde Patavium cum tuis Dardaniis, ut optimis studiis operam dares, contulisti, qui non optime provisum est? Inde vero doctrinæ tuæ insigni [de more] ornatus Venetiis medendi artem totam ætatem feliciter exercuisti; quod consilium qui non summopere laudetur? Quod vero quicquid inde lucri feceris, in Bagnacaballenses possessiones collocaris, qua prudentia factum sit, nunc probe constat, qui ex earum fructibus senectutem tuam omni labore vacuam facillime alis. Hoc vero, quod postremum consilium cepisti, ut te in istam vivendi libertatem, atque in summum otium vendicares, maturam præ se fert prudentiam. Navigationem tu quidem, Sylvi, quamdiu tibi per vires tuas licuit, exercuisti, in qua etiam tuam maris partem feliciter percurristi. Ut vero postea quam illæ defecere, neque navis validiores maris fluctus sustinere posset, vela deduxeris, teque in portum receperis, ornamem tuam prudentiam facile superat. Quare tibi tuum istud consilium valde gratulor, tuamque istam domum reditionem magnopere laudo. Unum illud non finit, ut hoc meo officio perfungar integro, quod Cives tui nunc magis, quam antea, Civilibus discordiis laborare videntur, qui etiam in proprias Familias reterrimas cædes inducere non dubitant. Sed ista isti viderint. Ipse rem tuam agēs, atque cum genero tuo, optimo adolescente, cum
filia,

filia, atque cum ejus filioliis vives. Si quid tamen istorum animos desævire, atque ad sanitatem redire posse sentias, te hortor, ut te in iis inter se componendis fidelissimum pacificatorem præbeas, ut non solum corporum, sed etiam animorum optimum te medicum probes. Non enim dubito, quin tua prudentia, tuaque illa dicendi virtute, atque istius ætatis reverentia multum ad eam pacem inter eos conciliandam, quæ postea in perpetuum integerrima servetur, sis omnino profuturus. Quod si obtineres, non tuo, sed Divino consilio domum rediisse prorsus judicaberis, quando multo magis Civium tuorum concordia, quam otio tuo consuluisse videberis; sin secus accidat, ut obstinatius sævire pergant, neque quicquam audiant, tum ad te rediens, solus in tuis studiis conquiesces. In primis autem animum tuum ad veram Christi Philosophiam diriges, atque in summo ejus in humanum genus collato beneficio commorieri contemplan- do; quo uno Divino studio ita Christianum animum indues, ut, quamdiu vivas, in summa felicitate vivas, cum postea decesseris, nil tibi molestum sit ex istis miseriis, quæ summa felicitas stultis esse videtur, excessisse. Hic nostræ, Sylvi, navigationis certissimus est portus; hic nostræ peregrinationis unus terminus hæret; hoc illud otium, quod nullo motu perturbari potest; hanc quietem si tibi constitueris, rectissime postea omnia. Ego, si quid de meo statu scire cupis, hic sum in cæteris lætus, in uno eo non leviter affectus, quod Principem Filium adhuc mihi Gallia retinet, neque, quando eum expectem, quicquam scitur, verum etiam si scitur, nescitur tamen. Sed quid si ego isthic improvise adsim, teque cupidissime complectar, mi Sylvi, mi Sylvi, contra vero ipse, mi Ricci, mi Ricci, lætissime gestientes? Tu vero interim non solum tuam, sed tuorum etiam valetudinem cura. Ferrariæ IV. Non. Aug. MDLVIII.

BARTHOLOMÆUS RICCIUS

Francisco Martellio S. D.

Rogat, ut Petrum Angelotium in causa privigni sui in judicio adjuvet, summa, atque diuturna molestia liberet, illumque primo quoque tempore absolvat.

36. **E**T Cœli ardor ingens, & mea ætas jampridem ingravescens non finit, ut hoc tecum coram agam; etsi non multum interest, utrum hoc tecum, an alio faciam modo, quem sciam eo loco meas literas, quo me etiam præsentem faceres, habiturum. Petrus Angelotius huc per hoc, quod vides, anni tempus, ut privigno suo in judicio adesset, Bononia profectus est. Ejus causam optime nosti. Hic me rogat, ut eam tibi de meliore nota commendem, idque, non ad ullam cujusquam gratiam ut judices, sed ut eam tantum judices, sequere hac summa, atque diuturna molestia liberes. Mihi igitur gratissimum erit, si is intelligat, hanc meam commendationem apud te tantum pondus habuisse, quantum is confidit habituram, hoc est, si illum primo quoque tempore absolveris; quod ut facias, te etiam, atque etiam rogo. Vale.

BARTHOLOMÆUS RICCIUS

Aloysio Barbaro S. D.

Literarum ejus elegantiam laudat, gaudiumque suum propter amicitiam cum ipso tanto, ac tam nobili Viro in postrema senectute contractam significat; gratias agit de benignis pollicitationibus, & opera liberalissime sibi oblata, profuturæque, quoties res ferat, se omnino effecturum, ut suam erga ipsum voluntatem non desideret.

37. **T**Uas literas accepi, Barbare, [ut te nunc tuo magis, quam meo, modo appellem] ex quibus multiplicem, eamque omnem maximam voluptatem percepi. Primum quia elegantissime scriptæ erant, quo ego uno in legendis literis mirifice delector, atque ita, ut nihil

nihil molestius faciam , quam cum ejus generis literas lego , quæ infantes , atque omni elegantia ornatu carent , contra nihil lætius , quam cum in iis , quæ tuarum similes sunt , videlicet , quibus ad omnem rectam scribendi rationem nihil deest , meam lectionem occupo. Deinde , quod in iis non eam benevolentiam erga me tuam , quæ trium dierum brevi consuetudine inter nos conflata esset , sed quæ multorum annorum instituta esse videretur , facile perspexi ; ut valde mihi gaudeam , me hac mea postrema senectute tanti , tamque nobilis Viri amicitia auctum esse. In eo vero , quo me tam liberaliter laudas , qui ego possum non omni voluptatis titillatione commoveri ? præsertim cum ab eo hæc mea laus proficiatur , qui cum ex optimis suis studiis , tum etiam sanctissimis moribus ab omnibus optime audit ? His accedit , quod hæc omnia eo mihi jucundiora accidere , quo minus expectabantur. Non dubitabam equidem , quæ tua summa visa est humanitas , quin institutæ amicitia nostræ optime memor esses ; sed in eo meam expectationem superasti , cum tuis amantissimis literis omnia mihi tam amice , tam benigne polliceris. Tamen hoc postremum non parvo animi dolore me affecit. Nam cum ego idem a quo primo sermone , quem tecum habui , ita te amare cœperim , ut si tecum ætatem vixissem , hanc animi propensionem erga te mei , quam oculis , vultu , verbis denique præsens facile perspexi , ut tibi prior non significarim , tuamque epistolam meæ literæ non anteverterint , non leviter commoveor. Quod vero tam liberaliter operam tuam mihi offers , ac quoties opus sit , eam te præstiturum affirmas , non solum mihi gratum , sed etiam per jucundum est. Quam tuam tam benigni animi erga me tui voluntatem eo , quo tu , hoc est , amicissimo facis animo , contra ego meam tibi recipio , atque offero ; in qua nihilominus , quoties res ferat , te quicquam a me , quam ego sim a te desideraturus , sinam desiderare. Madio tuo nomine salutem dixi. Is non solum eam tibi remittit , sed gratias agit , quod in tuis scriptis tam de se honorificam facis mentionem. Vale. IV. Non. Aprilis.

BARTHOLOMÆUS RICCIUS

Hieronymo Zoppio S. D.

Gratias agit ob oblatam sponte operam in corrigenda editione librorum suorum, atque, sibi satis esse, si ipse illud tantummodo folium, quod prælo subjiciendum est, percurrat, primis reliquis sibi relictis, in quibus corrigendis, & perpurgandis summus labor esse silet.

38. **C**Um heri forte ad meum, ut dicunt, impressorium venisses, ac, ut oculos in folium, quod prælo describebatur, coniecisti, librarii mendum offendisses, meque de eo nondum tibi cognitum peramice [quæ tua summa est bonitas] commonefecisses, scis, quæ multa postea in eam rem ultrò, citroque a nobis habita sint; in quibus cum ego quererem multa ad eum modum in toto opere, ut qui quasi memoriter percurrerem, me esse fugitura, doloremque, qui mihi in eo corrigendo vel honesta mercede proposita operam daret, habere neminem; continuo ipse tuam humanissime mihi obtulisti; atque ita, ut vere, atque ex animo eam offerre videreris; cui ego, ut debui, maximas gratias egi; cumque etiam, si ea uterer, nonnullam me tibi esse relaturum dicerem [etsi cum vel maximam retulissem, neque isti tuæ tantæ humanitati, neque animo erga te meo satisfecissem] constanter negasti, te nulla alia mercede ad hoc mihi officium præstandum, quam qua tuapte natura ad omnibus modis de omnibus literatis Viris ample promerendum uti soles, prorsus adduci posse. Tum ego varie affectus sum. Tuo enim isto officio valde indigebam; contra vero rustice, ne dicam ingrate, facere videbar, si id gratis a te accepissem, atque ita tibi par in remunerando, atque in accipiendo fuisset, non essem; tamen cum hoc ipse nequaquam ferres, ego vero etiam dum tuo isto benignissimo in me animo plurimum deberem, volui etiam tibi accipiendo magis debere; etsi nihilominus interdum grati animi esse videtur, cum aliorum benignitatem ad se admittit, quam etiam cum in alios quicquam ipse benignius confert. Quare, Zoppi, & ne inhumanus videri possem,

si

si tam promptæ benigne faciendi naturæ tuæ non obsequer, & parum prudens, si mihi in tanta re non optime consulere, statui, ut tu jubes, quando, ut ego velim, non permittis, tua opera uti; sed ea tamen ingenue, atque perliberaliter uti, videlicet ut tantum illud folium, quod prælis esset subjiciendum, ipse percurreres, prima vero reliqua, in quibus summus labor est corrigendis, ego perpurgarem, ut quæ me ex nimia, ac frequenti eorum scriptorum lectione perperam, atque inversè posita fallerent, ea ut novus in ea lectione facile deprehenderes, atque in suum certum locum reponeres. Sed hoc omne ea tamen ratione, ut quam gratiam a me tibi referri nullam permittis, eam saltem, ut in perpetuum, quod facturus sum, habeam, ne graveris.

BARTHOLOMÆUS RICCIUS

Thomæ Mustio S. D.

Exempla Romanæ Urbis inspicienda ad se missa, Pyrrbique Ligorii libellum, in quo nonnullas etiam Romæ veteris partes describit, cum gratiarum actione, & judicio suo remittit, illique auctor est, ut ex solida aliqua materia opus illud extrui jubeat, ut hac ratione omnia planiora habeantur, majoremque delectationem videntibus afferant.

31. **C**ircum maximum, Castrum Prætorium, Trajani, atque Claudii portus, quos mihi inspicendos misisti, mea cum summa delectatione vidi. Pyrrhi vero Ligorii libellum, in quo nonnullas etiam Romæ veteris partes describit, non mea item sine magna voluptate legi. Is mihi quidem Vir summo visus est judicio, qui in eorum locorum descriptione cum Auctores inter se temporum varietate sæpius discrepent, id quambrem fiat, prius ratione allata, suum postea interponens judicium, ut se res habet, mea quidem sententia vere dijudicat. Sed redeo ad ejus integram, cujus exemplum Cardinalis tuus sibi effingi velle dicitur, atque ea ratione ab usque Roma ipsa exemplar huc afferri jussit. Equidem, Musti, si quod sentio, mihi tecum dicendum est, illi auctor essem, ut ex solida aliqua materia opus illud extrui juberet: videlicet, ut in tabulato, quan-

quantum id fatis esse videretur, septem colles ex aliqua materia attollerentur; postea, quæ ædificia publica, quæ privata, quæ sacra, quæ non in iis essent, construerentur. Ita fieret in planitie, ut omnium ædes, Templâ, Basilicæ, Thermæ, ac reliqua loca ex eadem materia suis singulis nominibus adscriptis informarentur, qua una mea effingendi ratione omnia planiora haberentur. Continuo enim cum viis multa alia, quæ teguntur, perspicue cernerentur; deinde Insulæ a conjunctis secernerentur; præterea quæque ædium facies in suam regionem commode collocarentur. Certe prospicientibus cum omnia distincta essent, neque, ut in coloribus, alia aliis inculcarentur, & locorum cognitionem planiorem, & ad videndum delectationem majorem haberent. Adde ad aspiciendum etiam commodiorem usum. Nam quæ in summa tela depicta pars est, nisi scalis adhibitis, haud facile cerni potest. Sed redeo ad tua exempla. Ea simul una cum libro tibi remitto, gratiasque, quod eorum copiam mihi tam benigne feceris, minime vulgares ago. Vale.

BARTHOLOMÆUS RICCIUS

Aloysio Durellio S. D.

Significat, vites ex superiore hyberno frigore ad ipsas radices interiisse, suum tamen agrum in vite minus, quam in segete, sensisse, quem sperat, quantum sibi in ea detraxerit, tantum in vino esse repositurum, eumque duabus futuris feriis ad suum Quartisanum invitat.

40. **U**T a te nudius quintus discessi, ruri sum vindemiam curans, quæ non plenis labris hoc anno exundabit. Vites enim cujusque generis, ut plane scis, in primis autem aureolæ, quæ apud nos in maximo sunt pretio, ex superiori illo hyberno frigore ad ipsas radices interiere; ut noster congius ex prælis ipsis ad tres nostras libras pervenerit, amplius etiam, ut audio, alibi; meus tamen ager in vite minus, quam in segete sensit, quem spero, quantum mihi in ea detraxerit, tantum in vino esse repositurum. Ego puto, te mecum duas istas ferias per tuos discipulos esse posse: quare te expecto. Vale. Ex meo Quartisano.

BAR-

BARTHOLOMÆUS RICCIUS

Aloysio Durellio S. D.

Ciceronis testimonio ostendit, quanam significatio Verbo adscribo proprie subjecta sit.

41. **I**Ta est, Aloysi, quemadmodum ego tibi dicebam, de Verbi *adscribere* ratione, ut is tantum adscribat, qui superiora scripserit, non ut qui alienis literis aliquid mandat adscribi, ipse adscribere dicatur. Nam quod ad ea loca, quæ adducis ad Atticum, nihil meæ sententiæ adversantur. Primum inquit: *Terentia tua magnos articulorum dolores habet, & te, sororemque tuam, & matrem maxime diligit, salutemque plurimam tibi adscribit, & Tullia delitiæ nostræ, iis scilicet literis*, inquit Cicero, *quas ad me scribunt, non autem his, quas a me nunc tibi missas legis, tibi salutem adscribunt.* Utraque enim aberat. Ita & in secundo loco cum ait: *Alexis, quod mihi toties salutem adscribit, est gratum*, id est, in iis item literis, quas tuo nomine mihi scribit. Is enim puer Attici amanuensis erat, vel fortasse, cum abesset Alexis, scribens ad Atticum, semper adderet, ut suo nomine Ciceronem salutaret; ut prorsus videas, non recte dici, salutem, quibus iussisti, omnibus dixi; qui contra eandem tibi adscribunt; quia nihil ipsi supra scripserant; sed dicendum fuisse, qui contra, ut tibi eandem adscriberem, iusserunt. Vale.

BARTHOLOMÆUS RICCIUS

Aloysio Durellio S. D.

Explicat, quid sit servum raso capite pileum capere, quique pileati servi dicantur. Morem Romanorum abraderi servorum caput, ipsumque pileo induendi Auctorum testimonio confirmat, exponitque, cur in bello capti in venditione coronam gestarent.

42. **E**N tibi, Aloysi, idque paucis; neque enim res est admodum obscura; quid sit *servum raso capite*

pileum capere, quique *pileati servi* dicantur. Mos fuit apud Romanos, ut servis, cum manu mitterentur, caput abraderetur, atque ipsi postea pileum in illud induerent, quem morem Plautus attigit in Amphitrione in postremo primæ scenæ carmine, ubi Sosia exoptat, ne ab Amphitrione quoque hero suo agnoscatur, ut liber fiat. Plauti verba hæc sunt:

Ibo ad portum, atque hæc, ut sunt facta, hero dicam meo,

Nisi & is quoque me ignorabit, quod ille faciat Jupiter,

Ut ego hodie raso capite calvos capiam pileum.

Hoc est [inquit Sosia] ut liber fiam. Quem morem etiam Livius in postremo quinto quintæ Decadis libro planius explicat, ubi dicit; Prusiam Regem pileato capite Romanorum legatis obviam ire solitum, ut qui se Romanorum libertum profiteretur. Scis enim, servos, postquam libertate donati sunt, liberos vocari. Livii verba tibi adducere placuit. Ille igitur:

Polybius eum Regem indignum maiestate nominis tanti tradit pileatum capite raso obviam ire legatis solitum, liberumque se Populi Romani ferre, & ideo insignia ordinis ejus gerere. Illud ego addo, me de Julio Scaligero doctissimo Virò audisse aliquando, servos illos capillos postea extra Urbem certa porta efferre, atque humi fodere solere.

Hunc quoque morem raso pilei accipiendi capite ii servasse videntur, qui aut naufragium fecissent, aut periculosissimam maritimam tempestatem vitassent. Unde ille:

Gaudent quoque vertice raso

Garrula servati narrare pericula nautæ:

quasi qui pro libertate donata vitam a Deo receptam significarent. Quidam etiam servi pileati venibant; ut qui in bello capti essent coronam in venditione gestabant, quorum pileus id præ se ferebat, ut venditor in eorum venditione nihil emptori se præstiturum significaret. Vale.

BARTHOLOMÆUS RICCIUS

Aloyſio Durellio S. D.

Sententiam suam de versu 552. Virgilii Æneidos lib. 4. Nec servata fides cineri promissa Sichæo affert, legendumque Sichæo, non Sicheio, ut Servius, aliique volunt, contendit.

43. **C**um varia lectio sit in eo Virgilii versu, de quo ad me scribis,

Nec servata fides cineri promissa Sichæo;

alii enim *Sichæo*, alii *Sicheio* legunt, utra vero verior sit, quæris. Ego, Aloyſi, lego *Sichæo*, neque id pro *Sicheio*, ut Servius, & qui Servium sequuntur. Mea autem est hæc ratio, ut Dido queratur, se non præstitisse fidem cineri Sichæi, quam Sichæo dederat vivo, se scilicet nulli unquam nupturam, si illi superstes mansisset. Id quod etiam, si interpunctio fiat post *cineri*, manifeste apparebit. Legas enim hoc modo. *Non servata fides cineri, promissa Sichæo*, ut diversum sit *cineri*, & *Sichæo*, non autem, ut illi inepte unum faciunt, *cineri Sichæo*, quasi *Sicheio*. Opponit enim Poeta *cineri Sichæo*. Hic meus est sensus, quem locum etiam in nostro in quartum Æneidos librum ita exposuimus. Alii aliud, ut magis illis placet, sentiant. Vale.

BARTHOLOMÆUS RICCIUS

Antonio Ferrario S. D.

Rhumbi Ravennatis, Asparagi, & Cinararum laus. Cinaras sibi dono missas Principi suo mirifice placuisse significat, orasque, ut, si commodum ipsi fuerit, quanti quanti veneant, ad se alias mittat.

44. **R**humbus olim Ravennas, atque Asparagus primas inter alios ferebant; nunc his Cinara accessit nobilissimus. Patellas Rhumbi implebant. Asparagus quemvis pollicem crassitudine, caseum recentem molli-tudine superabat. Cinaræ vero singulæ situlam complent. Stipitis etiam medulla ad edendum tenerima, atque gu-

Tom. II.

O

stui

stui minime est ingrata. Taceat Neapolis, Genua, Hispania, & si quid usquam locorum præstantem Carduum profert. Sed heus tu, quid mei libri habent cum Cinaris? in quarum formam tam facile conversi sint? Non enim id de illis dici potest, quod de Catulli libro dicitur, qui ad Sermionem in Benaco in Carpionem piscem commutatus est. Certe veri simili ratione in nostris factum videri potest, quando ex foliis utrique constant, etsi earum compositione, quæ squamas imitantur, multo ad aspiciendum pulchriores, quam mei libri ad legendum sunt suaviores. Non possum tamen concedere, ut ita tractantem, atque legentem acute pungant, quem admodum tuæ faciunt Cinaræ. Sed multa sunt, quæ foris horrescant, atque armentur, intus tamen suavissimum præbeant cibum, in quorum genere hoc Cardorum est genus. Quare mihi gratissimæ accidere, siue illæ etiam pro meis libris venerint. Sed eo multo etiam gratiores fuere, quod maiorem eorum partem meo Principi dono misi, quas, ut nuntius retulit, mirifice laudavit. Utinam autem tibi commodum esset item ad eum numerum, quanti quanti venirent, mittere. Sed non facilis via est, neque qui laborem ferendi ferant, facile reperiuntur; sed ut tibi videbitur. Vale. Fabio, atque meis Abiis salutem. Ferrariæ.

BARTHOLOMÆUS RICCIUS

Marco Antonio Gambaronio S. P. D.

Baphii Orationem laudat, suarumque Epistolarum volumen cum Oratiuncula quam proxime edita suo nomine ei danda mittit.

45. **B**aphii tui Orationem, quam in funere nostri Delphinii, cum omnium scientiarum doctissimi Viri, tum in totius vitæ cursu probatissimi Franciscani Sacerdotis habuit, partim summo meo cum dolore, partim etiam voluptate perlegi; dolore, quo tanti mei amici morte quam maxime sum affectus; voluptate, cum eum video ab eloquentissimo adolescente de more laudatum. Cui solatio id quoque accedit, quod hunc video æquissimis passibus magistrum suum brevi affecturum;

ut

ut quod damni in illo factum sit, iste non multo post sit optime præstiturus: in quo neque ego separatim mei amandi totum desiderium omiserò, quando in hoc meo Bartholomæo illud sim optime renovaturus, ad quod mecum mutuo faciendum hoc modo visus sum benigne illum invitare, ut, quemadmodum ego illum ex ejus scriptis amare cœpi, ita ille quoque, si prius non fecit, nunc me ex meis diligere incipiat. Mitto igitur tibi mearum Epistolarum volumen cum ea Oratiuncula, quam proxime edidi, quæ illi meo nomine dederis; me vero, ut mutuo diligat, etiam rogabis. Vale, quando non mihi satis est dicere, cura, ut convalescas.

BARTHOLOMÆUS RICCIUS

Hippolyto Zafaleonio S. D.

Certiores facit, se post quindecim dies ad eum venturum, ut cum Vitrianio constitutum iter suscipiant.

46. **U**T rationem in eo, nisi post quindecim dies, a quo die constitueram, ad vos venire non possum. Tot enim reliqua vindemia sibi dies apposcit. Partim enim in labro musta ebulliunt, partim in uvis etiamdum maturescunt, ut aureum. Quare si ad eundem diem tuam absentiam sustinere poteris; nam de sumptu, isthic quoque domi es, neque adhuc ad docendum est redeundum; non te hora longius rejicio. Decem postea reliqui sunt dies, qui in Rhégiensi, atque Mutinensi itinere sunt consumendi. Quin si vacaret, cogitabam etiam Patavium a nostro domum reditu, ut ipse tuos, ego vero meum Cardinalem, qui III. Id. Septembris cum sororibus Principibus ad Balnea est discessurus, viseremus. Quid vero si Vitrianus quoque se tertium comitem adjungat? O felicissimum iter! Scribas igitur mihi, ut sciam, an mihi cum Bacco properandum, an lentius sit agendum. Vale. Ferrariæ Non. Sept. MDLXII.

BARTHOLOMÆUS RICCIUS

Hippolyto Zafaleonio S. P. D.

Queritur, auratas Comacienses, crateis viminibus diffractis, aufugisse. Admonet, eum verum hominum piscatorem futurum; additque jocosè, illum, si Petri retibus integris utatur, magnam utriusque generis piscium prædam facturum.

47. **C**omacienses auratæ crassiora illa, illa falsamentata, diffractis vimineis cratibus, aufugere, abiere, omnia ad unum in suum regnum rediere, nosque in sicco relinquere; neque inde hoc anno ulla vi ventorum amplius educi possunt. Vides enim quid Sacratius Cardinali nostro respondeat, se jam provinciam illam alteri decrevisse. Ut Dii illum male perdant, qui nos pessime perdidit. Cum tamen eas literas Cavallerio legendas misi, respondit, nihil esse, quod verear; eam enim operam se nobis navasse inquit, ut ille alter cedere cogatur, neque factus, etiamsi factus sit, nos vero veri hominum piscatores futuros. Ego tamen si non tantorum piscium, quam hominum malim, quando is tamen piscatus ad hominum quoque victum maxime facit, non multo minus hunc, quam illum cupio piscatum. Quare ipse tantum animas Deo, nobis vero ejus generis pisces, qui maxime probantur, expiscaberis. Utrum autem difficilius, non satis dixerim. Magis enim illorum animi in peccato dominantur, quam pisces in suo amplo mari libere cursitantes pervagantur. Si Petri tamen retibus integris utaris, magnam utriusque generis piscium facies prædam. Hactenus de Comaciensibus. De Arcoao melior est spes. Tridento a Cananio ad nostrum Cardinalem literæ expectantur, quibus tuo illi illam det. Ecquid aliud? nihil, nisi ut valeas. Vale.

BARTHOLOMÆUS RICCIUS

Hippolyto Zafaleonio S. D.

Cam in singulas horas semper aliquid accidere soleat, quo quis cogatur commutare, quod constituerit, certior faciat, totam itineris inter se constituti rationem commutatam esse, ac retro ordine verso iter faciendum.

48. **P**rofecto non una hominum est in rebus constituendis deliberatio. In singulas enim horas semper aliquid accidit, quo quis, quod constituerit, commutare cogatur. Ego tibi scripseram, ut me Bononiæ expectares ad decimum diem, unde postea Mutinam, atque Rhegium in reditu viseremus; ut vero domum rediissemus, Patavium peteremus; nunc tota hæc ratio commutata est, ac retro ordine itinere verso, commodius nobis accidere videtur. Quare te expecto, ut Patavium proficiscamur; cum vero inde redierimus, ego cum Vitriano, si minus per tua studia te nobis comitem præbere potueris, reliquam meam conficiam peregrinationem. Vale.

BARTHOLOMÆUS RICCIUS

Laurentio Frizzolio S. D.

Gratulatur de munere amplo Romæ ipsi tributo, Romamque unam esse prædicat, in qua Viri extolluntur, & summa miracula fiunt, ut etiam stipulatores ad Cardinalatum perveniant. Tanto initio medium, & extremum æque responsura pro certo se habere, significat, rogatque, ut in laudem Falopii unam ex Odis suis mittat, quas ex intimis sensibus solet eruere.

49. **O** Centies, & amplius diem illum, quo a nobis Romam discessisti, felicem, faustumque. Una, una Roma est, in qua Viri extolluntur, & summa fiunt miracula, ut etiam stipulatores ad Cardinalatum perveniant. In cæteris Urbibus, ut in minoribus paludibus factis est, si minutos pisculos, etiam si aureis hamis piscaris,

ris, capias, in una Roma vel ferreis Balanzæ capiuntur; ut ego recte olim hoc tibi divinarim; sed hoc initium est; quod tamen tibi valde gratulor; cui medium, huic vero extremum æque ut respondeant, ita cupio, ut ea quoque possim jam tibi gratulari. Sed cum venerint, non enim dubito, quin meo tempore veniant, eorum gratulationi non sum defuturus. Contra ego nunc a te expecto in laudem Falopii nostri unam ex tuis Odis, quas ex intimis sensibus eruere soles. Fac, si me amas, ne frustra expectem. Vale, Antonianoque nostro salutem.

BARTHOLOMÆUS RICCIUS

Joanni Vitrianio S. D.

Rogat, ut Nicolaus præsto sit ad pelliones in emendis pellibus agnitis, morticinis vulgo dictis, vestis subsuendis.

50. **N**icolaum isthuc mihi dedita opera, qui mihi agninas ejus generis pelliculas, quas vulgo morticinas appellant, vestis subsuendas emeret. Te rogo, ut cum illo sis ad istos pelliones, videasque in primis, ut illæ eo nigrore sint, quæ vel pilosum sericum superent, pilo vero incompósito, quique magis undulam, quam aquam æquabiliter profluentem, imitetur; præterea ne tineis attactæ sint. De nostris autem montibus, vide ne abortum faciant. Mures modo pariant, sed ejus tamen generis, quos mihi significas. Sed ego metuo, ne potius in fumum eum, qui hominum vultus tam ridicule depingit, evanescant. Vale. Ferrariæ.

BARTHOLOMÆUS RICCIUS

Tiresio S. D.

Patroni sui filium unicum optimæ indolis in humanioribus studiis instituendum commendat, rogatque, ut eum in interioribus discipulis habeat,

51. **Q**uamtu clientes Patronis suis debeant, non te fugere certo scio. Hi enim in illorum fortunis in-judiciis tuendis omne studium, atque laborem adhibent.

bent. Quid ab illis sit, diligenter exquirunt; quid contra adversarius objicere possit, etiam diligentius animadvertunt; in suo autem defendendo nihil omittunt; in adversario item refellendo omnia in causam suam conferunt. Quare cum ego uno Contulio meo & in causis Patrono, & extra causas amico etiam familiariter utar, huic omnia commoda non solum optare, sed etiam, in quo possim, prodesse debeo. Is unicum habet optimæ indolis filium, quem tibi in humanioribus studiis instituendum mittit. Quoniam vero pater est, & unici pater est filii, huic cum omnia præstet, non paterno tamen amoris satisfacit. Quare fit, ut cum nihil tuo studio, tuæque diligentiae diffidat, tamen a me contendat, ut eum tibi diligenter commendem. Te igitur rogo, ut, mea quoque causa, tuo isti diligentissimo in eum studio aliquid etiam addas, atque eum in tuis habeas interioribus discipulis. Quod si feceris, præterquam quod mihi gratissimum erit; polliceor tibi, Contulium ejus parentem [præter constitutam mercedem] gratissimum virum quotidie te esse cogniturum. Vale. Idibus Decembris MDLXII.



BARTHOLOMÆI RICCI

LUGIENSIS

EPISTOLARUM

FAMILIARIUM LIBRI VIII.

BARTHOLOMÆUS RICCIUS

Patriæ suæ S. P. D.



Quantus cuique in Patriam suam amor-
ingenitus sit, quantumque solo Pa-
trio quisque natura debeat, nulli,
qui modo hominis naturam aliquid
atingat, ignotum esse arbitror. Nam cum
multa in homine natura ipsa ingenuerit, quæ
quasi in eo dominantur, atque principatum ob-
tineant, in primis ea magna vis est, qua is
in Patriam afficitur, quaque totus in eam sum-
ma pietate adstringitur. Quare etiam Sapientes
in propinquitatis gradibus constituendis, ut a
Diis immortalibus discessere, Patriæ primas fa-
cile concesserunt. Et certe nemo tam abjecto,
tamque abdito loco natus est, qui eum non
habeat omnium charissimum; ut etiam Troiæ
domitor, qui multorum hominum mores vidit,
quique magnam Orbis partem peragravit, u-
nam Ithacam suam, quasi saxo nidulum appen-
sum, cæteris Orbis Civitatibus facile prætule-
rit. Hoc quidem naturæ impulsu omnes. Ve-
rum, si quid aut dignitatis, aut etiam utili-

ta-

tatis ad naturæ vim postea accedat, tanto magis in illam incenduntur, atque, ut illi omnia optata eveniant, expetunt; ut, qui duplici de causa ei plurimum debeant, pari item ratione gratissimi esse videantur. Quibus rationibus ego tibi, quantum quisque alius suæ, omnia comoda, omnem felicitatem, omnes Deos rogo, atque oro. Nam, quod ad naturæ rationem attinet, equidem nec Codro, ac Torquatis (si id mihi per Christianam Religionem liceat), qui pro suæ salute sese devovere, si te in aliquam solidam gloriam meo certissimo periculo adducere sperem, quicquam concederem. Certe in quo potui cum in quotidianis sermonibus, tum in meis ipsis scriptis hujusce animi, erga te mei significationem minime obscuram, declarare non destiti. Ut primum in Apparatus editione feci, in cujus inscriptione tuum quoque nomen meo nomini adscribi jussi. Quod etsi perparum omnino videri potest, certe illud haud contemnendum fuit, quod a me primum omnium hoc modo in omnium gentium cognitionem venisti. Nam si fortasse quispiam parum prudenter querat, cur ego neque primum illud opus tibi inscripserim, neque quod de Imitatione postea scripsimus, tibi item potius, quam Alphonso Atestio dicarim, is id sibi responsum habeat; tibi acceptissimum fuisse, videre te Civem tuum gratissimum habere,

re,

re, qui primum Corneliis suis, ac de se optime meritis hujus generis gratiam referret; deinde Principi suo secundam, cui & ipsa post Herculem ejus parentem omnia facile concedas, ac etiam aliquando soli sis concessura. A quo ipsa quoque tanto majorem, cum facultas dabitur, in te eandem speres, quanto Patriæ charitas, quam aliorum merita, majorem vim habere debet. Proxime vero cum Patriæ pietati tua in me tam ampla, tamque grata voluntas accessit, quæ tua sponte me absentem, atque omnia alia cogitantem, nobilissimo munere prosecuta es, non mihi quidem plus in te ardoris addidisti, sed omnino majoris debiti non parum adjunxisti; cui quoque ut aliquam gratiam referrem, mecum hoc modo constitui. Nam cum VIII. Epistolarum libros ad amicos, ac familiares meos multis, ita ut sit, ac variis de rebus conscriptos, editurus essem, hi sub tuo nomine, charissima Patria, ut ederentur, volui. Quam meam erga te bene gratam voluntatem ut eo loco habeas, quo haberes, si tibi omnem immunitatem, atque etiam Civium tuorum concordiam condonarem, rogo. Nam, si animus in omnibus rebus maxime spectandus est, meum in tuam salutem, in tuam gloriam ita propensum, atque pie affectum habes, ut pro illa Deos omnes assidue orem, ut te cum ab externis, tum etiam, quibus ma-

xime afflictaris, Civilibus odiis defendant. Pro hac autem, quantum in me est, si non ut cæteras superes, inter eas tamen aliquod nomen ut habeas, etiam omni sum studio conaturus. Vale.



BARTHOLOMÆUS RICCIUS

Lectori S. P. D.



Nil est, Lector humanissime, quod mireris, quod hæc meas Epistolas non ad suam temporis rationem descriptas, sed quasque, ut singulis scriptæ sunt, ita etiam in ordine esse digestas, videas. Quod institutum Tiro quoque in Ciceronis Epistolis servasse videtur. Et fortasse ea ratione, qua is fecit, nos quoque facere coacti sumus. Nam, cum eas confusas, ut putatur, haberet, ut quæque in manus incidebat, ita eam magis ad cuiusque nomen, quam ad temporis rationem in volumen conferebat. Id quod nobis quoque accidit, qui cum id moris in eis scribendis servaremus, primum ut raro diem Epistolis adscriberemus, deinde ut eas in-composite in capsulam conjiceremus, quas postea quotidie, ut fit, commisceremus; idcirco factum est, ut cum postremo in Codicem constituerentur, facilius quæ cuique scriptæ essent Epistolæ in unum componerentur, quam ut ad diem suum, qui in pluribus nullus erat, unaquæque redigeretur. Quod meum factum etsi nonnullius negligentia accusari potest, modo eæ tamen sint Epistolæ, quæ & eorum dignitate, qui-

quibus scriptæ sunt , & eorum , qui optimam hanc scribendi rationem optime tenent , lectione dignæ sint , satis huic errori factum videbitur . Neque enim frugiferæ arbores , propterea quod incompositæ sint in agro consitæ , aut caduntur , aut evelluntur ; neque eorum fructus ea quoque ratione sunt insuaviores , quam si in quincuncem essent dispositæ . Quare , siquid in eis erit , quod Lectori placeat , me illi satis fecisse arbitror . Cum vero Historiam scribam , hanc temporis rationem rectius conservabo . Vale .



BARTHOLOMÆI RICCI

LUGIENSIS


EPISTOLARUM

LIBER PRIMUS.

BARTHOLOMÆUS RICCIUS

Petro Bembo S. D.

Postquam ejus summam humanitatem, & præstantem humaniorum litterarum cognitionem laudibus extulit, suorumque studiorum rationem ipsi exposuit, judicium petit de editione APPARATUS LATINÆ LOCUTIONIS a se scripti, cujus particulam mittit, ut ex ea totius edificiï fabricam deprehendat, rogatque, ut de tota re, atque editione libere perscribat, quid sentiat.

I.  T tua summa in omnes humanitas, & præstans nostrorum studiorum cognitio, ac judicium facit, ut etiam, qui tecum numquam locuti sint, ac longissime gentium habitent, si quid in eis dubitationis habeant, te confidenter adire, atque tuum consilium quærere non dubitent; quos tu contra ita accipis, ut, si tecum conjunctissime vixissent, atque eo consilio juvas, quo qui quam fidelissimo. Qua ista singulari humanitate, atque prudentissimo judicio fretus, ego quoque multis aliis in te consulendo accedere non dubitavi. Ego, Bembe, cum in hisce humanioribus studiis & discendo, & dicendo jam multos annos versarer, in horum altero non equidem frustra operam ponebam; in altero parum proficiebam. Siquidem in observandis rebus cuique facillimum est studium; in scribendo vero cum aliqua dignitate, non ita. Nam etsi, quod in ea studii ratione in primis, ac maxime probatur, a scribendo calamum vix umquam deponerem; tamen in ea scriptio-

ptione mihi non satisfaciebam. Ea enim erat, quæ cæterorum, qui recentium more scribunt, ac, quicquid ad vulgarem orationem in buccam, nullo ornato, nulloque verborum defectu usurpant. Verum postquam Navagerius tuus me admonuit, ut lectionem meam tantum in bonis Scriptoribus exercerem, si in dicendo aliquid proficere cuperem, id non solum præstiti; verum etiam quædam mihi ex iis ipsis delegi, ex quibus non parum ad eo modo scribendum mihi accederet adjumenti. Id autem fuit nobiliorum locutionum electus, atque observatio. Quæ omnia, quoniam cum memoriæ non satis fiderem, tum etiam ut magis mihi ea in promptu essent, in suum separatim Codicem, atque ex suo literarum ordine descripsi. Quod meum opus, cui nomen feceram APPARATUM LATINÆ LOCUTIONIS, quasi unde mihi paratum esset, quomodo ad Latinam rationem loqui tuto, neque impolite possem, cum in primis Flaminius, Priulius, ac Julius Camillus vidissent, continuo, ut in communem utilitatem id conferrem, hoc est, ut ederem, me singuli sunt sæpius cohortati. Proxime vero Flaminius rursus ita mecum eadem de re egit, ut me etiam impietatis graviter accusaret, qui cum cæteris tantam utilitatem supprimerem, tum etiam mihi non parvam gloriam inviderem. Quibus rationibus, ut qui ita esse maxime cuperem, sum adductus, ut tantis tandem Viris in ejus editione obsequerer. Unus tamen adhuc scrupulus mihi obstare videtur, ne id libere, ac satis tuto iis morem hunc gererem. Vereor enim, ne liber meus non solum ullam utilitatem ulli sit allaturus, sed unde ego mihi aliquod nomen comparare sperarim, inde magis mei risum sum omnibus excitaturus. Quid, inquires, gravissimis istis Viris diffidis, qui cum scientia, tum judicio plurimum valent? Horum neutrum. Id magis metuo, ne ea benevolentia, qua me maxima prosequuntur, fortasse impediuntur, quo minus decernere possint, si quid inde nomini meo magis obfuturum, quam gloriolæ quicquam sit comparaturum. Quare tuum judicium magis quæro, qui & id prudenter facere nosti, & hac nulla animi affectione erga me, ut quem numquam videris, ad id recte faciendum quicquam impediaris. Ut, cum antea moleste tulerim, nullam mihi, quæ omnino esse potuisset fructuosissima, recum consue-

fuetudinem intercessisse, id mihi magis latandum nunc esse videam, Diique hac quoque nostri tua ignoratione rectius nobis consuluisse videantur, qui, quod in ea multum iacturæ feci, id mihi nunc in hoc tuo integerrimo iudicio totum probe compensent. Ejus igitur operis particulam tibi mitto, ex qua totius ædificii mei fabricam facile deprehendes, teque etiam, atque etiam rogo, ut tantum temporis Historiæ tuæ subtrahas, quantum hujus erit unius percurfæ lectionis [neque enim aut Bembi ingenio, aut rei facilitati amplius aut temporis, aut diligentia opus est] ac quid de tota re, atque de editione libere sentias, id postea ad me perscribas. Quod si a te, ut spero, impetro, erit mihi quam gratissimum. Quod vero ad editionem attinet, si eam comprobabis, polliceor tibi, quicquid mihi inde nominis conficiatur, me id tibi totum acceptum relaturum; si vero contra senseris, putabo te eundem, ne unde ego mihi aliquam gloriolam quærerem, inde in aliquam infamiam incidere, optime providisse. Vale. Venetiis Kal. Quintilis MDXXXII.

P E T R U S B E M B U S

Bartholomæo Riccio S. D.

Respondet, ejus scripta omnibus communicanda esse, cum nihil laudabilius facere possimus, quam dare operam, ut nostro vel labore, vel industria aliis hominibus pro virili nostra prodesse queamus. Illud unum admonet, ut ex ea sylva, atque congerie illa, quæ cognita, perspectaque sunt non solum doctis hominibus, sed iis etiam, qui modo paulum Latinam linguam attigerunt, demat, reliqua sibi magnopere probari significans.

2. **E** Pistola tua ita me delectavit, ut ægre admodum tulerim, quamquam tu Venetiis complures annos proxime vixeris, ego frequens fuerim, tamen nulum mihi tecum usum adhuc quidem intercessisse, tuæque me interea consuetudine, tuis congressibus, atque sermonibus caruisse. Cave enim putes, mihi quicquam ita aut gratius, aut jucundius accidere potuisse. Quod quoniam tua culpa magis, quam mea factum puto, qui
ad

ad me nunquam accesseris, numquam te mihi dederis intuendum, feram æquiore animo, propterea quod uno, eodemque brevi tempore totum te ut cognoscerem effecisti, tuamque in studiis nostris mitioribus doctrinam, & diligentiam ut perspicerem, voluisti, missis ad me scriptis tuis, quibus facile, quam sis in ea re mirificus, ac plane summus, cognovi. Itaque quod me rogas, ut videam, tibi que significem, an ea edenda sint: illa vero maxime omnibus sunt communicanda. Quid enim facere possumus laudabilius, quam dare operam, ut nostro vel labore, vel industria aliis prodesse hominibus pro virili nostra queamus? Tu autem multa in iis vel a pluribus non animadversa, vel perperam recepta, vel etiam neglecta, & rejecta, qualia sint, quemve usum præstent, palam facis, afferisque tamquam sylvam, ita modos, ordinesque certos, atque innumerabiles scribendi, quibus cum locupletare se sermo Latinus potest, tum firmare, atque consistere, ne sit lapsui, aut errori locus. Quamobrem, si unum statues, cætera mihi magnopere probabuntur; ut demas ex ea sylva, atque congerie illa, quæ cognita, perspectaque sunt non solum doctis hominibus, sed iis etiam, qui modo paulum Latinam linguam attigerunt. Nolo enim, in eo laborem sumere, ut orania, quæ dici possunt, colligas; nam quid esse magis supervacaneum potest, in tanta præsertim eorum, qui de Latine loquendi ratione, quæ scribant, ipsi conscripserunt, vel recentium, vel antiquorum copia? sed ut ea, in quibus vel aliquid homines doceas, quod ignorent, vel sint ipsa per se illustriora, venustiora, commodiora in tuum conferas librum, disponasque tamquam in quincuncem, sic suos in locos, ac formas, & imagines dicendi. Ea re & satietatem legentibus non afferes, & multum addes libro tuo dignitatis, splendoris, gratiæ. Cæterum de tuo in me animo, & fide, quæ amantissime scribis, ea per mihi grata sunt: quæ de me ipso, tu videris: in amore autem, & benevolentia posthac mutuo tecum faciam. Vale XII. Kalen. Aug. MDXXXII. Patavio.

BARTHOLOMÆUS RICCIUS

Petro Bembo S. D.

Significat, se posthac diligenter curaturum, ut damnum amicitiae ad hanc diem non cultæ resarciat, diluitque id, quod sibi obiecerat de editione sui APPARATUS LATINÆ LOCUTIONIS.

3. **D**uplicem voluptatem, eamque utramque maximam tuarum literarum mihi attulerunt; alteram, cum libri mei editionem tam fideliter probas, quo nihil mihi gratius, nihil iucundius accidere poterat; alteram, cum ita honeste quereris, quod nostra consuetudine tot annos mea culpa carueris, qui, ut par fuit, te nunquam adierim, neque quicquam de me a me perceperis. Nam quod doles, nullius tot annorum consuetudinis usum inter nos intercessisse, meque tanti facere significas, ego, aliquid esse me ut credam, facile adducor: qua etiam ratione mihi valde gaudeo. Sed nihil est, Bembe, quod meum ingenuum pudorem accuset. Ita enim sum homo, qui cum principibus Viris, nisi res cogat, neque congregi, neque familiariter versari audeam, præsertim in quo nullum damnum feceris. Quid enim Bembus ab homunculo Riccio consequi potuisset, quod ei quicquam aut voluptatis, aut utilitatis afferret? Certe, si quis nostrum hac nulla nostra interea familiaritate recte queri potest, idque permolestè ferre debet, is ego sum, qui ea quotidie, atque adeo in singulos dies multo eruditior, multoque ornatior extitissem. Sed posthac, quando ita tibi placere intelligo, curabo diligenter, ut hoc damnum luculente mihi resarciam. Nunc redeo ad libri editionem. Ego illum edam, quando ita tibi videtur, meque inde literatis, & Latinæ dictionis studiosis hominibus gratum, meo autem nomini minime ingratum facturum esse affirmas. Quod vero suades, ut quædam minuta, ac prope omnibus percognita minutis magistris relinquam, ac tantum ea apponam, quæ tui similibus Viris probentur, consilium tuum mihi non improbatur, sed quam mihi supellectilem ad politius Latine scribendum confeceram, eam omnem in eo flu-

studio cæteris quoque omnibus profuturam esse putabam. Certe id mihi providendum fuit, ut magis elegantes Viri, tuique, ut dicebam, similes, in scribendo multa a me haberent, quorum minime ignari essent, quam ut rudes, atque dictionis Latinæ parum periti quicquam eorum desiderarent, quibus orationem suam paulo luculentiorē reddere possent. Neque enim Varro, ut plane scis, cum de Latina lingua scribebat, etiam notiora persequi; neque Cicero in Oratore suo etiam ad minutissima quædam descendere, ut omnibus prodesse, quicquam veriti sunt. Quorum illustrium Virorum exemplo ego quoque, si quæ in mei LATINÆ LOCUTIONIS APPARATUM, quæ fortasse non sunt innumerabilia, eruditissimis Viris trita, adolescentibus vero minus erunt cognita, conjecero, fortasse minime peccasse videbor. Quod vero me mones, ut Lectoris satietatem devitem, eundem Bembe, ubi in opere illo id opus sit, non video. Siquidem hæc in perpetuis scriptis creari solet, mea autem breviora, & magis concisa, ac compendiosa esse non possent, quæ in singulis locutionibus terminantur, atque Lectorem liberum relinquunt. Vale.

PETRO BEMBO CARDINALI

Bartholomæus Riccius S. D.

Gratulatur de Cardinalatu, ostenditque, eam Dignitatem multo plus ab eo accepisse, quam illi dedisse, multoque ipsam videri cumulatiorē factam, quam illum splendidiorem. Addit, bene, ac feliciter cum Christiana Republicæ iri, si ejusdem Senatus magnam copiam simillimorum Senatorum habeat, inter quos Contarvenium, & Sa- doletium recenset ad eam Dignitatem nuper erectos.

4. **U**trum tibi, Bembe, isto tuo, ut dicunt, Cardinalatu, an Christianæ Reip. magis gratuler, incertus sum. Utri enim in eo majus beneficium allatum dicam, non satis habeo constitutum. Tu eam quidem Dignitatem adeptus es, quæ a suprema uno tantum distat gradu; sed quam tibi tamen cum ex tuis optimis studiis, tum etiam ex summis virtutibus jampri- dem delatam esse oportuit, adeptus es. Illa vero a te,

[ut nunc Gentis tuæ nobilitatem nihil recenseam] omnia summa accepit ; ætatem , quæ sua maturitate constet , consilium , ac prudentiam in constituendis rebus optimam , in iis peragendis experientiam singularem , nobilium artium , ac scientiarum cognitionem minime vulgarem , eam postremo eloquentiam , in qua omnis Romana elegantia redolere sentitur ; ut , cum diligentius considero , multo illa plus accepisse , quam dedisse , tuæque ista nobilissima accessione multo cumulatioꝛ , quam tu ista facillima cooptatione splendidioꝛ , ac illustrior , facta videatur . Quare una simul utrique gratulor , ut qui alter ab altero ad maiorem gloriam plurimum adiuti sitis . Sed cum vobis gratulor , tum mihi gaudeo , quod tam diu vixi , ut viderem aliquando ad istum Dignitatis amplissimum gradum virtuti , non autem semper tantum gratiæ , atque effusis largitionibus aditum esse patefactum : quod prius in Contarenio , deinde in Sadoletio Collega tuo , Viris , si qui alii , integerrimis , fieri cœptum est : nunc vero in te tertio comprobari , atque confirmari pergit . Utinam vero Senatus iste vestri simillimorum Senatorum magnam copiam haberet . Bene enim ac feliciter cum Christiana Rep. ageretur . Nam id ei contigisset , quod Plato in Rep. sancte administranda evenire cupiebat , ut qui eam regerent , atque administrarent , Philosophiæ optimis præceptis imbuti essent . Ad cuius amplissimi Ordinis summum locum si vestrum quisquam umquam perveniat , nihil dubito , quin eum continuo istorum hominum genere probe sit completurus . Sed redeo ad te . Cum tibi , inquam , præsentis Dignitatis vehementer gratulor , tum speratam etiam ut videam , Deos omnes pie rogo . Quod si impetro , nihil tum postea est , cur ego ex hac vita non libentissime excedam , cum Christianam Rempublicam optime constitutam relinquam . Vale . Ravennæ Non. Maii MDXXXIX .

P E T R U S B E M B U S

Bartholomæo Riccio S. D.

Gratias agit de literis, quibus gratulatur, se a Paulo III. Pontifice Maximo in Cardinalium Collegium fuisse cooptatum.

5. **G** Ratus mihi tuarum literarum sermo, & elegans, & doctrinæ plenus fuit, quibus literis gratularis, me a Paulo III. Pontifice Maximo in Cardinalium Collegium fuisse cooptatum. Tamen tu quidem parcius multo, continentiorque debueras in me laudando esse; sed tuæ te eloquentiæ flumen altum profecto, atque latum, ut a ripa solvisti, liberius, rapidiusque vexit, quam oportebat. Qua de re majores tibi gratias & nunc ago, & referam, cum potero. Vale. Non. Kalen. Junias MDXXXIX. Patavio.

BARTHOLOMÆUS RICCIUS

Andræ Navagerio S. D.

Iter suum Venetias describit; Mussuri Græci hominis humanitatem, & beneficentiam laudat, conditionemque propositam commodam sibi futuram significat.

6. **E** Odem die, quo a te profectus sum, Venetias perveni. Sane strenue, inquires. Ego vero magis incommode, qui & lutulenta via, & equo, quem scis, sella vero ea sum usus, quæ anum, atque totas interiores coxas mihi attrivit. Sub mediam vigiliam navim ad Mergaram conscendi; quem brevem in Urbem tractum remis non sine magno totius corporis, pedum vero maximo frigore, vix tandem confeci. Sero ad publicum hospitium [mei enim Abiosii Ravennam remigrant] utraque de via lassus appuli. Ubi ego pro loci ratione, & pro superioris diei labore nocte illa satis commode quievi. Postridie Mussurum adeo, qui, ut audivit a te nuncium esse cum literis, scalas ut ascenderem, jussit. Interea vero ille e cubiculo ad porticus januam mihi ob-

viam venit, qui, ut fit, antequam literas aperiret, ut valeres, ac quid rerum, amantissime quæsit. Recte, inquam, omnia. Ut vero tuas literas legit, eo me vultu, inque verbis, atque amplexibus accepit, quo ego facile cognoscerem, me a te illi ea de nota commendatum esse, qua commendari solent, qui vere amantur. Dicere non possem, quam Græcus homo, ac tantus Vir mecum humane se gesserit. Ut vero de te honorificentissime, & amantissime loqueretur, non puto te expectare, dum dicam. Sed omnia cumulavit, cum me recta ad eos misit, a quibus non disceffi: ad quem heri fui, ac, quid actum esset, narravi, gratiasque egi, quas potui maximas. Is contra mihi gratulatur, atque in reliquum, si quid accidat, in quo suo studio, atque opera mihi opus sit, id omne familiarissime pollicetur, tibi, ut suo nomine salutem plurimam adscriberem, iussit. Cui ego pro tanto erga me ejus animo respondi; non illum quidem apud ditem hominem, aut principem Virum suum officium & jam posuisse, & esse positurum, sed apud eum animum, qui ejus in perpetuum recordaretur. Itaque ab eo discedo. Sed redeo ad conditionem. Credo, eam mihi satis commodam futuram; et si nulla commodior, quam quo tempore tecum Aviani fui. Sed eo me consolor, quod tu quoque non semper es peregre permanurus; speroque propediem fore, ut in Urbem revertaris, ubi tua jucundissima, mihi, fructuosissima consuetudine frui possim. Interea in nostris studiis acquiescemus, in quibus consilium tuum sequar, ut in bonis Auctoribus tantum verser; cæteris, qui delectum verborum nullum habent, cæteros relinquens. Christophoro, atque Angelo Gabrieliis fratribus, ac Nicolao Stephanio salutem. Vale. Venetiis Id. Febr. MDXIII.

BARTHOLOMÆUS RICCIUS

Andree Navagerio S. D.

Se Venetiis esse significat, & memoria repetere, quæ sibi cum illo jucundissima acciderant. Summam ejusdem eruditionem, & doctrinam laudat, ipsiusque reditum in Urbem a se anxie expectari denuntiat.

✧ **E** Quidem, Navageri, Venetiis sum, ut ajunt, corpore, animo vero a te, atque ab isto nobilif-

lissimo comitatu abduci non possum. Vobiscum enim omnes istos vicos, ut præsens faciebam, sic absens assidua cogitatione lætissime obeo. In venationibus vero totus sum, sive lepores in aperta planitie insectandi, sive etiam per summa ista montium iuga capreæ sint dejiendæ. O cætera postea, quæ in sermonibus, sive de jocis, sive de literis agebantur! Nulla mihi umquam oblivio diem illum eripiet, cum ad amœnissimum collem illum deambularem, ego vero Maronem manu tenens nullum versum vel ad alterum verbum proferre possem, quin eum ipse excipiens totum librum memoriter absolveres; idemque in Horatio, Catullo, Tibullo faceres. Sed hoc fortasse cum multis; id quidem cum perpaucis, nisi tui est solius, quod tu ex iis Poetis & ad interiorem sensum, quæ sunt retrusa, atque abdita, erudite eruis, & ad optime imitandum omnia excipis: ut in illo tuo,

Si proprium hoc fueris, lævi de marmore tota,
& quæ sequuntur. Cujus loci sensus, aut ita est, ut tu explicas, aut nihil omnino. Ita de fama. Ita in eo:

Tibolus & assurgit, quibus & Rex ipse Phæneus.
Ita in cæteris. De imitatione vero tua Ecloga, Borgeus, Ceres, & Epigrammata omnia facile testantur. Quare ego diem illum non video, quo te in Urbem recipias, quando ego dicere non possum, quo ego ad vos redeam; quem postea quotidie adeam, atque aliquid semper percontans, numquam domum inanis revertar. Vale, ac comitibus salutem. Venetiis.

BARTHOLOMÆUS RICCIUS

Andræ Navagerio S. D.

Se a morbo non satis confirmatum esse admonet; orat tamen, ut de die certiore faciat, qui funeri Bartholomei Liviani Imperatoris constitutus est. Se enim velle ipsum orantem audire, ejusque actionem videre.

8. **E**Tŭ ex superiori morbo non satis confirmatus sum, qui me quadraginta dies graviter afflixit; quam tamen jam decem dies febris abiit, & brevissima via est ad Stephani; te in Bartholomæi Liviani Impe-

ratoris funere orantem audire volo. Oratio quidem in quantum, quod umquam legerim, delectavit, in qua nihil cum ad copiam, tum ad ornatum desideravi; actionem vero, quæ extrinsecus accedit, quæ una pars est de maximis non postrema, imo vero cui primas, cui secundas, cui tertias Demosthenes tribuebat, videre cupio. Hanc cum canora, ac clara voce, quamque in omnes partes apte commutes, tum ab omni corporis motu spero te optime comprobaturum. Quare te rogo, ut, qui dies isti funerali constitutus sit, mihi significes. Vale.

BARTHOLOMÆUS RICCIUS

Andræ Navagerio S. D.

Ejus Eclogam mittit a se descriptam, ut in ea corrigat, que mutavit, significatque, nullum exemplum ejusdem se passum esse describi, cum optime sciret, ei nondum, cui inscripta est, esse missum.

9. **M**itto tibi Eclogam tuam, quam mihi Aviani, ut scis, ex tua descripsi, ut quicquid in ea mutasti, ut tu heri mihi pollicitus es, id in ea pariter corrigeres. Cum Patavio rediero, eam ipse repetam. Non enim puto, te tam cito Romam discessurum, neque meam peregrinationem, quam tuam istam profectio- nem, fore diuturniorem. Si vero; eam Domitio dandam curabis. De Cornelio Feltrensi ita est, Eclogam illi recitavi, sed nullum exemplum neque illi, neque cuiquam descriptum est. Non enim tam ineptus sum, qui aliorum scripta tam temere publicassem, præsertim cum scirem, eam nondum ei, cui inscripta est, esse missam. Vale.

BARTHOLOMÆUS RICCIUS

Joanni Cornelio S. D.

Consolatur eum de proximo incendio, quod magnificentissimas ejus aedes absumpserat, ostenditque, eum minus ex eo detrimentum, quam retur, percepisse. Romanæ Urbis direptionem mirifice describit, epistolamque claudit subjiciens, animum, & oculos ab ædium incendio abducendos, & in Ariadnam uxorem, & quatuor filios, & totidem filias conjiciendos esse, ex quorum cum summis bonoribus, tum honestissimis liberis brevi summam, ac diuturnam voluptatem sibi percepturus.

10. **E**X iis, qui isthinc veniunt, te, quam tua animi magnitudo postulare videtur, acrius angi, atque acerbius sollicitari, audio. Quod si ita est, teque ejus detrimenti, ut arbitror, quod ex proximo incendio percepisti, nova aliqua, ac vehementior cogitatio in ista solitudine invasit, placuit, quid ex eo damni, multo, quam fortasse reris, minoris, feceris, tecum per literas percurrere, ut ego quanto illud tibi levius efficiam, ipse contra de tua ista solitudine, quæ te iniquius premit, tantum detrahas, atque diminuas. Magnificentissimas ædes, amplissimum Cornelie Familie domicilium, quas Georgius Pater cum quinque clarissimis filiis, & sorore Cypri Regina, omni dignitatis gradu cumulate illustres reddidisti, tibi tam subita incendii vi solo æquatas, permolestè fers. Supellectilis præterea magnam partem, pretiosarum mercium non parum, annonam fere totam, eamque uberrimam cum incendio, tum direptionibus male absumptam lamentaris. Addas etiam, si libet, quod Urbi Venetiis, quam usque eo Familia tua cum beneficiis, tum charitate semper est prosecuta, ut Georgius pater Cypri insulæ nobilissimo, atque amplissimo Regno eam adauxerit; Andreas autem Avi tui frater, pro eadem mori non dubitarit, quod huic, inquam, charissimæ Patriæ quasi lumen alterum in tuis ædibus ademptum esse videtur; addas licet, quæ quidem illi tanto ornamento fuere, quamdiu steterunt, quanto illa Orbi terrarum universo est & decori, & digni-

gnitati. Quæ omnia nisi magna, atque etiam latu gravia esse fatear, amens sum. Sed tibi tamen tanta esse non debent, quæ istam animi tui magnitudinem, qua cætera adversa pervincere soles, infringere; præsertim cum casus iste multas consolationes ad se magnopere levandum facile admittere possit. Nam, si tum ex aliorum miseriis, tum ex iis, quæ nobis ipsis multo graviora accidere poterant; miseriæ nostræ leviores fiunt, harum utraque haud parum tuus iste dolor sublevari potest. Continuo enim hoc ipsum, quod tibi accidit; ne quid aliud extrinsecus tibi male ominer; multo gravius, multoque horridius accidisset, si hæc ipsa calamitas illis diebus, quibus paulo ante Brixia cum fratre Francisco Cardinale omnes aberatis, injecta fuisset. Nam si, cum omnes aderatis, tam parum cum ab incendio, tum ab iis, qui diripiendi causa convenerant, rebus vestris profuistis, quid sperandum melius, si tam longe abfuissetis? si mulieres tantum tanta calamitas domi offendisset? Actum scilicet tum erat de universa Regia supellectili. Una flamma quicquid argenti facti, quicquid in pecunia, quicquid in nominibus habuissetis, impotenter abstulisset. Neque ii defuissent, qui vel ex ipsa flamma, quicquid possent, sibi eripere, atque auferre conarentur. Ut omittam, qui vobis gravissimus Brixia, ac subitus nuncius allatus esset; literas illas tristissimas a vestris uxoribus lachrimis scriptas, non commemorem; neque reditum ad Urbem vestrum curis omnibus oppressum vobis objiciam, ac tantum illud agam, in Urbem suam Cornelios pene hospites rediisse, quique paulo ante hospitio vel amplissimas Familias laxè accipere poterant, eos nunc anguste ad amicos, ac propinquos divertere coactos esse. Quæ omnia si vobis vitam non ademissent, certe ad primum in cinerem collapsæ domus aspectum mortui concidissetis, cum illarum ædium, Urbis instar, quas triduo ante florentissimas reliquissetis, nihil nisi fumum, ac ruinam offendissetis. Tantus enim subito dolor animum vestrum oppressisset, ut remedii nulla vi, nulla consolatione adhibita, quin is vos defereret, contineri potuisset. Affuistis omnes, atque ita firmi a vestro articulari morbo affuistis, ut, si nimis conflagentibus ædibus ullam opem asferre potuistis, certe rei tantum attulistis, ut præ illa altera, quæ vobis absentibus fuisset,

set, jactura hæc prope nulla haberi possit. Nam, quod ad domus nobilitatem attinet, quam nimis ægre ferre videris, nihil aliud dicam, quam quod vulgo tritum est, *domino domum, non autem dominum domo nobilitari*; præsertim cum multæ aliæ adhuc vobis supersint, quas foris locatis; quæ si non illis quidem pares sunt, nobiles tamen, atque in celeberrimis Urbis locis sunt positæ. Si vero honores spectemus, quibus domum tuam refertam esse dicebamus, horum nihil amissum est. Cornelie enim Familie splendor, atque gloria non ex amplissimis unarum ædium parietibus constat, sed ex præclaris ejus domi, forisque in suam, atque in Christianam Remp. rebus gestis elucet; ut nihil pertimescas, ne cum domus tuæ prolapsione tuorum quoque illustria facta prolapsa esse videantur, quæ Historiis omnibus excepta tamdiu in hominum auribus, atque sermonibus versabuntur, quamdiu Sol orbem suum versabit. Te præterea Patriæ dignitas movet, quæ in harum ruina non parum ornamenti ad aspiciendum amiserit. Diis gratias omnes agere debetis non mediocres, quod vobis est, unde eas multo etiam ampliores, ac magnificentiores brevi reficiatis; in quas etiam posteri vestri Principatus, ac multiplicatos Cardinalatus, atque etiam Summum Pontificatum feliciter inferre possint. Quod vero multa, & ampla supellex desiderata sit; neque hoc tantopere dolendum, quantum etiam lætandum est, quod pretiosior relicta est, atque unde viliores, cum voletis, commodissime comparetis. De annona pudet verbum facere, qui ex ea, quæ in vestris amplissimis villis superest, vel Oppida alere possetis. De mercibus autem quod non sine causa graviter angere videris, Cornelia navis Cyprii vestris pretiosis mercibus onusta, quæ plenius velis mox portus vestros intrabit, hunc dolorem vobis omnem facile abstergebit. Ut, quod ad damnum factum, multo id majus, ac gravius fieri potuisset; hoc vero, quod factum est, non ita tantum est, quin a vobis facile præstari possit. Jam vero, quod ab alienis calamitatibus in nostris miseriis remedii afferri solet, interdum haud leve est: quo uno solatio tu quoque ad istum tuum dolorem levandum haud parvo uti poteris, si tibi ante oculos aliquando proposueris, quibus hisce proximis annis universæ Italiæ amœnissimæ villæ, nobilissimæ Oppida,

pida, Urbs denique ipsa Roma cum armis, tum flammarum ardoribus & vexata, & concremata est: in cuius direptione nihil summæ injuriæ, nihil turpitudinis, nihil sceleris, quod barbaro hosti libuerit, non admisum est. Pater, rebus omnibus amissis, ex vinculis hinc sanctissimi conjugii violatam copulam, inde impubi adhuc filiæ vim nefarie illatam, inspectare cogebatur; parentes in liberum, liberi in parentum miseris cruciatibus separatim a proprio summo dolore afficiebantur; virgines vero sacræ eo loco luxuriæ sunt habitæ, quo si prostitutam vitam perpetuo egissent, fœdiora passæ non essent. In sacratissimis Deorum omnium locis fœda omnia admittebantur. Cum quibus vero fortuna melius egisset, his pedibus per difficillima, atque invia loca, per noctis horrores fame, siti, vigiliis enectis, per multa millia passuum ad alienos tandem rerum omnium egenis deveniendum erat. Res sacræ diripiebantur, privatæ auferebantur, publicæ deformabantur, magni vita redimebatur, quæ iterum esset redimenda; omnia fana, profana promiscua erant. At ego, quæ jam præterierunt, commemoro: quasi vero nunc prope totus Orbis terræ ab ortu Solis ad occasum crudelissimo bello non exardeat, cum terra, marique inter Christianam Rempub. & Turcarum Regem bellum omnium bellorum atrocissimum, ac maxime periculosum geratur, unde quotidie hinc a mari, inde a terra maximi terrores nuncientur. Quo quidem bello, non uter regnet, contenditur, quod neque satis tutum arbitrarer, sed fides Christiana, [quid enim gravius metui potest?] in maximum periculum adducitur; in quo animi quoque bona, non tantum corporis salus peragitur. Quorum duorum, quæ ad te consolandum sumpsimus, alterum non parvam doloris medicinam asferre, alterum summam etiam commiserationem commovere poterit. Quibus tamen ea quoque non postrema consolatio accedit, quod hoc calamitatis magis in fortunis, quam in liberis, ac rebus carioribus accidit. Sed omnium tamen ea consolatio maxima est, quam ipse tibi adhibere potes, si ab isto tuo mœrore animum, atque ab ædium incendio oculos abducens, eos in Ariadnam uxorem tuam primariam feminam, atque in quatuor ingenuissimos, atque ingeniosissimos filios, ac totidem filias conjeceris, ex quorum cum



cum summis honoribus, tum etiam honestissimis liberis brevi summam, ac diuturnam es voluptatem percepturus. Vale.

BARTHOLOMÆUS RICCIUS

Joanni Cornelio S. D.

De amantissimis ipsius litteris ad Principem suum scriptis gratias agit, ejusque in se officiorum eam naturam esse ait, ut posterius priore sit semper illustrius. Dolet, Apparatum suum nondum Vincentiam pervenisse, qui in tota Germania saepius publice descriptus fuerat; & si quid letius Ferrariae acciderit, se de eo eum certioorem statim facturum pollicetur.

II. Quoquo me verto, amoris erga me tui vestigia, ut proxime. Nam cum ego eas literas, quas Abiosio nostro tibi reddendas scripseram, prorsus periisse existimarem, ecce tibi ab utque Mutina, quantum apud te valuissent, nobis allatum. Inde enim mihi earum literarum, quas Principi nostro ex meis scripsisti, missum est exemplum, ut, te benevolentiae erga me tuae prius cumulatissime satisfecisse, quam meas literas accepisse, intelligerem. At quam nostri amantissimas literas tuas? quæ profecto a carissimo patre neque fideliores, neque ponderosiores expectarentur. Ex quo tuo tam illustri in me officio [etsi mihi novi nihil accidit, qui de te omnia cum mea in te summa observantia, tum tua peringenua natura sperare cogor] eam voluptatem cepi, qua majorem nullam accipere potuissem, etiam si ea ab eo homine, a quo nihil umquam expectassem, mihi venisset. Sed ea tuorum in me officiorum est natura, ut posterius priore sit semper illustrius. Itaque etiam novæ semper aliquid voluptatis afferat, necesse est. Quid vero tuae literæ profecerint, nihil etiamdum intelligebam. Quod vero ad Trissinum; id mihi cum eo homine evenisse video, quod Ciceroni evenit cum quodam Cive suo, qui peregre post multos dies domum rediens, ab eo interrogatus, ecquidnam Roma novi afferret? frontem contraxit, molesteque tulit, tot dierum discessum ab Urbe suum cuiquam ignorari potuisse. E-

go valde doleo, APPARATUM meum, quem trans Alpes usque alis gryphiis pervolitare, atque in tota Germania sæpius publice descriptum esse sciebam, Vincetiam usque non pervenisse, certe Patavium ad Bembum, atque ad Bonamicium pervenit. Sed ad rem redeo. Cum aliquid lætius Ferraria audietur, quando, id te scire avere, certo scio, te mea statim voluptate impertiari. Vale. MDXXXVIII.

BARTHOLOMÆUS RICCIUS

Augustino Abiofio S. D.

De locorum magno intervallo inter se posito queritur, quo fit, ut suavissimis sermonibus, & familiari consuetudine uti invicem non possint. Villulam suam, ac prædiolum laudat, ubi fructuum genus omne suppetit, ceteraque ad victum necessaria propter Oppidi propinquitatem facile parantur. Civium in se summam observantiam extollit, si-bique semper in mente habere doctissimos, probatissimos, atque integerrimos Viros, cum quibus honestissime vitam traducebat, significat.

12. **T**Uæ literæ mihi jucundissimæ fuerunt, nisi quod in iis extremis fuit, ut tui memoriam nunc longissime gentium & amice, ac benevole præstarem, quæ me res non solum graviter, sed multis etiam modis male affecit. Id enim, Abiofi, me non leviter torsit, quod ullo cum locorum, tum etiam temporis spatio tui jucundissimam memoriam mihi interceptam iri, subveritus sis, qui quam fraterne a me tot annos amatus sis, plane perspectum habeas. Ex eo vero, quod locorum intervalli facta est mentio, tantus mihi accessit dolor, ut major accedere non posset. Id enim ex me antea non animadverteram. Nam cum postremo ego Venetiis, tu vero Patavii ageremus, solebam te, aut etiam de te, interdum in alterum mensem, neque videre, neque quicquam habere. Quod quidem temporis spatium nunc quoque ex quo neque te vidi, neque tuas literas legi, cum mihi nondum plane præterisset, etiam si multo longius aberam; eo tamen de locorum intervallo nihil admonebar. Sed tu ea literarum tuarum parte,

te, quod mihi absenti summo solatio accidebat, eripui-
sti, ac me prorsus novis cogitationibus objecisti. Narro
tibi plane, idque in aurem, ne cæteri, quos id audire
maxime delectaret, sentiant. Si vestri trium, aut qua-
tuor suavissimorum amicorum, ac nobilissimæ Urbis de-
siderium tam moleste me laturum putassem, quidvis a-
liud potius, quam de meo discessu cogitarem; atque
haud scio, si id, ut cœpit, perget in dies majus fieri,
an me de improvviso Marius tibi ex summis scalis adef-
se nuntiet. Cave tamen quicquam nobis ejusmodi in Pa-
tria accidisse suspiceris, cur inde vix secundo mense pro-
perem emigrare. Villulam mihi statim mehercule bellu-
lam exornavi, quæ ab Oppido lapide altero, a fluvio
quingentis tantum passibus distat. Prædiolum vero cum
fructuum omne genus, tum vini, atque frumenti quan-
tum ad victum fatis est, fideliter reddit; cum neque ex
areola aviculæ per totam ætatem, aut ova ex nidulis,
atque ex ovibus lac recens, caseoli cujusque generis no-
bis desint. Si Oppidum respicias, nosti, quam ex uni-
verso Flaminiz agro rerum omnium copiam coloni ad
mercatum importent, quamque apud nos pervili pretio
veneant omnia. Carne vero cujusque generis tantum ab-
est, ut quicquam indigeamus, ut finitimæ etiam Civil-
tates ex Lugienfi mercatu eam sibi octavo quoque die
cum plurimam, tum etiam optimam comparent; piscis
vero Ravenna si satietatem omnino non tollit, jejunia
tamen levat; quotidie vero ex paludibus piscatores præ-
ter optima salsamenta, recentem abunde suppeditant.
Hoc vero, quod ad familiam alendam pertinet. Quan-
tum autem me mei Cives diligant, dici non posset.
Quid igitur inquires? aut unde tibi tam repente consilii
ratio commutata est? Nihil harum, inquam, rerum me
conturbat, neque quod apud Cives meos gratiosior esse
vel optem, qui me summa omnes observantia prose-
quuntur; sed cum ego a meorum Corneliorum consue-
tudine me prorsus sejunctum video, ac ejus Urbis, a
qua mihi cumulate tot honestæ voluptates profectæ
sunt, perpetuo mihi carendum esse considero, si possem
mori, penas tum sensissem omnes; tametsi tanta, tam-
que jucunda doctissimorum hominum copia me carere
haudquaquam in postrema causâ hujusce mei tanti desi-
derii connumerandum fuit. Hærent enim mihi in mente
meus

facere solebat, qui Camillum filium in literis Græcis, atque in Dialectica erudiebat. Hic nunc non doctiorem Philosophum Madio nostro quærens, sed meliorem conditionem sequens, se Patavium contulit. Hunc, ut in amicitiam tuam recipias, volo, atque quicquid ei opus erit, id omne meo nomine libentissime commodas. Polliceor tibi [etsi hoc tacere poteram] te in hujus adolescentis amicitia plurimum auctum esse, meumque hoc officium in iis, quæ a Riccio tuo tibi proficisci solent, esse repositurum. Nam præter bonas literas, quas optime callet, & Græcas, & Latinas, ea natura est adolescens, atque in amando integritate, qua nos sumus, quamque in aliis maxime cupimus. Vale. Spero Speronio salutem.

BARTHOLOMÆUS RICCIUS

Augustino Abiofio S. D.

Certioorem facit, doletque, Camilli filii faciem totam corruptam, atque ignea vi sædatam, dum plumbum funderet ad pueriles nummos conflandos.

15. **M**E miserum, Abiofi, me semper miserum, Abiofi. Oris Camilli venustus, decor, pulchritudo, quam nosti, nulla est, tota corrupta, atque ignea vi sædata est. O filium in æternum infelicem! O filio parentem infeliciorem! Oculi non sunt adempti; cætera vi ignea sunt contracta, atque combusta. Plumbum miser puer fundebat ad nummulos pueriles conflandos; cum vero formæ paulo ardentius concaluissent, illas aqua imprudens puer immerfit, atque iterum liquidum plumbum in illas infudit: jam scis, quod sequitur. Plumbum in ejus os totum est rejectum. O vultum, o faciem, o os, o filium Camillum! Præ lacrymis plura non possum. Vale.

BARTHOLOMÆUS RICCIUS

Augustino Abioſio S. D.

Casu ſuo , caſu amici dolet , cujus filius incolumis , ac læte concuſans , ut pueri faciunt , ita in calicem vitreum fronte offenderat , ut , eo perfracto , alterius oculi uſus ablaſus ſit , alterius vero in periculo verſetur .

16. **N**on eo de filii mei calamitate ad te ſcripſeram , ut tu de tui majore mihi ſignificares. O fatum! O Dii ſuperi! Quid enim infelicius? Incolumem, ac læte concuſantem, ut faciunt pueri, ita in calicem vitreum fronte offendere puerum, ut eo perfracto alterius oculi uſus auferatur, alterius in periculo verſetur? O hominum conditionem, ut omnibus periculis, omnibus infortuniis es propoſita! Doleo caſu meo, doleo tuo: totus doleo, atque ita, ut novo malo vix locus vacuus in me detur. In ore, in oculis ingens plaga accepta eſt. Crus frangere durum eſt; reſtitui tamen poteſt. Oculorum lumine orbatō nulla arte lumen comparatur. Os igne combuſtum nullo fuco, nullis medicamentis reſtituitur. Quando oculos ego in mei os, tu vero in tui filii oculos conjiiciemus, nihil eſt, quin is viſus eodem tempore cor nobis tranſſodiat; ut ſatius nobis eſſe videatur, ſi cætera ſint paria, aut mori, aut alio commigrare, ne noſtra vulnera, ſi oculi augent dolorem, in oculis ſemper habeamus. Afferunt amici conſolationem. Ego eo miſerior ſum, quod nullam accipio, atque dolore conficior, cui tamdiu obediam, quamdiu aut illi me, aut mihi illum mors eripuerit. Nam quæ aliis conſolatio mali ex oblivione afferri ſolet, ea mihi tota erepta eſt, cui mane, vesp̄ri, diē, noctu, in urbe, ruri ante oculos mea miſeria obverſatur, ut perpetuo miſer ſiam. Vale.

BARTHOLOMÆUS RICCIUS

Augustino Abiofio S. D.

Significat, filii Camilli cutem, qui sibi os combusserat, ita cum ea, quæ renovatur, coire, planamque fieri, ut pertenuis ignis vestigium appareat. Oportet, ut parem nuntium de filio suo mittat, certioresque faciat, ei lumen rediisse.

17. **Q**uadragesimus dies agitur, ut ad te antea scripti, cum Camillus os sibi combussit. Primis diebus cave quicquam miserius videris; id totum corrosum apparebat, neque cui cutis superinduci posset, quæ non rugas imitaretur, spes ulla erat. Nunc cum priori, quæ renovatur, ita convenit, ita cum ea coit, ita plana est, ut si nullum, certe pertenuis ignis vestigium sit futurum. Vere magnificus medicus, cum sæpe alias, tum in hoc non solum magnificus, sed etiam mirificus fuit. Utinam parem nuntium de tuo mihi mittere posses; ei lumen rediisse, quando oculus nihil offensus est. Sed ut ut sit, æquo tamen ferendum est animo. Vale.

BARTHOLOMÆUS RICCIUS

Augustino Abiofio S. D.

Cæsarem Cambianum adolescentem ingenuum Juri Civili operam daturum sibi ab Hectore Cochio commendatum commendat, ut ei in consilio, et re, si opus fuerit, praesto sit.

18. **H**ector Mirolus iis moribus, studiis, atque ea animi integritate præditus, qua noster Hektor Cochius erat, me in primis observat, atque colit, quique apud fratrem suum Prætorem nostrum in amicorum causis mihi numquam defuit; quibus rationibus ego quoque contra nihil habeo, quod ejus causa non libenter nolim. Hic me rogat, ut si quem isthic ejus generis, qualis es tu, amicum habeam, ei Cæsarem Cambian-

bianium adolescentem ingenuum, Civem suum, & præter Civitatis necessitudinem secum summa etiam familiaritate conjunctum; commendare velim, qui, si quid ei opus erit; est enim novus, ac longe gentium isthuc profectus, Juri Civili operam daturus; habeat, ad quem tuto confugere, eumque de re sua fideliter consulere possit. Tibi igitur illum ita commendo, quemadmodum me debere facere intelligis. Continuo illum eo vultu, atque iis verbis accipies, quibus ex veteribus amicis quempiam faceres. Probe nosti, Abiosi, qui novi sunt in alienis urbibus, quam multis de rebus sint admonendi; qui vero domo etiam longe absunt, quam interdum juvandi; quorum utrumque si optimo adolescenti præstiteris, præter quam quod mihi gratissimum feceris, Hectorem, ac Cambianium ipsum ita tibi obstrinxeris, ut cum omnem gratiam tibi retulerint, semper tamen sint eam multo majorem habituri. Vale.

BARTHOLOMÆUS RICCIUS

Augustino Abioſio S. P. D.

Consolatur de morte uxoris, ostenditque, neque in nostrorum, neque in nostra etiam ipsorum morte magnopere dolendum esse, cum animi non extinguantur, sed loci tantummodo commutatio fiat, atque ejus loci, ubi summo bono perpetuo sumus perfruituri. Itaque in fine Epistolæ quemlibet hortatur, ut ita ad eum discessum se comparet, ut nihil lætius faciat, nihil cupidius expetat.

19. **U**T primum nobis rumor attulit, uxorem tibi decessisse, vehementer perculsus sum; ut vero is certiori nuntio comprobatus est, haud humane ingemui. Continuo enim una cum ejus desiderio, quam unice dilexisti, filiorum copiam quasi omnium infantium, quos tibi cum reliqua totius familiæ cura probe curandos reliquerat, mihi succurrit, non ut diffiderem, quin id optime præstare posses, sed si quid. Sed nolo tibi gravius ominari. Verum, ne is mihi tamen altius, atque diuturnius insideret dolor, ut alio tempore fecisset, atque etiam in tali alias effecit casu, id, quod dicam, prohibuit omnino. Forte tum duos Tusculanarum quæ-

stionum primos libros totidem diebus, quot ipsi scripti erant, absolveram. Pergebam reliquos. Nosti quæ præcepta in iis libris cum ad dolorem, tum ad mortem ipsam contemnendam tradantur. Hæc ego ita haueram, itaque mihi ea ipsa in animo hæserant, ut altius dolor in eum neque penetrare, neque diutius commorari posset. Utinam recentis doloris tui acerrimi morsus tibi concederent, ut inde ipse quoque hanc ad te medicinam admittere posses, quod tamen, ut experiaris, neque importunum erit, & ego id tibi magnopere suadeo. Omnibus enim rationibus facile vinceris, ne tuam quoque mortem tibi, cum venerit, modo ad eam ea, qua facis, recta vivendi ratione ipse venias, quicquam dolendam existimes. In tuorum vero etiam acerbissima perfrendenda multo fortior fies, cum videris præclaros Viros, quos magis, quam sœmellas, atque aniculas, imitari debemus, in sua etiam ipsorum morte se fortissimos Viros præstitisse. Et profecto nihil est, quod aut in nostrorum, aut in nostra etiam ipsorum morte tantopere doleamus. Nam si nostra quicquam dolemus, inique facimus, qui nos ex turbulentissimæ vitæ maximis tempestatibus excedere, atque in tranquillissimum portum pervenire, dolemus. Si vero nostrorum nos dolor angit, idque nostro facimus beneficio, ut qui eorum desiderium lugeamus, non eorum amantes, sed nostri commodi, quo nihil turpius esse potest, cupidi sumus. Si vero quicquam mali iis in morte accidisse veremur, Apollinis etiam iudicio eo metu liberati sumus. Hic enim cum eis, qui sibi Templum Delphis egregie exædificassent, sui que operis mercedem repeterent, in tertium diem illis eam se daturum respondit: quo die postea inventi sunt mortui: ut Dei testimonio mors summum præmium sit homini iudicata. Non enim solum ingratus, sed etiam impius Deus fuisset, si pro tanto munere tantum scelus admisisset. Quam sententiam quidam populi sequebantur, qui quo die quis sibi nasceretur, eum lacrymis; cum vero moreretur, lætitia prosequerentur. Id quod Euripides in Ctesiphonte his versibus, quos Cicero hoc modo Latinos fecit, testatus est:

*Nam nos docebat cætus celebrantes domum
Lugere, ubi esset aliquis in lucem editus,
Humana vite varia reputantes mala,*

Omnes

Omnes amicos laude & lætitia exequi.

Cui illud Crantoris optime convenit, cum dicebat :

Ignavis homines in vita mentibus errant.

Euthinous potitur fatorum munere læto.

Sic fuit utilius finiri, ipsique, tibi que.

Quid vero ille, qui hoc versiculo quasi rogabat, ne se quisquam mortuum lacrymis prosequeretur cum ait?

Nemo me lacrymis decoret, nec funera fletu

Faxit. Hoc autem ii homines, qui animam una cum corpore extingui putabant. Quanto vero nos magis id tenere debemus, qui prope certi sumus, supremum illum diem non animorum extinctionem, sed commutationem loci asserre, atque ejus loci, ubi summo bono perpetuo sumus perfruituri? ut tantum absit, ut eum diem quicquam abhorreamus, ut illum etiam mire optare, atque, si fas esset, vi aliqua nobis repræsentare deberemus. At perfecti non sumus homines, sed qui iis tantum ducimur, quæ videmus, ea vero, de quibus nulla certior ratio habeatur, perfugientes. At ratio, ut propius ad eam perfectionem accedamus, nos admonet, atque etiam adjuvat. Christus vero, cum post suum in Cælum ascensum Discipulos divino spiritu opplevit, omnem dubitationem aliter fieri posse nobis abstulit, quem si audiamus, atque ejus mortem intueamur [præterquam quod id natura omnibus accidat] neque malum existimare, neque ut præcipuum, dolere debemus. Ita nos in hoc ad eum discessu comparabimus, ut nihil lætius faciamus, nihil cupidius expetamus. Vale tu modo, atque hac instituendi ratione filios institue, ut cum eis quoque quid tale a suis, atque adeo a se ipsis acciderit, quo levius id perferant, a te parente habeant optimo. Vale.

BARTHOLOMÆUS RICCIUS

Augustino Abiofio S. D.

De reditu Principis sui ex Gallia sibi jucundissimo certior rem facit, cujus in Urbem ingressum inter Civium lætos clamores, campanarumque lætissimos rinnitus diligenter describis, seque Aesonis instar ex sexagenario, & quinarvio vigenarium factum præ lætitia videri significat.

20. **G** Ratulare mihi, Abiofi, idque quantum umquam alias ulli amico fecisti. Princeps meus ex

Gallia rediit, hoc est, omnis præsentis vitæ meæ jucunditas mihi rediit, & futura etiam in multos annos prorogata est. O mihi felicem sine numero diem! Nam totum illud tempus, quo is ad Regem bello illo difficillimo inter horrida arma, inter confertissimas fortissimorum hostium acies versabatur, quæ non pertinui? quid adversi in mentem non venit? ut nunc etiam cogitans, atque in tuto positus, totus horrescam. Sed lætius agamus. Tandem post biennium, ac quatuor alterius anni menses domum rediit. Dii boni, quæ omnium Civium lætitia, qui læti clamores, qui omnium campanarum [ut vulgo] crebri, ac lætissimi tinnitus! Plena porta ad Angelorum omnis Civitas illi obviam in tota suburbana prata illa Regia exivit. Patruus duo Hippolytus Cardinalis, & Franciscus magno equitum comitatu ad Lacum obscurum illum exceperunt. Frater Aloysius etiam aliquot millia ultra fines patrios illi occurrit, cum Alphonfus jam multo ante ad lacum Lemani per dispositos equos illi obviam advolasset. Nosti ad Angelorum ut longa, ut lata via est: cave granum milii [ut dicunt] ea præ hominum multitudine capere posset. Ex fenestris reliqua Matronarum nobilitas extabat. Parietum, viarum ipsarum, urbis lapides lætitia exultabant. Ita frequentissimo populo clausis omnibus tabernis, in arcem ad Patrem ducitur. Qui complexus [nam verba præ lætitia utrique longius intercepta sunt] hinc patris, inde filii, ne expecta, dum dicam. Ipse, qui pater es, conjicito. Mater ac sorores reliquæ erant, ad quas adiretur. Ad eas descendit. Hinc a matre, inde sororibus Regiis Principibus complexus tenetur. Sed hæc aliorum lætitia est. Redeo ad me. Equidem, Abiosi, id, quod de Æsone dicunt, ex sexagenario, & quinario vigenarius factus videor. Cum illa enim summa lætitia vires mihi integriores, atque fortiores rediisse videntur. Et profecto ut mærorum hominem conficit, ita lætitia illum, vel graviter affectum, diutius sustinet. His accedit, quod amicis meis, quæ una re nihil lætius facio, si quibus id usus erit apud eum, prodesse non parum potero, atque per eum apud Patrem Principem haud etiam minimum, quorum hoc antea perparum erat; illud prorsus nihil. Quo uno meo tanto bono, præsertim hac mea senectute, Deo Optimo Maximo, cui omnia debeo, immortales gratias, quando

do vix hoc cum illo usurpari potest, ago; atque id in eo beneficii loco habeo, quo majori nihil habere possem. Quare ipse amice facies, si eo, quantum umquam alias, aut mihi ipsi, aut alii amico fecisti, amicissime gratulabere. Vale.

BARTHOLOMÆUS RICCIUS

Augustino Abioſio S. D.

De honesta repulſa in Magiſtratu petendo nihil eſſe dolendum ſignificat. Filium Camillum Juri Civili operam dantem ad eum mittit, rogatque, ut ei conſilio, favore, aut alia re qualibet præſto ſit, ſtatimque de loco provideat apud eorum quempiam, qui in ſingulos mēſes conſtituta certa pecunia hoſpites alunt, ut de viſtu nihil ei curandum ſit, totuſque in ſua ſtudia liberius poſſit incumbere.

21. **Æ** Quius equidem erat, ut tibi nunc novam dignitatem gratularer, quemadmodum paulo ante cariffimæ uxoris tuæ mortem dolueram. Sed multa petitioni tuæ adverſata ſunt; in primis autem competitoris tui Patria, quæ cum optime de re iſta publica merita, neque jam multos annos ulla dignitate cohoneſtata eſſet, hæc ea ratione optimo illi Viro, ut ei gratificaretur, hanc provinciam decrevit. Tametſi is quoque Vir iis virtutibus præditus eſt, cui omnes Magiſtratus rectiſſime committi poſſent, tibiſque prope major laus fuit ab eo uno illo ſuffragio ſuperari, quam quibus multis tu cæteros ſuperavi. Quare ſi nihil eſt, quod tibi gratuler, neque tamen contra eſt, quod iſta tua tam honeſta repulſa mihi doleam. Sed hæc acta ſunt. Jam vero, quod inſtat, agatur. Camillus filius jam duos annos Juri Civili operam dat, idque in Patria, ſed mire cupit aliquot annos iſthic cum Doctorem, tum Urbis celebritate in iis ſtudiis ponere; quod cum me ſæpius rogaret, numquam tamen impetravit. Nam cum ego eum adoleſcentem viderem; eſt enim duo de viginti annos natus; decrevi tamdiu eum mecum habere, quamdiu ejus inconſulta adoleſcentia id me facere cogeret. Nunc vero cum importuni hujusce belli cauſſa hic omnes A-

cædemiz occlusæ sint , neque privatim quisquam doceat , isque in sua sententia firmius persistet , manus mihi danda est. Ex duabus enim rationibus , quas potissimas habebam , potior mihi erepta est : quæ vero restat , in multis hujus similibus comprobatur . qui adolescentes vel longissime gentium in ejus generis studia a parentibus suis mittuntur. Sed cum ego te , me alterum isthic habeam , hoc ei libentius , atque multo securius concedo. Certo enim scio , te illi , qui ego tuis essem , mei loco esse futurum , hoc est , qui neque consilio , neque favore , neque quaque re alia quicquam sis ei defuturus . Hunc igitur tibi mitto ; cui continuo de loco providebis , atque apud eorum quempiam , qui in singulos menses constituta certa pecunia hospites alunt ; ut de victu nihil ei curandum sit , totusque in sua studia liberius incumbere possit. Vale. Ferrariz XII. Cal. Novembris MDLVII.

BARTHOLOMÆUS RICCIUS

Augustino Abiofio S. D.

Se juxta illud , qui diu vivit multa , quæ non vult , videt , jam septuagenarium multis tempestatibus agitatum fuisse significat , sed amicorum præcipue morte gravius affectum , nunc vero in Abiofii interitu tanto vulnere laesum , ut illud numquam speret amplius coiturum , in cujus laudes mirifice excurrit , profizeturque , eum quidem suo fato sibi eripi potuisse , ejus vero gratissimam memoriam nullo modo eripi posse , idque in ejus liberis amandis se comprobaturum pollicetur.

22. **U**T vere , Abiofi , nimisque ille vere dixit , qui dixit ; *qui diu vivit , multa , quæ non vult , videt* , ut ego jam septuagenarius , non equidem ut Priamus , multas meorum cædes , funera , Urbis excidium , atque incendium vidi , tametsi mea quoque cymba in suo parvo lacu non levioribus tempestatibus agitata est. Sed amicorum , eorumque probatissimorum Virorum morte gravius affici non potui , qui in uno Hectore Cochio , qui unus omnium mihi primus ereptus est , primum non leve vulnus accepi ; post hunc in Flaminio ; dein-

deinceps in Masejo, Amasejo, Bonamicio, Corradio, Braschio; nunc vero in Abioſio nostro id ita commotum est, ut numquam sperem amplius coiturum: aut quia familiaris, ut plane ſcis, magnam vitæ meæ partem cum illo egerim, quique mihi non tam prænomine, quam etiam animo, ac voluntate ſemper conjunctiſſimus fuit: aut quia poſtremi ictus, ut qui arborem dejiciunt, quam primi, gravioreſ eſſe ſolent. O Abioſi, o mi Abioſi, quem ego iſthinc uſque in meo aliquo graviſſimo morbo huc accerſiſſem, ut divina illa tua medendi arte mihi priſtinam valetudinem reddereſ, ipſe tibi in tuo præſto aſſeſſe nequiviſti, ac, quæ multis ſæpius proſuit, ea tibi ipſi ars tua nullam opem aſſerre potuit. Ut ſi etiam non tua cauſſa [ut de ætatis ratione nihil agam, qui nondum admodum ſenex eras] Dii te multo diutius in terris relinquere nolebant, ſaltem id aliorum ſaluti, qui tecum deceſſiſſe videntur, omnino concedere potuiſſent; ut communi etiam damno in illo accepto mihi non ſit levius dolendum. Doleo itaque & meo præcipuo, & tuo proprio, & cæterorum percepto ex ejus interitu incommodo. Sed amicitia vis, ac ſuaviſſimæ conſuetudinis recordatio me magis movet. Hujus enim deſiderio omnia commoda ut cedant, neceſſe eſt. Sed in hoc meo dolore eum ita mortuum amabo, ut vivum facere conſuevi. Potuit enim iſ mihi ſuo fato eripi, ejus vero gratiſſima memoria eripi non poteſt. Id quod in ejus liberis amandis comprobabo, quibus ego non ſcribo, quando nihil habeo, quod in tanto mœrore iis conſolationis aſſeram; verum tu meo nomine illis omnem meam operam, omne meum ſtudium, quoties id eis uſu veniat, fideliter polliceberis, quibus ego omnia, quam parenti faciebam, ſum æque præſtaturus. Vale.

BARTHOLOMÆUS RICCIUS

Auguſtino Abioſio Bartholomæi Filio S. D.

Certiorẽ facis, ſe ad Chriſti aſcenſum Venetias venturum, rogatque, ut ſibi, & Camillo filio cubile comparet.

23. **S**I tu, & parentes, & fratres, & cariſſima uxor tua valetis, bene eſt, ego cum mea familiola
fatis

satis belle habeo. Hoc satis esse posset ; sed illud addo , ut ad proximum Christi ascensum mihi , ac Camillo filio cubile compares ; nam apud te sumus hoc anno habitaturi ; ne pater tuus semper meos Cornelios execrétur. Sed cum ego melius cogito , anguste olim habitabatis ; quid vero nunc , cum secunda nova nupta , Valerii fratris uxor accessit ? Vereor , ne mihi ad meos Cornelios redeundum sit ; sed ipse videris. Hæc quamprimum , ac , fideliter , ut Abiofio reddantur , diligentissime providebis. Vale , atque omnibus salutem .

BARTHOLOMÆUS RICCIUS

Augustino Abiofio Bartholomæi Filio S. D.

Cum ob importunam pestilentie vim celeberrimus Venetiarum mercatus sublatus sit , propterea Venetias accedendi causam sibi sublata esse significat. Hortatur , ut cum cæteris medicis eam ex Urbe ejiciat , & Bisantium impellat , aut alio quovis trans maria omnia exportandam jubeat , ut saltem sub discipulorum conventum , cum Camillum filium Patavium ducet , sine ullo metu una esse possint .

24. **D** Ii tantum malum dent isti pestilentie , quantum ipsa dat populis & mortis , & doloris , quæ mihi vestrum omnium conspectum abstulit. Constituera enim , ut ad te antea scripseram , ad istum Christi in Cælum ascensum tecum , atque cum parentibus tuis esse octo illos dies ipsos , sed cum ob importunam istam pestilentie vim celeberrimus mercatus sublatus sit , ob eandem causam isthuc accedendi causa mihi sublata est. Tamen si tu nihil ad meas illas literas , quibus mihi hospitium condixeram. Credo , hospitem tibi non satis probatum esse , quem piscium istorum maximum helluonem noras , cuique in vini ratione numquam satis sit ; etsi numquam melius , atque ad meum stomachum , quam apud vos bibi. Sed illa , illa suavia colloquia ad mensam , in deambulando , in sedendo , in via , ad librarios , ad medicos nostros Superchios , Marocios , quam omnia jucunda ? cum quibus , si me amas , quando hanc artem optime tenetis , istam malam
be-

bestiam ex Urbe ejicite, expellite, purgate nobilissimam Civitatem, Bisantium illam, impellite, aut etiam quo malit, trans maria omnia exportandam jubete; ut, si non ad constitutum diem una esse potuimus, saltem sub discipulorum conventum, cum Camillum filium Patavium ducam, id sine ullo metu facere possimus. Vale.

BARTHOLOMÆUS RICCIUS

Pierio Valeriano S. D.

Gratias agit de ejus opere elegantissimis versibus scripto, quod ipse domum usque tulerat. Librum suum de Imitatione ad ipsum mittit, in quo si quid erit, quod ipsi non improbetur, sibi gratissimum facturum ait, si se per litteras certiores fecerit.

25. **E**odem tempore me & summa voluptate, & dolore minime levi affecisti. Voluptate, cum domum usque opus tuum elegantissimis versibus scriptum dono ipse tulisti. Quid enim mihi gratius accidere potuit, quam ut a tanto Viro tam familiariter mecum ageretur? Dolore, quod per illud tempus in Urbe non essem, qui te, ut dignus eras, acciperem, ac suavissimis tuis sermonibus multis per horam illam de rebus perfrui possem. Sed hujus damnum in tuis versibus perlegendis mihi magna ex parte resarciam. Quod vero voluptatis accepi, quoties istius humanissimi facti tui in mentem veniet, veniet autem cum ex ipsius virtute, tum ex libri lectione sæpius, toties renovabitur, mihi que auctior fiet. Utinam modo quid ego quoque haberem, quo tibi contra gratiam aliquam referrem. Nam in hoc de Imitatione, quem librum tibi mitto, non mihi satisfacio. Vellem amplius quiddam, teque tam præstanti Viro dignum mittere posse. Malui tamen ex hac parva relata gratia grati animi erga te mei significationem aliquam facere, quam ingratus in nulla videri: in quo tamen si quid erit, quod tibi haud improbetur, non prorsus in referenda gratia frustra fuisse valde lætabor. Quod si accadat, mihi gratissimum feceris, si me per litteras certiores feceris. Vale.

BAR-

satis belle habeo. Hoc satis esse posset ; sed illud addo , ut ad proximum Christi ascensum mihi , ac Camillo filio cubile compares ; nam apud te sumus hoc anno habitaturi ; ne pater tuus semper meos Cornelios excreetur. Sed cum ego melius cogito , anguste olim habitabatis ; quid vero nunc , cum secunda nova nupta , Valerii fratris uxor accessit ? Vereor , ne mihi ad meos Cornelios redeundum sit ; sed ipse videris. Hæc quamprimum , ac , fideliter , ut Abiofio reddantur , diligentissime providebis. Vale , atque omnibus salutem .

BARTHOLOMÆUS RICCIUS

Augustino Abiofio Bartholomæi Filio S. D.

Cum ob importunam pestilentiae vim celeberrimus Venetiarum mercatus sublatuſ sit , propterea Venetias accedendi causſam ſibi ſublataſ eſſe ſignificat . Hortatur , ut cum cæteris medicis eam ex Urbe ejiciat , & Biſantium impellat , aut alio quovis trans maria omnia exportandam jubeat , ut ſaltem ſub diſcipulorum conventum , cum Camilluſ filiuſ Patavium ducet , ſine ullo metu una eſſe poſſint .

24. **D** Li tantum malum dent iſti peſtilentiae , quantum ipſa dat populis & mortis , & doloris , quæ mihi veſtrum omnium conſpectum abſtulit. Conſtitueram enim , ut ad te antea ſcripſeram , ad iſtum Chriſti in Cælum aſcenſum tecum , atque cum parentibus tuis eſſe octo illos dies ipſos , ſed cum ob importunam iſtam peſtilentiae vim celeberrimus mercatus ſublatus ſit , ob eandem cauſſam iſthuc accedendi cauſſa mihi ſublata eſt. Tameſi tu nihil ad meas illas literas , quibus mihi hoſpitiuſ condixeram. Credo , hoſpitem tibi non ſatis probatuſ eſſe , quem piſcium iſtorum maximum helluonem noras , cuique in vini ratione numquam ſatiſſit ; etſi numquam melius , atque ad meum ſtomachuſ , quam apud vos bibi. Sed illa , illa ſuavia colloquia ad menſam , in deambulando , in ſedendo , in via , ad librarios , ad medicos noſtros Superchios , Marocios , quam omnia jucunda ? cum quibus , ſi me amas , quando hanc artem optime tenetis , iſtam malam
be-

bestiam ex Urbe ejicite, expellite, purgate nobilissimam Civitatem, Bisantium illam impellite, aut etiam quo malit, trans maria omnia exportandam jubete; ut, si non ad constitutum diem una esse potuimus, saltem sub discipulorum conventum, cum Camillum filium Patavium ducam, id sine ullo metu facere possimus. Vale.

BARTHOLOMÆUS RICCIUS

Pierio Valeriano S. D.

Gratias agit de ejus opere elegantissimis versibus scripto, quod ipse domum usque tulerat. Librum suum de Imitatione ad ipsum mittit, in quo si quid erit, quod ipsi non improbetur, sibi gratissimum facturum ait, si se per litteras certiore fecerit.

25. **E**odem tempore me & summa voluptate, & dolore minime levi affecisti. Voluptate, cum domum usque opus tuum elegantissimis versibus scriptum dono ipse tulisti. Quid enim mihi gratius accidere potuit, quam ut a tanto Viro tam familiariter mecum ageretur? Dolo, quod per illud tempus in Urbe non essem, qui te, ut dignus eras, acciperem, ac suavissimis tuis sermonibus multis per horam illam de rebus perfrui possem. Sed hujus damnum in tuis versibus perlegendis mihi magna ex parte refarciam. Quod vero voluptatis accepi, quoties istius humanissimi facti tui in mentem veniet, veniet autem cum ex ipsius virtute, tum ex libri lectione sæpius, toties renovabitur, mihi que auctior fiet. Utinam modo quid ego quoque haberem, quo tibi contra gratiam aliquam referrem. Nam in hoc de Imitatione, quem librum tibi mitto, non mihi satisfacio. Vellem amplius quiddam, teque tam præstanti Viro dignum mittere posse. Malui tamen ex hac parva relata gratia grati animi erga te mei significationem aliquam facere, quam ingratus in nulla videri: in quo tamen si quid erit, quod tibi hæc improbetur, non prorsus in referenda gratia frustra fuisse valde lætabor. Quod si accadat, mihi gratissimum feceris, si me per litteras certiore feceris. Vale.

BAR-

fatis belle habeo. Hoc satis esse posset ; sed illud addo, ut ad proximum Christi ascensum mihi, ac Camillo filio cubile compares ; nam apud te sumus hoc anno habitaturi ; ne pater tuus semper meos Cornelios execrétur. Sed cum ego melius cogito , anguste olim habitabaris ; quid vero nunc , cum secunda nova nupta , Valerii fratris uxor accessit ? Vereor, ne mihi ad meos Cornelios redeundum sit ; sed ipse videris. Hæc quamprimum , ac , fideliter , ut Abiofio reddantur , diligentissime providebis. Vale , atque omnibus salutem.

BARTHOLOMÆUS RICCIUS

Augustino Abiofio Bartholomæi Filio S. D.

Cum ob importunam pestilentie vim celeberrimus Venetiarum mercatus sublatus sit , propterea Venetias accedendi causam sibi sublatam esse significat. Hortatur , ut cum cæteris medicis eam ex Urbe ejiciat , & Bisantium impellat , aut alio quovis trans maria omnia exportandam jubeat , ut saltem sub discipulorum conventum , cum Camillum filium Patavium ducet , sine ullo metu una esse possint .

24. **D**Li tantum malum dent isti pestilentie , quantum ipsa dat populis & mortis , & doloris , quæ mihi vestrum omnium conspectum abstulit. Constituera enim , ut ad te antea scripseram , ad istum Christi in Cælum ascensum tecum , atque cum parentibus tuis esse octo illos dies ipsos , sed cum ob importunam istam pestilentie vim celeberrimus mercatus sublatus sit , ob eandem causam isthuc accedendi causa mihi sublata est. Tamen tu nihil ad meas illas literas , quibus mihi hospitium condixeram. Credo, hospitem tibi non satis probatum esse , quem piscium istorum maximum helluonem noras , cuique in vini ratione numquam satisfit ; etsi numquam melius , atque ad meum stomachum , quam apud vos bibi. Sed illa , illa suavia colloquia ad mensam , in deambulando , in sedendo , in via , ad librariorum , ad medicos nostros Superchios , Marocios , quam omnia jucunda ? cum quibus , si me amas , quando hanc artem optime tenetis , istam malam

be-

bestiam ex Urbe ejicite, expellite, purgate nobilissimam Civitatem, Bisantium illam impellite, aut etiam quo malit, trans maria omnia exportandam jubete; ut, si non ad constitutum diem una esse potuimus, saltem sub discipulorum conventum, cum Camillum filium Patavium ducam, id sine ullo metu facere possimus. Vale.

BARTHOLOMÆUS RICCIUS

Pierio Valeriano S. D.

Gratias agit de ejus opere elegantissimis versibus scripto, quod ipse domum usque tulerat. Librum suum de Imitatione ad ipsum mittit, in quo si quid erit, quod ipsi non improbetur, sibi gratissimum facturum ait, si se per litteras certior fecerit.

25. **E**odem tempore me & summa voluptate, & dolore minime levi affecisti. Voluptate, cum domum usque opus tuum elegantissimis versibus scriptum dono ipse tulisti. Quid enim mihi gratius accidere potuit, quam ut a tanto Viro tam familiariter mecum ageretur? Dolo, quod per illud tempus in Urbe non essem, qui te, ut dignus eras, acciperem, ac suavissimis tuis sermonibus multis per horam illam de rebus perfrui possem. Sed hujus damnum in tuis versibus perlegendis mihi magna ex parte refarciam. Quod vero voluptatis accepi, quoties istius humanissimi facti tui in mentem veniet, veniet autem cum ex ipsius virtute, tum ex libri lectione sapius, toties renovabitur, mihi-que auctior fiet. Utinam modo quid ego quoque haberem, quo tibi contra gratiam aliquam referrem. Nam in hoc de Imitatione, quem librum tibi mitto, non mihi satisfacio. Vellem amplius quiddam, teque tam praestanti Viro dignum mittere posse. Malui tamen ex hac parva relata gratia grati animi erga te mei significationem aliquam facere, quam ingratus in nulla videri: in quo tamen si quid erit, quod tibi haud improbetur, non prorsus in referenda gratia frustra fuisse valde labor. Quod si accidat, mihi gratissimum feceris, si me per litteras certior feceris. Vale.

BAR-

satis belle habeo. Hoc satis esse posset ; sed illud addo , ut ad proximum Christi ascensum mihi , ac Camillo filio cubile compares ; nam apud te sumus hoc anno habitaturi ; ne pater tuus semper meos Cornelios execrétur. Sed cum ego melius cogito , anguste olim habitabátis ; quid vero nunc , cum secunda nova nupta , Valerii fratris uxor accessit ? Vereor , ne mihi ad meos Cornelios redeundum sit ; sed ipse videris. Hæc quamprimum , ac , fideliter , ut Abiofio reddantur , diligentissime providebis. Vale , atque omnibus salutem .

BARTHOLOMÆUS RICCIUS

Augustino Abiofio Bartholomæi Filio S. D.

Cum ob importunam pestilentie vim celeberrimus Venetiarum mercatus sublatus sit , propterea Venetias accedendi causam sibi sublatam esse significat . Hortatur , ut cum cæteris medicis eam ex Urbe ejiciat , & Bisantium impellat , aut alio quovis trans maria omnia exportandam jubeat , ut saltem sub discipulorum conventum , cum Camillum filium Patavium ducet , sine ullo metu una esse possint .

24. **D** Ii tantum malum dent isti pestilentie , quantum ipsa dat populis & mortis , & doloris , quæ mihi vestrum omnium conspectum abstulit. Constitueram enim , ut ad te antea scripseram , ad istum Christi in Cælum ascensum tecum , atque cum parentibus tuis esse octo illos dies ipsos , sed cum ob importunam istam pestilentie vim celeberrimus mercatus sublatus sit , ob eandem causam isthuc accedendi causa mihi sublata est. Tamen si tu nihil ad meas illas literas , quibus mihi hospitium condixeram. Credo , hospitem tibi non satis probatum esse , quem piscium istorum maximum helluonem noras , cuique in vini ratione numquam satisfit ; etsi numquam melius , atque ad meum stomachum , quam apud vos bibi. Sed illa , illa suavia colloquia ad mensam , in deambulando , in sedendo , in via , ad librarios , ad medicos nostros Superchios , Marocios , quam omnia jucunda ? cum quibus , si me amas , quando hanc artem optime tenetis , istam malam
be-

bestiam ex Urbe ejicite, expellite, purgate nobilissimam Civitatem, Bisantium illam impellite, aut etiam quo malit, trans maria omnia exportandam jubete; ut, si non ad constitutum diem una esse potuimus, saltem sub discipulorum conventum, cum Camillum filium Patavium ducam, id sine ullo metu facere possimus. Vale.

BARTHOLOMEUS RICCIUS

Pierio Valeriano S. D.

Gratias agit de ejus opere elegantissimis versibus scripto, quod ipse domura usque tulerat. Librum suum de Imitatione ad ipsum mittit, in quo si quid erit, quod ipsi non improbetur, sibi gratissimum facturum ait, si se per litteras certiore fecerit.

25. **E**odem tempore me & summa voluptate, & dolore minime levi affecisti. Voluptate, cum domum usque opus tuum elegantissimis versibus scriptum dono ipse tulisti. Quid enim mihi gratius accidere potuit, quam ut a tanto Viro tam familiariter mecum ageretur? Dolore, quod per illud tempus in Urbe non essem, qui te, ut dignus eras, acciperem, ac suavissimis tuis sermonibus multis per horam illam de rebus perfrui possem. Sed hujus damnum in tuis versibus perlegendis mihi magna ex parte refarciam. Quod vero voluptatis accepi, quoties istius humanissimi facti tui in mentem veniet, veniet autem cum ex ipsius virtute, tum ex libri lectione sapius, toties renovabitur, mihi-que auctior fiet. Utinam modo quid ego quoque haberem, quo tibi contra gratiam aliquam referrem. Nam in hoc de Imitatione, quem librum tibi mitto, non mihi satisfacio. Vellem amplius quiddam, teque tam præstanti Viro dignum mittere posse. Malui tamen ex hac parva relata gratia grati animi erga te mei significationem aliquam facere, quam ingratus in nulla videri: in quo tamen si quid erit, quod tibi hanc improbetur, non prorsus in referenda gratia frustra fuisse valde lætabor. Quod si accadat, mihi gratissimum feceris, si me per litteras certiore feceris. Vale.

BAR-

BARTHOLOMÆUS RICCIUS

Alexandro Magiolio S. D.

APPARATUM LATINÆ LOCUTIONIS *a se scriptum, & editum ex multis editionibus alibi factis comprobati significat. Certiorem facit, alterum ad Italicam rationem a se confectum fuisse, cujus primum folium publice descriptum ad eum quoque mittit, ut sibi per litteras ostendat, quid de ejus utilitate sentiat.*

26. **V**ide, Magioli, quid novi studii. APPARATUM AD LATINAM LOCUTIONEM scripti, eumque superioribus annis edidi, qui quam ab omnibus nationibus probatus sit, ejus post meam multarum aliorum editiones facile comprobant. Eo non contentus alterum interea confeci, ad Italicam rationem compositum, hoc est, ut verborum, ut Grammatici dicunt, sensa paucis prius Italice proferrem, deinde quot modis cum proprie, tum figurate ea Latine, atque eleganter dici possent, abunde subicerem. Quo perfectio, primum folium publice describi jussi, quod postea quoquo versus ad amicos mitterem, ut, quid illis de eo studio videretur, postea ad me perscriberent. Tuum igitur folium habere, quod cum ipse quoque percurreris, [neque enim diuturnæ, atque diligentioris lectionis opus est] quid de ejus utilitate sentias, per litteras mihi significabis. Vale.

BARTHOLOMÆUS RICCIUS

Georgio Cornelio S. D.

De humanitate, & benignitate, qua illum totos illos dies tractaverat, quibus Venetiis ad consortes fratres fuerat, gratias agit, rogatque, ut, si illi Bononiam, aut Romam, aut quovis alio iter habendum sit, ad se diverteret, ut ipse etiam de sua benevolentia aliquid testari possit.

27. **P**Utabam equidem ad id humanitatis, qua universa Familia tua maxime prædita est, tibi a tuis
etiam

etiam humanioribus studiis plurimum accessisse, sed meam illam opinionem longe superasti. Nam cum proxime Patavio rediens me Venetiis ad confortes fratres offenderes, ita me benigne complexus es, ita omni humanitatis officio accepisti, atque totos illos dies ita familiariter tractasti, ut a quovis vetere amico neque amicus accipi, neque benignius tractari possem; quem etiam in sermone parentis nomine honoris gratia appellare non dubitares; præsertim cum nullus familiaritatis usus inter nos intercederet, qui puer admodum esses, cum ego apud patrem tuum Aloygium nunc Cardinalem, & Marcum Antonium fratres tuos instituerem; neque postea accidit, ut una semel colloqueremur. Pro quo isto tuo in me tam benigno animo, atque ista tui tanti erga me amoris significatione ego ita tibi sum in omne tempus obstrictus, ut, quod cæteris fratribus debeam, præ eo, quod tibi lubentissime debere volo, parum sit. Non enim, mihi crede, ita me quisquam vel amplissimis muneribus afficere potuisset, ut tu isto tuo lætissimo vultu, istis tuis amicissimis verbis, atque omni ingenua humanitate affecisti. Utinam vero huic animo meo, atque isti officio tuo in referenda gratia satisfacere possem, utrique, ut sum in habenda, qui me tibi in perpetuum maxime debitum polliceor, gratissimus essem. Si tibi tamen hac umquam aut Bononiam, aut Romam, aut quovis alio, iter habendum esset, ut re paternum hunc meum in te animum experiaris, te etiam, atque etiam rogo; non ut ea ratione tuam benevolentiam compensare velim, sed ut ipse de mea, qui tecum interdum testari possis, aliquid amplius haberes. Vale.

BARTHOLOMÆUS RICCIUS

Augustino Carrario S. D.

Significat, se ejus discessu Florentiam admodum affectum esse, multoque satius ipsi futurum propter belli discrimen, si secum consueta ambulationunculas in suavissimis sermonibus confecisset. Hortatur, ut interdum animi causa ad Abiosum omnibus summe necessitudinis rationibus secum conjunctum se conferat, ipsique ostendat, quanti a se fiat.

28. **Q**ui mihi meam Aristotelis Poeticam tuo nomine reddidit, is te Florentiam hoc anno missum esse nuntiavit; præterea addidit, te tua voluntate illuc potius, quam alio ire coactum fuisse, ut Florentina, ac florentissima Academia illa perfruereris. Quo isto tuo a nobis discessu multifariam affectus sum, & quod tua suavissima consuetudine sum cariturus, & quod nostra Academia in te uno nobis adempto tantum damni fecerit. Verum illud me magis movet, quod per ea tempora in Hetruriam profectus es, quibus tota ea provincia maximo Senensi bello exardet; ut etiam magis armis, quam literis rem geri oporteat. At alii arma induant, nos in Academicorum conventus, in Bibliothecam nostram abdemus, in libris habitabimus. Recte quidem. Tamen & Diogenes, ne solus in tanto belli discrimine cessaret, dolium suum quaque versabat. Non male Urbi ominor; timeo isti tuo otio; quod si ullum erit, tui solius fortasse erit; certe Cives alio, quam in Academiam rapiuntur. Ut tibi multo satius fuisset, si cum tuo Riccio consueta ambulationunculas in porticibus tuis ad Joannis Baptistæ in suavissimis sermonibus confecisses. Sed tu cum tui similibus vere ex ejus generis hominibus estis, qui sunt microcosmi, qui in statu quoque Cœli conversiones imitamini. Quasi enim per sphaeras in orbem vos quoque per singulos annos versamini; nisi atomos magis imitantes huc nunc, alio alias confuse, ac nullo ordine, ut vos majorum vestrorum status impellunt, circumerratis. Sed quando tuus Capricornus ad nos rediturus sit, non video. Sed fatis de jocis.

cis. Est ad Cartusianorum familiam Ludovicus Abiofius jam multis annos Rector, qui mecum omnibus summæ necessitudinis rationibus conjunctus est. Si interdum animi causa illuc te contuleris, ac, quanti a me fias, illi ostenderis, id meo amicissimo fecisse videbis. Vale.

BARTHOLOMÆUS RICCIUS

Julio Portulachio S. D.

Petrum Vandinium Civem suum, & affinem coactum in aliena Urbe litem sequi commendat, rogatque, ut apud Judices ei præsto sit, sicuti causæ honestas jubet, & ejus bonitas postulat.

29. **P**etrus Vandinius meus & Civis, & affinis est. Sed hæc communia cum cæteris esse possunt, ejus vero bonitas non ita. Est enim, ut Romane eum laudem, vir bonus, qua etiam sua bonitate nunc cogitur in aliena Urbe litem sequi. Hic sororis suæ filiae marito Venetiis CC. aureos dat filio Lugum perferendos, quos ipse filius postea Principi nostro pro vestigali quodam dissolvat. Is bonus vir cum pecunia aufugit, neque postea usquam repertus est. Tandem certior factus, istum Brixiae eam pecuniam in vestibus veteribus vendendis exercere, isthuc se contulit, suum ad Judices ab isto repetitum. Quod cum intelligerem, ac plane scirem, quanti referret, peregrinum in aliena Urbe Civem aliquem habere, cujus gratia sustentaretur, tuam, hoc est, ejus Viri, qui in sua Civitate plurimum valeret, eum habere volui. Hunc igitur ita tibi commendo, ut causæ honestas jubet, & ejus bonitas postulat. Quoquo modo ei prodesse poteris; multifariam enim poteris; ne eum deseras, te etiam atque etiam rogo. Vale.

BARTHOLOMÆUS RICCIUS

Julio Portulachio S. D.

Gratias agit, quod Vandinii causam ita susceperit, ut ejus filius sibi retulerit, illud officium ipse in ea præstari, quo majus filius a patre expectare non potuisset. Certiorem facit, se Calinio eandem ipsam causam commendasse, sibi que pergratum futurum addit, si commendationem suis tribus verbis renovaverit.

30. **E** Quidem, Juli, cum tibi Vandinii causam commendavi, eo animo id feci, quo tu faceres, si tuorum quempiam mihi commendares; ut ei nihil deesset; quemadmodum ego in tuis nihil omitterem, quod a me desiderares. Quam meam opinionem ipse Vandinus continuo ad me scribens, mihi comprobatur. Ait enim, ita te causam suam suscepisse, ut ejus faceres, quicum omnibus summæ necessitudinis causis conjunctus esses. Nunc vero ejus filius isthinc domum rediens, multo etiam uberius de tuo erga patrem suum officio mihi retulit, cum diceret, majora a se filio patrem suum expectare non potuisse, quam quæ ipse tua humanitate ei præstitisses, atque adeo interea quotidie præstare non cesses. Pro quo isto tuo in Vandinium maximo officio, etsi scio, te mihi magis in hoc ipso, quod mea causa facis, debere plurimum, qui tibi, ubi tuam istam gratificandi rationem exerceris, tam honestam causam obtuleris, fateor tamen, me tibi tantum debere, quam qui maxime. Quod tuum officium [etsi plane vel primo die cumulasti] ut id tamen ad extremum adaugeas, hoc est, ne hospitem virum optimum in aliena Civitate ab improbiis adversariis gratia, atque pecunia opprimi sinas, te etiam, atque etiam rogo. Aloysio Calinio hanc ipsam causam commendavi. Quid meæ literæ apud eum ponderis habuerint, non satis intelligo. Pergratum mihi feceris, si commendationem meam tuis tribus verbis renovabis. Herculi suavissimo adolescenti, ut filio carissimo, salutem adscribito. Vale.

BARTHOLOMÆUS RICCIUS

Julio Portulachio S. D.

Rogat, ut videat, ne trifur adversarius in carcere detentus sibi eripiat, ac in alicujus gratiam iudicium effugiat.

31. **A**UDIO, trifurem istum adversarium nostrum etiam in carcere artem suam exercuisse; quod factum probat, eum dignum esse, qui omnibus sententiis absolvatur. Quid autem nunc ajunt socii sceleris duo ejus fratres impurissimi? quid, inquam, afferunt excusationis? Jam enim manifesto tenetur, neque quicquam aliud restat, nisi ut inter tria vestra publica signa literam longam, Plautino more, efficiat. Sed quoniam iudicium improbitate, ac temporum nostrorum iniquitate scelus interdum plus æquo valet, vide quæso, ne iste nobis eripiat, ac in alicujus gratiam hoc iudicium effugiat. Vale.

BARTHOLOMÆUS RICCIUS

Julio Portulachio S. D.

Gratias agit de suo in Camillum filium suum paterno animo; certiores facit, Homerum, atque Æsopum Græcos sibi redditos esse; seque vereri ait, ne Camillus filius se patrem imitetur in unis Latinis literis, Græcis omissis, acquiescentem.

32. **T**E amabam, Juli, antea tuo optimo ingenio, atque multorum annorum amicitia nostra plurimum, nunc vero tuis magnis, ac multiplicatis officiis, atque isto tuo in Camillum filium meum paterno animo, non solum amo, sed etiam observo, plurimumque tibi debeo. Homerum, atque Æsopum Græcos accepimus, qui quidem tam nobis grati fuerunt, quam quo animo missi sunt, qui gratissimo sunt missi. Utinam filius iis literis, quam facit, magis delectaretur, sed vereor, ne patrem imitetur, qui in unis Latinis acquievit. Dii cætera illi secudent. A Madio nostro spero longiores nostras literas tibi jam redditas esse, quibus significabam,

R 2

omnia

omnia tua recte nobis allata. Tu vero in tuis & proximis, & superioribus nihil de Hercule nostro. Ecquid in Africam nunc? Nolo illi male ominari. Isthæc tamen per hæc difficillima tempora tam importuna peregrinatio mihi satis placere non potest. Cura, te amabo, ut, cum aliquid de eo habebis, intelligam. Camilli, & ejus matris, & meo nomine valebis.

BARTHOLOMÆUS RICCIUS

Julio Portulachio S. D.

Gratulatur, eum incolumem ex Græcia domum rediisse, tantasque tempestates, totque piratarum incursiones feliciter evitasse. Ostendit, peregrinationem terrestrem maritima longe tutiorem esse. Rogat, ut tormentum parvulum ferreum ad Camillum filium primo quoque tempore mittat, curesque, ut rebus omnibus, quibus opus est, optime sit instructus.

33. **A**udio de Julio patre tuo, te mirum peregrinatorem factum, nuperque ex Græcia incolumem domum rediisse, eoque mihi gaudeo, quod nos quoque hac ratione te revisurum spero; tibi vero gratulor, qui tantas tempestates, tot piratarum incursiones devitaris. Mihi quidem peregrinatio ea probatur, quæ periculis careat. Quare maritima maxime improbatur, ubi non solum a procellis, a scopulis, sed etiam a piratis maxime timendum est. At terra a latronibus quoque non levia instant pericula. Recte quidem; sed ea commodius devitari possunt. Certe terra nobis naufragia non affert, neque hospitium vetat, cæteraque multa non aufert commoda. Quare jam terram teras licet, omnem Italiam peragrarè poteris, deinde in Galliam transcendes, Germania patet, cæteras Orbis partes domi tuæ uno Ptolomæo duce percurres. Sed hætenus de peregrinatione. De Camilli parvulo ferreo tormento tua cura est, ut primo quoque tempore, ac quam optimus mittatur, omnibus etiam rebus, quibus opus est, optime instructus. Illud mihi in primis videbis, ne quid scilicet reverberet, te te rogat, ut ad nos venias, ac nobiscum aliquot dies velis; ut, quem infantem reliquisti, ado-

le-

lescentulum videas, & meo etiam, nomine Julium patruum tuum plurimum salvere jubebis. Vale.

BARTHOLOMÆUS RICCIUS

Decurionibus suis Lugiensibus S. D.

Gratias agit, quod ipsorum Ordo sententiis omnibus se decreverit, qui humaniores litteras publice doceat, altera tanta mercede honorifice addita, quæ idem munus antea ob-euntibus persolvebatur, sequæ apud eos ad diem dictam futurum pollicetur, ut eorum liberos instituat,

34 **T**Andem aliquando a vobis eas literas accepi, quæ & meo summo erga vos, & vestro haud minimo erga me amore dignæ essent. Iis enim mihi significastis, me vestrum istum Ordinem omnibus sententiis decrevisse, qui humaniores literas apud vos publice docerem. Nam quod jam multos ante annos, cum interim eadem hæc opera vobis nihilominus usu veniret, nequaquam feceritis, in eam ego id partem accipio, ut summo cum honore meo factum a vobis existimem, qui meæ magis dignitatis, quam vestrorum filiorum utilitatis rationem habuistis, cum ad tenuem illam hujusce muneris mercedem invitare meam operam reveriti estis; quod nunc re ipsa plane comprobavistis. Nam cum res vestra publica ex Casellianarum aquarum superinductionibus aliquanto auctior facta esset, ac melius vestræ juventuti in hisce studiis consulere velleris, ad veterem ejus muneris mercedem alterum tantum addidistis, ut mihi provinciam istam demandaretis. Quod meorum studiorum vestrum perhonorificum testimonium ita accipio, ut quod a minime ignaris hominibus, certe a probatissimis, atque de bonis literis optime sentientibus Viris proficisceretur. Pro quo tamen nihil est nunc, quod a me ullam gratiarum actionem expectetis. Is enim equidem vir sum, qui malim aliquam gratiam referre, quam vel mirificas, atque immortales agere. Quod quidem meum institutum ut vobiscum etiam retineam, quantum in me erit, enitar, cum vestris liberis, meis Civibus eam operam dabo, quam a me tantopere expetere videmini, quam ego longius non differam, quam ad diem

diem dictam, hoc est, ad Calend. Aprilis : quod & mihi tum per anni tempus ad commodissime navigandum, tum ad reliquum viæ terra, quod lutulentissimum nunc esse scio, curru res meas convehendas longe commodius futurum erit : & Marino nostro, cui usque eo provincia isthæc literaria profertur, nihil de ejus tempore detrahetur. Sed tamen quod paulo ante me facturum negaram, vobis universis, singulis, publicis, privatis, amicis, quique amicorum causa in tam honesta provincia nobis demandanda studuistis, gratias eas ago, quas tanta animi vestri benignitas postulare videtur. Valete.
Venetiis Prid. Non. Febr. MDXXXIV.



BARTHOLOMÆI RICCI

LUGIENSIS


EPISTOLARUM

LIBER SECUNDUS.

BARTHOLOMÆUS RICCIUS

Antonio Brasaulio Musæ S. D.

Ubi inuectus est in sacrilegum hominem, qui sibi venenum misere propinarat, gratias agit, quod ipse sponte præsto affuerit, præsentissimumque remedium ad vim veneni contundendam adhibuerit, illudque gratis in se beneficium contulerit, ut referendæ gratiæ nulla vel bene grato animæ facultas detur, cum nemo pro vita parem umquam gratiam referat, nisi quam acceperit, eandem illi vitæ reddiderit.

i.  Ebebam tibi antea plurimum, Musa; undique enim de me optime meritis eras; nunc vero quicquid sum; totum tibi acceptum refero. Nisi enim ipse tua humanitate, tuæque sponte mihi præsto affuisses, de me, ac de misera mea familia actum esset. O impium venenum, quod latenter in meas venas infundebatur; ego vero miser, qui quidvis aliud, quam hoc timuissim! Mihi jam funus parabatur, neque ego quicquam me ægrotare sentiebam. Dii boni, quid hodie est hominum improborum? quid perditæ conscientiæ? quid profligatæ æquitatis? ita ne ille, de quo ego ita meritus eram? in quem tot mea officia contuleram? pro quo etiam non levia pericula adiveram? hanc mihi gratiam referre studebat? immo vero quantum in ipso fuit, cum mulatissime retulit? O hominem sacrilegum! Quid enim in Deum ipsum pejus moliri poterat, quam falso, ac per summam fraudem ita ejus veritatem, hoc est, Deum

ipsum oppugnare, atque appetere? Sed is præsto sibi affuit, qui te mihi tantum patronum adhibuit, ut continuo latentem hunc morbum a me longe propulsares. Vive diu, Musa, atque ista ope, atque integritate tui similes tueare, sicque afficias, atque ea officii magnitudine prosequaris, ut nullam tibi gratiam referre queant. Id enim proprium eorum est, qui gratis in alios beneficium conferunt, ut ita de iis mereantur, ut referendæ gratiæ nulla vel bene grato animo facultas detur. Quis enim pro vita parem umquam gratiam retulerit? nisi quam acceperit, eandem illi vitam reddiderit? Deus tamen est, Musa, qui vel centuplum tibi, ac tui similibus facile compensat. Equidem moleste fero, cum hominum improbitas hanc mihi tantam tibi debendi facultatem obtulerit, saltem meam hanc debitionem apertius testari non posse, ut, & quam illustre tuum istud officium fuerit, sempiternæ memoriæ meis scriptis mandarem, & mei similibus te optimum patronum, iniquissimis vero acerbissimum adversarium ostenderem. Non enim eo contentus sum, ut is probus vir cum legendo in hanc Epistolam inciderit, suam improbitatem probe notari sentiat, sed si ea umquam temporis ratio incidat, qua liberius id agere possim, tibi polliceor, me continuo occasionem occurrurum, atque isti debitioni, atque animo meo cumularissime satisfacturum. Vale.

BARTHOLOMÆUS RICCIUS

Bonifacio Rugerio S. D.

Rhombum dono mittens difficultatem habendi piscis nobilioris in foro Ravennate ob oculos ponit propter nobilissimas Civium familias, quæ multæ sunt, & splendide vivunt, ad quas domum usque deferitur quidquid elegantioris piscis in ora maritima capitur.

2. **R**avenna quidem sita est in ora maritima, quæque non longius a mari tribus millium passibus distat; quod tamen ad piscationes attinet, non sane frequentes sunt. Aut enim anni tempore impediuntur, aut parum est in eo mari nunc piscium. Sane adhuc in foro piscario Raja tantum est visa, plebejum, ac vile piscis

scis genus ; siquid vero elegantioris piscis capitur omnino ; præter nobilissimas Civium familias , quæ & ipsæ multæ sunt , & splendide vivunt , tres sunt Sacerdotum frequentissimæ [ut minutas omittam complures alias] ac locupletissimæ familiæ ; nosti genus hominum , atque palatum , quamque laute agant. His , si quid usquam nobilioris piscis capitur , domum usque deferretur , quia pluris illi pro eo dant , quam in foro vel a tribus non fieret , in quo Chremetis pisciculi tantum in pretio sunt. Ego jam multos , quicquid hoc est Rhombi , dies observo , & tandem captum vix potui capere. Nunc tibi mitto , certe eo animo , quo plane scis , libentissimo : verum etiam si patellam magis impleret , multo etiam libentiori. Vale. Ravennæ.

BARTHOLOMÆUS RICCIUS

Bonifacio Rugerio S. D.

Versus quosdam de Cardinalatu Hippolyto Atestio delato a se factos mittis ea conditione , ut Ferrinio non ostendat.

3. **H**ic jam multos dies rumor erat constantissimus , incerto tamen adhuc nuntio , Hippolytum Atestiurum tandem Cardinalem factum. Quam quidem famam postea vestra ista armorum publica simulacra , ac qui ludi celeberrimi isthic per tota hæc Saturnalia spectantur , multo auctiorem fecere. Ex qua quidem communi omnium lætitia cum ad me quoque pars mea perveniret , lusi in eam nescio quid cum Pado , atque Tibride , quos meos lusus tibi mitto , quia eos semper aliquid esse putasti. Ea lege tamen mitto , ne Ferrinio quicquam , qui nondum ab injuria mecum discedit , qui tot menses ad tot meas literas ne literam quidem ; quem ego posthac haud scio , an magis ferum , aut ferreum , quam Ferrinium in meis literis appellem. Sed quid ago ? quasi ego non magis cupiam illum eos dissipare , quam is videre. Utinam ii sint , qui mihi. Sed non sunt. Neque ego pergo reliquum votum. Nisi plane toti vobis excidimus , aut isthæc a vobis vos ipsos abstulit lætitia , aliquid , si non speculæ , verborum saltem possumus expectare. Vale. Ravennæ VII. Id. Feb. MDXXXIX.

BAR-

BARTHOLOMÆUS RICCIUS

Bonifacio Rugerio S. D.

Sibi litteras Italice scriptas gratas fuisse significat, facereque ait, se malle intelligere, frumentum in cellam suam primo quoque tempore importatum esse, quam ut inde sibi ad centesimam ejusmodi epistolam liber excrescat.

4. **T**Ametsi ea mihi excusatio, quam tu modeste magis, quam vere affers, quamobrem ad meas Latinas litteras Italice ipse respondere malueris, nequaquam probatur, qui te id quoque & apte, & Latine, ut quisquam alius, facere posse, plane non ignorem, quoquo tamen modo rescripseris, id mihi quam gratissimum fuit. Quid enim gratius accidere potuit, quam ut, non modo ad hujusmodi meas, hoc est, non maximis de rebus scriptas, tam suaves ipse contra tuas, jucundissimasque elicerem litteras? Quod vero de frumento perurbane jocar, valde mihi arrisit; sed nolim sapius pro frumento ridicula afferri. Malo enim mihi frumentum in cellam meam primo quoque tempore importatum esse, intelligere, quam ut inde mihi vel ad centesimam ejusmodi epistolam liber excrescat. Tu vero contra si id eo, ut tu dicis, nomine rem meam minus curas, ut a me crebrius litteras accipias, rectius faceres, si mihi tandem causam eam dares, quamobrem tibi magis gratias agerem, quam ut te quotidie eadem de re per litteras obtunderem. Quod vero ad meos Riccios attinet, eis non tam mea causa ut omnia præstes, quibus ego nihil honestissime cupere non possum, quam ne malevolorum hominum, quorum isthic plena sunt omnia, calumniis opprimi sinas, te etiam, atque etiam rogo. Vale.

BARTHOLOMÆUS RICCIUS

Bonifacio Rugerio S. D.

Consolatur de filii morte, quod totus ætatis hominis cursus certissimis periculis, & calamitatibus objiciatur, ut, ei potius latandum sit, quod filius moriens tot, ac tanta mala devitarit, quam dolendum, quod vivens cum cæteris ea misere non pertulerit. Diluit, quæ contra afferre poterat, hortaturque, ut reliquos duos filios cariores habeat, atque in eam virtutis viam ducat, ut, cum sibi quoque hinc discedendum erit, eos in terris cum optimis studiis institutos, tum hanc animi fortitudinem edoctos relinquat.

5. **N**ON equidem, Rugeri, eo ad te Orationem meam miseram, ut inde mihi tantum dolorem accersirem; mallem ego eam numquam scripsisse. Sed vide, ut homines rerum suarum ignari sint omnium. Ego, tibi cum eam describerem, magnam voluptatem capiebam, quod scirem, te mea scripta libenter legere sole-
re, cum tamen ex ea ipsa mihi jam constitutus esset præfens hic dolor. Nisi enim ad eam mihi rescripsisses, nihil opus erat, ut de filii tui morte, præsertim tam longe gentium, audirem; aut si audissem omnino, eo id fortasse tempore accidisset, quo ejus diuturnitate minus moleste ipse angerere, neque ego ea ratione tam acriter urgerer; nunc vero ipse & tibi recens vulnus commovi imprudens, & mihi dolorem insciens accersivi novum. Sed quando tuum istud vulnus quotidie commune omnibus accidit, nihil est, quod in eo præcipue, ac gravius doleas: ego vero in meo non tam tecum querar, quam ut tibi in tanto isto tuo mœrore consolationem aliquam cerner, si possim, afferre. Quod si assequar, id mihi erit optatissimum; si minus quicquam profecero, certe amorem erga te meum ex hac quoque parte tibi maxime testatum reliquero. Graviter te angit amisisse filium, & filium summa spe, ac optima indole; utrumque certe gravissimum, maximeque dolendum; filii enim, etsi vel omnibus membris capti sint, carissimi sunt; verum si ad naturæ charitatem accedat corporis integritas, & animi be-
ne

ne instituti ratio, ac spes maxima, quæ in isto tuo omnia splendide posita erant, tum prope perpetuo, cum occidunt, videntur esse desendi. Cui acerbissimo, ac infinito dolori tuo jure æquissimo tamen extrinsecus aliquid objici potest, quo levior fiat, si minus prorsus tolli possit. Aut enim quod tibi in filii morte, aut illi in eo discessu ademptum est, [quando nihil aliud in nostrorum morte, quam aut nostram, aut eorum ereptam commoditatem aliquam queri solemus] ægre lamentaris; quod autem ad ejus damnum, certe cum eo rectius agi non potuit, quam ista ætate ex his miseriis, quibus omnia plena sunt, in æternam illam Dei Opt. Max. felicitatem evolare. Revoca tibi, mi Rugeri, in mentem totum ætatis tuæ cursum. Adolescentiam repete, [nam in pueritia prope nihil sentimus] perge vero juventutem; repende cum vir factus es; considera denique eam, quam nunc agis ætatem; si quicquam offenderis, quod tranquilli, quod securi otii habuerit, quod non omnibus molestiis abundarit, quod non certissimis periculis, & suis, & suorum objectum fuerit; tum ego tibi non solum concedo, ut in tanti filii obitu omnes lachrymis habenas immittas, sed ego quoque meis possum tuarum flumen valde adaugere. Sed si contra ingrata tibi omnia extitisse, ac laboriosissima expertus es; quid est, quod filio meliora esse comparata sperares? Quasi vero hæc tempora non jampridem omni scelere cumulata sint, aut usquam locus ullus sit virtuti, non ubique improbi, falsi, perjuri, omnisque sceleris affines summo in loco in omnibus Civitatibus, apud omnes Principes sint constituti; ut tibi potius lætandum sit, quod moriens hæc tot, ac tanta mala devitarit, quam dolendum, quod vivens cum cæteris hæc ipsa, atque his etiam graviora misere non pertulerit. At hac ratione bonis omnibus magis moriendum, quam vivendum esset. Hoc ego non dico; tamen vitam hominum miseriam esse ipsam, neque tu non concedes. Id assero, si quis nobis decesserit, hac ratione minus ejus obitum nobis esse dolendum; quod multis miseriis liberatus sit, magisque ei gratulandum, quod ex hac morte in veram vitam, ac beatissimum vivendi statum in Cælum ascenderit. Defunctorum enim nostrorum alia ratio est, atque majorum nostrorum. Ii enim arbitrari poterant, una cum corpo-

re animam interire. Itaque recte querebantur in suorum morte, ut qui ubique esse defuissent; nos vero animam tum solum vivere putamus, cum ex hoc carcere terreno liberata est. At periculum est, ne ea perpetuis cruciatibus apud Inferos torqueatur. Hoc mi, Rugeri, per paucorum est, eorumque, qui Christum Servatorem suum esse non satis credunt; ex quo uno scelere reliqua sequi solent scelera, quibus mortui in eas pœnas detruduntur. Verum de eo adolescente, ac pœne puero, ac tali patre nato quicquam tale verendum esse, nihil suspicor. Quin is & suapte bonitate, & patria institutione magis par est credi, ut unus factus sit Cœlitum, quam numerum auxerit inferorum. Quod vero ad tuam utilitatem, vel potius patrium desiderium attinet. Primum eo si gravius angaris, haud satis video, qui dolor iste tuus satis laudari possit, qui proprium commodum in eo queraris. Præterea vero quod in eo non omnibus liberis spoliatus sis, minus unius interitu sollicitari debes. Reliqui enim duo sunt, quorum uterque natus est grandior, neque etiam fortasse utriusque spes inferior, quam erat in tertio. Quod magnam tibi consolationem asferre potest: quando etiam bis tantum tibi relictum est, quantum est ademptum. Nam si omnes in uno occidissent, ut mihi in Camillo [quod Dii omen avertant] fieret, fortasse tum honestius tibi lugendum esset. Quare in hos duos, qui tibi a Deo relictī sunt, omnem istam sollicitudinem, atque desiderium confer. Nos habe, quod facis, cariores, atque in eam virtutis viam ducas, qua una etiam senectutem tuam maxime consoleris: atque, cum tibi quoque hinc discedendum erit, eò animo confirmatus discedas, quo Christiano homini par est discedere, atque ad eum in Cœlum tendens, reliquos duos in terris cum optimis studiis institutos, tum hanc animi fortitudinem edoctos relinquant. Vale.

BARTHOLOMÆUS RICCIUS

Joanni Baptistæ Eletio S. D.

Letitiam suam patefacit de jucundissimo nuntio ad se allato, Grifolium adhuc vivere, seque avidè expectare significat, ut id confirmetur, cum id, quod de ejus obitu omnibus inhaeserat, tale sit, ut prope unico verbo evelli non possit. Beriguardi villam nobilissimam, & laxissimam ad ducenta cubilia, Cœlique optima salubritate præditam laudet.

6. **O** Mihi jucundissimum de meo Grifolium nuntium, cui, si quicquid sum, pro Evangelii donem, non mihi, meæque voluptati satisfaciā. Vivit ergo meus Grifolius? atque his etiam fruitur auris? Equidem, Eleti, quoniam id tam opto, quam filiolum Camillum, quam me ipsum vivere, id eo minus in animum induco, ut credam. Ubi, te quæso, nobis ille hoc triennium mortuus jacuit? ubi, inquam, delituit? aut quid tantum interea molitus est? ut amicis non solum literam ullam, sed etiam, ut il se decessisse judicarent, æquissimo animo pertulerit? Omnino illud otium aliquid tanto viro dignum pariet. Avidè expecto scire cætera, ac confirmari mihi, eum etiam nobiscum agere. Non enim quod nobis omnibus de ejus obitu tam inhaeserat, tale est, ut prope unico verbo mihi evelli possit. Sed Dii malum huic pestilentiae dent, quæ mihi multa adhuc incommoda attulit, unum illud non minimum, quod literarum quoque mittendarum institutum fustulit. Non enim isthinc quemquam ad nos, multo vero minus a nobis ad vos commeare licet. Sed brevi tamen spero, rem in suum pristinum statum restitutam iri. Nam isti Mauri, qui pestem in Urbem intulerunt, secum etiam sub alis in suis sarcinis abstulerunt, probeque Urbem purgarunt. Ego in Beriguardo sum cum meis Principibus filiis, villa omnium, quæ sunt, quæ fuerunt, quæque futuræ sunt, & nobilissima, & laxissima ad ducenta cubilia, Cœli vero ea salubritate, quæ quæ optima. Itaque etiam rectissime valeamus, quod te quo-

quoque facere puto, opto quidem certe. Vale. Ex Be-
riguardo Nonis Octobris MDXXXIX.

BARTHOLOMÆUS RICCIUS

Joanni Baptistæ Eletio S. D.

*Suilla salsamenta Ferrariensi modo composita mittens laudi-
bus extollit; ait tamen, ea non esse ejusmodi, ut no-
bilissimos pisces, quibus Venetiis lautissimo prandio acce-
ptus fuerat, equent. Addit, se id moleste non ferre, cum
rerum copia facile ab amicis vinci possit, non ita in amore.*

7. **S**uilla salsamenta, quæ tibi mitto, nostro Ferra-
riensi modo composita, optima esse puto, cupio
quidem certe. Sunt enim ex meis suis, iisque ex ha-
ris jure esculento, non autem ex montanis glande pa-
ctis; præterea doctissima manu confecta. Sed ita sit;
numquam tamen Varios, Sgumbros, patellarios Rhom-
bos, oblongis pedibus Cancros illos tuos, cæterosque
cujusque generis nobilissimos pisces, quibus me Venetiis lau-
tissimo prandio acceperis, æquabunt. Neque id tamen
moleste fero. Facile enim ab amicis rerum copia vinci
possum, in amore non ita, ut ne meus quidem Abio-
nius, qui amando amicos suos longe superat, mihi par
reddat. De Grifolio nostro si quid habes, pergratum mi-
hi feceris, si id mecum communicabis; sed eum puto
veterum amicorum prorsus oblitum. Vale.

BARTHOLOMÆUS RICCIUS

Benedicto Lampridio S. D.

*Alphonsum Riccium adolescentem, ac pæne puerum, qui
casu quodam misero, atque infelici Marcum Antonium
Riccium propinquum suum occidit, jure solo Patrio in
biennium exulantem commendat, petitque, ut ei im-
petres a Cardinali suo facultatem in Oppido Solavelio com-
morandi, & ibi per hoc biennium tuto agendi.*

8. **M**eus mos est in scribendo, Lampridi, ut non
ita unaquaque de re epistolis amicos a suis stu-
diis

diis interpellem. Itaque etiam factum est, ut tu quoque multo minus crebro meas literas legas. Malo enim nunciorum opera, quoties eorum facultas datur, ad salutem iis meo nomine impertiendam uti; quam quotidie epistolis quodammodo cum illis abuti, Diique facerent, ut nunc quoque aut nullam, aut saltem tam miseram scribendi causam non haberem. Satiùs enim mihi esset, sexcentas huiusmodi epistolas, quam propinquum periisse. Sed quoniam res humanæ fati [ut ille] trahuntur, nos quoque fati concedamus, necesse est. Alphonfus Riccius adolescens, ac pæne puer, casu quodam misero, atque infelici Marcum Antonium Riccium occidit. Nam cum Marcus Antonius maledictis Alphonsum sapius laceravisset, tandem is quoque exarsit, atque a convitiis ad manus venire, quo in certamine Marcus Antonius vulneratur, ac non multos post dies moritur. Riccii cæteri, quæ frequentissima est familia, continuo conveniunt, violatam propinquitatem refarciunt, in funus una postea omnes prodeunt, æque ab omnibus iniqui fati conditio defletur; datur præterea ab ejus, qui cædem fecerat, parente cæsi parvulis liberis in perpetuum victum bona pars agri bene culti, neque verbum ullum postea de cæde illa umquam auditum est. Hæc domi provisæ sunt; foris autem est, quod etiam desideretur. Adolescens, qui in cædem illam misere incidit, jure solo exulat Patrio, neque illi a Principe nostro, nisi in biennium domum reditus ulla cujusquam gratia exorari potest. Interea vero ubi is tuto agat, locum quaerit. Sed cum Solarolio Cardinalis tui Oppido nullum commodiorum habeat, is a me contendit, ut per amicos hanc in hoc biennium illic commorationem impetrem. Quare ego te rogo, atque oro, ut ita cum eo agas, ut nobis id exores: quod eo facilius obtinebis, quod fere quotidie gratiam hanc multis aliis facit. Ac ut ab adolescente omnia tuta habeas, ne quid tumultus, ac rixæ in Oppidum secum afferat, ego omni hac suspicione te libero, fidemque meam tibi obstringo, nihil novi ab eo esse metuendum, quem veteris admitti graviter pœniteat, atque etiam gravius pigeat. Quod si mihi impetras, omnium gratissimum feceris. Vale.

BARTHOLOMÆUS RICCIUS

Hippolyto Orio S. D.

Jucundas sibi fuisse ipsius literas significat, seque ejus absentiam facile ferre: si usus ferat, se ejus operam, quam multis pollicetur, petiturum; Castellium adolescentem optimum misere interfectum se dolere; sed ita esse, homini majorem nullam pestem, quam ab homine, oriri posse.

9. **S**urrexeram a mensa ad septimam horam, cum tuæ literæ mihi redditæ sunt, quæ mihi tam jucundæ fuerunt, quam solebant esse tui suavissimi congressus, quibus nunc privatus valde doleo. Nam cum Portius, qui mihi olim Costii loco relictus erat, in Patriam se recepisset, ubi suorum studiorum fructum aliquem caperet, tuque adhuc pro Portio nobiscum eras, nihil amisisse videbar, qui in te uno ejus desiderium valde levarem. Verum cum tu quoque Bononiam te contulisti, neque discedens ullum mihi, qui tuam vicem referret, substituísti, solus relictus esse videor. Sed cum id postea honestissima de causa factum esse animadverto, eo levamine dolorem istum facile consolor. Perge tu modo, ut facis, atque propera eum finem tuis studiis imponere, quem nos cupimus, & illa postulant. Quod vero operam tuam tam multis mihi isthic polliceris, tu quidem amice, sed frustra facis. Nam quam ego tibi præstarem integerrimam, eandem abs te petere, si usus veniat, non dubitarem. De Castellio adolescente optimo misere interfecto, ut homo, a quo nihil humanum alienum esse debet, moleste tuli. Sed ita est, homini majorem nullam pestem, quam ab homine, oriri posse. Corradio salutem, quem, ut tecum communicet de Juris Civilis corpore, meo nomine commonefacies. Vale.

BARTHOLOMÆUS RICCIUS

Hippolyto Orio S. D.

Ejus negligentiam in scribendo redarguit, orasque, ut rescribat, qua in spe res sit de Camilli libris, ne eodem tempore duo corpora emanantur.

10. **J** Am quindecim dies erant ipsi, ex quo a nobis Bononiam discessisti, neque etiamdum quicquam de Camilli libris audiebamus; ego vero arbitror, te eos ad librarium non offendisse, atque cuiquam alii venditos esse, interea vero, si qui alii venum exponantur, expectare; quod tamen perpaucorum fuit verborum, si id ad nos scripisses; præsertim cum scires, nos hic quoque in speculis esse, si qui appareant; ne eodem tempore duo corpora emeremus. Satis enim est, pro uno tantum nunc dissolvere, quantum olim pro duobus non fiebat. Expecto scire, qua in spe res sit. Corradio, ac Bochio salutem. Vale.

BARTHOLOMÆUS RICCIUS

Sebastiano Corradio S. D.

Opus suum de Imitatione nuper in vulgum editum mittit, ut ibi quoque emptori copia sit. Rogat, ut apud librarium suum proponi jubeat, cui pretium ipse faciat ad libri rationem, & curet, ut, cum erit, per quem tuto id facere possit, pecunia ad se deferatur.

11. **V** Ide, mi Corradi, quanta communium studiorum vis sit. Te equidem, quod sciam, numquam vidi, neque tu me fortasse, nedum ut magna ulla inter nos intercedat consuetudo; tamen cum tua opera mihi usu veniret, nostris iis studiis fretus, sic eam a te contendere non dubitavi, ut si tecum multos annos familiariter vixissem. Mitto ad te opus meum de Imitatione nuper in vulgum editum, ea ratione, ut isthic quoque emptori copia sit. Hoc igitur ut apud librarium tuum proponi jubeas, te etiam, atque etiam rogo. Pretium erit,

rit, quod ei videbitur ad libri rationem; pecuniam vero [quando jampridem studiosorum omnium Quæstor factus es] æque ad te, ut deferatur, curabis, eamque, cum erit, per quem id tuto facere possis, huc ad me rescribes. Vale. Ferrariæ.

BARTHOLOMÆUS RICCIUS

Sebastiano Corradio S. D.

Certiores facit, cum forte adesset ad Gyraldium senem, ejus literas allatas fuisse, jussuque Gyraldii a se lectas, amoris, & humanitatis plenissimas; risum utrinque magnum commotum, cum ipso in suum nomen incidisset, & ad Riccium arridens inter legendum addidisset spinosum; seque quasi foricem suo indicio mendacium detexisse.

12. **F**Orte aderam ad Gyraldium nostrum, tamen si quid dixi forte aderam, qui ab eo senem nusquam discedam? forte tamen aderam, cum ei tuæ literæ afferuntur. Quas ut a te missas vidit; lege tu, inquit, Ricci. Cui ego, quid si? At ille, quid enim? Quasi aut ab ejusmodi veniant, quæ quicquam habere possint, quod vel in concione palam recitari non possit, aut ego quicquam habeam, quod te celatum velim. Ita mihi eas legendas obtulit. Credebam equidem, Corradi, te ex tuis studiis suavissimum, atque humanissimum esse virum, verum ex iis literis multo te vidi & suaviorem, & humaniorem. Sentiebam [ita me Dii ament] illa tua verba ex intimo animi exprimi, atque, ut par est, a filio ad parentem, cujus tu personam cum eo suscipiebas, carissimum; ut, nisi ego te amarem, quantum facio quemquam alium, tibi irascerer, qui me in eo prudentissimo & doctissimo senem amando superare videaris, qui in ejus observantia, atque pietate nulli facile concedo. Sed te feram æquo animo absentem; si adesses, non ita fortasse. Cum vero ad extremam epistolam venio, qua in parte salutem adscribis communibus amicis, ac continuo in meum nomen incidi, ita me omni lætitia suffudisti, ut multum ex nostra æmulatione tibi remittere coactus sim; sed arridens ad Riccium, ego inter legendum addidi spinosum. Ecquid, inquit, ille? ita ne est? Ego ve-

ro, ita. Sed cum risum non tenerem, quasi forex meo indicio mendacium meum detexi. Risus utrinque major est postea commotus; ut ego mihi ipsi tuo nomine salutem dixerim, quemadmodum tu meo nunc Bochio, Cuspicio, & M. Tullio Berojo dices, nisi cui eorum ita accidat in meis mecum, quemadmodum mihi tecum in tuis ad Liliū evenit literis. Vale.

BARTHOLOMÆUS RICCIUS

Sebastiano Corradio S. D.

Petit ab eo volumen, non ea tamen conditione, ut Lilius, qui statim, ac habuit, mortuus est, & cum cæteris libris hæredibus illud reliquit. Liliū testamentum exponit, oratque, ut se alterum parentem, qui reliquus ipsi est, magis, quam facit, amet.

13. **A**lter parens tibi suo die decessit; alter tuo ejus contemptu aliquantum abalienatus est; ut eodem tempore prope duobus orbatus sis parentibus. Quid enim decem volumina e manibus mihi erepta sunt? Num Lilius tam fortis fuit, qui omnibus membris captus erat, ut in suo vim tibi attulerit? Is certe suum habuit, sed paucos illud dies habuit omnino. Nam continuo moritur, idque cum cæteris ejus libris ad hæredes pervenit. Ego vero adhuc in eo contemnō. Sed istam tibi nostri negligentiam facile ignosco, si id fatale futurum erat, ut cui prius mitteretur, is quoque illo, unde nulli reditus datur, postea mitteretur. Quare vide, atque cave, ne bis impius fias, hoc est, ne mihi quoque meum eo modo mittas. Malo enim omnia mea me incolumi conflagrari scripta, quam a quoquam eo omine vel aureos montes accipere. Sed redeo ad Liliū. Is in pecunia, quam multo grandiore omnium opinione reliquit; erat enim ad Hs. cccc. Herculem Atestium Principem nostrum hæredem instituit, quam tamen in egenos [ut ei videretur] postea divideret; cum tamen ipse ex sorore sex neptes egentissimas haberet, mox omnes locabiles, quibus singulis tantum legavit, quantum levidensem vestem vix efficeret. Libros Jo: Baptista Gyraldio, propinquo suo ex altera parte, Profepo

pero Pasetio ex altera reliquit ; Epigrammatum vero libros complures , quos item Herculi Principi moriens commendavit , atque ita decessit. Vale , atque vive , parentemque alterum , qui tibi reliquus est , magis , quam facis , ama.

BARTHOLOMÆUS RICCIUS

Sebastiano Corradio S. D.

Ejus Brutum se accepisse significat , illumque librario conglutinandum dedisse : libros armis cedere , sibi cum ceteris Civibus jussu Herculis Principis lorica cum hasta datam ad Patriam , si casus ferat , defendendam ; se quotidie cum Sarachio esse , neque umquam ab eo discedere , quin prius ejusdem amici commendationem renovet , eumque polliceri , se , ut prima occasio detur , eum esse arrepturum , remque omnem confecturum .

14. **B**rutum tuum accepi , nondum legi. Continuo enim librario conglutinandum misi. Sed jam libri cedunt armis , cum Princeps Hercules loricas singulis Civibus mitteret , quibus præsto essent ad Patriam , si casus ferat , hoc Italico tumultu defendendam , uterenturque. Mihi quoque meam cum hasta dari jussit. Vides ? Ita me Dii bene ament , ut verum narro. Sed hoc ego quoque tecum riderem , nisi illud , an molestius , an ? sed loqui non possum. Ego scilicet annos sexaginta tres natus , iis studiis , quæ omnes norunt , miles fiam ? Utrum me veteranum militem , an tirunculum appellabis ? Nam ætas me non solum veterem , sed etiam vetustissimum facit , militiæ vero omnis imperitia omnium rudissimum comprobatur. Sed de his hætenus. Ego quotidie cum Sarachio sum , neque umquam ab eo discedo , quin prius amici tui commendationem studiosissime renovem : qui mihi contra se omnem operam daturum recipit , ut tibi in tanto amico tuo obsequatur. Videt enim cum ex tuis ad me literis , tum ex mea apud se renovata commendatione , quantopere illi studeas. Is enim homo est , qui hisce humanioribus studiis valde delectatur. Quare etiam in eos , qui his , ut ipse facis , plurimum valent , mirum in modum afficitur. Utinam

autem in ejus manu res posita esset ; jampridem nihil laboraremus ; pollicetur tamen , fidemque suam obstringit , se , ut prima occasio detur , eam esse arrepturum , remque omnem esse confecturum . Vale .

BARTHOLOMÆUS RICCIUS

Sebastiano Corradio S. D.

Judicium suum de Bruto a se lecto exponit , eumque luculentissimum opus edidisse proficitur , ac unde ipsi magna etiam apud posteros gloria sit ventura .

15. **B**rutum a librario optime , ut dignus est , conglutinatum accepi . Legi , atque adeo quotidie avide lego . Non enim frustra id tempus mihi ponere videor . Nam quod ad Historiam , quæ in eo libro cum Græca , tum multo magis Latina versatur , tantum abest , ut quicquam desideretur , ut etiam interdum ex summa ejus abundantia luxuriare videaris , quæ tamen luxuries suum semper aliquem fructum affert . Quæ vero tu alio modo legenda esse censes , atque palam leguntur , mihi valde arident , tibi in iis maxime assentior ; sed quæ sensa paulo sunt abstrusiora , ea eadem facilitate aperis , ut omnibus maxime pateant . Nolle[m] [si omnino mihi dicendum est filio , quod sentio] te minuta quædam tam curasse , ut mediocriter eruditus nihil relinqueres , idque magis probassem , si cum Viris scribendo , non autem semper cum adolescentulis tibi agendum esse censuisses , eorum etiam rationem hanc habuisses , Asconiumque in ea interpretatione imitatus esses . At rerum copia id me facere non fuit . At vitis cum cultior ad videndum , tum etiam utilior ad ferendum est , quæ probe putata , atque in sua certa capita constituta componitur , ne luxuries eam prorsus perdat , cum ad fructum pervenerit . Equidem a te expectabam , ut in Ciceronis variis de Oratoribus judiciis judicium tuum ostenderes , atque in iis explicandis tuum quoque planius explicares . Sed quot capita , tot sententiæ . Certe luculentissimum opus edidisti , ac unde tibi magna etiam apud posteros gloria sit ventura . Vale .

BAR-

BARTHOLOMÆUS RICCIUS

Sebastiano Corradio S. D.

Dupliciter gratulatur, & quod a Senatu Veneto sua publicæ Scholæ omnibus sententiis delectus fuerit, & quod Pontifex Maximus Bononiensium Civium rogatu ab eo Senatu impetravit, ne a Bononiensi Gymnasio abduceret. Diluit ea omnia, quæ sibi contra afferre poterat, infertque tandem, eum plane videre, Bononienses suos cum in illo ipso, tum in ejus dignitate optime ipsi consuluisse.

16. **D**upliciter tibi gratulor, utrumque vero maxime, cum quod Senatus Venetus te publicæ suæ Scholæ omnibus sententiis delegit, tum quod Pont. Max. Bononiensium Civium rogatu ab eo Senatu impetravit, ne te a Bononiensi Gymnasio abduceret, quorum utrumque ad tuam maximam gloriam pertinet, atque haud scio, an posterius etiam multo eam majorem tibi cumularit. Quare quantum res ipsa postulat, tantum etiam tibi gratulor, sed cum tibi gratulor tua ista duplici, ac tanta gloria, tum etiam tibi auctor sum, quoniam Bononiæ commodissimas ædes, ac suburbanum etiam amœnissimum cum ad rei familiaris usum, tum ad animum per ætatem recreandum tibi jampridem comparasti, neque non cum tota Civitate arcûssima jam multos annos conjunctus es amicitia, ne tranquillissimum istum vitæ statum cum quovis alio commutare quæras. Omnino Venetiæ, si Urbes conferantur, quam Bononia, multo sunt nobiliores, ac quo ex omnibus totius Orbis partibus Principes, ac literatissimi confluunt Viri. Multa tamen Bononiæ tibi præsto, quæ Venetiis desiderares, ad sunt commoda. Continuo enim quæ ex suburbano tuo ad victum legis, frumentum, vinum, ligna, ea omnia carius illic tibi essent emenda. At mihi ibi quoque pradiolum emissem, unde hæc eadem certiora, & propria haberem. Scilicet. Quasi jampridem omnia suburbana non sint a nobilioribus occupata. Longe vero gentium villam habere, quis tibi ejus usus esse posset? ad quam vel longa navigatione; vel præter navigationem aut equo, aut rheda tibi utendum esset. At sit unde etiam propius e-

mas. Quanti vero id emerēs? Arculam tuam vel duo jūgera exhaustissent. Præterea vero quid ex eo legerēs, cum vesticalia, cum tributa pendisses? At ex publicis cellis, ut cæteri, victitarem. At continuo ex lignorum penuria algeres. In vino mercedis dimidium absumeres, alterum ædium conductio tibi auferret. Sed quid ego pergo cætera? Solem non emerēs, cæterarum rerum præsentī pecunia vix copia fieret. Quæ contra Bononiæ aut a tuo suburbano, aut ex foro abunde, ac multo vilius, quotidie habes. Jam vero quanti illud est, cum per æstatem te ex urbanis tumultibus, atque ex mœnibus conclusis illis æstibus subducis, atque subtrahis, ibique aut solus inter libros otiose versaris, aut etiam cum amicis tuis lætissime agis? quo uno recreationis munere Veneriis prorsus caruisses. At amicorum nobilissimæ Villæ non defuissent, quas jucunde cum illis obivissem. Recte quidem apud amicos, sed domi nostræ rectius, & commodius agimus. Sint horum cum tua pares voluntates; tempus, quod tibi, iis quoque opportunum accadat; convenient omnia ad iter suscipiendum; rusticatio illa omnibus commoda veniat; amœnissimæ sint Villæ; ex omnibus denique rebus omnem capias voluptatem; certe cum in alieno te esse videres, atque habere, qui in tuo esse posses, recordareris, tum tua summa illa voluptas subito concideret, vultum commutares, animo ita afficereris, ut etiam ingemisceres. Equidem quotidie sum cum meis Principibus aut in Beriguardo, aut in Padi nobilissima illa ad Thealdi arcem insula, aut ad Caput aureum, alias aliis in Regiis, ac magnificentissimis eorum Villis, ex omnibus tantam voluptatem, quam quisque alius mei similis, capio, verum [ut verum fatear] cum me aliorum bonis lætari, atque in alieno regno esse sentio, continuo ea mihi delectatio languescit, atque etiam quodam modo odiosa fit. Contra vero si in mea villula sim, quæ etiam vix duo cubicula, eaque humi præbet ad habitandum, omnibus tum fruor lætitiis, neque mihi quicquam deest ad omnem voluptatem percipiendam; ut illud superius sit gaudere, quod dicunt, in sinu, hoc vero omnibus lætitiis effuse gestire. Id quod ex interiori, ac secretiori virtute illa emanat, quæ est, cum sentio, me in meo apud me esse, meoque etiam ære comparato. Quod, ut de te quoque suspi-

picer, facile adducor, cui a tuis publicis studiis hæc agendi, ut velis, aliqua ratio plurimum confert. Quid vero quod maxime ad tuam dignitatem attinet, quod Bononiensis Gymnasii Theatrum multo, quam Venetum est, cum auditorum frequentia, tum eorum etiam dignitate refertius, atque nobilius? quamquam ipse tuis locupletissimis scriptis sæpe alias totum Orbem tibi amplissimum Theatrum effecisti, proxime vero in iis, quæ in Ciceronis Brutum scripsisti, ita tibi illud patefecisti, ut jam laxius nullo modo id efficere possis. Quibus omnibus de causis plane vides, Bononienses tuos cum in te ipso, tum etiam in dignitate tua tibi optime consuluisse, qui ne in utroque tantum commodi amitteres, suo studio, suoque in te amore te secum esse voluere, quibus ut vir gratissimus eam gratiam referes, quam soles, & potes maximam, cum in eorum juventute, tum in iis, qui alieni isthuc addiscendi causa ex omnibus nationibus se conferunt, adolescentes, fideliter, ut facis, instruendis. Vale.

BARTHOLOMÆUS RICCIUS

Sebastiano Corradio S. D.

Suo malo fato, nullo facto, se minimi fieri ab eo, quem non nominat, significat; eum autem, a quo plurimum diligitur, jam annum suo summo cum detrimento abesse; curaturum tamen, ut ejus amicus intelligat, se nihil illi defuisse.

17. **S**I meum officium [hæc tecum fili] tantum apud meos valeret, quantum deberet, & quantum tua commendatio apud me ponderis habet, neque iste tuus amicus, neque cum eo multi alii mei, quibus opera mea quotidie usu venit, quicquam laborarent. Sed malo meo fato, nullo facto, pluris hic me non facit, quam qui minimi. Qui me plurimum diligit, jam annum meo summo cum detrimento longissime abest. Curabo tamen, ut amicus tuus cum te ad me de se diligentissime scripsisse, tum me etiam, quantum in me erit, sibi nihil defuisse, intelligat. Vale.

BAR-

BARTHOLOMÆUS RICCIUS

Sebastiano | Corradio S. D.

Epistolas suas magis ad personarum , quam ad ullam temporis rationem distributas esse ostendit , quemadmodum Tiro in epistolis Ciceronis fecit . Commendat , ut Camillo filio Juris Civilis corpus emat sex , aut septem aureis scutatis , quos ad eum se remissurum pollicetur .

18. **M**Eis epistolis id studii opus esset , quod tu in Ciceronis epistolis te ponere scribis . Nam cum ego non magis compositas meas instituerim , quam Tiro Ciceronis fecerit , qui eas neque in codice scripsissem , neque , quæ mea summa est negligentia , iis omnibus diem suum adscripsissem , eo factum est , ut postremo cum eas edendas describerem , magis ad personarum , quam ad ullam temporis rationem eas distribuerem . Sed redeo ad te . Si hoc præstas , Corradi , quod credo , te optime præstaturum , quid orationi profuturus sis , non video . Fortasse , ut quippiam facilius explicetur , effeceris ; major tua tamen in eo laus erit , quod eorum temporum quasi quamdam Historiam ex epistolarum ordine contexueris . Sed de his hætenus . Camillo filio Juris Civilis corpore opus est . Hic vero eorum librorum parva copia est , eaque usitatissima , ac quod gravius est , carissima . Duplo enim pluris venit , quam superioribus annis venibat , quam homines culpam in isthæc bella Gallica , unde ejus generis libri , ut solent , nunc nulli in Italiam convehi possunt , recte conferre videntur ; ego vero audio isthic meliorem horum esse conditionem . Vide quæso , num ita sit . Sed pluris illud , quam sex , aut septem aureis [ut nostri dicunt] non emo . Si eo pretio haberi potest , scribas ad me , qui totidem tibi pro eo remittam . Vale .

BARTHOLOMÆUS RICCIUS

Sebastiano Corradio S. D.

Rationem reddit, cur potius ad eum, quam recta ad Hippolytum Orium, septem aureos scutatos pro corpore Juris Civilis librario dissolvendos miserit: rogat, ut libros continuo mittendos curet, quorum nimis diuturno Camillus filius desiderio tenetur: certiore facit, se brevi duos epistolarum suarum libros ad Atestios Principes conscriptos missurum.

19. **M**itto tibi per publicum Tabellarium septem aureos, ut dicunt, scutatos. Eos tua manu Hippolyto Orio reddes, quibus pro corpore Juris Civilis librario dissolvat. Si quæris, cur hos ei recta non miserim? respondeo, hoc mihi modo tutius esse visum; non quin illi omnia facile confidam; sed quoniam is minus est in Urbe notus, neque ad quam aut domum, aut Tribum ego has literas inscriberem, satis sciebam. Accedit, quod is forte abesse nunc poterat, quod de te nihil dubitare poteram. Eum ad te accersi jubebis, si aderit; si absit, cum redierit, pecuniam illi meo nomine dinumerabis, eumque ad libros continuo mittendos, quorum jam nimis diuturno Camillus filius desiderio tenetur, urgebis. Brevi expecta epistolarum nostrarum libros duos ad Atestios Principes scriptos, quasi decem reliquorum ad amicos fidelissimos prænuntios. Vale.

BARTHOLOMÆUS RICCIUS

Sebastiano Corradio S. D.

Rogat, ut Ludovici Rasponii filius, quem is domi ei dederat ad erudiendum, ita illi commendatus sit, ut Camillum filium suum haberet, polliceturque, eum haud frustra tantum officium apud equitem gratissimum esse collocaturum.

20. **L**udovicus Rasponius meus est perverus amicus, sed hoc mihi cum multis aliis commune est,
ea

ea Vero ejus viri humanitas est, ut me in primis colat, atque ita mecum familiariter agat, ut, si cum multo se majore ageret, humanius non faceret. Is me rogat, ut Paulum filium suum, quem domi tibi dedit ad erudiendum, ea de nota commendem, qua facerem, si Camillum filium meum tibi commendarem, cujus honestissimam petitionem, [ne tecum multis agam,] loco meæ commendationis accipies, ejusque filium ita commendatum habebis, atque Camillum filium meum haberes. Id quod non eo tamen facio, ut verear, ne tua sponte omnia ei, & quæ ad sanctissimos mores, & ad optimam instituendarum literarum rationem pertinent, quorum utrumque ita in te conjunxisti, ut utrum sit majus, haud facile cerni possit, sis æque, ut cæteris, præstaturus; sed ut ejus parenti, hoc est, parenti, quibus enim verbis id parentis affectus in filios interpreter melius non habeo, morem gererem. Siquid tamen tuæ illi optimæ voluntati, atque assiduo docendi instituto tuo separatim huic etiam addi potest, ut mea causa addas, te etiam, atque etiam rogo. Mihi enim gratissimum erit, si Paulus ad patrem suum, is autem ad me hanc meam commendationem magnum pondus apud te habuisse, hacque tibi se multo commendatiorem fuisse, perscripserit. Tametsi haud frustra tantum tuum officium apud equitem gratissimum polliceor te esse collocaturum. Vale.

BARTHOLOMÆUS RICCIUS

Sebastiano Corradio S. D.

Summam letitiam suam effundit propter spem a se conceptam, Summum Pontificatum Hippolyto Cardinali suo delatum iri, rationibusque multis conatur persuadere, Summam illam Dignitatem ipsi committendam esse.

21. **L** Aurentium Castium, quem mihi secundo commendas, quo vultu, quibus verbis acceperim, quoque studio illi apud Sarachium nostrum affuerim, is tibi referet: a me autem nihil aliud habebis, nisi me in summa esse spe, summum istum Pontificatum Hippolyto Cardinali nostro omnino iri delatum. Quod si ita sit,
Dii

Dii boni! quæ gestiens nostra omnium lætitia? quæ totius Civitatis alacris exultatio? quod agri? quod omnium Municipiorum solidum gaudium? quæ præterea universæ Europæ pax? quæ Principum, ac Regum animorum concordia? quæ denique ætas aurea cum hac nostra conferri poterit? Cœlo lactis imber effluet; terræ sua sponte uberrimas fruges ferent; vites nectar effundent; ex arboribus suavissimi fructus legentur; ver perpetuum floribus mire fragrantibus totum Cœlum complebit; saluberrimi venti spirabunt. Sed quid plura? Nihil ad Deorum vitam in terris agendam, præter unam æternitatem, desiderabitur. At bone, Ricci, quid agis? quo isto tuo desiderio raperis? quid tantum moliris? Id quidem magis optari, quam sperari licet. Nullus enim mos est, tam nobiles, tamque illustres Cardinales ad summum illum gradum admitti solere, ne illi postea Familiæ suæ autoritate autoritatem illam magis opprimerent, quam regerent. In more quidem multum poni, nullas inficiās imus; sed quid mirum, si novum institutum in re maxima, maximeque necessaria inducatur? Quasi vero quotidie vel in optime institutis Civitatibus veteres leges non abrogentur, novæ surrogentur, moreque novo vetus mos, & consuetudo tollatur, atque etiam optime tollatur. Ut quantum ad consuetudinem, ea magis temporum rationi obtemperare, quam tempus ipsam sequi debeat, fiatque præter morem sapius, cum e Rep. esse probe constet. Quod vero metuis, ne si potentior Princeps Pontifex fiat, tota Resp. occupetur, aut saltem de ea magna fiat imminutio; id magis ab istis providendum fuit, a quibus omnibus ea plaga jam multos annos illi graviter, atque altius inflicta est; qui cum suos haberent, quasi terræ filios, ut eos cum nobilitate, tum re etiam amplissima auctos relinquerent, palam, atque insolenter ista via grassati sunt. Ex qua teterrima Resp. imminutione facta ingentia etiam bella usque ad nobilissimarum Urbium everisiones sunt postea consecuta. Quorum omnium nihil est, quod ab hoc nostro verearis, qui suos ejus generis dignitatis habet, cui parum adjungi possit; in iis autem opibus ita abunde constitutos, ut magis ab illis, si quis casus ferat, ipse juvari, quam ut in eos is quicquam de suo conferat, facile possit; ut hac ratione tantum absit, ut nobis iste Pontificatus eripiat, ut nobis porius, quam

cui-

cuiquam alii sit omnibus sententiis deferendus. Ea vero ratione, quæ sequitur, quoniam nobilissima est, quæque cum huic Magistratui semper opportuna accidit, tum hoc tempore magis accidere non posset, jampridem eum nobis delatum esse oportuit. Id autem est, ut otium universæ Reip. Christianæ constituatur, ac pax perpetua in ea concilietur: quod nunquam fiet, nisi bellum hoc, quod inter duos potentissimos Principes Cæsarem, & Galliæ Regem cum diuturnum, tum etiam nefarium acerrime geritur, tandem aliquando prorsus extinguatur, atque utrique de manibus arma ista eripiantur; in cuius postea locum pax, atque optima eorum animorum consensus inducatur. Ad quod sanctissimum opus integre præstandum, atque brevi conficiendum, nullus in illo gravissimo ordine aptior, ac natura ipsa magis opportune factus, quam hic noster, reperitur. Hic enim, qua familiaritate cum Rege conjunctus est, cum eo aget & fidelius, & liberius: qua vero ejus frater Hercules Cæsarem summa colit observantia, facile & ipse ejus animum trahabit, simulque una uterque cum utroque usque eo Christiane aget, quoad hoc otium, hanc quietem, ac tranquillæ agendi rationem suis comparat: cujus quidem optimi animi sui uterque non parvam ante significationem dedit: semel ille, cum proxime Senæ, nomine Regio, præfuit, quæ Civitas quamdiu sub ejus imperio mansit, nihil in difficili illa obsidione durius sensit, nihil indignum pertulit; ut vero Imperium ad alium delatum est, continuo totius agri quaque versus ingentem vastitatem, in Urbe vero præter cætera, quæ belli insolentia cum a nostris ipsis calamitosa, tum ab hostibus etiam turpia inferuntur, famem prope Perusinam perpeffa est. Quod quid aliud sibi præferret, quam hunc nostrum tum quoque hanc unam concordiam, atque Reip. incolumitatem prudenter spectasse, qui non meridie planius perspicit, is cæcus, atque amens est. Hujus vero Frater Hercules totum hoc belli tempus in hac sanctissima pacificatione versatus est, neque quicquam in tota vita tam studiose, tam anxie, tamque omni contentione egit, atque conatus est, quam cum hujus conglutinandæ pacis omnem dieque, noctuque aut per literas, aut per certissimos nuntios, aut per se etiam ipsum præsens optimam daret operam, qui nunc Fratri Pontifici adjunctus, quod opus habet

habet optime inchoatum, atque ex magna parte informatum, cum eo felicius absolveret. Præterea vero, si, ut dicitur, aliud vitæ genus, atque alius conditionis status alios mores affert, atque aliam vivendi rationem postulat, qui ab hoc non magis sperandum est, cum ei gregi præfectus fuerit, cui eum Deus Optimus Maximus præfecisset, quam ut primo quoque tempore in id unum incumbat, atque omnia sua studia conferat, omnesque conatus intendat, ut ei eam pacem pariat, quam Christus Opt. Max. Pontificibus suis discipulis, cum se ad mortem pararet, reliquit, ut se mutuo, ac fraterne inter se amarent, ac vicissim diligerent: ut unus omnium in Christo, a quo horum alter cognomentum Christianissimi sibi adinvenit, alter vero ei se acerrimum defensorem profiteretur, animus & voluntas eadem esset. Certe hic alio animo, quam esse deberet, esse non posset, ut Reip. suæ cum ad præsens otium, tum ad speratam Cœli gloriam consuleret, atque prospiceret; in qua tamen una agendi ratione commutanda, unum id mihi valde adversaretur, quod non multum ei mutandum, atque a se ipso discedendum esse video, qui semper illo animo fuit, ut uni paci omnes hujus generis belli comparatas victorias facile posthaberet; quemadmodum [ut paulo ante dicebam] in bello Hetrusco comprobatum est; quod ita facile ducebat, ut nihil sentiretur, magisque ad concordiam res, quam ad ullam incommodi suspicionem omnibus spectare videretur. Quod genus officii tam necessarium, quam quod maxime, a quovis alio qui ex minutis istis Cardinalibus Pontifex fiat, sperari non potest. Quanti enim superiores quosdam [ne quemquam nominem] aut Cæsar, aut Rex fecerit, res ipsa indicat, idque summa cum Reip. clade, atque turpitudine indicat. Neesse est enim, ut navis non solum remis, ac ventis in cursum suum impellatur, sed ut illa forma ea sit, quæ ab illa ad celeritatem plurimum adjuvetur: quemadmodum etiam musica instrumenta, quæ ex una materia alium sonum, ex alia alium referunt: ita in hoc, atque adeo in omnibus Magistratibus, plurimum interest, an ex humili genere, an ex illustri Familia ortus sit, qui eis præficiatur, quique domo non parum auctoritatis in illam secum afferat. Nisi hoc quoque loco mihi objicias, aliquot etiam ex Illustrissimo illo Ordine non deesse, qui cum

cum majorum suorum illustri dignitate, tum suoapte etiam bono, ope, ac gratia plurimum possunt, pollentque, qui hanc Pontificiam dignitatem dignitate propria tollant, au-geantque quam maxime. Ad quod respondemus, [quod tamen cum eorum bona gratia dictum volo] istos quidem, [sentio enim quos mihi significes] præclaros Viros, ac nobilissimos esse, sed qui tamen cum hoc nostro minime conferendi sint. Prudentia quidem, ætate, ac gratia, ut pares cum nostro sint, possum concedere, certe cum majorum dignitate amplissima, atque eorum etiam, qui nunc sunt, aguntque in Imperio multo etiam ampliori, postremo opibus, ac rerum omnium summa copia, quæ non essent aut longe aliunde expectandæ, aut a suis per tributum extorquendæ, si quid aut a Turcis, aut a Christianæ Fidei rebellibus, quorum utrumque jam multos annos imminere videtur, ingrueret adversi, neque ipsi, se multo inferiores esse, negare audebunt. Sed hæc ita sint, inquires, quoniam rationibus, ut ita esse fatear, me vincis, certe tu contra hoc mihi nunquam negabis, quin suspicandum sit, ne quas antea Cardinalis Regias partes tutatus esset, Summus postea Pontifex factus, easdem tueretur, atque eo etiam ardentius, ac fortius, quo in potentiori auctoritate constitutus esset, tueretur; quo etiam fieret, ut majus belli incendium excitaretur. Recte quidem nunc suspicari videris, sed ego te facile omni ista suspicione prorsus libero. Certe, Corradi, hic noster Regi plurimum debet, isque Princeps est, qui in referenda gratia, quam in accipienda, cumulator esse solet, sed non eo sequeretur tamen, ut hujus tantam remunerationem cum ullius tam magno faceret detrimento. Probe enim tenet, tam illos ingratos esse, qui ex alienis opibus gratiam referunt, quam illos illiberales, qui non ex suo eandem ineunt; quod vitium vel morte ipsa cautius devitaret. Verum fac, ut aliquid apud ejus animum remanserit, cui nondum in Rege remunerando [ne quid de successione illa tibi nunc dicam] satisfecerit, in nulla re alia majus beneficium in eum conferre, neque se gratiorem ostendere posset, quam si illi a potentissimo, atque infensissimo, infestissimoque hoste pacem afferret, quam si ejus Regnum in perpetuo otio constitueret, quam ærarium jampridem exinanitum clauderet, atque repleret, quam si populorum omnium gravissimis, atque assiduis

tri-

tributis finem imponeret. Hæc magis sunt, in quibus se Regi suo gratissimum præstare studeret, cujus etiam amplissima in se collata merita eo superaret, quod in eo ipso gratificando universæ Reipub. Christianæ gratissimum faceret. Ac quoniam in una pace constituenda totius rei summa versari videtur; quid si Regum alter, atque etiam uterque pacem hanc recuset, conditiones non probet, easque alter alteri iniquiores imponat? Quid, inquam, tum ageret iste tuus Princeps Pontifex? Quid? prudenter ille quidem, ut in cæteris rebus omnibus ageret. Nam quod ad conditiones attinet, eas illis ipse ut æquissimas proponeret, quæque nisi summo scelere possent recusari, diligenter videret. Si tamen nostro aliquo malo fato accideret, ut ad pacem novum consilium inire oporteret, ne recurram in Sanctissima persona ad Platonis præceptum in tali casu, qui jubet in Civilibus discordiis, qui neutram partem secuti essent, tum alteri, atque adeo potentiori parti se adjungere, quorum accessione facta, quæ se pars altera inferiorem videret, postea ab armis discedere, atque æquissimas condiciones accipere cogere; atque ita aut sua voluntate, aut vi coacta arma deponeret; ne, inquam, ad arma a suis Sacris summum Pontificem avocem; id tantum eo casu ageret, rem suam Christianam curaret, nulli eorum adhærens, utrique pie studeret, gregem suum pace, ac lege optime pascens; illos vero interea cum assiduis literis, tum etiam idoneis nuntiis exhortans ad ista impia arma deponenda. Quorum si tanto ardore tamen tenerentur, summamque in iis sibi gloriam positam esse putarent, tandem in Turcas Christiane coirent, ac fœdus omnium Sanctissimum ferirent: deinde ad Christi Servatoris nostri sepulchrum recipiendum, ad amplissima Regna sibi comparanda, atque ad omnibus copiis copias suas honeste locupletandas arma illa sua, suas vires, suam illam virtutem bellicam, sua isthæc infinita odia converterent, proponere non cessaret. Quæ omnia cum in Christi honorem fierent, nullum dubium est, quin certissimam victoriam inde essent relaturi; ac quæque inde acquirerent, ab universa Ecclesia recte acquisita probarentur: qui vero in præliis cecidissent, eorum animæ recta in Cælum, in æternam illam Dei gloriam evolassent. At unus scrupulus etiam mihi restat; id autem est, quod, qui non ita sunt nobis

biles Cardinales , semper se postea contemni , atque in nullo pretio haberi a tanto Pontifice arbitrantur . Quorum hic suffragiis in summum illum Pontificatum delectus sit , eorum non meminerit ? ac memoriam suam omni genere erga illos officiorum non testaretur ? quem modo optime de cæteris merentem faciebamus , eum nunc in referenda gratia negligentem arbitrari possumus ? Utinam mea auctoritas tanta esset , cui tanta fides adhiberi posset ; equidem eis pollicerer , quicquid huic aut auctoritatis , aut amplitudinis accessisset , hunc id totum in eorum commoda sine ulla dubitatione esse collaturum ; neque quicquam apud eum fore tam carum , quod eorum gratiæ non libenter post esset habiturus . Hoc loco præterea iis quoque rumoribus , quos ab imperita multitudine spargi audio , occurrerem , nisi jampridem nostra integritas omnibus perspecta esset : nos veterum injuriarum nihil meminisse , neque Herculem Fratrem Fratris Pontificatu quicquam insolentiorum fore , cum sua optima natura , tum etiam singulari prudentia , ut vicinis quicquam propterea ab eo timendum esset , quibus non ut vicinis , sed alteris ut parentis , alteris ut fratrum loco & nunc utitur , & semper est usus , in omne etiam tempus uteretur . Sed jam dicendi finem faciam . Si his rationibus omnibus , quas tibi ab nostro adduxi , Rerum publicarum summa recte committitur , hæc jam multo ante huic nostro committenda fuit ; neque tamen , quod hoc ante non factum sit , eos , qui in Pontifice creando suffragia ferunt , hoc ipsum vidisse , multo vero minus contempnissse , arguo . Alterum enim nimis crassæ ignorantix , alterum effrænata immanitatis fuisset ; sed in hunc diem Deum Optimum Maximum hanc gregis sui summam custodiam distulisse arbitror , ut ex multorum aliorum administratione hæc nostri gloria splendidius elucesceret , atque eandem iis , qui postea essent secuturi , viam hic ad sanctius hanc Remp. administrandam præmonstraret , atque præmuniret . Arbitror , te jam videre quibus rationibus tantam spem mihi confecerim . Si quid tamen contra est , quod ego non viderim , Deus viderit . Vale .

BARTHOLOMÆUS RICCIUS

Venturæ Pistophilo S. D.

APPARATUS sui partem mittens orat, ut Diploma ab Alphonso Principe sibi curet, quo ab alienis cum impressoribus, tum etiam venditoribus, quantum ejus auctoritas sit, optime caveatur.

22. APPARATUS mei; ita enim opus hoc inscribere placuit; partem tibi mitto, ut primum videas, utrum in ejus hac publica editione ullam studiosis utilitatem simus allaturi; deinde, si id ita fore statueris, ut meæ etiam peramice consulas. Id autem effeceris, si Diploma ab Alphonso Principe nostro mihi miseris, quo ab alienis cum impressoribus, tum etiam venditoribus, quantum ejus auctoritas sit, optime caveatur. Vale.

BARTHOLOMÆUS RICCIUS

Venturæ Pistophilo S. D.

Gratias agit, quod non solum unum, sed duo Diplomata miserit, optionem deferens, utrum malit, id sibi sumat. Pollicetur, se ad eum omnium primum, cum volumen excusum fuerit, missurum.

23. Ita agitur cum amicis, Pistophile, ut tu cum tuo Riccio egisti, cui a lectis ejus literulis [ut con-jicere videor] neque iis, quam amicitia nostra postula-bat, vehementioribus, non solum unum, sed duo Di-plomata misisti, optionem deferens, utrum mallet, id mihi fumerem? Equidem pro utroque tibi gratias ago quam maximas, idque eo magis, quod ita mos est, quam quod id te a me expectare sciam; etsi eorum al-terum mihi satis superque esse potuisset. Cum totum vo-lumen excusum, ut dicunt, erit, primum omnium illud expecta. Vale. Venetiis.

BARTHOLOMÆUS RICCIUS

Gotardo Costio S. D.

Se ei in amore mutuo respondere significat, mittitque epistolam a se conscriptam ad Herculem Atesium de Prænomine, Nomine, & Cognomine ad Latinam rationem, ex prælis recentissimam, oratque, ut perscribat, utra ratio ei magis probetur.

24. **N** Unquam tibi concedam, ut ipse maiorem voluptatem ex mea consuetudine Ferrariæ caperes, quam ego facerem ex tua. Sed ne iudex sum iniquus, concedo, ut parem ceperis. Nunc vero cum disjuncti sumus, credo item utrique æque evenire, ut, quod præsentia facere non possumus, id memoria repræsentemus. Mihi quidem non solum nostri sermones, congressus, atque omnes vel brevissimæ consalutationes in animo obversantur, vetum etiam ita inhærent, ut nunquam evelli possint. Cujus amoris erga te mei summus mihi testis est Portius tuus, cum quo sum quotidie istud tui desiderium leniens, quem adolescentem & summa probitate, summoque ingenio præditum, ac commutata persona libenter te mihi alterum esse puto. Sed quid ego testem extrinsecus quæro? quasi vero proximæ meæ ad te literæ non idem planissime testentur, quas, si recte diei rationem inibis, eodem die, quo tuas, videbis esse conscriptas, quas cum leges, continuo aut omni lætitia exilies, intelligens me tibi mutuo in amore respondere, aut etiam dolebis, quod a me in eo facile vincaris, qui ea ad te multo ante mea sponte, quam tu tuis literis ea ipsa efflagitasti, tam longe miserim. Mitto tibi epistolam ad Herculem Atesium, in qua de Prænomine, Nomine, & Cognomine ad Latinam rationem multa disputantur, ex prælis, ut dicunt, recentissimam; utra vero magis ratio tibi probabitur, feceris mihi gratissimum, si ad me perscripseris. Sisena, ut isti, Sisenius, ut nos scribimus, item Andreas Canalius tibi salutem rescribunt. Balthassar Hispanus bonus sane vir jampridem decessit; Camillus filiulus te salutat. Vale.

-BAR-

BARTHOLOMÆUS RICCIUS

Gotardio Costio S. D.

Sibi gratum futurum significat, si rem totam explicet, cur non frequentes ad se literas mittat; suam magnam esse propensionem ad omnes literatos Viros fraterno complectendos; se quamprimum Manfroniam defensorem, & Oratorem de finibus agri Bononiensis, & Ferrariensis misurum; ab omnibus quidem amicis eum communiter salutari, a Sisenio solo salutem dictæ literas adjunctas quam suavissime scriptas, aliaque subijcit ad Antimachum, & Camillum filium spectantia.

25. **C**Ur tuarum literarum infrequentia causam in meam Imitationem, atque in nescio quam epistolam de nautis transferas, non equidem intelligo. Quid enim liber meus de Imitatione te a scribendo deterreat, conicere non possum; multo vero minus, quæ epistola illa sit de nautis, qui ad te de eo hominum genere, quod sciam, nihil unquam scripserim. Quare mihi pergratum feceris, si rem totam plenius explicabis. Quod autem mihi gratias agis, quod te in tuis quoque amem, tu quidem grate, sed & communibus studiis, & amicitia nostra indignum facis. Equidem, Costi, Portium tuum amo cum tua causa, tum etiam mea natura. Plane enim nosti, quæ mea propensio sit ad omnes bene literatos Viros fraterno complectendos. Tamen is quoque est ea integritate, atque probitate, ut, qui ab omnibus ametur, dignissimus sit. Scriberem ad te, ut ei meam omnem operam pollicereris, nisi id ipsi non solum antea fecissem, sed etiam præstitissem. Quicquid enim adhuc potui studio, gratia, ei non defui, neque re etiam familiari, si opus erit, sum defuturus. De Manfroniana defensione nunc tibi quidem obsequi non possum, sed brevi curabo, ut possim; cui ea quoque accedet defensio, quam nunc de finibus Bononiensis, ac Ferrariensis agri habeo in manibus prope absolutam, sane quidem, ut mihi videtur, justam, ac fortasse non ineptam Oratorem. Amicis, quibus scribis, tuo nomine salutem dixi, quæ omnibus tam grata fuit, ut nihil magis, Sisenio vero multo gratior.

Is enim est homo, qui rem interius confiderat. Quare cum omnes te communiter resalutent, solus saluti dictæ suas literas adjunxit. Eas igitur lege quam suavissime scriptas. Pene mihi fugerat de Antimacho. Is & annis gravis, & graviore morbo, si quid tamen gravius est senio octogenario, affectus jam tertium mensem in lecto cubat; dabo tamen operam, ut is per Fabium filium suum intelligat, se absenti tibi quoque plurimum amari. Nam qui ei salutem dicam, nihil est; magis opus esset, ut tu ex arte tua illi illam afferres, cui tamen Fabius filius ejus facultatis adolescens non imperitissimus præsto adest, atque omnia, quæ filius optimus optimo patri debet, pie præstat. Camillus filiulus suavissimus, ac mellitissimus puer, nisi ego sum pater, tui memoriter meminit, & cum parente suo te plurimi facit. Vale. Feriæ VI. Cal. Januarias.

BARTHOLOMÆUS RICCIUS

Bartholomæo Portio S. D.

Insignem Abiosii humanitatem laudat; dolet, eum non offendisse Venetiis Cornelium; ejus naturam, mores, & orationem eam esse ait, ut primo sermone eos, quibuscum loquitur, ita devinciat, ut sine ulla amicorum commendatione ei libenter studeant.

26. **N**on miror, quod te meus Abiosius lectis meis literis tam amice, eoque vultu, quo veterem amicum faceret, acceperit, tibi quæ omnia pollicitus sit, quæ ab eo tibi usui forent. Ejus enim ea est humanitas, quæ in ullo esse posset; in me vero is amor, quo æmo alius alium prosequitur. Quare si te ita complexus est, nihil mihi mirum accidit; magis mirum accidisset, si contra evenisset. Sed redeo ad te. Ego, Porti, sic soleo commendare, quos dignos mea commendatione arbitror, ut te sum ratus, ut nihil omittam. Doleo, te meum Cornelium Venetiis non offendisse. Vidisses in eo quoque, quanti ego te faciam. Tametsi tua natura, tuique optimi mores, atque adeo oratio ea est, ut primo sermone ita, quibuscum loquaris, tibi devincias, ut sine ulla amicorum commendatione tibi libenter studeant. Doleo equidem,

dem, quod te diu cariturus sum; sed tua causa contra lætor, qui in ista illustri optimorum Virorum luce ages, ubi & multum nominis, & non parum studiorum tuorum utilitatis consequi poteris. Vale, Abiofioque nostro salutem meo nomine dices.

BARTHOLOMÆUS RICCIUS

Bartholomæo Portio S. D.

Se moleste tulisse significat, veteribus medicis invidiæ eum fuisse; sibi tamen gaudere, illique gratulari, quod nulla injuria sit, quæ inimicis nostris facilius condonari possit, quam ea, quæ ex invidia infertur, ut quæ suis ipsa gladiis seque, nosque assidue ulciscatur.

27. **T**uas litteras accepi, quibus mihi significas id, quod de nostro Madio antea pernoveram, te isthic veteribus medicis summæ invidiæ fuisse; quod quidem, ut debui, moleste tuli. Malim enim id, quod æquius erat, te ab omnibus amari, quam a quoquam odio haberi. Sed quoniam eos fregisti, atque ut digni fuerunt, pertractasti, mihi gaudeo, tibi vero gratulor. Scito tamen, si qua ulla injuria est, quæ inimicis nostris condonari possit, eam esse, quæ nobis ex invidia infertur, ut quæ suis ipsa gladiis seque, nosque assidue ulciscatur. Quare illis concedere possumus, ut quousque invidia sit, ita isti nobis invideant, ut medii disrumpantur. Non enim arbitror aliis armis rem geri, quam quæ in medendi officina constantur, quarum scientiam tu optime tenes, neque vereor, quin victor semper evadas. Sed in iis literis manum tuam non agnosco; neque tu quicquam; recte tamen arbitror. Aut enim calami defectu, quo interdum etiam litterarum solita forma non perficitur, aut aliqua animi perturbatione, qua eas scripisti, evenisse, facile adduci possum, ut credam; si quid tamen, cura, ut sciam. Vale.

BARTHOLOMÆUS RICCIUS

Joanni Renio S. D.

Significat, se certiorē esse factum, eum quotidie gravius oculorum morbo laborare, seque id permolestē ferre. Licet autem unus visus rebus omnibus in hac vita jucundior esse videatur, hortatur, ut nihilominus in Christo, ut facit, acquiescat, & exterioris luminis amissionem interiori lumine consoletur.

28. **C**Um ego de te de quodam tuæ Diœcesis, qui hac forte Bononiam iter habebat, diligenter quærerem, is mihi post ea, quæ de tua integritate, ac summa in gregem tuum pietate prædicavit, te quotidie gravius oculorum morbo laborare, atque ita, ut parum abesset, quin eorum usu captus esses, retulit; quod, ut debui, tui permolestē. Multa enim sunt homini in hac vita jucundissima, sed unus visus omnibus mihi jucundior esse videtur, quo uno nobis ablato quid in reliqua vita boni accidere possit, non video. Quare isto tuo tanto bono amisso tantum doleo, quantum te, quod plurimum est, amo. Sed quoniam ita hominum conditio est, ut omnibus miseriis subjecta sit; ut iis lætandum est, qui integra valetudine perfruuntur; ita contra, qui in male affecta sunt constituti, æquo animo ea est perferenda, ut te facere scio, quem ego novi secundam fortunam moderatissime semper tulisse, neque dubito, quin etiam in hac adversa parem virtutem adhibeas perferenda. Nam qui ad extremam senectutem vitam suam honeste produxit, ut eam quoque eodem tenore, quo quo ea profecta est, probe absolvat, nulli dubium esse potest. In Christo tuo, ut facis, acquiesce, atque ejus interiori lumine, quod a te nulla vis eripere potest, Mundi, atque exterioris hujus luminis amissionem consolare. Vale.

BARTHOLOMÆUS RICCIUS

Lazaro Sabellio S. D.

Animos addit, ut adversarii artes nihil metuat, admonetque, ut, si quid, se absente, ille commoliatur, efficiat, ut in suum reditum res differatur.

29. **C**Ur ego tibi in hoc non gratificer? Ecce igitur, quod cupis. Si quid impurus ille, me absente, commoliatur, continuo cum nostro eris, ac, ut in meum reditum res differatur, efficiet. In quo tibi non multum erit elaborandum. Is enim ita mihi discedenti benignissime recepit. De illius vero appellatione quid egeris, nihil scribis. Vale. Atilio, Sylvio, Canasio salutem. Bononiæ Idib. Octob. MDLVII.



BARTHOLOMÆI RICCI

LUGIENSIS


EPISTOLARUM

LIBER TERTIUS.

BARTHOLOMÆUS RICCIUS

Bernardino Masejo S. D.

Gratias agis & de libris suis de Imitatione, & de pecunia sibi missa. Se graviter angere significat, quod Pontificiis literis ita distineatur, ut nulla ipsi ad amicorum literas vel breviter dictandi facultas detur. Hortatur, ut velis, remisque contendas, ut insigni Galero ornetur, donec ei fortuna secunda favet.

1.  E proprio [quod dicunt] motu gratias ago; commodius agi non poterat. Isto enim modo & libris meis de Imitatione, & rei nummarie exilitati optime confuisti. Quare iterum tibi gratias ago, atque hasce posteriores tanto etiam majores, quanto mihi magis opus est presenti pecunia, quam sperata. Quod ad tot meas ad te amantissime scriptas literas ne literam quidem unquam, tua mehercule causa doleo magis, quam mea. Nam quod Riccium tuum, quem tantum amare solebas, a quo certe scires, te quamplurimi fieri, ex omni tua scriptione deleveris, cum tu in nullis meis scriptis non fideliter legaris, non sine aliqua tua nota factum videri potest. Sed, cum te sic postea tuis istis Pontificiis literis distineri video, ut ad amicorum literas nulla tibi, vel breviter dictandi, facultas detur, me multo acrius angit. Nam te sic eo modo occupatum video, ut vix cibum capias, nedum cum Musis tuis te quicquam oblectare possis. Sed recta erunt omnia, si eo perveneris, quo tu maxime studes, & omnes tui vehementer exoptant, ut insigni illo Galero orneris. Urge igitur

gitur tantam occasionem, Masei. Tende ad istos ventos vela omnia; omnes auras cape, ut portum prius capias, quam secundissimi istorum ventorum flatus te prorsus deficiant. Nam; si te in alto deferant, nullo inde postea remigum impulsu eruere; in anchoris, mihi crede, moriere. Vale.

BARTHOLOMÆUS RICCIUS

Bernardino Masejo S. D.

Literas has reddentem commendat, ut ei conditionem aliquam nobilem querat, id tum sibi, tum Ferrinio amico suo gratissimum futurum significans, rogatque, ut libere perscribat, quid de opere suo de Imitatione sentiat.

2. **H**ic, qui tibi has literas reddidit, Ferrinii propinquitatis vinculis conjunctior est nemo. Hic a me contemdit, ut eum tibi commendem. Quamobrem id faciat, non satis video, qui illum tanti apud te esse sciam, ut ab eo tibi ipse, si usus veniat, facile commendari possem; tamen, quoniam ita ei placuit, eum tibi ea de meliore nota commendo, qua soleo, cum aliquem de optima commendo. Conditionem isthuc querit aliquam nobilem: Si ejus opera ad aliquid tibi usus esse putares, ea fideliter uti posses; sin minus, isque apud aliquem principem Virum tua opera collocabitur, mihi gratissimum, Ferrinio autem multo feceris gratius. Meum opus de Imitatione te percurrisse arbitror. Si per tuas ingentes occupationes, quid de eo sentias, ad me perscribere liceret, id esset mihi mirum in modum gratum. Vale. Magiolio, ac Rugerio nostris salutem. Ferrariae. Quarto Idus Septemb. MDXXXIII.

BARTHOLOMÆUS RICCIUS

Bernardino Masejo S. D.

*Gratulatur de Cardinalatus Dignitate ei delata, optatque,
ut ad ultimum Dignitatis gradum summa cum Reipubl.
Christiana utilitate feliciter perveniat.*

3. **E**T vetus amor erga te meus, & ista tuæ summa Dignitatis accessio id gratulationis genus a me postulabat, quod maximum, atque amicissimum esset, quod ego quoque, ut præstarem, omnia exquisivi. Sed, cum utroque meum ingenium, atque dicendi facultas multo inferior esset, qui tuos sanctissimos mores, Romanaeque istas literas semper plurimi feci, Cardinalatus autem Dignitas uno tantum gradu a Summo Pontificatu distet, veritus, ne dum ego utrique æque respondere studeo, neutri satisfacerem, hanc vulgarem, quam nullam omnino, gratulationis significationem facere malui. Tibi igitur gratulor, Masei optime, vereque gratulor cum tantam istam tuæ Dignitatis accessionem factam, tum quia primus eam in Familiam tuam intulisti; quasi qui posteris tuis ad amplissimam gloriam hanc viam aperueris. Sed nimis hæc, sentio, vulgaris est mea gratulatio. Quid enim frigidius, aut quid jejunius diceret, qui te de facie tantum novisset? Utinam, Masei, huc animum meum expromere possem, atque summam in te benevolentiam meam par oratio sequeretur, longe, mihi crede, hæc post se etiam amplissimi Sacerdotii Dignitatem relinqueret, amoremque in te meum æquaret. Tamen si haud scio, an magis isti Dignitati mihi gratulandum sit, quod illo Viro illam auctam esse video, qui in eam multo plus splendoris, quam acceperit Dignitatis, omnino attulerit. Utrique igitur gratulabor, & quod illa tua virtute plane cumulata est, & tu ad omnium Dignitatum cumulum una illa proxime accessisti, cui utrique suam istam tantam gloriam diurnam [quando perpetuam per rerum conditionem mihi non licet] maxime opto. Id vero tibi amplius; ut ad ultimum Dignitatis gradum summa cum Reip. Christianæ utilitate feliciter pervenias. Vale.

BAR-

BERNARDINUS MAFEJUS CARDINALIS

Bartholomæo Riccio S. D.

Significat, se perhonorifica illius gratulatione sic affectum, ut nihil eorum rejecerit, quæ sibi tribuerit, licet eum amore lapsum facile intelligeret. Addit, se velle eum putare, a se hæc vel per jocum, vel per audaciam dicta; nullius tamen literas se æque, atque illius delectasse, in quibus eum totum, quasi in speculo, viderit amore incensum, lætitiæ quadam abundantia gestientem.

4. **C**UM in manus calami sumpsissem, ut literis tuis, quas ad me proxime dedisti, accuratè, graviterque rescriberem, repente, nescio quo pacto, mutavi consilium, ut familiarius tecum agerem: tu vero isthæc velim dicas nemini. Ego ille temperans, omnis gloriæ contemptor, a vanitate, ut mihi videbar, alienissimus, perhonorifica illa tua gratulatione sic affici me sensi, ut nihil eorum rejecerim, quæ mihi tribuis, licet te amore lapsum facile intelligerem. Quare quoniam eum mihi errorem tuæ literæ objecerunt, qui jucundissimus est, cave eum mihi eripere coneris. Erit enim etiam fructuosus; siquidem necessitatem mihi quandam imponet, ut, qualem me tuæ literæ faciunt, talem me præbeam. Sed, hæc me vel luisse, vel audacter dixisse, putato, quod utrumque mihi apud te licet. Quod sequitur, in pauca conferam. Quo enim verior, eo brevior debet esse oratio. Cum multi mihi, quod ad hunc gradum ascenderim, gratulati sint, nullius tamen literæ me æque, atque tuæ delectaverunt, in quibus te totum, quasi in speculo, vidi amore incensum, lætitiæ quadam abundantia gestientem; præterea in me effluentem ea, quæ quidem quo minus agnosco, a meque longius abesse sentio, eo majorem gratiam tibi debeo, majoremque benevolentiam, quam me tibi præstaturum semper esse confidas velim. Vale. VIII. Cal. Junias Roma.

BAR-

BARTHOLOMÆUS RICCIUS

Lazaro Bonamico S. D.

Philippum Ferrium Civem suum , ac discipulum in magna rei exiguitate constitutum commendat , ut ei locum quaerat apud aliquem nobilem Civem aut in docendis ejus filiis , aut quoquo alio modo , quo possit studiis suis facilius operam dare .

6. **P**hilippus Ferrius , qui tibi has literas reddidit , meus est & Civis , & discipulus , quorum alterutrum vel ad singularem quamvis commendationem plurimum valere potest , utroque vero nihil magis . Accedit tamen ad hæc summa adolescentis probitas , ac bonarum literarum mirum desiderium ; quo posteriore factum est , ut tuas sequeretur , teque magistrum maxime cuperet . Isthuc itaque se contulit , ut sub tua disciplina utramque linguam excoleret ; sed cum victum , & , quæ reliquæ necessaria sunt , sustinere ipse per rei suæ exiguitatem minime posset , locum querit apud aliquem nobilem Civem , aut in docendis ejus filiis , aut quoquo alio modo , qui illi ad hæc expediat studia . Huic ego omnia a te pollicitus sum , quæ a me habere posset , si isto essem in loco . Scio enim te , quicquid mea causa faceres , meorum etiam esse facturum . Quare ita illum primum accipies & vultu , & oratione , qua soles , cum quem tibi gratissimum accipis ; deinde eam operam dabis , ut , si locus ullus isthic sit , is huic sit . Certe , Bonamici , quicquid studii , quicquid officii in hunc adolescentem contuleris , id erit mihi mirum in modum gratum . Si vero locum impetro , omnia tua in me summa , atque innumerable beneficia cumulabis , ipsum præterea spe optima adolescentem magnopere sublevabis , tibi in perpetuum devinxeris . Vale . Ferrariæ VI. Cal. Novemb.

BARTHOLOMÆUS RICCIUS

Lazaro Bonamico S. D.

*Certiorum facit, se ejus causam Principi suo commendasse, sibi-
que recepisse, eum nihil ipsi apud Judicem suum ad omnem æ-
quitatem, atque maturam celeritatem defuturum. Hortatur,
ut eandem causam apud ipsum Principem ipse quoque
tribus versiculis Latinis commendet, quod plurimum causæ
profuturum, Principique gratissimum futurum pollicetur.*

7. **E** Ram in Beriguardo cum meo Principe, domo ab uxore mihi literæ tuæ sunt redditæ, quas ut legi, continuo causam tuam illi commendavi, qui mihi recepit, ut primum Ferrariam rediisset; redit enim quinto quoque die; se nihil tibi apud Judicem suum ad omnem æquitatem, atque maturam celeritatem esse defuturum. Qui cum & tuo amplissimo nomine, & mea etiam de te prædicatione te jam multo ante cognosceret, literas tuas mihi legendas quæsit, ratus eas Latine scriptas esse. Cui ego; is nunc Princeps, mecum egit nostra lingua, cum tamen alias semper Latine ad me scribere consueverit, ut ejus animum hinc quoque erga te facilem videre possis. Equidem non dubito, quin præstaturus sit, quod recepit. Sed si ad eum ipsum Principem tribus versiculis Latinis causam ipse commendares, & causæ tuæ te plurimum profuturum, & Principi gratissimum facturum, facile tibi polliceor. Tu tamen, ut tibi videbitur. Lilio tuo nomine salutem adscripsi, qui mihi rescripsit tum sibi nihil gratius accidere potuisse. Hoc enim uno maxime oblectatur, ut a tui similibus, qui pauci adhuc reliqui sunt amici, multum ametur, tibiue eandem plurimam impertit. Vale.

BARTHOLOMÆUS RICCIUS

Romulo Amasejo S. D.

Queritur, quod compromissi diem elabi siveris; se tamen nihilominus eum tantum diligere, quantum antea amavit, & coluit semper.

8. **T**E tamen, mi Romule, tantum diligo, quantum antea & amavi, & colui semper. Meis enim
V ratio-

rationibus ista tua mei compromissi declinatione, quam a te factum est, rectius consuli non poterat; qui librarium istum hoc modo & Diplomatis integra multa, & compromissi pœna probe multabo: tuum fuit tamen [ignoscas mi Romule, si tecum causâ meâ æquissimam rationem dissimulare non queo] aut compromissum non accipere, aut, eo accepto, secundum animi tui sententiam intra constitutum tempus decernere, præsertim cum quicquid ipse decrevisses, de compromissorum ipsorum more cautum esset, ut certum ratumque haberetur; quorum tu neutrum fecisti; alterum arbitror, ne mihi tui studiosissimo rem æquissimam negares, alterum, ne contra Crassi tui preces judicares. Itaque compromissi diem elabi sivist. Neque enim ad hoc iudicium Boaterii nostri præsentia requirenda fuit. Tibi enim, ut plane scis, res tota erat commissa. Te tamen, mi Romule, tantum diligo, quantum antea amavi, & colui semper. Vale.

BARTHOLOMÆUS RICCIUS

Romulo Amasejo S. D.

Tantum imbrium copiam trium dierum spatio effusam significat, ut multis in viis ad equi sellam aqua pertingeret; id vero frumento in agris sub ipsam maturitatem maximam detrimentum attulisse; se tamen diligenter curaturum, ut ab iis, quorum prædia in altioribus locis sunt posita, quidquid ipsi curandum erit, fideliter habeat, & perpuratum.

9. **C**Um ad III. Idus Junias domum a te rediissem, ita universum agrum nostrum perpetuis trium dierum imbribus obrutum offendi, ut multis etiam tum in viis ad equi sellam aqua pertingeret. Nam, cum fossæ magnam illam aquæ vim capere non possent, exuperatis earum ripis, aquis omnia exundarant. Nabant frumenta in agris sub ipsam maturitatem, quorum etiam magna pars superioribus diebus violentissimis ventorum flatibus ad terram constrata jacebat. Ut, quod ad messem attinet, quam tibi coram cum maximam, tum perpurgatam futuram promiseram, quid nunc sperem, non satis

videam. Id sane nulli dubium est, quin ex ea proluvie, quamvis etiam frumenta probe exsiccentur, corrupti non nihil tamen semper exoleant; sed curabimus diligenter, ut ab iis, quorum prædia in altioribus locis sunt posita, quicquid tibi curandum erit, fideliter habeamus, & perpuratum. Nunc passim, ac summo studio omnium operarum manu secantur. Id enim quoque adversi accidit, ut Auster, qui in Flaminia pestilenter dominatur, nunc, ut cum maxime, perflet; ne ejus vehementissimis flatibus spicæ inter se collisæ domum inanes convehantur. Vale.

BARTHOLOMÆUS RICCIUS

Romulo Amasejo S. D.

Gratulatur de dignitate ipsi delata, cujus nuntius in id temporis inciderat, quo ipse, uxor, & filius unicus, inverso cisis, a violentissimis equis rapti fuerant. Dei beneficio incolumes ex tanto periculo se evasisse, tamque jucundo nuntio ex maximo metu contractio paululum se recreatum videri. Hortatur ad dandam omnem operam Farnesio, quem sperat libentissimo animo id præstiturum, quod restat, ad eam dignitatem cumulare illustrandam.

10. **G**ratulor tibi, Romule, etsi tuæ istius dignitatis nuntius in id mihi temporis incidit, quo ego, & uxor, & filius unicus, inverso cisis, a violentissimis equis [quantum in ipsis fuit] discerpti, atque in unum tumulum rapti sumus. Sed Dei clementia tantam tragædiam pati non potuit. Hujus enim beneficio, nullo humano ex tam horrido, ac multiplici funere incolumes erepti sumus; si tamen eam incolumitatem appellamus, cum quis omnino corporis dolore vacuus sit, animi vero graviter laboret. Nam eo metu, quem contraximus in tanto casu, ita affecti sumus, ut nullo alio morbo, etiam si ab hinc quinquaginta annos id fiat, siquidem decessuri. Sed ad istum tuum jucundum nuntium paululum tamen recreatus esse videor. Quare cum tibi gratulor, tum etiam mihi gaudeo, quod ista tua dignitas virtuti tuæ summum ornamentum attulerit, mihi vero tantum hunc dolorem meum aliquantulum levarit, quando prorsus

BARTHOLOMÆUS RICCIUS

Paulo Manutio S. D.

Tabellarii negligentiam incusat : queritur , eum cum comite Lugum ad se non divertisse : jocatur de nomine , quod sibi commutatur : hortatur , ut ad se primo quoque tempore advolet , ejusque adventum Rugerium quoque avidè expectare significat .

12. **S**I tuus iste , nescio quis , Tabellarius rectè incessisset , vel potius suo die tuas literas mihi reddidisset , ex in Manutii fratris tui decessum incidissent , qui a me III. Non. Octobris cum monili pretioso discessit , ut , si spem aliquam in via augendi ejus fœnoris concepisses , eam plane totam deponas : tamen si , quicquid in hoc peccatum est , quod quam multiplex sit , vides , tota tua culpa est , qui Cæsennæ ad publicum hospitium consistere , quam Lugi ad tuum Riccium accurrere , maluisti . Primum enim Romæ cum comite isto [si modo quid est de comite] te eum Lugi potius commemoraturum , quam Cæsennæ , constituere debuisti . Deinde , si id Romæ non vidisti , cum mihi Cæsenna literas dabas , non venit in mentem , cui , aut unde etiam scribebas ? Hæc duo si considerasses , Riccium tuum jam decem dies tua præsentia non defraudasses . At hoc , inquires , quidem succurrit ; loci enim propinquitate admonerbar ; sed serius . Jam enim Romæ Cæsenna cum comite locus erat constitutus . Quasi vero centum M. passuum Cæsenna Lugum tibi divertendum fuerit , aut non commodissime ei significare posses , te locum ex Cæsenna Lugum fecisse , quando nomen tam bellus commutator es factus , qui te isthic ex Manutio Prosperum facias . Sed credo Prosper iste me quoque fallere conabatur . Sed cur te non commodius Proteum fecisti ? Ita me Dii ament , ut multo rectius . Nam in mari quoque regnum obtinuisses tuum . Dii boni , quantum mihi risum ea tuæ Epistolæ pars excitavit ! Moriar , si umquam tantum . Sed risus missos faciamus , ac serio agamus . Ego te hic expecto , aut tu me isthic primo quoque tempore expecta ; hac tamen lege , ut ad publicum hospitium

tium lautioribus me cœnis accipias, neque sine equo, ac Jacobo nostro, ubi ego te tanto sumptu multabo, ut in reliquum iter, etiam ad unum me, non modo ad Hunnos, viaticum te sit omne defecturum, quando ex larga ea spe jam plane te decidisse intellexti. Quare, si tibi recte consulas, ad nos primo quoque tempore advolabis. Bonifacius Rugerius [si quid hoc quoque ad rem pertinet] de te quantum honorifice & sentiat, & loquatur, dici non potest. Is quoque te avidè expectat. Vale.

BARTHOLOMÆUS RICCIUS

Paulo Manutio S. D.

Certiorē facit, se assidua, ac vehementissima febris laborare, vitæque perexilem spem sibi relictam videri; a se animæ prius Christianæ consultum; deinde uxori, reliquisque rebus suis testamento cautum: scripta sua se ipsi relinquere, ejusque fidei committere: orat, ut suam primo quoque tempore fidem studiosis omnibus in Particulis edendis peramicè liberes: denique, se Bibliothecam suam Augustino Abissio venire velle, significat.

13. **D**Ecimus hic agitur dies, Manuti, cum in febrem assiduam, atque eandem vehementissimam incidi, ex qua Dii ipsi, si rectum, piumque oro, ut convalescam, efficiant. Nam, ut nunc quidem est, perexilis sane vitæ spes relictæ videtur. Sed cum nudius quintus, postquam animæ, ut par fuit, Christianæ consului, Floræ quoque uxori mihi charissimæ, & reliquis meis rebus testamento cavi; reliquum erat, ut idem meis scriptis prospicerem, quod per alium neque commodius, neque fidelius, quam per Manutium facere sum visus. Quare ea tibi relinquo, tuæque fidei committo, proque ea necessitudine, qua conjunctissima inter nos viximus, etiam, atque etiam commendo, ut meam primo quoque tempore fidem studiosis omnibus in Particulis edendis peramicè liberes. Augustino Abissio Bibliothecam meam venire volo, cui a me salutem plurimam imperties, ac ambo valebitis, vestrumque Ric-

312 BARTHOL. RICCIUS
cium, ut vivum fecistis, ita mortuum amabitis. Vale.
Ravennæ VIII. Cal. Apr. MDXXXVIII.

BARTHOLOMÆUS RICCIUS

Paulo Manutio S. D.

Ferrinium amicum vi pestifera ereptum dolet, ejusdemque mortem diligenter describens, ostendit, temporis remedio tantum dolorem levari non posse, cum majoris ejus filii presentia, qui quotidie cum Camillo a se docetur, parentis memoriam sibi renovet, & assidue vulnus refricet acerbius: a se in ejus funere Orationem scriptam, & sermonem habitum cum Gyraldio; utrumque se missurum, ut edat: de re libraria admonet, oratque, ut quidquid ex ea pecuniæ confectum est, ad se mitti curet.

14. **S**cribis, tibi allatum esse, Ferrinium diem suum tibi nuntiavisse. Ita est, Manuti; sed non satis proprie Ferrinium nobis vi pestifera subito ereptum fuisse. Is enim Mutinam Principem suum sequens, in itinere in febriculam incidit levissimam. Tertio die, quo Mutinam pervenit, moritur. Nam, etsi Ferrariam relatus est, etiam dum voce, & verbis satis utens, mortuum tamen potius, quam vivum relatum esse, dici potest, cui crura, ac brachia non solum calore naturali destituta, quasi glacies, tota friguissent, sed quæ carbonem extinctum nigrore superarent. Oculus ille, ille vultus, cui gratias omnes Venus, & decor afflarat, abierant, nulla Ferrinii imago remanserat; sensum tamen, ac orationem retinuit, donec ultimum egit spiritum; qui in suo obitu nullum amicum ad se admisit, neque Riccium compatrem suum carissimum, id causæ afferens, ne primo illorum aspectu, quicquid reliquum supererat animæ, quam ille, quamdiu posset, retinere studebat, se subito defereret; ne filiis quidem hanc quoque gratiam fecit, quos moriens vidit nullos. Sed interea id unum agebat, ut cum Deo hinc decederet, id quod nulli dubium est, quin effecerit, qui Christianissime decesserit. Ita Ferrinius nobis ea ætate, iis moribus, eo fructu, majore etiam spe, repentino auferitur, in cujus mortis
nun-

nuntio tibi allato, puta de Riccii tui quoque obitu esse nuntiatum. Nam, quicquid nunc sum reliquus, Manuti, umbra sum; quod spiritus fuit, id cum Ferrinio mortuum est. Quid faciam? Ita sum in eos, quos maxime diligo, ut illum faciebam, teque facio. Camillo, inquires, filiolo tute consule, Ricci. Neque mihi, neque illi desum, sed nihil proficio. Dolor conatus meos superat, lachrimæ erumpunt; totus conficior. His accedit, quod major ejus filius, qui quotidie cum Camillo a me docetur, si quid temporis remedio tantum dolorem levare possem, non finit, ut faciam. Sua enim presentia memoriam parentis mihi renovans, assidue vultus refricat acerbius. In hujus funere Orationem scripsimus; fecimus etiam sermonem, an fletum potius? quem habui cum Gregorio Gyraldio, de ejus obitu. Isti, ut hæc edam, instant, & cogent tandem; tum commodius utrumque ad te mittam. De re autem nostra libreria, etsi nihil jam prorsus mihi laboro, filii causa eam tamen cura sollicitat. Si quid potes, eam confice. Si non quanti res est, ac nos cuperemus, at quanti potest, ac, quicquid adhuc ex ea confectum est pecuniæ, id si mitti curabis, percommodum illi accidet, cui tu nunc, ac posthac parentis loco es futurus. Vale, vale, Manuti, Ferriniumque communem fere fratrem, mecum desse. Ferrariæ.

BARTHOLOMÆUS RICCIUS

Paulo Manutio S. D.

Certiores facit, se Comacino Ferrariam gravissima febre laborantem advectum fuisse: itineris difficultate tres dies in via consumptos, ac se pæne demersum ad Argentam significat; nunc quidem domi se cum suis sine febris esse, sed ita interdum tussi angî, ut pæne spiritum intercludat: hortatur, ut lagenulam vinosam mittat, quam se diligenter curaturum pollicetur, ut vinulo plenam remittat ipsius palato admodum jucundo.

15. **Q**uo die tu, Manuti, Ferraria Venetias, ego Comacino, ut ex tui discessus die conjicio, Ferrariam appuli; sed tu felicius omnino, qui satis

fatigatus valens ad tuos rediisti. Ego enim, qui valentissimus a te discefferam, gravissima febre domum sum advectus; ut Comaclium Dei omnes, quantum in ipsis est, perdant, multo etiam magis, quam nunc est, in sua mera solitudine perditissimum. Hoc in loco, ut audis, cum me febris graviter affligebat, tum id etiam non levius excruciabatur, quod, qui in febris horrore, aut etiam in summo postea æstu, quicquam officii, quod in tali re præstari solet, nullus erat, præsertim cum domi carissimam uxorem haberem, quæ utrunque amantissime facere posset: quo facto tu quoque mihi in mentem veniebas, cum proxime Ferrariæ tuam in tua febricula sapius vocares. Sed tu minus miser fuisti, qui tuum Riccium tibi assidentem semper habuisti, ego vero omnium miserrimus, qui nullum meum Manutium habui, ubi nisi mare, litus, palus putida, via vero domum multo his etiam infestior, quæ me tres dies retinuit, cum suapte natura, tum etiam temporum iniquitate. Padus enim utramque ripam exuperans sexcentis in locis navem trahi posse prohibebat, adverfo autem flumine tantum remis in tanto Padi impetu uti amentissimi erat hominis. Ad Argentam vero, ubi se ad Blasii vicum deflecit Padus, pœne demersus sum. Deus me servavit, cum, quo navigarem, noctis obscuritate nihil cerneretur. Domi nunc sum cum meis, etiam sine febris, quique tam longam epistolam scribere potuerim, tamen ad Cœlum nondum satis audeo exire. Tussis enim interdum me ita angit, atque conquassat, ut pœne mihi spiritum intercludat. Sane videres, cubanti cum exoritur [is enim status illi inimicissimus est] me longe saltu exilientem, atque ea confictatum, non prius spiritum recipere posse, quam prope oculi ex suis locis exiluisse videantur. Quare Trimezinium nostrum nondum visi, sed, cum primum mihi domo per infestissimam hanc tussim exire licebit, ad eum accurram, ut consoletur, tuique absentis desiderium mea præsentia leniam aliquo modo, ac ad vinulum illud, quod ei tu tuis verbis in tantam gratiam posuisti, jucunde invitent. Utinam vero se idem ad finem præstet, ac ne aufugere studeat. Certe mihi peregre redeunti non idem est visum, quale ex usu videri antea quotidie solebat. Sensi enim, quasi hospes, æscio quid in eo inesse non sinceri, nisi id ex meo sto-

ma-

macho magis contractum est vitii, quod equidem valde cupio, atque si ita est, Comacliio jam ignosco. Neque hoc tamen eo dictum esse velim ipse suspiceris, ut hoc modo ejus mittendi fidem meam tibi liberarim. Nam, si vel fugiat; fugere non poterit, quin mittatur; mitte tu modo lagenulam vinosam, cætera ego diligenter curabo. Tuas literas avidè expecto, ut sciam quam rectè confirmatus domum perveneris. Vale, Aldinoque suaviolum dato.

BARTHOLOMÆUS RICCIIUS

Paulo Manutio S. D.

Maseji obitum cum Manutio deslens in ejus laudes excurret, letandumque potius, quam dolendum ostendit, quod ex his ærumnis in summam, atque æternam felicitatem, quam Deus ab initio illi, ejusque similibus constituit, evolarit.

16. **E**rgo Masejum perpetuus sopor
Urget? cui pudor, & iustitia soror
Incorrupta fides, nudaque veritas,
Quando ullum inveniet parem?

Possum ego, Manuti, prope versibus iisdem tecum Maseji nostri obitum deslere, quibus Horatius Quintilii cum Virgilio desleret. Siquidem iis ille moribus, atque ea vitæ integritate præditus fuit, ut qui pares paucos, superiorem haberet neminem; atque eo magis, quod qui alii hisce virtutibus ornantur, iis hæc gradatim cum ætate accedere solent, hic vero quasi nascens, eas secum extulisse videbatur. Continuo enim in ipsa ephebi a ut vir probatus est, in adolescentia vero maturam gravitatem, quasi quæ in ea senectutem suam ageret, præ se ferebat. Quare ab omnibus valde amabatur, a Principibus vero eo in pretio est habitus, ut a Paulo III. Pontifice Maximo, quo a secretis uteretur, Romam ab usque Patavio accersitus sit; in quo suo officio eam operam navavit, atque ea fide in eo se decem annos præstitit, ut tertio anno antequam Pontifex decederet, ab eo in Cardinalium Collegium cooptaretur, quam sacrosanctam Dignitatem integerrime postea semper gessit.

Nam,

Nam, cum Regiæ diffensiones ita universam Christianam Remp. invalissent, ut quotidie in ea recenti [quid enim dicam veteri] vulnere novum vulnus adderent, atque usque eo penetrare non dubitarent, ut in Pontificiis etiam suffragiis decertarent, atque impotenter digladiarentur; in his Masejus ita se gessit, ut cum neutri parti adhæresceret, utrique tamen percharus haberetur. Aut enim hic cum paucioribus, iisque probatissimis, ac doctissimis Viris agebat, aut in sua studia se se abdens, ubi aut novi quid scribens, aut in Pauli III. Pontificis Maximi Historia, quam ipse scripserat, ut eam politioem brevi in vulgus ederet, assiduo studio versabatur. Quare jure bonis omnibus flebilis discessit; mihi quidem in primis, qui cum eo ab ineunte ejus adolescentia summa familiaritate conjunctus eram; tibi vero, Manuti, omnium maxime, cui ad veterem necessitudinem magna etiam spes accedebat, fore, ut Aldo filiolo tuo non parum opis afferret in aliqua Sacerdotii collatione, cujus etiam optimi erga te animi sui certam jam significationem in LX. aureorum in singulos annos illi attributorum certissima pensione dare incœperat. Si tamen nos rectius rem considerabimus, multo æquius faciemus, si eum summa lætitia prosequemur, ut qui ex his ærumnis in summam illam, atque æternam felicitatem, quam Deus illi, atque ejus similibus ab initio constituerat, evolavit. Certe lucem hanc intueri, Cœlo hoc spirabili perfrui amens sim, si non optem; si vero contemnā, impius; nihil enim in terris homini suavius, nihil charius dari potest; si tamen nostræ cogitationes se paulo altius tollant, ac, quæ tandem humana sit conditio, æquius perpendant, si non hanc vitam deferere optemus, certe, ut nobis ex ea migrandum erit, ejusque dies postremus venerit, id haud moleste ferre debebimus; præsertim cum id omnibus omnino faciendum sit; neque propterea quis levius decedat, qui octingentesimum annum, quam qui octuagesimum agens, decesserit. Quare, Manuti, lætemur potius, [ut in hoc quoque a vulgo secernamur] quod Masejus noster eum vitæ cursum confecerit, quem Deus illi præscripserat, neque nos quicquam moveat aut ejus adolescentia, atque florentior ætas, quasi qui jam multos annos nobiscum esse posset; quando quaque ætate quis decesserit, mature, & suo tem-

tempore decessisse videatur ; neque ea benevolentia , quam mutua tenebamur , quaque etiam praesentes perraro fruebamur , nos tantopere sollicitet . Nam , quod ad nos , ea quoque mortuum prosequemur . Multo vero minus utilitas nostra nos tangere debet , ne in amico magis commodum nostrum , quam ejus discessum lamentari videamur ; magisque inter nos , atque etiam cum cæteris Christiane agere studeamus , ut , cum hinc nos quoque evocabimur , cum hac spe ad Beatorum sedes evolemus , tum posteris nostris sanctiorem nostri memoriam relinquamus . Vale .

BARTHOLOMÆUS RICCIUS

Paulo Manutio S. D.

Rogat , ut post Parthenium in Aonii honorem incumbat , praesertim cum plures annos ipse cum Aonio summa benevolentia conjunctus sit , ille vero menses tantummodo cum Parthenio .

17. **P**arthenium tuum antea mea sponte cum cæteris ejus generis optime literatis Viris amabam ; nihil enim acciderat , ut hanc benevolentiam ei separatim præstarem ; nunc vero , cum te illum tantopere amare scribis , ego quoque tua causa , ei ut omnia optata veniant , cupio . Quare , ut in omnem ejus honorem incumbas , per me quidem licet . Verum , mi Manuti , si quid post hunc , id , ut Aonio nostro velis , te ita rogo , ut si id ipsum mihi ipsi rogarem . Tanti ego hunc , idque jure optimo facio , quantum tu Parthenium tuum facis . Id mihi amplius ut concedas , necesse est , quod me cum meo summa benevolentia plures annos , qua tu cum tuo menses , arctissime conjunctum esse vides . Quare tu quoque eum erga meos animum habebis , quem me erga tuos habere sentis . Vale .

BARTHOLOMÆUS RICCIUS

Paulo Manutio S. D.

Orat, ut quamprimum prælis suis decem suarum Epistolarum libros ad amicos scriptos edendos curet, ut saltem sciat, se decedente, in ea quoque parte aliquid, quod secum non concidat, remanere; hortaturque, ut sibi caveat a Bononiensi Cælo multis in locis pessime improbatum.

18. **S**cripsi ad Corradium, ut de Epistolis nostris edendis tecum ageret diligentissime, causamque, quamobrem id eum rogassem, etiam adscripsi; nunc idem tecum ago. Quam ego a te, Manuti, quæ ab amico expectari possint, omnia expectare possim, tu optimus testis es, quem scis a me tanti fieri, quanti a quoquam alio fias. Equidem in benigne tibi faciendo tuis Bononiensibus vel meo summo cum dolore possum concedere, in te vero vere amando ne ab Antonio quidem fratere tuo, tuique amantissimo, vincor. Quod cum ita sit, spero te quoque in amore mecum mutuum futurum, in eo præsertim, in quo meæ vitæ ratio non agitur parva. Vides, mi Manuti, me in decrepitam ætatem [quid enim dicam in senium labentem] quam vitam, quoniam quam communis ejus cursus ratio postulat, longius proferre in mea non est positum manu, cupioque non solum hoc sæculum aliquo modo, sed æternæ, si possim, vivere; saltem, quod mihi in eo præstare permissum est, ne omisisse videar, magnopere studio; id autem est in reliquorum meorum scriptorum editione collocatum, quæ si divulgentur, non dubito, quin in doctissimorum Virorum aliqua memoria nomen meum sit aliquot etiam annos perduraturum. Ex iis autem nunc decem Epistolarum libros ad amicos scriptos edere statui, hos autem ut a te exirent, multis de causis mirum in modum cupio. Quare te etiam, atque etiam rogo, ut hanc mihi gratiam facias, quam etiam alienissimis quotidie facis, ut tuis prælis publice describantur; quantum autem in rei sumptum impendendum dixeris, tantum tibi continuo dissolvam. Sed cum hoc te rogo, tum illud etiam oro, ut id ipsum quamprimum
fa-

faciendum cures, ut si earum lectione diutius frui nequeam, saltem sciam, me decedente, in ea quoque parte aliquid, quod mecum non concidat, remanere. Vale. Cum has eram signaturus, tuus nuntius advenit, qui, ut me de iis, quæ ante libenter ex fratris tui literis noveram, certiores fecisset, me non levi affecit molestia; cum diceret, te numquam isthic satis belle habuisse. Manuti, mihi omnia Bononiensia in Cælo sunt, Cælum autem istud multis in locis pessime improbat. Quare ab isto, ut a valde pestifera bestia, etiam atque etiam cavebis iterum. Vale.

BARTHOLOMÆUS RICCIUS

Paulo Manutio S. D.

Fato magis regi homines, quam prudentia, ex ejus consilio repente commutato Ferrariam cum familia commigrandi, ut convivæ sit cum cæteris nobilioribus Hippolyto Atestio Cardinali, ostendit, ejusque adventum singulos ejus amicos secum avido, anxieque expectare significat.

19. **E**Quidem, Manuti, ea olim sententia fui, ut magis homines sua prudentia, quam ullius fortunæ arbitrio regerentur, quam etiam meam sententiam suis validissimis rationibus in meis libris de Gloriâ satis tueri videbar; nunc vero totus hæreo, ac parum abest, quin ab ea sententia discedens, a me ipso ad eos, qui contra sentiunt, palam fiam transfuga. Nam, cum jam sæpius ante omnes amici tui, iique principes interdum Viri, in hanc curam studiosissime incumberent, ut Ferrariæ commode, atque cum aliqua dignitate agere posses, nihil tamen suo studio, atque auctoritate proficere unquam potuere; superiori vero æstate, cum Bononienses, ut te secum haberent, omnem honestam conditionem tibi proponerent, ego, & Pigna interea omnia tentavimus, ut te illis interciperemus. Plane enim scis, cum hac Venetias rediens transires, te biduum nobiscum moratum; quo tempore, ut perpetuo esse posses, omnia nostra consilia contulimus, quæ ita tu probasti, ut, si a Principe Hercule honesta aliqua conditio tibi offerretur, tum rem facile absolvi posse putares. Is eam assert æquissimam.

Tem-

Tempus postulas ad deliberandum : datur : discedis : res postea multos dies per literas ultro , citroque missas tractatur , neque tamen quicquam perficitur. Utrum an in decernendo , utram acciperes [ne quid de Romana , ac Papiensi dicam] non satis constituebas ? Ita sensim res tota postea refrixit , atque agi est desita . Ecce autem tibi ; atque etiam alia omnia agenti , qui te tantum nomine cognoverat , ad te adit , atque ita tecum agit , ut non prius discederet , quam te Hippolyto Ateffio Cardinali suo amplissimo familiarem efficeret . At qua familiaritate ? qua illi cum cæteris nobilioribus conviva esses . Cui honori CCC. etiam sunt addita . Qua una magnifica conditione , si non perpetuo Ferrariæ , ubi is nunc jam longum tempus agit , certe magnam temporis partem es commoraturus . Ecquid ais , Manuti ? Num ita est ? *Cedant* , inquit ille , *arma togæ* ; ego vero , inquam , cedant consilia fato ; ita enim ab initio erat in mente illa constitutum , ut hac ratione , atque hoc tempore , Ferrariam cum familia commigrares , nos vero tui omnia frustra experiremur . Cui isti tuo tamen fato multo equidem debeo , quod fatalem meum diem anteceffit , qui in mea senectute veterem consuetudinem renovare potero , cujus etiam recordatione videbor quodammodo annos quoque renovasse . Sed Dii isti pestilentiæ omnia mala dent , quæ te nobis tot menses interceptit . Nunc vero , cum ea ita se remisit , ut omnibus , qui cum fide publica isthinc discedunt , a cæteris Civitatibus accipiantur , quid stas ? cur non huc advolas ? quid te amplius remoratur ? At oculi , inquires , parum etiam lippiunt . At , mihi crede , ut caliginosum istud Cælum reliqueris , ac in Pado nostro semel eos laveris , omnem in perpetuum tibi lippitudinem absterferis , neque tibi umquam postea dolebunt . Si igitur cætera parata sunt , continuo navem conscendas ; si vero conscenderis , vela fac ; si ea fecisti , remis etiam incumbere , ut primo quoque tempore tuis familiaribus tui desiderium expleas . Te Cæsarius Vir optimus , qui de te optime & sentit , & loquitur , quemque tu omnium plurimi facis , cupide expectat ; est Locatellius Philosophiæ ; Juris Civilis Catus ; Cananius vero mendi artis haud imperiti Viri . Familiæ item gubernator , quique a secretis est , horam illam non vident , qua te fraterne amplexentur . Extra autem familiam vestram

stram Pigna, & Riccius pro tuo adventu etiam vota faciunt, quibus tu contra item, qui te postea peramicem perfruentur. Sylvius Antonianus nobis accedit, mirificus adolescens, qui de unaquaque re, quæ ei subito propofita sit ad dicendum, Hetrusco versu, idque ad lyram, optime canit. Sed hoc ad vulgi aures, tuis autem doctissimis in Latinis etiam non minus satisfaciet, qui tui videndi summo exardet desiderio. Vale. Ferrariæ VI. Cal. Decemb. MDLVI.

M A N U T I U S

Bartholomæo Riccio S. D.

Nilil esse in suis consiliis antiquius responderet, quam ut in aula eximii Principis, ac Viri præstantissimi Cardinalis Hippolyti Estensis consensescat & multis rebus se impediri subjicit, ne statim Ferrariam se conferat, ubi ejus sermonibus, humanitate, & lepore fruatur, interruptamque multorum annorum consuetudinem resarciat.

20. **V**Era narras, optime Ricci, atque ita narras, ut in magna tuarum literarum prudentia facile tamen amor interluceat. Mihi, ut scribis, conditiones hoc biennio delatæ sunt multæ, quinque fere, aut sex, omnes cum emolumento, nulla sine dignitate; fecit tamen sive valetudo mea, seu voluntas, seu fati potius, quæ in rebus humanis dominatur, occulta quædam vis, ut omnes rejecerim, hanc postremam, ut dederem me summo Cardinali Hippolyto Estensi, unam avide sum amplexus, unam omnibus anteposui, nec est in meis consiliis quidquam antiquius, quam ut in illius aula eximii Principis, ac Viri præstantissimi consensescam. Quare quod hortaris, ut ad vos quamprimum me conferam, non efficis, ut cupiam, qui cupiditate jam ardeam; dolorem potius auges, cum intelligam, quod maxime volo, id me consequi hoc quidem tempore non posse. Nam, ut omittam, quod hæc me frigoris acerrima vis, & intemperies Cœli semel, aut iterum cubiculo egressum pessime accepit, & in eadem claustra, in easdem, ubi multis jam mensibus jacui, tenebras retrussit; præterea pietas me retinet. Fratres habet uxor

Tom. II.

X

mea

mea duos , quos ego ambos unice diligo , contraque ipsi mihi singularem non modo benevolentiam , verum etiam observantiam præstant ; probi sunt adolescentes , ingenio , modestia , virtute etiam ornati , una re minus laudandi , quod inter ipsos non convenit . Orta est inter eos , post obitum patris , de hæreditate dissensio ; inde lis , inde odium , quod nisi ego me interponerem , nisi utrumque prehensarem , rogaremque per parentis manes , per solitudinem matris , per existimationem familiæ , conflictarentur assidue turpibus judiciis , gravi jactura famæ , magno rei familiaris detrimento . Hoc ego dum versor in negotio , dum in eo studium , operamque pono , ut uxoris meæ fratribus consulam , putem mihi esse verendum , ne quis me , sana præditus mente , reprehendat ? Non puto . Num igitur , hoc te iudice , pertimescam ? Hem Ricci , qui Sacris in Literis non ambitione , ut multi , sed ita versatus es , ut scientiam e libris petitam vita exprimeres , quæ sunt illa præclara , quæ nos Magister ille bonarum actionum optimus edocuit ? Non hæc sunt , egentibus subvenire , errantes in viam , diffidentes ad concordiam revocare ? Ama igitur me de hoc officio ; non postulo , ut laudes . Jam enim didici vel ætate doctus , vel morbo admonitus , recte factorum fructum a Deo potius , quam ab hominum judiciis , expectari , omnemque laudem non in honore verborum , sed in ipsa re , atque in una virtute consistere . Vides jam duas esse commorationis meæ causas , utramque satis gravem . Accedit tertia , ne ipsa quidem levis , ut imprimam librum meum de Legibus Romanis , quem flagitantibus multis debere jam diutius non possum , eoque magis in hanc voluntatem incubui , quod inscriptum opus Hippolyto Cardinali , cui me addixi totum , committetur . Reliqua deinceps , quæ ad Romanas antiquitates pertinent , suo quidque tempore , absolverunt , & in ejusdem Cardinalis nomine , si modo hoc illius modestia patietur , apparebunt . Ad me quidem quod attinet , quæ juris mei sunt , volo omnia ab illius voluntate pendere . Si quid ingenio , si quid literis consequar , ad unius arbitrium refero ; unius laudem mea studia spectabunt ; uni posthac mea serviet industria . Tu , mi Ricci , fac tibi ita persuadeas , amabiliorem mihi Ferrariam fore tua causa . Tuis enim sermonibus , tua humanitate ,

te, tuo lepore frui, interruptamque multorum annorum consuetudinem licebit aliquando refarcire; quod ut sit maxime diuturnum, opto vehementer, & ut tu amantissime auguraris, etiam spero. Vale. Pignæ nostræ salutem plurimam. Venetiis Pridie Id. Decemb.

BARTHOLOMÆUS RICCIUS

Manutio S. D.

Significat, se ruri messem satis uberem curantem, villulamque rusticæ pictura exornantem commendari, maximeque cupere, eum secum esse. Nonnulla addit de Camilli filii peregrinatione, matremque sibi referre; eum ex illa nonnihil mansuetioris animi domum retulisse, & cum libris in gratiam rediisse videri.

21. **U**tinam mecum esses, Manuti, ubi tuæ mihi litteræ sunt redditæ, atque eo animo, ac corporis viribus, non autem eo annorum numero, quo ego sum, esses. Latior, atque valentior esse non posses. Ruri sum messem meam satis uberem curans, atque interim villulam rustica pictura exornans. Huc accedit, quod nihil urbani æstus sentires, qui, si usquam Cælum inflamat, Venetis ardentius inflamat. Nam etsi laxissime habitas, nulla tamen liberior, ac salubris aura æstum istum tibi lenit, atque temperat; cum hic omnia contra, & summa amœnitate plena. Sed hoc magis optare, quam sperare possum, quando, quod in rem tuam maxime futurum erat, Cardinalem tuum vel semel visere nunquam per tuos oculos quivisti. De Camillo, ita ut tu scribis, facere constitui; quin quo is tempore peregre erat, ego cum Madio, cum Sylvio Antoniano, ac aliis hujus generis hominum comitatu in mea Ricciola in Quartisano suo me oblectabam, quorum utriusque in urbem reditus forte in eundem diem incidit. Mane enim ergo, ille vespere advenit. Paternæ accipitur. Ut enim nuntiatur, Camillum pultasse, continuo mater se scalis deorsum in ejus complexu præcipitem demittit. Ego illum in Bibliotheca expectavi. Cætera non sine lachrimis. Pater sum, ac unius ejus tantum filii pater. Vespere sub cœnæ omnem suam peregrinationem nobis

exponit, satis eam quidem commodam, nisi, quod a meis amicis neque isthic, neque Patavii eo vultu accipitur, quo antea mecum factus erat. Solus Ruscellius facti nescius; illum amicissime complexus est. Causam illi attuli, quia sine meis ad omnes literis, qui magis aliquid mali eo ornatu, quam boni, accidisse facile suspicarentur. Cætera multa in eam sententiam; quæ omnia visus est in eam partem, quam debebat, accipere, seque Patavii mire cupere sequenti anno suis studiis operam dare dicebat. An id studiorum causa, an liberius agendi potestate a custode parente remotior faciat, haud satis dispicio. Mater refert ex ista peregrinatione nonnihil mansuetioris animi domum retulisse, atque cum libris in gratiam rediisse videri. Ego fidelem nostrum, scis bene quem dico, ne referat, magis metuo, neque id cum eo dissimulo. Tam enim cito ut deferbuerit, adduci non possum, ut credam. Interim autem assidue est ad Aloysium Atestium in iis, qui ei in cubiculo operam dant, qua una ratione aliquantum in rationis gyro continetur. Dii illum melius, quanto etiam me meliores sunt, curent. De tuo Betonicatu, ut in urbem rediero, diligenter curabo. Vale. Ex mea villula Ricciola. Non. Jul. MDLVII.

BARTHOLOMÆUS RICCIUS.

Aldo Manutio Pauli Filio S. D.

Queritur, sibi libellum Ciceronis locutionum ab eo conscriptum, & editum non fuisse missum, petitque, ut statim mittendum curet.

22. **I**Ta ne, Alde fili, cum Riccio altero parente tuo tam parum benevole agis? qui libellum bellissimum Ciceronis locutionibus conscriptum edidisti, neque mihi non solum meum volumen non misisti, sed ne de eo quidem aut a te, aut a patre tuo Paulo verbum est factum? quasi ego tuæ istius gloriolæ non ita cupidus sim, atque is Camilli filii mei, si quid tale edidisset, fuisset. Sed ego tibi facile ignosco, qui adolescentulus hæc non videris; non ita illi, quamvis perpetuum oculorum morbum mihi objiciat. Hoc enim animi, atque bene-

benevolentiae, non autem corporis oculis cernitur. Ita tibi quoque tamen ignosco, si, quod in ea re damni tua culpa feci, id mihi praestandum curabis, hoc est, si meum mihi volumen remiseris, aut gratis, aut quanti quanti indicetur. Parenti tuo non scribo. Proxime enim is ad me scripsit, postero earum literarum die isthinc Brixiam esse discessurum. Cum ad eum scribes, meo nomine illi salutem adscribes. Vale.

BARTHOLOMÆUS RICCIUS

Gabrieli Cefanio S. D.

Gratulatur de Episcopatu ei delato, jocaturque, istius generis Dignitates podagrosis plerumque demandari, quia optime sunt, & ad eorum dolorem valde deliniendum accommodatæ.

23. **T**antum tibi ex istius Episcopatus tui Dignitatis accessione gratulor, quantum dolui ex Cardinalatus amissione, si noster Maximus Pontifex factus esset. Nulli enim dubium est, quin, qui tibi Cardinalis Episcopatum sua sponte detulit, multo libentius Pontifex Cardinalatum detulisset; sed illud in spe, hoc in manu, ac quasi illius viæ præmunitor. Verum cum hoc gratulor, tum etiam eo doleo, quod mea congratulatio in tuum morbum inciderit. Audio enim, te non satis belle habere; sed tanta Dignitas vel cuique morbo saluberrima posset esse medicina, etiam si podagra te acrius torqueret; neque alia ratione factum arbitror, ut plerumque podagrosis istius generis dignitates demandentur, nisi quia optimæ sunt, & ad eorum dolorem valde deliniendum accommodatæ. Sed satis de jocis. Dii tibi præsentem Dignitatem fortunent; speratam etiam brevi concedant, cui, quanto hac major erit, tanto ego quoque graviores polliceor congratulationem. Vale.

BARTHOLOMÆUS RICCIUS

Gabrieli Cefanio S. D.

Manutii epistolam mittit, ut ex ea intelligat, quæ causa ejus adventum retardet, Et ut eum apud Cardinalem suum excuset, fateaturque, eundem in quovis scribendi genere omnium ætatis sue facile principem esse.

24. **M**Anutii nostri epistolam, quam ad meam rescribit, tibi legendam mitto, ut, quæ causa nobis ejus adventum retardet, intelligas, ac, si quid postea opus erit, ejus excusationem apud Cardinalem tuum comprobare possis; utrum autem meam, non satis constituo. Vereor enim, ne si cum ea, quæ est elegantissima, parum compta, minus ornata, ac quasi infans conferatur, multum de ea detrahatur; ut ei in scribendo non solum concedam, sed etiam libenter concedam, fateorque meum Manutium in quovis scribendi genere omnium ætatis nostræ facile principem. Vale.

BARTHOLOMÆUS RICCIUS

Galeatio Gonzagio S. D.

Epistolam mittit, in qua cum Corradio disputaverat, quibus rationibus facile fieri posset, ut Hippolytus Arestius Cardinalis hoc tempore Summus Pontifex decerneretur.

25. **C**Um ego quoque cum cæteris nostris mirum in modum cuperem, ut Hippolytus Arestius Cardinalis summus Pontifex hoc tempore decerneretur, quibus id rationibus facile fieri posset, satis longa epistola ad Corradium nostrum disputavi. Eam tibi legendam mitto ex iis versibus, quos ipse hodie mane, cum ad Principem nostrum essemus, in hanc sententiam scriptos mihi recitasti, ut videas quam apte inter nos conveniamus. Vale.

BARTHOLOMÆUS RICCIUS

Galeatio Gonzagio S. D.

Fortune iniquitate evenisse significat, quo minus suum desiderium parum prudens videri possit.

26. **E** Quidem, Galeati, in eam spem, quam vidisti, avidissime veniebam, sed ea tamen ratione, quæ certissimis argumentis probaretur, veniebam. Neque enim plus unquam in ejus generis suffragiis fortunæ temeritatem, quam prudentiæ consilium, valere putavi. Quoniam tamen secus sive quorundam improbitate, sive, ut tu mavis, fortunæ vitio accidit, æquo animo facile perferam. Quod vero me mones, ut in posterum mea desideria æquius temperem, atque comprimam, ut, si, quemadmodum cupimus, recte successerit, integriore lætitia postea perfruamur, si minus, id levius animum nostrum offendat, tu quidem recte, & sapienter mones. Tamen si in hujus generis desiderio id mihi solatio semper esse possit, me nulla mea ignorantia frustra tam cupide sperasse, qui, quæ certiora cernerem, paulo ardentius concupiverim; sed id fortunæ iniquitate evenisse, quo minus meum hoc desiderium parum prudens videri possit. Vale.

BARTHOLOMÆUS RICCIUS

Galeatio Gonzagio S. D.

Vas te admodum cum eo agit, conaturque boni viri actione ab eo obtinere, quod fortasse propter potentiam in jus vocando nulla ratione obtinisset. Orat, ut rescribat, utrum velit se comparare ad causam suam iudici comprobendam, an efficere, ut de munere sibi collato gratiæ illi in perpetuum agendæ sint.

27. **E** Go te, Galeati, in jus vocare, tecumque jure substructionis agere constitueram, qui in meis fundamentis, me inscio, ædificium tibi substruxeris; sed boni viri actione prius tecum agere placuit, atque te

commonefacere, an jure decernere, an pacto mecum convenire malueris. Pactum autem id esse potest, ut aut tuam mihi substructionem vendas, aut eam demoliaris, atque ejus lapides, ligna, ferramenta, cæteraque, quæ ad aliam ædificationem tibi usui evenirent, alio cures transferenda; horum alterutrum si feceris, & æquum feceris, & ego nullam dicam tibi postea dicam; sin aliter animatus sis, ac judicio rem decernere mavis, diem tibi dico Calendas Martias. Solus Princeps Hercules nobis Judex erit, ne causâ ullam provocationem habeat, aut in Judicibus rejicendis, si plures deligantur, res longius trahatur. Uterque vero ut causam suam agat, æquius erit, ut omnis prævaricationis suspicio tollatur, ac jure æquissimo decertetur, in quo judicio tibi etiam permitto, ut novo agendæ causæ modo agas, quoniam scilicet optimus es Poeta, ut etiam tuis etiam grandioribus heroicis pertractes, facile concedo. Sed quid ego imprudens egi? pœne causam meam stultus prodidi, ac mihi insciens etiam prævaricator fui, qui in hac mea liberalitate non animadverti, continuo Judicem tibi benevolentissimum futurum, qui sentiat eo dicendi genere apud se agi, quo ipse quoque maxime delectatur, atque in quo ille etiam non parum profecerit. Quare, quod postremo obtuleram, id revoco, oblatum recipio; sed de more utrinque causa, non autem ex altera parte canendo, ut agatur, volo. Sed quid, si, quæ tua summa est liberalitas, reliquum tuum istud ædificium mihi condones, ut qui locupletissimus sis, hoc est, qui infinitis hujusmodi locis abundes? ego vero illud solum mihi in meo perpusillo solo constituerim? quod si faceres, ego tibi gratiam haberem maximam. Nam si me parem relaturum dicam, tantundem esset, atque si id emissem. Nisi postremam hanc conditionem magis probas, ut ego ad primum tabulatum; quod vero supra illud est, ipse æque possideamus, atque ita in unis ædibus, ut etiam fratres confortes, concorditer habitemus. Expecto scire quam harum conditionem acceperis, ut, quid mihi agendum sit, sciam, an causam meam instituam, meque comparem ad eam Judici comprobendam, an tibi de munere tuo gratiæ magis sint in perpetuum agendæ. Vale.

Meum fundamentum in Principis Herculis Atestii tormenti militaris, cognomento terræmoti, laudem.

Hoc

*Hoc tonat Alcides, hoc horrida fulmina trudit,
Concussit hoc terram, hoc arcibus excidio est.*

Tua substructio.

*Bellica sic inter dignum tormenta fuisti,
Cui prius ornaret sacra corona caput.*

BARTHOLOMÆUS RICCIUS

Bartholomæo Mirolio Prætori S. D.

Consolatur de patris obitu eas omnes rationes afferens, quæ in tanta calamitate filii dolorem lenire posse videntur: hortatur, ut ad prudentiam illam redeat, qua in ceteris consolandis plurimum valet, quæque eum ad summam auctoritatem ipsi a Principe delatam evexit.

28. **P**igna noster mihi retulit, te, ut tibi de patris tui obitu nuntiatum est, ita commotum, itaque a te ipso abalienatum esse, ut parum abfuerit, quin ad id nuntii subito ipse quoque occideres, ac, quod reliquum tibi spiritus remansit, id totum in acerbissimos questus esse collatum, neque quicquam aliud ex te audiri, quam hei pater, pater mihi rerum omnium charissime, nunc me tam longe gentium tam præter omnem expectationem relinquis? in cuius voluptate ego omnes meas voluptates repositas habebam? quo uno mihi tam subito abrepto, omnis lætitia adempta est, vita vero reliqua acerbissima est futura? In quo tuo tanto, tamque iusto dolore te equidem non possum non magnopere laudare. Major enim plaga nulla accipi potest, quam quæ in parentum interitu accipitur, ut unde nos lucem hanc hausimus, quaque læte perfruimur, eam illis eripi videamus; præsertim cum iis parentibus orbemur, qui in nostra educatione nihil aut probati studii, aut paternæ pietatis non adhibuerint. Ego quoque adhuc meum lugeo, & quoad vixero, lugebo; sed prudentiam tuam tamen non possum non desiderare, qui cum istius jam grandioris ætatis sis, atque eam totam in iis studiis consumpseris, quibus hæc humana non solum incerta, manca, fluxa, optime prospicere, sed etiam contemnere deberes, ita te nunc opprimi finas, ut, si nihil unquam de hominum conditione aut ipse legisses, aut de aliis

au-

audivisses, nihil in te ipso alias, aut in tuis propinquis, aut amicis, iis interdum etiam charioribus, aut sensisses, aut vidisses. Quæ res si nobis omnino solatio esse non possunt, certe quodammodo iis assuescendo, levior superveniens fit dolor. Jam alter annus est, cum mater tibi decessit, scio tibi tum ex pietate continuo parentem occurrisse, atque etiam tum de ejus obitu dolere cœpisse. Matris igitur dolor, & parentis præsens illa cogitatio recentem istum tibi dolorem aliqua ex parte mitiget, atque leniat. Tamen si gravissimos etiam Viros habes, quos in tuo tanto luctu optime imiteris, qui in charissimorum, ac clarissimorum filiorum obitu [quando in horum morte multo parentes acrius anguntur, quam filii faciunt in parentum obitu] fortissimos Viros sese præbuere. Id quod ipse quoque efficies, si ejus personæ, quam apud Principem nostrum, quæ tua virtus est, geris, aliquam rationem adhibebis. Id quoque accedit ad tuum tantum istum dolorem non parum levandum, quod pater tuus jam senex moritur, quæ ætas natura humanæ vitæ finem asserre solet; quod quinque filios inter se fraterne amantes reliquit, eosque jam viros omnes, te, ut maximum natu, ita etiam ea autoritate apud Principem nostrum, quæ maxima est, quo post multas Præturas æquissime gestas, nunc Consiliario utitur optimo; alterum, qui rem familiarem domi curat; tertium, & postremum milites haud instrenuos; inter hos Hectorem adolescentem optimum, atque in Philosophia [de more] insigni testimonio decoratum. At hoc ipsum doleo. Hoc me angit solum, quod ea voluptate, quam ex quinque talibus filiis percipiebat, diutius perfrui nequiverit. Quasi vero nescias, rerum humanarum conditionem ita se habere, ut, quo quis lætius agere cœpit, omnium jam laborum immunis, in summa etiam, ut ita dicam, felicitate constitutus, eo tempore concedat, atque ex summo statu aut præceps dejiciatur, aut etiam intreat. Scio, te recordari me tibi paucis ante diebus, idque de tuis rebus lætissimis, cum congratularer, tertiam gratulationem brevi in celeberrimas tuas Nuptias recte esse ominatum; eam Diis in hanc consolationem commutare placuit. Quando iis quoque videbitur, illam etiam tertiam congratulationis causam non negabunt. Redi, redi tandem ad te, Miroli, hoc est, ad tuam illam prudent-

dentiam, qua in cæteris consolandis plurimum vales, quæque te ad tantum authoritatis, quanta ea est, quam tibi Princeps noster detulit, evexit. Una illa totus niteres; tibi ipsi tua virtute præsto adsis, atque viriliter consolare, vivaque, quamdiu vivis, neve, quod a te remedium habere potes, id aliunde expecta. Ad tua judicia, ad tuas publicas rogationum subscriptiones redi. Obliviscere desiderium tuum, præsertim ejus rei, quam si tecum etiam aliquot annos habuisses, ea tamen te, aut tu ea eras aliquando cariturus; ut, si pater tuus interrogari possit, utrum maluisset, an se tibi, an te sibi superstitem futurum, certe is responderet, se cum naturæ rationi obtemperare, tum ne, quod sibi vel morte ipsa gravius fuisset, pateretur, maluisse. Ut videas, eum quoque in suo obitu hoc tantum malum evitasse, tamen multo majus est bonum, ad quod pervenisse putatur, quam quod hic ipse eum reliquisse existimas, ad illam scilicet æternam vitam, ubi nihil est, quod alterum interitum metuat; atque ubi te cum reliquis fratribus tuis, filiis suis, cum Deo placuerit, læte expectat. Vale.

BARTHOLOMÆUS RICCIUS

Bartholomæo Mirolio Prætori S. D.

Orat, ut de Joannis Zaionii causa jampridem utrinque omnibus rationibus disputata sententiam ferat, neque eam ab adversario diutius cavillationibus trahi patiatur.

29. **J**oannes Zaionius, qui tibi has literas reddidit, causam habet cum vitrico suo Puinario, quæ jampridem utrinque omnibus rationibus disputata est. Restat, ut ipse de ea sententiam feras, quæ cum ab ejus adversario diutius cavillationibus traheretur, me rogavit, ut ita tecum agerem, ut hanc sententiam sibi impetrarem. Vides, Mirolie, æquissimam amici postulationem, neque te fugit tui officii esse, rem tandem absolvere, bonitatis etiam cavillationibus obviam ire, neque finire jus ipsum ulla ullius gratia quicquam differri amplius, opprimi vero nullo modo. Quibus rationibus ego quoque id a te contendo, non ut nobis causam adjudices, ab adversario vero abjudices, quorum neutrum neque

que mea integritas, neque tua æquitas patitur, sed quod æquissimum est, ut post longissimum tempus caussam iudices, ac de ea sententiam feras, ita te rogo, ut studiosius rogare non possem. Quod si a te impetro, erit mihi valde gratum. Vale.

BARTHOLOMÆUS RICCIUS

Jacobo Grifolio S. D.

Letitiam suam ob ejus literas acceptas, quem jamdiu mortuum putabat, effundit: se valere, sed ab animo non admodum sibi belle esse significat, propterea quod ejus discipulus Princeps, patre incio, in Galliam ad Regem belli tantum gloria profectus sit: se malle, eum Venetiis Egnatio succedere, aut Bononiensem conditionem accipere, quam Romam abire.

30. **O** Literas multos mihi annos desideratas, o diem mihi felicissimum, cum a meo Grifolio, de cuius vita ad hunc diem incertus eram, certior factus sum, eum etiam vivere. Rumor enim apud tuos Venetiis emanarat, quem tuum perpetuum silentium comprobat, te diem tuum obiisse. Is ut Ferrariam pervenit, me valde perculit. Continuo in Hetruriam ad Aonium nostrum eas literas scribo, quas puto te vidisse in eis, quas ille postea cum suis in vulgum edidit, qui cum te videre, atque valere rescripsisset, vix tamen adduci poteram, ut crederem. Natura enim comparatum est, ut, quæ avide cupimus, etiamsi ea videmus, falli quodammodo semper dubitemus. Nunc vero omni metu sum liberatus, cum tu id mihi per tuas literas testatus es, quem posthac Deos omnes, ut incolumem servant, rogo, atque oro. Ego, Grifoli [ne mireris, quod potius Grifoli, quam Grifole, te appellem; Latinarum enim familiarum nomina, quarum rationem sequor, ut ad Herculem Atestium Epistola mea probavi, quod tu quoque, si tibi esset integrum, facere deberes, id omnino postulant] ego, inquam, Grifoli, valeo cum reliqua familia, etli Camillus, cum hæc scriberem, ex febricula convalesceret. Utinam ab animo tam mihi belle esset. Princeps enim meus, in quo uno nunc, cum grandior

dior natu factus esset, atque apud patrem majorem auctoritatem haberet, omnem meam, hoc est, quatuordecim annorum spem posueram, jam quartum mensem, inscio patre, immo vero cum ejus summo dolore, qui mori non potuit, in Galliam ad Regem profectus est, neque de ejus reditu spes ulla ostenditur, professionis autem causæ belli tantum gloria fuit. Quæ me res multis de causis angit. Hæc pauca de meo statu. Ut vero sensi Urbis tuæ civiles motus excitatos esse; continuo tu mihi in mentem venisti, actuum studiorum aliam rationem, aliam armorum esse duxi. Quod vero scribis, te Romam cogitare, multæ quidem causæ, eæque honestissimæ esse possunt, quamobrem eo te conseras: ego te Venetiis malletm Egnatio succedere, in quam spem me Manutius noster adducere videtur. De Bononiensi etiam conditione subaudio, etsi de ea tu ne verbum quidem, quæ eo magis mihi probatur, quod prope una esse videremur. Unius enim diei iter distaremus, ut aut ego ad te, aut tu ad me, crebro itare, atque tot annorum interruptam, atque etiam intermortuam consuetudinem, quodam modo resarcire possemus. Sed Dii quod melius. Legretio tuo tuæ literæ ut recte perferantur, per Tabellarium nostrum curabo diligenter. Vale.

BARTHOLOMÆUS RICCIUS

Jacobo Grifolio S. D.

Rationem reddit, cur statim ejus literis non responderit: gratulatur, quod Vincentiæ publicæ scholæ cum summa Civium benevolentia præsit: ejus Orationes, quæ sub prælo sunt, se avide expectare significat: de re Corneliiana ejus prudentiam laudat, seque cum Principe sedulo acturum pollicetur.

31. **N**E tibi simul, cum ad Cornelium nostrum rescripsi, rescriberem, id effecit, quod tuæ literæ, nisi postquam Tabellarius discesserat, mihi sunt redditæ. At in Cornelii fasciculum conjectæ erant. Ita quidem. Sed cum ego rure in Urbem rediissem, uxor, quæ fasciculum dissolverat, & utrasque legerat, Cornelii, ut quæ majoris negotii erant, mihi in manus dat; eas ut per-

percurri, calamum sumo, rescribo, Tabellario non solum præsente, sed etiam urgente. Duas autem post horas Camillus filius tuas mihi attulit. Ecquid hoc est, clamo, literarum? Tum uxor, una erant cum Cornelianis. Quid autem negligentiae? Cur non mihi sunt cum eis redditae? Muliercula se eas oblitam esse excusat: ego vero excrucior. Nunc igitur eas habe, ac quod ad mutuam benevolentiam attinet, ita quidem est, ut dixti, nullo diuturno silentio, nullo aut temporum, aut locorum intervallo de vera amicitia quicquam detrahi posse. Quare nihil est, quod metuamus, ne aut ipse a me, aut ego a te perpetuo amemur. Scribis te secundo Vincentiae publicae scholae summa cum istorum Civium benevolentia praesse. Quare etiam, atque etiam tibi gratulor, sed multo magis, quod viaticum, ut scribis, sequestutis tibi compararis, ut cum ea ingruerit, quam jam adesse, nedum instare, video, in otio satis commode agere possis. Orationes, quas significas, te sub praelis habere, avide expecto. De re vero Cornelianae tu quidem prudenter mecum egisti, qui cum videres, non solum nullam facilitatem habere ad impetrandum, sed ne de ea quidem verbum faciendum esse, eo minus ponderosas literas ad me dedisti. Sed is ex sua humanitate, non autem ex insensibiliorum hostium odio rem hanc existimavit, neque vidit, non solum non permitti, ut Corrigienses agros suos sererent, sed etiam, quos superiori anno sevisset, eorum messem hostili incendio esse consumptam, in quos sequenti anno, si bellum erit, nihilo clementius agetur. Quin Princeps magis nos beneficio, si neget, quam si, quod agimus, concesserit, afficere, se vere excusare poterit, quibus sementem, atque ejus operas hoc modo conservavit. Cum eo tamen sedulo agam. Malo enim, me illi nimis in amicorum rebus studiosum, quam in re militari parum prudentem, videri. Vale.

BARTHOLOMÆUS RICCIUS

Philippo Ferrio S. D.

Orat, ut Philippum Ferrium domum redeuntem, atque illac iter habentem eo vultu accipiat, quo se ipsum faceret, eumque hoc primo ingressu sibi devinciat.

32. **L** Aurentius Frizolius, qui tibi has literas reddidit, mihi multis de causis charissimus est, in primis autem propter communia studia, in quibus nunc ætatem longe superat, mox omnium etiam opinionem superabit, eum unice diligo. Ob autem sanctissimos mores, atque vitæ summam integritatem, valde etiam admiror. Hic isthac, domum rediens, iter habet, ut eum eo vultu accipias, quo me ipsum faceres, te rogo; si vero per ejus modestiam obtinere posses, ut eo die tecum esse vellet, mihi gratissimum esset, tibi vero minime insuave. Ego, Ferri, adolescentem optimum novum amicum tibi conciliavi; tu eum, quæ tua summa est humanitas, ita hoc tuo primo ingressu tibi devinxeris, ut nulla postea oblivio vestram amicitiam sit interruptura. Vale.

BARTHOLOMÆUS RICCIUS

Philippo Ferrio S. D.

Rogat, ut Aurelii Tibertii filios domi erudiendos accipiat, illique ex suis verbis operam suam offerat.

33. **A** Urelius Tibertius mihi rescripsit, se tibi nunc quam esse defuturum, idque ego tibi affirmo. Cave enim putes, te humaniorem, aut magis officiosum virum unquam vidisse. Quin is etiam me rogat, ut tecum ita agam, ut duos ejus filios domi erudiendos accipere velis, non quin apud se, ut cæteri faciunt, ad te ventitando, ii quoque doceri possint; sed est, quod amplius in iis quærat; id autem est ingenua educatio, mores optimi, quæ domi suæ ob multorum generum homines, qui eam frequentant, qui de more pueria in omnibus

bus blandiuntur, in pluribus vero obsequuntur, habere non potest. Hos igitur, ut accipias, ne expecta, ut te roget. Operam tuam illi ex meis verbis offeres. Ad e-
jus enim erga te benevolentiam hanc quoque necessitudi-
nem adjunxeris, tibi que illum multo arctius devinxeris,
quorum etiam studio, si quid diligentiae tuae accedere
poterit, ut mea causa accedat, te etiam atque etiam
rogo. Vale.

BARTHOLOMÆUS RICCIUS

Philippo Ferrio S. D.

*Circumforaneum quemdam rabulam ita vivis coloribus, &
graphice describit, ut eum videre videaris, & ab eo se
domi, forisque obsessum significat.*

34. **I**ta bene grati homines, ut iste Virgiliaster, de
se optime meritis gratiam referunt. Venit ad me
inops, miser, ut quem hostis nudum reliquisset, sine
toga, quæ vero reliqua vestis, scissa, nedum attrita,
soleis, ut nosti, absque solea, pileo laneo, eoque, quam
vaporarii purgatoris, multo sordidiori, ore vero macilen-
to, ac quasi fame enectus, quid multis? centum,
qui ostiatim quærunt, melius vestitos, atque multo habi-
tiores vidisti. Continuo Græcas se literas optime callere
jactat, Latinas qui minus, quas suas appellabat? qui-
bus satis tamen eruditus mihi inter loquendum est visus.
Is conditionem quærît, puta tu, cui ego vel verum Vir-
gilium talem proposuissem filijs suis magistrum accipien-
dum. Humane tamen sum commotus. De meo nescio
quid pusilli primum illi do, atque ita, ut melius pos-
sum, eum a me dimitto. Postridie me domo egreden-
tem adoritur. Causas quasdam honestas mihi fingo,
quamobrem cum eo commode esse non possim. Vix ab
eo me avello. Vespero ad ostium pultat. Jubeo respon-
deri, me foris cœnare. Sed quid verbis opus est? Hic
jam me domi, forisque obsidebat, cui molestiæ hoc con-
silijs cepi. A meo Aloysio duos aureos nummos erogo,
quos illi ejus nomine postea dono do, illum amice ad-
monens, ne bonis literis hanc injuriam faciat, ut qui
iis ad istam mendicitatem abutatur. Jam natu grandio-
rem

rem eum esse ostendo ; ut senectuti consulat , admoneo ; ne in aliquo publico mendicorum hospitio commoriatur , obijcio ; quæ , ut a me dicta erant , ita amice accepisse videbatur . Discedens autem , ut se tibi per literas commendarem , instat : vicit : scribo . Sed is eas literas , puto , aperuit , quando eas tibi nullas reddidisse , sed quædam tantum memoriter ex illis recitasse , scribis . In iis fortasse aliquid esse potuit , quo mihi , tibi que ab eo prudentius caverem . Sed istum circumforaneum rabulam omittamus . Tibertium nostrum Virum optimum , mihi que amicissimum tam graviter pedibus laborare , valde doleo , sed quando *morbis non est* , ut ille , *ad mortem* , æquo animo ferendus est . Illi meo nomine salutem , quam possum , dixeris , quam medici reliquam asserre possint . [et si id morbi ejus generis est , qui medicos irridere solet] ab eis ea petenda est . Vale .

BARTHOLOMÆUS RICCIUS

Aurelio Tibertio S. D.

Certiores facit , se de filiis ad Philippum Ferrium scripisse ; additque cujusdam vocis in suo Epitaphio posita significationem .

35. **D**E Philippo Ferrio te valde amo . Ad eum scripti de filiis tuis . Non dubito , quin tibi libenter obsequatur , qui hoc quoque modo suis rationibus multo melius sit consulturus . De voce illa , quæ in amici nostri Epitaphio erat , miror , quid isti dubitarint , quæ planius poni non potuit ; ejus tamen sensus est : quo Consiliario illa utebatur , ac de cujus sententia omnia constituerebat . Sed multo graviora sunt consecuta , quæ ad te non scribo , ne majorem dolorem tibi commoveam , quando scribis , te superioribus etiam graviter affectum esse . Vale .

BARTHOLOMÆUS RICCIUS

Bartholomæo Abiofio S. D.

Bartholomæum Portium suum perveterem amicum commendat, ut ei præsto sit, donec Doctoratus insignia assequatur, deinde in medendo etiam omnia tribuat.

36. **B**artholomæus Portius meus pervetus amicus est, quique totum illud tempus, quo Ferrariæ Philosophiæ operam dedit, tam familiariter mea domo usus est, quam ego tua, cum Venetiis agerem, uti solebam. Hoc cum dixi, puto etiam dixisse, eum esse Virum optimis moribus, atque ea integritate, quæ tibi, ac nobis probari solet, æque præditum. Sed his accedit Latinarum, ac Græcarum literarum optima institutio. Hic testimonium suæ doctrinæ, quod Doctoratum vulgo appellant, a vestro Collegio quærit, quo merito dato, isthic etiam, ubi artem suam postea exerceat, permanfurus est. Hunc recta ad te mitto; primum ut tanto amico te adaugeam; deinde ut ei meo nomine, & in illo eâ dignitate condecorando, & in medendo etiam omnia tribuas; sed in posteriori te etiam, atque etiam rogo; videlicet ut eos ægrotos, quibus tu suppetere non possis, illi curandos attribuas, atque ita optimum adolescentem, optima spe, istis initiis, quasi tuo spiritu foveas, atque in viam dirigas. Pro quo ego isto tuo tanto officio nihil tibi a me ipso polliceor. Non enim nostra amicitia ex eo amicitiarum genere est, quæ ex ullo suo officio quicquam remunerationis expectet. Sed quantum ad Portium, fidem meam tibi obstringo, te tam officioso Viro, quam quod Portio præstiteris, officium nullum præstitisse, re ipsa quotidie esse comprobaturum. Vale.

BARTHOLOMÆUS RICCIUS

Jacobo Bonio S. D.

Gratulatur de amore Cardinalis erga ipsum, idque gratulatur non tam ipsi, quam ejus parenti optimo seni, qui in eo omnium fortunarum suarum columnen constituit.

37. **C**Um Pater tuus Madium, Pignam, meque [tres enim, ut fere semper sumus, una offenderat] tuo nomine salvere jussisset, ei omnes, ut idem tibi nostro omnium nomine adscriberet, rogavimus. Ego vero id nimis exile esse amicitiae nostrae existimans, has ad te literas exaravi, quibus etiam post salutem, tibi, quod facio, Cardinalis tui amorem erga te valde gratularer. Refert enim pater ex tuis literis, te apud eum Principem operam tuam ponere, qui omnium gratissimus est, quique tibi cum praesenti, tum etiam multo majori sperata utilitate benignitatem suam quotidie declarat. Sed hoc non tam tibi, quam parenti tuo optimo seni, mihiqve veteri amico, gratulor, quem summa voluptate, cum hæc narrabat, liquefieri videbam, quique in te omnium fortunarum suarum columnen esse constituit, atque a quo non solum res familiaris amplior fiat cum ad sororem honesto Viro collocandam, tum etiam ad reliquam familiam non parum juvandam, sed etiam ad summam aliquam dignitatem extollendam. Quem diem si ego [id enim ex annis meis dicendum est] videro, me tum aliud congratulationis genus ex summo artificio deprompturum, polliceor. Vale.

BARTHOLOMÆUS RICCIUS

Jacobus Bonio S. D.

Rogat, ut epistolam ad Riccium Cardinalem a se scriptam ipse manu sua reddat, & excusationem afferat, quamobrem tam sero sit missa: hortatur, ut eam letitiam patri jampridem ingravescenti afferat, ut ipsum quotidie proficere videat, Deumque orat, ut ei omnia feliciter absolvat.

38. **T**uas literas accepi, in quibus omnia gratissima acciderunt; de Riccio autem Cardinali multo etiam gratius accidit. Scripseram enim ad eum, cum Cardinalis factus est, epistolam, qua illi tantam Dignitatem maxime gratulabar, sed eam non misi, quoniam omnes postea, de quibus ego quæsissem, nullum Riccium Cardinalem esse affirmabant. Quare eam gratulationem, quæ non omnium mearum postrema videtur, frustra fecisse, quæque, ut interiret, necesse erat, graviter, atque iniquo animo perferebam. Sed cum tu, ut res ipsa est, & nos optabamus esse, nobis significasti, eam mihi, meque una cum illa illi restituiſti. Hæc ea est, quam tuæ adjunctam esse vides, epistola. Per mihi, per, inquam, gratum feceris, si ipsi eam tua manu reddideris, atque quamobrem tam sero sit missa, eam excusationem afferes, quam ipse de me audisti. Ad quod officium tuum, quicquid aliud opus erit, id omne tuæ relinquo prudentiæ. Quod vero ad te attinet, perge, ut cœpisti, sustine, patere, vince. Nihil enim magnum sine magno sit labore. Etiam arbores, & sementes dura hyemis perferunt frigora, ut ad fructus suos per æstatem postea perveniant. Pater jampridem ingravescent, per quot, ac quanta pericula vitam traxerit, nosti, qui una cum eo partem tuam etiam non parvam subiisti. Nunc gratias Diis agit immortales, qui se in hunc diem servarunt, ut te in ista dignitatis spe non parva positum videat, a quo uno sperat nomen familiæ suæ in aliud nomen, quam ipse optimis studiis fecit, omnino extollendum. Tu vero, ut facis, a te ipso, hoc est, a bono, ne disceſſeris. Diu cætera, qui se pie, ac vere

colentes non deferunt, tibi feliciter absolvent, Quod vero ego Transpadanus Romana lingua ad te scribam, tu vero Romæ Italice mihi rescribas, id tuis occupationibus facile condono. Quid enim aliter faciam, qui, quam in ea quoque scribendi ratione valeas omnium optime, sciam? De Cornelio meo, ut commodum erit. Neque enim res te ulla cogit, ut officium hoc festines. Madio, Brasaulio, Pignæ, ut iussisti, tuo nomine salutem dixi. Hanc eandem omnes, tibi ut adscriberem, rogant. Has, si me amas, Mathiolo, qui iis nuntiis præest, qui per dispositos equos quaque versus mittuntur, recte reddendas curabis. Vale. Cal. Aprilis MDLIV.

BARTHOLOMÆUS RICCIUS

Francisco Sisenio S. D.

Facilius esse ostendit, pueros ore docere, quam libris, majoremque eos ex hac docendi ratione fructum capere, quam ex alia qualibet, miro plane modo persuadere conatur.

39. **Q**Uam varia, ac multiplex sit, Siseni, puero-
rum edocendorum ars, & facultas, facile inde
cognosci potest, quod fere quisque magister suam habet,
quam propriam sequatur, docendi regulam. Hæc mihi,
alia alii magis probatur. Quare etiam sit, ut in ea de-
ligenda maximo sit opus judicio. Nam quemadmodum
non omnis pileus omni capiti facile accommodatur; sic
non omnis instituendi via, & præceptio pueris con-
veniet omnibus. Magistri ea cura est, ut qua via
quisque discipulus ducatur, facilius prius is pernorit,
eamque postea studiosius in iis insistat instituendis, ut
nos ab initio in nostro Principe fecimus, quem cum in-
genio valere, nec dum literas una simul ad vocem com-
ponere didicisse viderem, ne ea legendi disciplina mihi
annum auferret, novam rationem inivi, ut prima di-
cendi rudimenta ei ad digitorum articulos commonstra-
rem, ac optime edocerem, ne, si ea, quæ erant illi
memoriæ mandanda, multa vidisset in libro perscripta,
desperaret, atque animo concideret, librumque iratus
abjiceret. Liber ego illi fui, cui quotidie pro puerili cap-
tu aliquid suppetebam, ut nunc etiam sit in dicendi

ratione, quam cum superioribus diebus Principi nostro explicarem, nescio quid ei visum est obijcere, cui, quamquam a nobis contra, cum tu quoque adesses, satis tum abunde est responsum, placuit tamen tecum hoc quoque modo rationem hanc nostram aut firmioribus argumentis tueri, aut etiam iisdem, sed alio modo, pertractare. Naturam, Siseni, omnibus rebus ducem sequi semper optime factum esse, boni omnes existimarunt. Cum igitur ista ipsa ex auditu magis, quam scriptione, infantem puerum continuo loqui edoceat, recte is quoque Magister facere existimabitur, qui in sermone magis, quam in scriptione puerum suum ad Latinam dictionem exercebit. Neque nunc, ut omnia, quæ illi usu veniant, Latine a se proferat, intelligo. Nam ad hanc loquendi rationem multo major est opus Latini sermonis usus, & verborum copia, quam in puero esse possit, sed in eo, quod illi tantum erit a Magistro sua lingua propositum, atque dictatum ad Latine postea faciendum. Nam si scriptam habeat puer Orationem, quam Latinam suo stylo conscribat, aut ea paulo angustior sit, aut multis verbis conscripta, oportet. Si brevior, parum proficitur; si plena agatur pagina, periculum est, ne puer animo prius cadat, quam dictatum legendo percurrerit, ac, quicquid agat postea, laboriose atque difficulter agat, verseturque in re, cuius primus aspectus lassitudinem ei afferat. Est enim Princeps [ut de meo nunc dicam] puer, qui quæ ab hisce studiis maxime abhorret. At tempus ei datur ad cogitandum accommodatius. Certe ad ignaviam non parvam excitandam. Charta, calamo, atramento, ac cæteris ejus generis opus est ad scriptiorem. Ea dum parantur, dies abiit. At præsto adsint. Ne sit calamus obtrusus, ne charta absorbeat, ne parum atramentum fluat, neve liquidius sit, æque providendum est. Verum antequam hæc in manum sumat, antequam incipiat, quæ distorsiones? qui hiatus? quæ cætera ad ignaviam? Tandem incipit, vel inceptat potius. Scriptio lenta est: lituræ officium: delet: reponit: mutat. Adde, quod verbum nullum a se, omnia a Magistro efflagitat. Ecquid hoc? illud autem? non memini verbum. Etsi omnia sint planissima, socorde tamen, atque fastidiose agitur. Ecce autem tibi aut prius imprudenter in cubitum scribentis offendit; aut etiam falso accusatur. Istæ rixæ vel totum diem potest aufer-

auferre. Mensa atramento conspergitur; hunc illum, illum alium accusare; neminem non præfractæ causam suam ad ravim agere videres. In altera vero exercendi ratione, quæ ex ore, ut ita dicam, præcipitur, nihil est, quod tale quicquam verearis. Nulla instrumenti causa impeditur puer. Charta, calamus, atramentum, & reliqua id genus in lingua sunt posita; nullum ex omni parte impedimentum. Præsto adest Magister; instat; urget; hortatur; fervet opus: non denique [quod maximum est] quam longum id futurum sit, usquam apparet. Nam primum dictatum paucioribus verbis comprehenditur, reliquum, quasi ex perpetuo fonte ad pueri satietatem clanculum hauritur. Accedit ad hæc quæ potior ratio est, quod ad paratius Latine loquendum, quo uno maxime Principi opus esse apud alienas gentes facile intelligis, aut hæc una est expeditior via, aut nulla omnino alia. Id autem quemadmodum ego præstem, te rogo, ut semel adesse, ac videre velis. Ea enim instituendi ratio talis est, ut vel ad unum sensum puero nostro Italice dictatum, quod is postea nobis Latine reddat, tota facillime percipiatur. Hæc nunc ea ratio est, non quin, cum plusculum & doctrinæ, & usus Principi accesserit meo, ad hanc postea quoque scribendi rationem, sim eum traducturus, in qua una ita versabimur, ut qui ad imitandam veram rationem non minimum cognoverit, ac in eo operæ multum & annorum, & studii, non fortasse inepte posuerit. Sed de illo aliorum erit iudicium. Nunc, quod instat. Jam aliquot etiam menses hoc modo meus Princeps mihi ad dicendum exercendus est. Cum tempus aderit accommodatius, nos eo non magis, quam hoc præsentī facimus, abutemur. Vale.

BARTHOLOMÆUS RICCIUS

Marco Gandulfo S. D.

Se Bononiam venturum significat, ut Epistolas suas per Antonium Manutium imprimat. Orat, ut ibidem cubiculum sibi commodum provideat, omniaque ad commorandum necessaria, quæ singula mirifice describit.

40. **B** Ononiz totum Septembrem esse cogito, quo tempore ab Antonio Manutio meæ Epistolæ imprimam-

mantur. Quare tu mihi de cubiculo cum foro, tum impressoribus commodo providebis, apud mulierem scilicet Bononiensem, hoc est, munditiis, atque humanitate præditam. Nolo fordidam, incultam, rusticam, atque insuavem; neque etiam anum, tussi graviter laborantem, atque ostrea in omnibus ædium angulis evomentem; sed quæ media ætate sit, forma integra, atque liberali, vestitu mundo, læto, atque hilari, vultu, quæ advenientem hospitem accipiat, quæque in primis cum ancillis, ac pueris ne de quaque re levissima contumeliose contendat. Nihil enim mihi odiosius offerri potest, quam cum domi rixari sentio. Postremo, quæ ipsa non multum garriat, atque odiosa, sed pauca, eaque lata omnia atque jucunda loquatur. Quod vero ad mensam, eam volo mantiliis, quadris, cyathis, & cæteris ejus instrumentis pereleganter apparatus. Lecti vero fulcra honorifica, quæ putidos, atque infestissimos cimices non gignant; eorum deinde tentoria pernitida. Lectum autem non tam molli lana, qua magis, quam pluma, utor, bene completum, perquam etiam candidis lintheis stratum, quæque sæpius commutentur, neque id ex aliis, ut sit, lectis, sed quæ ex capsâ recenter purgata depromantur. Pulvinaria plumæ, non situm olentia. Nam quo ego ea vestiam, domo mecum afferam. Cubiculum vero magis latum, quam angustum, placet. Id autem an humi, an ad primum tabulatum, non admodum laboro. Ad secundum, multo etiam minus ad tertium, [ut ad Annam hospitam esse audio] annis meis, atque genibus importunum est. Id autem in primis curabis, ut fumus, si ignis opus erit, per vaporarium commodius exeat, ne aliena culpa oculi mihi doleant. Hæc vero cum aut sursum, aut deorsum, aut quoquo deflexero, ne in aliquam immunditiam offendant, cupio; quarum sæpius, me absente, cum pavimentum, tum etiam parietes erunt reverrendi. De fenestris nihil dico, quæ sunt cubiculorum oculi, ea ut vitrea, ut luminosa, neque pulvere, atque araneis opæta sint, scis legenti, atque scribenti oportere. Locum postremo, quo ad naturæ ex inferioribus partibus operam dandam utimur, neque in cubiculo, neque cum cubiculo conjunctum ferre possum. Commodius atque nobilius erit, si vas sit fictile, quod, data illa opera,

con-

continuo in fornices inferiores evacuetur. Hæc sunt, quæ mihi in hac mea menstrua hospitalitate per te parari cupio; cætera ego mihi ex meo ære, ut magis libebit, comparabo. Vale. Ferrariæ VI. Cal. Aug. MDLVII.

BARTHOLOMÆUS RICCIUS

Marco Cornelio Spalatrensi Archiepiscopo Designato.
S. D.

Rationem reddit, cur tacite a nobilissimo comitatu se surripuerit, rogatque, ut honestissimam suam causam cum Carnificcio, ac Perio, ut æquum est, accipiat.

41. **V** Ideo, te valde miratum esse, meque tecum, atque adeo cum doctissimo atque humanissimo tuo Carnificcio fortasse aliquid subaccussasse, hospitem scilicet elegantissimum, qui me tibi, atque tam nobili comitatu tam tacite surripuerim, cujus mei facti causam etsi tibi a familiari tuo, qui me ad ultimas scalas comitatus est, expositam esse certo scio, visus sum tamen hoc modo per literas recte facere, si eandem ipse quoque non reticuissem. Cum ego te, Marce, ex eo nuntio, quem acceperas de Triulcii Pontificis Legati Cardinalatu, cum Carnificcio, ac Perio omni lætitia gestientem viderem, atque a cetero comitatu, atque etiam a Jacheto omnium optimo musico, cum etiam dum suavius Harpicordo sonaret, cum iis parum secessisse, quasi qui inter vos secreto colloqueremini, mihiq; negotium instaret, nolui tantam vestram lætitiā ne verbo quidem conturbare. Nam, cum ego interea complura spatia in longa porticu cum illo tuo confecissem, neque ipse adhuc Senatum tuum dimitteres, de discedendo ita, ut feci, cum eo consilium cepi, paulo post tamen, aut saltem postridie ad te rediturus, quo solo solus familiaris perfruerer. Sed neque eo die per meas occupationes mihi ad te redire licuit; postridie vero cum iis liber essem, comites de reditu in Patriam inter se constituerant; quos cum ego neque sine me discedere, neque illi diem hunc mihi concedere possent, factum est, ut ego vobis omnibus parum urbanus videri potuerim. Et profecto, nisi hoc modo erratum meum per vestram hu-

humanitatem mihi purgare liceret, hoc gravius ferre non possem: quam meam honestissimam causam ut Carnificius, ac Perius, ut æquum est, accipiant, ambos etiam, atque etiam rogo. Nam de te nihil admodum vereor, ut quicquam de mea ingenua, quam tot annos unus omnium optime nosti, natura minus belle suspiceris; sed quanto magis tibi confido, tanto plus de præstantissimis illis Viris, quibusque nostra familiaritas minus nota est, cum hoc meum nimis familiare factum viderint, ne me in nimia familiaritate peccasse valde accusent, timere cogor, quibus etiam post hanc excusationem meo nomine plurimam salutem dixeris. Vale.

BARTHOLOMÆUS RICCIUS

Marco Cornelio S. D.

Dolet, se illi in petitione sua apud Principem satisfacere nequivisse, additque rationem allatam a Principe, cui negavit, se, quod petebatur, posse concedere, negationemque ipsi profuturam probasse.

42. **R** Enatae tuas literas reddidi. Ea, quæ ejus est humanitas, se cum Principe filio omnem operam esse daturam, ut tibi obsequeretur, mihi recepit. Ego vero ad Principem scripsi, rem istam diligentissime commendans. Is mihi rescribit, hoc non esse in jure belli, ut obsessis concedatur, ut quicquam aliunde in Oppidum comportetur; multo vero minus, ut ex suo agro percipiant; quin hoc primum, atque solum attenditur, ut, quicquid possunt, commeatus illis auferant, atque a vicinorum etiam eos intercludant. Si tamen id mihi pusilli concedat, magnum periculum esse, ne multo etiam pluribus idem concedere cogatur. Quare ne alius nos sibi objicere possit, id si sua voluntate facturus sit, negat posse concedere; qui id nostro quoque beneficio se negare probat, qui nulla illa sua permissione amico nostro sementem hanc, atque operarum sumptus conservat. Nam, si bellum erit, eadem belli in futurum æquum futura est ratio, quæ præsentis etiam fuit anni; ut, qui fortior erit, is metat, atque legat. Vides quibus rationibus, non solum armis, oppugnamur,
at-

atque etiam jure vincamur. Doleo mirum in modum, me tibi in hac re satisfacere nequivisse; nisi tamen id est satisfacere, ea, quæ plane videas non esse impetrandæ, ea tamen pro amico perstudiose rogare. Vale.

BARTHOLOMÆUS RICCIUS

Vincentio & Joanni Marco Fantoniis
Fratribus S. P. D.

De patris obitu dolet omnia reputanda proponens, quæ maximo solatio eis esse possint, hortaturque, ut ipsum in omnes benigne agendo imitari pergant.

43. **Q**Uod subito meo isthinc discessu coram facere nequivi, id nunc absens per literas exequar. De obitu patris vestri valde doleo, tum vestra primum causa, qui optimum parentem amisistis, tum etiam non parva mea, cui in eo benevolentissimus animus decessit. Vix simplex consolabilis dolor, duplex multo etiam minus. Vobis enim pater charissimus, mihi fidelissimus, ac multorum annorum amicus, est defensus. Verum si tamen rectius consideremus, atque dolorem nostrum in rationis gyrum revocemus, multo minus ejus obitum nobis dolendum esse videbimus. Hic enim rem ex perexiguis initiis suo studio, sua industria, suo labore, atque diligentia quam amplissimam effecit; filias, quas pudicissimas habuit, vos filios, quos maxime ingenuos procreavit, atque aluit, cum honestissime collocatos, tum etiam multis, ac fidelissimis amicitiiis devinctos reliquit, ex quibus etiam neptes, atque nepotes vidit. Id accedit, quod in tota vita, quam ad octuagesimum quintum annum feliciter produxit, nihil cuiquam injuriæ intulit; in multos vero multa benigne, ac liberaliter contulit. Cum vero in ea Provincia, atque adeo in eo Oppido vixisset, quod perpetuis, ac maximis odiis Civilibus laboraret, ita se semper gessit, ut æque utrique parti acceptissimus existeret. Unum ei reliquum ad omnem humanæ conditionis felicitatem deerat, ut, quemadmodum feliciter vixerat, feliciter etiam decederet, id quod felicius facere non potuit. Nam cum sana mente, corporis viribus satis integris uteretur, qui

et

etiam post multos dies, ex quo febre assidua laborare cœpit, semper cum suis pedibus lectum commutaret, tum etiam apte, atque ad rem loqueretur, cum postremo naturæ ex inferioribus partibus operam dedisset, atque inde se in lectum reciperet, tum spiritus eum defecit, atque ita felicissime cadens sine ullo doloris sensu moritur. Quod genus mortis si mihi Deus concedat, nihil amplius ab eo exoptem. Quibus rebus si quid etiam de animo, qui homini immortalis datus est, cogitemus, hac quoque ratione nisi in æternam gloriam eum commigrasse putemus, aut imprudentes, aut etiam illi iniqui sumus. Quæ omnia maximo solatio nobis esse possunt. Nam si nobis tanto patre, mihi vero tanto amico carendum est, his vobis cum summis commodis, mihi vero cum multo ejus beatiori statu carendum est. Quod vero ad vos attinet, illud est, ut parenti, quod jampridem instituistis, similes esse, huncque ipsum in omnes benigne agendo, pergatis imitari. Valete.

BARTHOLOMÆUS RICCIUS

Antonio Angelio S. D.

Sibi potius letandum, quam mœrendum, de Ravanii uxoris suæ fratris discessu significat, non leviter tamen angere, quod filiolos pæne infantes reliquerit. Orat, ut rescribat, quantum eorum natu maximus in studiis humanioribus profecerit, ut vel ad se duci jubeat in primis Juris Civilis rudimentis instituendum, vel adhuc Latini sermonis ignarum ipse separatim ab aliis paulo attentiori studio informet, ut citius ad se mittere possit.

44. **H**ieronymum Ravanium, uxoris meæ fratrem, diem suum obiisse audio, cujus interitum atque, ut debui, moleste tuli, sed, quando cum eo, ut qui integerrime atque Christiane vixerit, optime actum esse pro certo ausim affirmare, magis ejus discessum lætitia, quam mœrore prosequi debeo. Id vero me non leviter angit, quod filiolos, quos impuberes, ac pæne etiam infantes reliquit, quo is adolescens pervenerat, perducere nequiverit. Quæ cura etsi eorum patruis relicta esse videtur, meam ego tamen, non tantum pro ea affi-

affinitate, quæ mihi cum illo intercedebat, sed pro summa nostra benevolentia, aliquam esse volo. Quare mihi resoribas velim, quantum eorum natu maximus in humanioribus studiis profecerit. Nam, si ejus sermonis Latini cognitionis, esset, quæ ad prima Juris Civilis rudimenta traduci posset, continuo eum ad me duci juberem, mecumque haberem, quamdiu satis illi esset, ad totam illam in causis defendendis rationem percipiendam; sin aliquid etiam adhuc ei desideratur, te rogo per eam amicitiam, quæ tibi cum ejus parente intercedebat, perque tuos liberos, si quid eis [quod omen Deus avertat] tale accidisset, ut paulo diligentiorum illi operam des, ac separatim ab aliis aliquid paulo attentioris studii impertias, quo eum citius ad me mittas, qui postea in parentis locum recurrens, cæteris fratribus pro patre, matri vero, ac reliquæ familiæ voluptati esse possit. Quod si feceris, mihi omnium gratissimum feceris, quique tui istius officii perpetuo memiherim. Vale!

BARTHOLOMÆUS RICCIUS

Julio Magnanio universæ Franciscanæ Familiæ
Generali S. D.

De morte Philippi Braschii Viri summi, doctissimi, sibi que amicissimi certiore facit, & Epitaphium lapidi inscribendum mittit, malevolorum nonnulla subjiciens, hunc illi supremum honorem invidentium.

45. **P**hilippus Braschius Faventinus unus ex tua Franciscana Familia, Vir summa, ut nosti, doctrina, majori etiam Sacerdos integritate, doctissimorum vero Virorum amicitiiis, in quibus Vincentius Madius non ultimus erat, florentissimus, superioribus diebus decessit. Hunc ego vel post Madium, vel quantum Madius, amavi; certe ita, ut etiam mortuum non parum diligam, ejusque memoriam non solum amice præstem, simque perpetuo præstaturus, verum etiam, quantum in me est, eam cæteris quoque repræsentare studeam, neque totum interiisse sinam. Id autem de cæterorum more facere cogito, si in pariete e regione ejus tumuli lapidem, in quo incisum sit ejus Epitaphium, designandum

dum curabo. Ad quam rem duo a custode tuo tantum postulo ; alterum , lapidem ex iis , quos multos frustra habet ; alterum , locum in Templo vacuum , cætera mihi ex meo ære comparaturus. Tum homo iste , ministro [ut vos dicitis] qui brevi expectabatur , rem remittit. Paucos post dies is venit. Hunc adeo , atque hoc idem ab eo peto , qui non solum benigne omnia mihi concedit , sed gratias etiam agit , quod communi amico tantam memoriam procurem ; quin etiam rogat , ut hanc eandem Epitaphii operam quatuor ejus generis ex vestris Sacerdotibus , qui Faventiæ superioribus annis decessere , dare ne negem. Recipio , me illi omnia libenter facturum. Tum ille mihi ut custos lapidem attribuat , de loco etiam nihil impediatur , jubet , atque ita discessit. Redeo postridie , ut lapidem mihi deligam. Tum custos negat ullum lapidem adesse ; qui vero adfuit , quod inficiari non potest , alienos esse ait. Ita etiam locum alii jampridem destinatum objicit. Quod cum audio , id verum esse suspicari cœpi , quod mihi secreto dictum erat ; quosdam ex iis sua improbitate huic meo Christiano officio maxime esse adversaturos ; immo vero , si obtinuissem , nullum dubium esse , quin etiam inscriptum lapidem aut scalpello deleverent , aut saltem aliquo modo turpiter fœdarent. Qui malevoli si hoc agunt , ut hunc illi supremum honorem invideant , moriantur & ipsi quantum cito velint , polliceor in meo etiam lapide pro eorum virtute in hoc genere laudis nihil eis esse defuturum. Quæ de re tota mihi visus sum recte facere , si te certiores facerem , teque id , quod etiam atque etiam facio , rogarem , ut custodi tuo , quid agendum esset , scriberes. Nam si tua voluntas huic meo honestissimo desiderio accesserit , ego amico meo postea non deero ; sin contra [quod tamen adduci non possum , ut credam] hac mihi epistola , quæ illi apud omnes gentes Epitaphii loco erit , fatifecero , quin etiam ipsum Epitaphium , cujus tibi exemplum mitto , ipsi epistolæ adscribam. Vale.

D. O. M.

*Philippo Braschio Franciscano Sacerdoti probatissimo cum
Philosopho haud imperitissimo, tum suapte ingenio Viro
integerrimo, primum Christiano Concionatori, tum
publico Metaphysicæ in Ferrariensi Gynnasio
Interpreti, vitæ, moribus, institutis
optime prædito.*

V. Ann. XLI. mor. III. Non. Jan. MDLVII.

Bartholomæus Riccius & amice fecit, & posuit.

BARTHOLOMÆUS RICCIUS

Hieronymo Palanterio S. D.

*Consolatur de Braschii morte, nihil esse affirmans, cur tan-
topere doleat, ne amico æternam gloriam invidere videat-
tur. Hortatur, ut ad se, & sua studia tandem redeat,
ejusque optimos mores, atque vitæ Sanctitatem in se ex-
primat.*

46. **C**Ur tantum, Palanteri, infano isti dolori indul-
ges? cur te tantum afflicta? cur tamdiu in isto
mœrore, ac luctu contabescis? Braschius tuus, immo ve-
ro noster, non, ut reris, e vita decessit, sed in vitam,
unde prius venerat, a nobis discessit, ubi etiam nos læ-
tus ad nostrum diem expectat. Nosti quam integre vi-
xerit, vidisti quam quiete, quam in Christo animam
egerit. Ecquid igitur isto tuo perpetuo luctu tanto a-
mico æternam gloriam tantam invidere videris? Redi
tandem ad te, atque ad tua studia, atque ita in ea in-
cumbas, ut eum in iis cæteris aliquando referas; in e-
jus vero vivendi ratione ita insistas, ut ejus optimos
mores, atque vitæ Sanctitatem in te exprimas. Me cer-
te eum, qui in te amando nulli concedat, habebis,
quin etiam, quoniam ei charissimus fuisti, quem ego
unice dilexi, mihi quoque nihilominus acceptus eris,
quem etiam possum in ejus locum facile reponere. Vale

BAR-

